

Mūlapaṇṇāsa-aṭṭhakathā : 1 - 2320

**222. Evaṃ** (2.0001) **me sutanti** kakacūpamasuttaṃ. Tattha **moḷiyaphaggunoti** **moḷiti** cūḷā vuccati. Yathāha-

“Chetvāna moḷiṃ varagandhavāsitaṃ,  
vehāyasaṃ ukkhipi sakyapuṅgavo;  
ratanacaṅkoṭavarena vāsavo,  
sahassanetto sirasā paṭiggahī”ti.

Sā tassa gihikāle mahatī ahosi, tenassa **moḷiyaphaggunoti** saṅkhā udapādi. Pabbajitampi naṃ teneva nāmena sañjānanti. **Ativelanti** velaṃ atikkamivā. Tattha kālavelā, sīmavelā, sīlavelāti tividhā velā. “Tāyaṃ velāyaṃ imaṃ udānaṃ udānesī”ti (dhammapade vaggānamuddānaṃ, gāthānamuddānaṃ; mahāva. 1-3) ayaṃ kālavelā nāma. “Ṭhitadhammo velaṃ nātivattatī”ti (cūḷava. 384; udā. 45; a. ni. 8.19) ayaṃ sīmavelā nāma. “Velā-anatikkamo setughāto”ti (dha. sa. 299-301) ca, “velā cesā avitikkamanaṭṭhenā”ti ca, ayaṃ sīlavelā nāma. Taṃ tividhampi so atikkamiyeva. Bhikkhuniyo hi ovadituṃ kālo nāma atthi, so atthaṅgatepi sūriye (2.0002) ovadanto taṃ kālavelampi atikkami. Bhikkhunīnaṃ ovāde pamāṇaṃ nāma atthi sīmā mariyādā. So uttarichappañcavācāhi ovadanto taṃ sīmavelampi atikkami. Kathento pana davasahagataṃ katvā duṭṭhullāpattipahonakaṃ katheti, evaṃ sīlavelampi atikkami.

**Saṃsaṭṭhoti** missībhūto samānasukhadukkho hutvā. **Sammukhāti** purato. **Avanṇaṃ bhāsatīti** tā pana pacanakoṭṭanādīni karontiyo disvā natthi imāsaṃ anāpatti nāma, imā bhikkhuniyo anācārā dubbacā pagabbhāti aguṇaṃ katheti. **Adhikaraṇampi karotīti** imesaṃ bhikkhūnaṃ imā bhikkhuniyo diṭṭhakālato paṭṭhāya akkhīni dayhanti, imasmiṃ vihāre pupphapūjā vā āsanadhovanaparibhaṇḍakaraṇādīni vā imāsaṃ vasena vattanti. Kuladhītarō etā lajjiniyo, tumhe imā idaṅcīdaṅca vadatha, ayaṃ nāma tumhākaṃ āpatti hoti, vinayadharānaṃ santikaṃ āgantvā vinicchayaṃ me dethāti adhikaraṇaṃ ākaḍḍhati.

**Moḷiyaphaggunassa avanṇaṃ bhāsatīti** natthi imassa bhikkhuno anāpatti nāma. Niccakālaṃ imassa pariveṇadvāraṃ asuññaṃ bhikkhunīhīti aguṇaṃ katheti. **Adhikaraṇampi karontīti** imesaṃ bhikkhūnaṃ moḷiyaphaggunattherassa diṭṭhakālato paṭṭhāya akkhīni dayhanti. Imasmiṃ vihāre aññesaṃ vasanaṭṭhānaṃ oloketumpi na sakkā. Vihāraṃ āgatabhikkhuniyo ovādaṃ vā paṭisanthāraṃ vā uddesapadaṃ vā therameva nissāya labhanti, kulaputtako lajjī kukkuccako, evarūpaṃ nāma tumhe idaṅcīdaṅca vadatha, etha vinayadharānaṃ santike vinicchayaṃ dethāti adhikaraṇaṃ ākaḍḍhanti.

**So bhikkhu bhagavantaṃ etadavocāti** neva piyakamyatāya na bhedādhippāyena, atthakāmatāya avoca. Ekaṃ kirassa ahosi- “imassa bhikkhussa evaṃ saṃsaṭṭhassa viharato ayaso uppajjissati. So sāsanaṃ sāpi avanṇoyeva. Aññena pana kathito ayaṃ na oramissati, bhagavatā dhammaṃ desetvā ovadito oramissati”ti tassa atthakāmatāya bhagavantaṃ etaṃ, “āyasmā, bhante”ti-ādivacanaṃ avoca.

**223. Āmantehīti jānāpehi. Āmantetīti pakkosati.**

**224. Saddhāti** (2.0003) saddhāya. **Tasmāti** yasmā tvaṃ kulaputto ceva saddhā-pabbajito ca, yasmā vā te etāhi saddhiṃ saṃsaṭṭhassa viharato ye tā akkosi-ssanti vā, paharissanti vā, tesu domanassaṃ uppajjissati, saṃsagge pahīne nuppajjissati, tasmā. **Tatrāti** tasmim̐ avaṇṇabhāsane. **Gehasitāti** pañcakāmaguṇa-nissitā. **Chandāti** taṇhāchandāpi paṭighachandāpi. **Vipariṇatanti** rattampi cittaṃ vipariṇataṃ. Duṭṭhampi, mūlhampi cittaṃ vipariṇataṃ. Idha pana taṇhāchandava-sena rattampi vaṭṭati, paṭighachandavasena duṭṭhampi vaṭṭati. **Hitānukampīti** hitena anukampamāno hitena pharamāno. **Na dosantaroti** na dosacitto bhavi-ssāmi.

**225. Atha kho bhagavāti** kasmā ārabhi? Phaggunassa kira ettakaṃ ovādaṃ sutvāpi, “bhikkhunisaṃsaggato oramissāmi viramissāmī”ti cittampi na uppannaṃ, bhagavatā pana saddhiṃ paṭāṇī viya paṭiviruddho aṭṭhāsi, athassa bhagavato yathā nāma jighacchitassa bhojane, pipāsitassa pāniye, sītena phuṭṭhassa uṇhe dukkhitassa sukhe patthanā uppajjati. Evameva imaṃ dubbacaṃ bhikkhuṃ disvā paṭhamabodhiyaṃ subbacā bhikkhū āpāthaṃ āgamiṃsu. Atha tesam̐ vaṇṇaṃ kathetukāmo hutvā imaṃ desanaṃ ārabhi.

Tattha **ārādhayiṃsūti** gaṇhiṃsu pūrayiṃsu. **Ekaṃ samayanti** ekasmiṃ samaye. **Ekāsanabhojananti** ekaṃ purebhattabhojanaṃ. Sūriyuggamanato hi yāva majjha-nhikā sattakkhattuṃ bhuttabhojanampi idha ekāsanabhojananteva adhippetam̐. **Appābādhatanti** nirābādhatam̐. **Appātaṅkatanti** niddukkhatam̐. **Lahuṭṭhānanti** sarī-rassa sallahukaṃ uṭṭhānam̐. **Balanti** kāyabalam̐. **Phāsuvihāranti** kāyassa sukhavi-hāram̐. Iminā kiṃ kathitam̐? Divā vikālabhojanaṃ pajahāpitakālo kathito. Bhaddā-lisutte pana rattim̐ vikālabhojanaṃ pajahāpitakālo kathito. Imāni hi dve bhojanāni bhagavā na ekappahārena pajahāpesi. Kasmā? Imāneva hi dve bhojanāni vaṭṭe sattānam̐ āciṇṇāni. Santi kulaputtā sukhumālā, te ekato dvepi bhojanāni paja-hantā kilamanti. Tasmā ekato apajahāpetvā ekasmiṃ kāle divā vikālabhojanaṃ, ekasmiṃ rattim̐ vikālabhojananti visuṃ pajahāpesi. Tesu idha divā vikālabhojanaṃ pajahāpitakālo kathito. Tattha (2.0004) yasmā buddhā na bhayaṃ dassetvā tajjetvā pajahāpenti, ānisaṃsaṃ pana dassetvā pajahāpenti, evaṇhi sattā sukhena pajahanti. Tasmā ānisaṃsaṃ dassento ime pañca guṇe dassesi. **Anusā-saṇi karaṇiyāti** punappunaṃ sāsane kattabbaṃ nāhosi. “Idaṃ karoṭha, idaṃ mā karoṭhā”ti satuppādakaraṇiyamattameva ahosi. Tāvattakeneva te kattabbaṃ akaṃsu, pahātabbaṃ pajahiṃsu, paṭhamabodhiyaṃ, bhikkhave, subbacā bhikkhū ahesuṃ assavā ovādapāṭikarāti.

Idāni nesaṃ subbacabhāvadīpikaṃ upamaṃ āharanto **seyyathāpīti**-ādimāha. Tattha **subhūmiyanti** samabhūmiyaṃ. “Subhūmyaṃ sukhette vihatakhāṇuke bijāni patiṭṭhapeyyā”ti (dī. ni. 2.438) ettha pana maṇḍabhūmi subhūmīti āgatā. **Catu-mahāpatheti** dvinnaṃ mahāmaggānaṃ vinivijjhivā gataṭṭhāne. **Ājaññarathoti** vinī-ta-assaratho. **Odhastapatodoti** yathā rathaṃ abhiruhivā ṭhitena sakkā hoti gaṇhituṃ, evaṃ ālambanaṃ nissāya tiriyaṭo ṭhapitapatodo. **Yoggācariyoti** assāca-riyo. Sveva assadamme sāretīti **assadammasārathi**. **Yenicchakanti** yena yena maggena icchati. **Yadicchakanti** yaṃ yaṃ gatiṃ icchati. **Sāreyyāti** ujukaṃ purato

peseyya. **Paccāsāreyyā**ti paṭinivatteyya.

**Evameva khoti** yathā hi so yoggācariyo yena yena maggena gamanaṃ icchati, taṃ taṃ assā āruḥhāva honti. Yāya yāya ca gatiyā icchati, sā sā gati gahitāva hoti. Ratham pesetvā assā neva vāretabbā na vijjhitabbā honti. Kevalam tesam same bhūmibhāge khuresu nimittam ṭhapetvā gamanameva passitabbam hoti. Evaṃ mayhampi tesu bhikkhūsu punappunam vattabbam nāhosi. Idam karotha idam mā karothāti satuppādanamattameva kattabbam hoti. Tehipi tāvadeva kattabbam katameva hoti, akattabbam jahitameva. **Tasmāti** yasmā subbacā yuttayānapaṭi-bhāgā hutvā satuppādanamatteneva pajahiṃsu, tasmā tumhepi pajahathāti attho. **Elaṇḍehīti** elaṇḍā kira sālādūsanā honti, tasmā evamāha. **Visodheyāti** elaṇḍe ceva aññā ca valliyo chinditvā bahi nīharaṇena sodheyya. **Sujātāti** susaṅṭhitā. **Sammā parihareyyāti** mariyādam bandhitvā udakāsiñcanenapi kālenakālam mūla-mūle (2.0005) khaṇanenapi velligumbādicchedanenapi kipillapūṭakaharaṇenapi makkaṭakajālasukkhadaṇḍakaharaṇenapi sammā vaḍḍhetvā poseyya. **Vuddhiā-**dīni vuttatthāneva.

**226.** Idāni akkhantiyā dosam dassento **bhūtapubbanti-**ādimāha. Tattha **vedehi-**kāti videharaṭṭhavāsikassa dhītā. Atha vā **vedoti** paññā vuccati, vedena īhati iriyatīti **vedehikā**, paṇḍitāti attho. **Gahapatānīti** gharasāminī. **Kittisaddoti** kittighoso. **Sor-**tāti soraccena samannāgatā. **Nivātāti** nivātavutti. **Upasantāti** nibbutā. **Dakkhāti** bhattapacanasayanattharaṇadīpujjalanādikammesu chekā. **Analasāti** uṭṭhāhikā, **susamvihitakammantāti** suṭṭhu samvihitakammantā. Ekā analasā hoti, yaṃ yaṃ pana bhājanam gaṇhāti, taṃ taṃ bhindati vā chiddam vā karoti, ayam na tādisāti dasseti.

**Divā uṭṭhāsīti** pātova kattabbāni dhenuduhanādikammāni akatvā ussūre uṭṭhitā. **He je kāḷīti** are kāḷi. **Kiṃ je divā uṭṭhāsīti** kiṃ te kiñci aphāsukaṃ atthi, kiṃ divā uṭṭhāsīti? **No vata re kiñci** Ti are yadi te na kiñci aphāsukaṃ atthi, neva sīsam rujjhati, na piṭṭhi, atha kasmā pāpi dāsi divā uṭṭhāsīti kupitā anattamanā bhākuṭima-kāsi. **Divātaram uṭṭhāsīti** punadivase ussūrataram uṭṭhāsi. **Anattamanavācanti** are pāpi dāsi attano pamāṇam na jānāsi; kiṃ aggim sītoti maññasi, idāni taṃ sikkhāpe-ssāmīti-ādīni vadamānā kupitavacanam nicchāresi.

**Paṭivisakānanti** sāmantagehavāsīnam. **Ujjhāpesīti** avajānāpesi. **Caṇḍīti** asoratā kibbisā. Iti yattakā guṇā, tato diguṇā dosā uppajjīṃsu. Guṇā nāma saṅikaṃ saṅikaṃ āgacchanti; dosā ekadivaseneva patthaṭā honti. **Soratasoratoti** ativiya sorato, sotāpanno nu kho, sakadāgāmī anāgāmī arahā nu khoti vattabbataṃ āpa-jjati. **Phusantīti** phusantā ghaṭṭentā āpātham āgacchanti.

**Atha** (2.0006) **bhikkhu soratoti veditabboti** atha adhivāsanakkhantiyam ṭhito bhikkhu soratoti veditabbo. **Yo cīvara ...pe... parikkhārahetūti** yo etāni cīvarādīni paṇītapāṇītāni labhanto pādaparikkammapiṭṭhiparikkammādīni ekavacaneneva karoti. **Alabhamānoti** yathā pubbe labhati, evaṃ alabhanto. **Dhammaññeva sakka-**rontoti dhammaṃyeva sakkāram sukatakāram karonto. **Garum karontoti** garubhā-riyam karonto. **Mānentoti** manena piyam karonto. **Pūjentoti** paccayapūjāya pūjento. **Apacāyamānoti** dhammaṃyeva apacāyamāno apacitīṃ nīcavuttiṃ

dassento.

**227.** Evaṃ akkhantiyā dosaṃ dassetvā idāni ye adhivāseṇti, te evaṃ adhivāseṇtīti pañca vacanapathe dassento **pañcime, bhikkhaveli-ādimāha.** Tattha **kālenāti** yuttapattakālena. **Bhūtenā**ti satā vijjamānena. **Sanhenāti** sammatṭhena. **Atthasañhitenāti** atthanissitena kāraṇanissitena. **Akālenāti-ādīni** tesameva paṭipakkhavasena veditabbāni. **Mettacittāti** uppannamettacittā hutvā. **Dosantarāti** duṭṭhacittā, abbhantare uppannadosā hutvā. **Tatrāti** tesu vacanapathesu. **Pharivāti** adhimuccitvā. **Tadārammaṇaṅcāti** kathaṃ tadārammaṇaṃ sabbāvantaṃ lokaṃ karoti? Pañca vacanapathe gahetvā āgataṃ puggalaṃ mettacittassa ārammaṇaṃ katvā puna tasseva mettacittassa avasesasatte ārammaṇaṃ karonto sabbāvantaṃ lokaṃ tadārammaṇaṃ karoti nāma. Tatrāyaṃ vacanattho. **Tadārammaṇaṅcāti** tasseva mettacittassa ārammaṇaṃ katvā. **Sabbāvantanti** sabbasattavantaṃ. **Lokanti** sattalokaṃ. **Vipulenāti** anekasattārammaṇena. **Mahaggatenāti** mahaggatabhūmikenā. **Appamāṇenāti** subhāvitena. **Averenāti** niddosena. **Abyābajjhenāti** niddukkheṇa. **Pharivā viharissāmāti** evarūpena mettāsahagatena cetasā tañca puggalaṃ sabbañca lokaṃ tassa cittassa ārammaṇaṃ katvā adhimuccitvā viharissāma.

**228.** Idāni tadatthadīpikaṃ upamaṃ āharanto **seyyathāpīti-ādimāha.** Tattha **apathavinti** nippathaviṃ

karissāmīti attho. **Tatra tatrāti** (2.0007) tasmim tasmim ṭhāne. **Vikireyyāti** pacchiyā paṃsum uddharitvā bījāni viya vikireyya. **Oṭṭhubheyyāti** kheḷaṃ pāteyya. **Apathaviṃ kareyyāti** evaṃ kāyena ca vācāya ca payogaṃ katvāpi sakkuṇeyya apathaviṃ kātunti? **Gambhīrāti** bahalattena dviyojanasatasahassāni cattāri ca nahutāni gambhīrā. **Appameyyāti** tiriyaṃ pana aparicchinnā. **Evameva khoti** ettha idaṃ opa-  
mmasam sandanaṃ- pathavī viya hi mettacittaṃ daṭṭhabbaṃ. Kudālapīṭakaṃ gahetvā āgatapuriso viya pañca vacanapathe gahetvā āgatapuggalo. Yathā so kudālapīṭakena mahāpathaviṃ apathaviṃ kātuṃ na sakkoti, evaṃ vo pañca vacanapathe gahetvā āgatapuggalo mettacittassa aññathattaṃ kātuṃ na sakkhissatīti.

**229.** Dutiya-upamāyaṃ **haliddinti** yaṃkiñci pītakavaṇṇaṃ. **Nilanti** kaṃsanīlaṃ vā palāsanīlaṃ vā. **Arūpīti** arūpo. Nanu ca, dvinnaṃ kaṭṭhānaṃ vā dvinnaṃ rukkhānaṃ vā dvinnaṃ seyyānaṃ vā dvinnaṃ selānaṃ vā antaraṃ paricchinnā-kāsarūpanti āgataṃ, kasmā idha **arūpīti** vuttoti? Sanidassanabhāvapaṭikkhepato. Tenevāha “anidassano”ti. Tasmīñhi rūpaṃ likhituṃ, rūpapātubhāvaṃ dassetuṃ na sakkā, tasmā “arūpī”ti vutto. **Anidassanoti** dassanassa cakkhuviññāṇassa anāpātho. Upamāsam sandane panettha ākāso viya mettacittaṃ. Tulikapañcamā cattāro raṅgajātā viya pañca vacanapathā, tulikapañcame raṅge gahetvā āgatapuriso viya pañca vacanapathe gahetvā āgatapuggalo. Yathā so tulikapañcamehi raṅgehi ākāse rūpapātubhāvaṃ kātuṃ na sakkoti, evaṃ vo pañca vacanapathe gahetvā āgatapuggalo mettacittassa aññathattaṃ katvā dosuppattiṃ dassetuṃ na sakkhissatīti.

**230.** Tatiya-upamāyaṃ **ādittanti** pajjalitaṃ. **Gambhīrā appameyyāti** imissā gaṅgāya gambhīraṭṭhānaṃ gāvutampi atthi, aḍḍhayaohanampi, yohanampi. Puthulaṃ panassā evarūpaṃyeva, dīghato pana pañcayojanasatāni. Sā kathaṃ gambhīrā appameyyāti? Etena payogena parivattetvā uddhane udakaṃ viya tāpetuṃ asakkuṇeyyato. Ṭhitodakaṃ pana kenaci upāyena aṅgulamattaṃ vā aḍḍhaṅgulamattaṃ vā evaṃ tāpetuṃ sakkā bhaveyya, ayaṃ pana na (2.0008) sakkā, tasmā evaṃ vuttaṃ. Upamāsam sandane panettha gaṅgā viya mettacittaṃ, tiṇukkaṃ ādāya āgatapuriso viya pañca vacanapathe gahetvā āgatapuggalo. Yathā so ādittāya tiṇukkāya gaṅgaṃ tāpetuṃ na sakkoti, evaṃ vo pañca vacanapathe gahetvā āgatapuggalo mettacittassa aññathattaṃ kātuṃ na sakkhissatīti.

**231.** Catuttha-upamāyaṃ **biḷārabhastāti** biḷāracamma pasibbakā. **Sumadditāti** suṭṭhu madditā. **Suparimadditāti** anto ca bahi ca samantato suparimadditā. **Tūlīnīti** simbalitūlalatātūlasamānā. **Chinnasassarāti** chinnasassarasaddā. **Chinnabhabharāti** chinnabhabharasaddā. Upamāsam sandane panettha biḷārabhastā viya mettacittaṃ, kaṭṭhakaṭṭhalaṃ ādāya āgatapuriso viya pañca vacanapathe gahetvā āgatapuggalo. Yathā so kaṭṭhena vā kaṭṭhalena vā biḷārabhastāṃ sarasaraṃ bhara-bharaṃ saddaṃ kātuṃ na sakkoti, evaṃ vo pañca vacanapathe gahetvā āgatapuggalo mettacittassa aññathattaṃ katvā dosānugatabhāvaṃ kātuṃ na sakkhissatīti.

**232.** **Ocarakāti** avacarakā heṭṭhācarakā, nīcakammakārakāti attho. **Yo mano padūseyyāti** yo bhikkhu vā bhikkhunī vā mano padūseyya, taṃ kakacena oka-

ntanaṃ nādhivāseyya. **Na me so tena sāsana**karoti so tena anadhivāsanena mayhaṃ ovādakaro na hoti. Āpatti panettha natthi.

**233. Aṇuṃ vā thūlaṃ vā**ti appasāvajjaṃ vā mahāsāvajjaṃ vā. **Yaṃ tumhe nādhivāseyyāthā**ti yo tumhehi adhivāsetabbo na bhavēyyāti attho. **No hetam, bhanteti**, bhante, anadhivāsetabbaṃ nāma vacanapathaṃ na passāmāti adhippāyo. **Dīgharattam hitāya sukhāyā**ti iti bhagavā arahattena kūṭam gaṇhanto yathānusandhinā desanaṃ niṭṭhapesīti.

Papañcasūdaniyā majjhimanikāyaṭṭhakathāya

Kakacūpamasuttavaṇṇanā niṭṭhitā.

## 2. Alagaddūpamasuttavaṇṇanā

**234. Evaṃ** (2.0009) **me sutanti** alagaddūpamasuttaṃ. Tattha gaddhe bādhayim-sūti gaddhabādhino, gaddhabādhino pubbapurisā assāti gaddhabādhipubbo, tassa **gaddhabādhipubbassa**, gijjhaghātakakulappasutassāti attho. Saggamo-kkhānaṃ antarāyaṃ karontīti **antarāyikā**. Te kammakilesavipāka-upavāda-āṇāvītik-kamavasena pañcavidhā. Tattha pañcānantariyadhammā kammantarāyikā nāma. Tathā bhikkhunīdūsakakammaṃ, taṃ pana mokkhasseva antarāyaṃ karoti, na saggassa. Niyatamicchādiṭṭhidhammā kilesantarāyikā nāma. Paṇḍakati-racchānagata-ubhatobyañjanakānaṃ paṭisandhidhammā vipākantarāyikā nāma. Ariyūpavādadhammā upavādantarāyikā nāma, te pana yāva ariye na khamāpentī, tāvadeva, na tato paraṃ. Sañcicca vītikkantā satta āpattikkhandhā āṇāvītik-kamantarāyikā nāma. Tepi yāva bhikkhubhāvaṃ vā paṭijānāti, na vuṭṭhāti vā, na deseti vā, tāvadeva, na tato paraṃ.

Tatrāyaṃ bhikkhu bahussuto dhammakathiko sesantarāyike jānāti, vinaye pana akovidattā paṇṇattivītik-kamantarāyike na jānāti, tasmā rahogato evaṃ cintesi- ime āgārikā pañca kāmagaṇe paribhuñjantā sotāpannāpi sakadāgāminopi anāgāminopi honti. Bhikkhūpi manāpikāni cakkhuvīñṇeyyāni rūpāni passanti ...pe... kāyaviñṇeyye phoṭṭhabbe phusanti, mudukāni attharaṇapāvuraṇādīni paribhuñjanti, etaṃ sabbaṃ vaṭṭati. Kasmā itthīnaṃyeva rūpasaddagandharasaphoṭṭhabbā na vaṭṭanti? Etepi vaṭṭantīti. Evaṃ rasena rasaṃ saṃsandetvā sacchandarāgaparibhogañca nicchandarāgaparibhogañca ekaṃ katvā thūlavākehi saddhiṃ atisukhumasuttaṃ upanento viya, sāsapena saddhiṃ sineruṃ upasaṃharanto viya, pāpakaṃ diṭṭhigataṃ uppādetvā, “kiṃ bhagavatā mahāsamuddaṃ bandhantena viya mahatā ussāhena paṭhamapārājikaṃ paññattaṃ, natthi ettha doso”ti sabbaññutaññāṇena saddhiṃ paṭivirujjhanto vesārajjaññaṃ paṭibāhanto ariyamagge khāṇukaṇṭakādīni pakkhipanto methunadhamme doso natthīti jinassa āṇācikke pahāraṃ adāsi. Tenāha- “tathāhaṃ bhagavatā dhammaṃ desitaṃ ājānāmi”ti-ādi.

**Evam** (2.0010) **byā khoti** evam viya kho. **Samanuyuñjantīti-ādīsu** kiṃ laddhiko tvam, laddhiṃ vadehīti pucchamānā samanuyuñjanti nāma. Diṭṭhiṃ patitṭhāpentā samanuggāhanti nāma. Kena kāraṇena evam vadasīti kāraṇaṃ pucchantā samanubhāsanti nāma. **Aṭṭhikaṅkalūpamāti-ādīsu** (ma. ni. 2.42-48) **aṭṭhikaṅkalūpamā** appassādaṭṭhena. **Mamsapesūpamā** bhusādhāraṇaṭṭhena. **Tiṇukkūpamā** anudahanāṭṭhena. **Angārakāsūpamā** mahābhītāpanaṭṭhena. **Supinakūpamā** ittarapaccupaṭṭhānaṭṭhena. **Yācitakūpamā** tāvakālikaṭṭhena. **Rukkhaphalūpamā** sabbaṅgapaccāṅgapalibhañjanaṭṭhena. **Asisūnūpamā** adhikuṭṭanaṭṭhena. **Sattisūlūpamā** vinivijjanaṭṭhena. **Sappasirūpamā** sāsaṅkasappaṭibhayaṭṭhena. **Thāmasāti** diṭṭhithāmena. **Parāmāsāti** diṭṭhiparāmāsena. **Abhinivissa voharatīti** adhiṭṭhahitvā voharati dīpeti vā.

**235. Yato kho te bhikkhūti yadā te bhikkhū. Evam byā kho ahaṃ, bhante, bhagavatāti** idaṃ esa attano ajjhāsayena natthīti vattukāmopi bhagavato ānubhāvena sampaṭicchati, buddhānaṃ kira sammukhā dve kathā kathetuṃ samattho nāma natthi.

**236. Kassa kho nāma tvam moghapurisāti** tvam moghapurisa kassa khattiyassa vā brāhmaṇassa vā vessassa vā suddassa vā gahaṭṭhassa vā pabbajitassa vā devassa vā manussassa vā mayā evaṃ dhammaṃ desitaṃ ājānāsi. **Atha kho bhagavā bhikkhū āmantesīti** ayaṃ pāṭiyekko anusandhi. Ariṭṭho kira cintesi- “bhagavā maṃ moghapurisoti vadati, na kho pana moghapurisāti vuttamattakena maggaphalānaṃ upanissayo na hoti. Upasenampi hi vaṅgantaputtaṃ, ‘atilaḥuṃ kho tvam, moghapurisa, bāhullāya āvatto’ ti (mahāva. 75) bhagavā moghapurisavādena ovadi. Thero aparabhāge ghaṭento vāyamanto cha abhiññā sacchākāsi. Ahampi tathārūpaṃ vīriyaṃ paggaṇhitvā maggaphalāni nibbattessāmi” ti. Athassa bhagavā bandhanā pavuttassa paṇḍupalāsassa viya aviruḥhibhāvaṃ dassento imaṃ desanaṃ ārabhi.

**Usmīkatopīti** (2.0011), bhikkhave, tumhe kinti maññatha, ayaṃ ariṭṭho evaṃ laddhiko sabbaññutaññāṇena paṭivirujjhivā vesārajaññaṃ paṭibāhitvā tathāgata tassa āṇācakkhe pahāraṃ dadamāno api nu imasmiṃ dhammavinaye usmīkatopi? Yathā nibbutepi mahante aggikkhandhe khajjupanakamattāpi aggipapaṭikā hotiyeva, yaṃ nissāya puna mahā-aggikkhandho bhavye. Kiṃ nu kho evaṃ imassa appamattikāpi ñāṇusmā atthi, yaṃ nissāya vāyamanto maggaphalāni nibbatteyyāti? **No hetam, bhanteti, bhante, evaṃ laddhikassa kuto evarūpā ñāṇusmāti?** Maggaphalānaṃ paccayasamatthāya ñāṇusmāya usmīkatabhāvaṃ paṭikkhipantā vadanti. **Maṅkubhūtoti** nittejabhūto. **Pattakkhandhoti** patitakkhandho. **Appaṭibhānoti** kiñci paṭibhānaṃ apassanto bhinnapaṭibhāno evarūpampi nāma niyyānikāsanaṃ labhitvā aviruḥhidhammo kiramhi samugghātita paccayo jātoti attano abhataṃ paccavekkhanto pādaṅguṭṭhakena bhūmiṃ khaṇamāno nisīdi.

**Paññāyissasi kho** Ti ayampi pāṭiyekko anusandhi. Ariṭṭho kira cintesi- “bhagavā mayhaṃ maggaphalānaṃ upanissayo pacchinnoti vadati, na kho pana buddhā sa-upanissayānaṃ yeve dhammaṃ desenti, anupanissayānampi desenti, ahaṃ satthu santikā sugatovādaṃ labhitvā attano sampattūpagaṃ kusalaṃ karissā-

mī”ti. Athassa bhagavā ovādaṃ paṭipassambhento “paññāyissasi”ti-ādimāha. Tassattho, tvaṃyeva, moghapurisa, iminā pāpakena diṭṭhigatena nirayādīsu paññāyissasi, mama santikā tuyhaṃ sugatovādo nāma natthi, na me tayā attho, idhāhaṃ bhikkhū paṭipucchissāmīti.

**237. Atha kho bhagavā**ti ayampi pāṭiyekko anusandhi. Imasmiñhi ṭhāne bhagavā parisam sodheti, ariṭṭhaṃ gaṇato nissāreti. Sace hi parisagatānaṃ kassaci evaṃ bhaveyya- “ayaṃ ariṭṭho bhagavatā akathitaṃ kathetuṃ kiṃ sakkhissati, kacci nu kho parisamajjhe bhagavatā kathāya samāraddhāya sahasā kathitaṃ”ti. Evaṃ kathitaṃ pana na ariṭṭhova suṇāti, aññenapi sutam bhavissati. Athāpissa siyā “yathā satthā ariṭṭhaṃ niggaṇhāti, mampi evaṃ niggaṇheyyāti sutvāpi tuṇhibhāvaṃ āpajjeyyā”ti. “Tamaṃ (2.0012) sabbaṃ na karissanti”ti. Mayāpi na kathitaṃ, aññena sutampi natthīti “tumhepime, bhikkhave”ti-ādinā parisāya laddhiṃ sodheti. Parisāya pana laddhisodhaneneva ariṭṭho gaṇato nissārito nāma hoti.

Idāni ariṭṭhassa laddhiṃ pakāseto **so vata, bhikkhave**ti-ādimāha. Tattha **añña-treva kāmehī**ti-ādīsu yo so, bhikkhave, bhikkhu “te paṭisevato nāmaṃ antarāyāyā”ti evaṃladdhiko, so vata kilesakāmehi ceva kilesakāmasampayuttehi saññāvitakkehi ca aññatra, ete dhamme pahāya, vinā etehi dhammehi, vatthukāme paṭisevissati, methunasamācāraṃ samācarissatīti netam ṭhānaṃ vijjati. Idam kāraṇam nāma natthi, aṭṭhānametaṃ anavakāsoti.

**238.** Evaṃ bhagavā ayaṃ ariṭṭho yathā nāma rajako sugandhānipi duggandhānipi jiṇṇānipi navānipi suddhānipi asuddhānipi vatthāni ekato bhaṇḍikaṃ karoti, evameva bhikkhūnaṃ nicchandarāgapaṇītacīvarādīparibhogañca anibaddhasīlānaṃ gahaṭṭhānaṃ antarāyakaraṃ sacchandarāgaparibhogañca nibaddhasīlānaṃ bhikkhūnaṃ āvaraṇakaraṃ sacchandarāgaparibhogañca sabbaṃ ekasadisam karotīti ariṭṭhassa laddhiṃ pakāsetvā idāni duggahitāya pariyattiyā dosaṃ dassento **idha, bhikkhave, ekacceti**-ādimāha. Tattha **pariyāpuṇantī**ti uggaṇhanti. **Suttanti**-ādīsu ubhatovibhaṅganiddesakhandhakaparivārā, suttanipāte maṅgalasuttaratanasuttanālakasu-ātuvaṭṭakasuttāni, aññampi ca suttanāmakam tathāgatavacanaṃ **suttanti** veditabbaṃ. Sabbampi sagāthakam suttaṃ



**geyyanti** veditabbaṃ, vīsesena saṃyuttake sakalopi sagāthāvaggo. Sakalaṃ abhidhammapiṭakaṃ, niggāthakaṃ suttaṃ, yañca aññampi aṭṭhahi aṅgehi asaṅga-hitaṃ buddhavacanaṃ, taṃ **veyyākaraṇanti** veditabbaṃ. Dhammapadaṃ, theragāthā, therīgāthā, suttanipāte nosuttanāmikā suddhikagāthā ca **gāthā**ti veditabbā. Somanassañāṇamayikagāthāpaṭisaṃyuttā dve-asītisuttantā **udānanti** veditabbā. “Vuttañhettaṃ bhagavatā”ti-ādinayappavattā (itivu. 1,2) dasuttarasatasuttantā **itivuttakanti** veditabbā. Apaṇṇakajātakādīni paṇṇāsādhikāni pañcajātakasatāni **jātakanti** veditabbāni. “Cattārome, bhikkhave, acchariyā abbhutā dhammā ānande”ti-ādinayappavattā (a. ni. 4.129) sabbepi acchariya-abbhutadhammapaṭisaṃyuttā (2.0013) suttantā **abbhutadhammanti** veditabbā. Cūḷavedallamahāvedallasammādiṭṭhisakkapañhasaṅkhārabhājanīyamahāpuṇṇamasuttādayo sabbepi vedañca tuṭṭhiñca laddhā laddhā pucchitasuttantā **vedallanti** veditabbā.

**Atthaṃ na upaparikkhantī**ti atthatthaṃ kāraṇatthaṃ na passanti na pariggaṇhanti. **Anupaparikkhatanti** anupaparikkhantānaṃ. **Na nijjhānaṃ khamantī**ti na upaṭṭhahanti na āpāthaṃ āgacchanti, imasmiṃ ṭhāne sīlaṃ samādhi vipassanā maggo phalaṃ vaṭṭaṃ vivaṭṭaṃ kathitanti evaṃ jānituṃ na sakkā hontīti attho. **Te upārambhānisamsā cevā**ti te paresaṃ vāde dosāropanānisamsā hutvā pariyāpuṇantīti attho. **Itivādappamokkhānisamsā cā**ti evaṃ vādappamokkhānisamsā, parehi sakavāde dose āropite taṃ dosaṃ evaṃ mocessāmāti imināva kāraṇena pariyāpuṇantīti attho. **Tañcassa atthaṃ nānubhontī**ti yassa ca maggassa vā phalassa vā atthāya kulaputtā dhammaṃ pariyāpuṇanti, tañcassa dhammassa atthaṃ ete duggahitaggāhino nānubhonti. Apica parassa vāde upārambhaṃ āropetuṃ attano vādaṃ mocetuṃ asakkontāpi tañca atthaṃ nānubhontīyeva.

**239. Alagaddatthikoti** āsivisa-atthiko. **Gadoti** hi visassa nāmaṃ, taṃ tassa alaṃ paripuṇṇaṃ atthīti **alagaddo**. **Bhogeti** sarīre. **Idha pana, bhikkhave, ekacce kulaputtā dhammaṃ pariyāpuṇantī**ti nittharaṇapariyattivasena uggaṇhanti. Tisso hi pariyattīyo alagaddapariyatti nittharaṇapariyatti bhaṇḍāgārikapariyattīti.

Tattha yo buddhavacanaṃ uggaṇhetvā evaṃ cīvarādīni vā labhissāmi, catuparisamajjhe vā maṃ jānissantīti lābhasakkārahetu pariyāpuṇāti, tassa sā pariyatti **alagaddapariyatti** nāma. Evaṃ pariyāpuṇato hi buddhavacanaṃ apariyāpuṇitvā niddokkamaṃ varataraṃ.

Yo pana buddhavacanaṃ uggaṇhitvā sīlassa āgataṭṭhāne sīlaṃ pūretvā samādhissa āgataṭṭhāne samādhigabbhaṃ gaṇhāpetvā vipassanāya āgataṭṭhāne vipassanaṃ paṭṭhapetvā maggaphalānaṃ āgataṭṭhāne maggaṃ bhāvessāmi phalaṃ (2.0) sacchikarissāmīti uggaṇhāti, tassa sā pariyatti **nittharaṇapariyatti** nāma hoti.

Khīṇāsavassa pana pariyatti **bhaṇḍāgārikapariyatti** nāma. Tassa hi apariññātaṃ appahīnaṃ abhāvitaṃ asacchikataṃ vā natthi. So hi pariññātakkhandaḥ pahīnaki-leso bhāvitamaggo sacchikataphalo, tasmā buddhavacanaṃ pariyāpuṇanto tantidhārako paveṇipālako vaṃsānurakkhako hutvā uggaṇhāti. Itissa sā pariyatti bhaṇḍāgārikapariyatti nāma hoti.

Yo pana puthujjano chātabhayādīsū ganthadharesu ekasmiṃ ṭhāne vasituṃ asakkontesu sayaṃ bhikkhācārena akilamamāno atimadhuraṃ buddhavacanaṃ

mā nassatu, tantim dhāressāmi, vaṃsaṃ ṭhapessāmi, paveṇim pālessāmīti pariyāpuṇāti, tassa pariyatti bhaṇḍāgārikapariyatti hoti, na hotīti? Na hoti. Kasmā? Na attano ṭhāne ṭhatvā pariyāputattā. Puthujanassa hi pariyatti nāma alagaddā vā hoti nittharaṇā vā, sattannaṃ sekkhānaṃ nittharaṇāva, khīṇāsavassa bhaṇḍāgārikapariyattiyeva. Imasmimṃ pana ṭhāne nittharaṇapariyatti adhippetā.

**Nijjhānaṃ khamantīti** silādīnaṃ āgataṭṭhānesu idha silaṃ kathitaṃ, idha samādhi, idha vipassanā, idha maggo, idha phalaṃ, idha vaṭṭaṃ, idha vivaṭṭanti āpāthaṃ āgacchanti. **Tañcassa atthaṃ anubhontīti** yesaṃ maggaphalānaṃ atthāya pariyāpuṇanti. Suggahitapariyattimṃ nissāya maggaṃ bhāvetvā phalaṃ sacchikarontā tañcassa dhammassa atthaṃ anubhavanti. Paravāde upārambhaṃ āropetuṃ sakkontāpi sakavāde āropitaṃ dosaṃ icchiticchitaṭṭhānaṃ gahetvā mocetuṃ sakkontāpi anubhontiyeva. **Dīgharattaṃ hitāya sukhāya saṃvattantīti** silādīnaṃ āgataṭṭhāne silādīni pūrentānampi, paresaṃ vāde sahadhammena upārambhaṃ āropentānampi, sakavādato dosaṃ harantānampi, arahattaṃ patvā parisamajjhe dhammaṃ desetvā dhammadesanāya pasannehi upanīte cattāro paccaye paribhuñjantānampi dīgharattaṃ hitāya sukhāya saṃvattanti.

Evam (2.0015) suggahite buddhavacane ānisaṃsaṃ dassetvā idāni tattheva niyojento **tasmā tiha, bhikkhavi-**ādimāha. Tattha **tasmāti** yasmā duggahitapariyatti duggahita-alagaddo viya dīgharattaṃ ahitāya dukkhāya saṃvattati, suggahitapariyatti suggahita-alagaddo viya dīgharattaṃ hitāya sukhāya saṃvattati, tasmāti attho. **Tathā naṃ dhāreyyāthā** Ti tattheva naṃ dhāreyyātha, teneva atthena gaṇheyyātha. **Ye vā panāssu viyattā bhikkhūti** ye vā pana aññe sārīputtamoggallānāmahākassapamahākaccānādikā byattā paṇḍitā bhikkhū assu, te pucchitabbā. Ariṭṭhena viya pana mama sāsane na kalalaṃ vā kacavaraṃ vā pakkhipitabbaṃ.

**240. Kullūpamanti** kullasadisam. **Nittharaṇatthāyāti** caturroghanittharaṇatthāya. **Udakaṇṇavanti** yañhi udakaṃ gambhīraṃ na puthulaṃ. Puthulaṃ vā pana na gambhīraṃ, na taṃ aṇṇavoti vuccati. Yaṃ pana gambhīrañceva puthulañca, taṃ aṇṇavoti vuccati. Tasmā **mahantaṃ udakaṇṇavanti** mahantaṃ puthulaṃ gambhīraṃ udakanti ayamettha attho. **Sāsaṅkaṃ** nāma yattha corānaṃ nivutthokāso dissati. Ṭhitokāso, nisinnokāso, nipannokāso dissati. **Sappaṭibhayaṃ** nāma yattha corehi manussā hatā dissanti, viluttā dissanti, ākoṭitā dissanti. **Uttarasetūti** udakaṇṇavassa upari baddho setu. **Kullaṃ bandhitvāti kullo** nāma taraṇatthāya kalāpaṃ katvā baddho. Pattharivā baddhā pana padaracāṭi-ādayo uḷumpoti vuccanti. **Uccāretvāti** ṭhapetvā. **Kiccakārīti** pattakārī yuttakārī, patirūpakārīti attho. **Dhammāpi vo pahātabbāti** ettha **dhammāti** samathavipassanā. Bhagavā hi samathepi chandarāgaṃ pajahāpesi, vipassanāyapi. Samathe chandarāgaṃ kattha pajahāpesi? “Iti kho, udāyi, nevasaññānāsaññāyatanassapi pahānaṃ vadāmi, passasi no tvaṃ, udāyi, taṃ saṃyojanaṃ aṇuṃ vā thūlaṃ vā, yassāhaṃ no pahānaṃ vadāmi”ti (ma. ni. 2.156) ettha samathe chandarāgaṃ pajahāpesi. “Imaṃ ce tumhe, bhikkhave, diṭṭhimṃ evaṃ parisuddhaṃ evaṃ pariyodātaṃ na allīyetha na kelāyetha na dhanāyethā”ti (ma. ni. 1.401) ettha vipassanāya chandarāgaṃ pajahāpesi (2.0016). Idha pana ubhayattha pajahāpento “dhammāpi vo

pahātabbā, pageva adhammā”ti āha.

Tatrāyaṃ adhippāyo- bhikkhave, ahaṃ evarūpesu santappaṇītesu dhammesu chandarāgappahānaṃ vadāmi, kiṃ pana imasmiṃ asaddhamme gāmadhamme vasaladhamme duṭṭhulle odakantike, yattha ayaṃ ariṭṭho moghapuriso niddosa- saññī pañcasu kāmaguṇesu chandarāgaṃ nālaṃ antarāyāyāti vadati. Ariṭṭhena viya na tumhehi mayhaṃ sāsane kalalaṃ vā kacavaraṃ vā pakkipitabbanti evaṃ bhagavā imināpi ovādena ariṭṭhaṃyeva niggaṇhāti.

**241.** Idāni yo pañcasu khandhesu tividhaggāhavasena ahaṃ mamanti gaṇhāti, so mayhaṃ sāsane ayaṃ ariṭṭho viya kalalaṃ kacavaraṃ pakkipatīti dassento **chayimāni, bhikkhave**ti-ādimāha. Tattha **diṭṭhiṭṭhānāni**ti diṭṭhipi diṭṭhiṭṭhānaṃ, diṭṭhiyā ārammaṇampi diṭṭhiṭṭhānaṃ, diṭṭhiyā paccayopi. **Rūpaṃ etaṃ mamāti-ā-** dīsu **etaṃ mamāti** taṇhāggāho. **Esohamasmīti** mānaggāho. **Eso me attāti** diṭṭhi- ggāho. Evaṃ rūpārammaṇā taṇhāmānadiṭṭhiyo kathitā honti. Rūpaṃ pana attāti na vattabbaṃ. Vedanādīsupi eseva nayo. **Diṭṭhaṃ** rūpāyatanaṃ, **sutaṃ** saddāya- tanaṃ, **mutaṃ** gandhāyatanaṃ rasāyatanaṃ phoṭṭhabbāyatanaṃ, tañhi patvā gahetabbato **mutanti** vuttaṃ. Avasesāni sattāyatanaṃ **viññātaṃ** nāma. **Pattanti** pariyesitvā vā apariyesitvā vā pattaṃ. **Pariyesitanti** pattaṃ vā appattaṃ vā pariyes- itaṃ. **Anuvicaritaṃ manasāti** cittaṃ anusañcaritaṃ. Lokasmiñhi pariyesitvā pattaṃ atthi, pariyesitvā nopattaṃ. Apariyesitvā pattaṃ atthi, apariyesitvā nopattaṃ. Tattha pariyesitvā pattaṃ pattaṃ nāma. Pariyesitvā nopattaṃ pariyes- itaṃ nāma. Apariyesitvā pattaṃ, apariyesitvā nopattaṃ manasānuvicaritaṃ nāma.

Atha vā pariyesitvā pattaṃ apariyesitvā pattaṃ pattaṃ pattaṃ nāma. Pariyesitvā nopattaṃ pariyesitaṃ nāma. Apariyesitvā nopattaṃ manasānuvica- ritaṃ nāma. Sabbaṃ vā etaṃ manasā anuvicaritattā manasānuvicaritaṃ nāma. Iminā viññāṇārammaṇā taṇhāmānadiṭṭhiyo kathitā, desanāvilāsenā heṭṭhā diṭṭhā- di-ārammaṇavasena viññāṇaṃ dassitaṃ (2.0017). **Yampi taṃ diṭṭhiṭṭhānanti** yampi etaṃ so lokoti-ādinā nayena pavattaṃ diṭṭhiṭṭhānaṃ.

**So loko so attāti** yā esā “rūpaṃ attato samanupassati”ti-ādinā nayena pavattā diṭṭhi loko ca attā cāti gaṇhāti, taṃ sandhāya vuttaṃ. **So pecca bhavissāmīti** so ahaṃ paralokaṃ gantvā nicco bhavissāmi, dhuvo sassato avipariṇāmadhammo bhavissāmi, sinerumahāpathavīmahāsamuddādīhi sassatīhi samaṃ tatheva ṭhassāmi. **Tampi etaṃ mamāti**ti tampi dassanaṃ etaṃ mama, esohamasmī, eso me attāti samanupassati. Iminā diṭṭhārammaṇā taṇhāmānadiṭṭhiyo kathitā. Vipā- ssaṇāya paṭivipassanākāle viya pacchimadiṭṭhiyā purimadiṭṭhiggahaṇākāle evaṃ hoti.

Sukkapakkhe **rūpaṃ netamā mamāti** rūpe taṇhāmānadiṭṭhiggāhā paṭikkhattā. Vedanādīsupi eseva nayo. **Samanupassatīti** imassa pana padassa taṇhāsamanu- passanā mānasamanupassanā diṭṭhisamanupassanā ñāṇasamanupassanāti catasso samanupassanāti attho. Tā kaṇhapakkhe tissannaṃ samanupassanānaṃ, sukkapakkhe ñāṇasamanupassanāya vasena veditabbā. **Asati na paritassatīti** avi- jjamāne bhayaparitassanāya taṇhāparitassanāya vā na paritassati. Iminā

bhagavā ajjhatakkhandhavināse aparitassamānaṃ khīṇāsavaṃ dassento desanaṃ matthakaṃ pāpesi.

**242. Evaṃ** vutte aññataro bhikkhūti evaṃ bhagavatā vutte aññataro anusandhi-kusalo bhikkhu- “bhagavatā ajjhatakkhandhavināse aparitassantaṃ khīṇāsavaṃ dassetvā desanā niṭṭhāpitā, ajjhattaṃ aparitassante kho pana sati ajjhattaṃ parita-ssakena bahiddhā parikkhāravinaṃse paritassakena aparitassakena cāpi bhavi-tappaṃ. Iti imehi catūhi kāraṇehi ayaṃ pañho pucchitabbo”ti cintetvā ekaṃsaṃ cīvaraṃ katvā añjaliṃ paggayha bhagavantaṃ etadavoca. **Bahiddhā asatīti** bahiddhā parikkhāravinaṃse. **Ahu vata meti** ahosi vata me bhaddakaṃ yānaṃ vāhanaṃ hiraññaṃ suvaṇṇanti attho. **Taṃ vata me natthīti** taṃ vata idāni mayhaṃ natthi, rājūhi vā corehi vā haṭaṃ, agginā vā daḍḍhaṃ, udakena vā vulhaṃ, pari-bhogena (2.0018) vā jiṇṇaṃ. **Siyā vata meti** bhavye vata mayhaṃ yānaṃ vāhanaṃ hiraññaṃ suvaṇṇaṃ sālī vīhi yavo godhumo. **Taṃ vatāhaṃ na labhā-mīti** tamahaṃ alabhamāno tadanucchavikaṃ kammaṃ akatvā nisinnattā idāni na labhāmīti socati, ayaṃ agāriyasocanā, anagāriyassa pattacīvarādīnaṃ vasena veditabbā.

Aparitassanāvāre **na evaṃ hotīti** yehi kilesehi evaṃ bhavye, tesaṃ pahīnattā na evaṃ hoti. **Diṭṭhiṭṭhānādhīṭṭhānapariyuṭṭhānābhīnivesānusayānanti** diṭṭhīnañca diṭṭhiṭṭhānānañca diṭṭhādhīṭṭhānānañca diṭṭhipariyuṭṭhānānañca abhīnivesānusayā-nañca. **Sabbasaṅkhārasamathāyāti** nibbānatthāya. Nibbānañhi āgamma sabbasa-ṅkhārā-iñjitāni, sabbasaṅkhārācalanāni sabbasaṅkhāravipphanditāni sammanti vūpasammanti, tasmā taṃ,

“sabbasaṅkhārasamatho”ti vuccati. Tadeva ca āgamma khandhūpadhi kilesūpadhi abhisaṅkhārūpadhi, pañcakāmaguṇūpadhīti ime upadhayo paṭinissajjiyanti, taṅhā khīyati virajjati nirujjhati, tasmā taṃ, “sabbūpadhipaṭinissaggo taṅhākkhayo virāgo nirodho”ti vuccati. **Nibbānāyāti** ayaṃ panassa sarūpaniddeso, iti sabbeheva imehi padehi nibbānassa sacchikiriyatthāya dhammaṃ desentassāti aya-mattho dīpito. **Tassevaṃ hotīti** tassa diṭṭhigatikassa **ucchijjissāmi nāmassu, vinassissāmi nāmassu, nāssu nāma bhavissāmīti** evaṃ hoti. Diṭṭhigatikassa hi tilakkhaṇaṃ āropetvā suññatāpaṭisaṃyuttaṃ katvā desiyamānaṃ dhammaṃ suṇantassa tāso uppajjati. Vuttañhetam- “tāso heso, bhikkhave, asutavato puthujjanassa no cassaṃ, no ca me siyā”ti (saṃ. ni. 3.55).

**243.** Ettāvata bahiddhāparikkhāravinaṣe tassanakassa ca notassanakassa ca ajjhatakkhandhavināse tassanakassa ca notassanakassa cāti imesaṃ vasena catukkoṭikā suññatā kathitā. Idāni bahiddhā parikkhāraṃ pariggahaṃ nāma katvā, vīsativatthukaṃ sakkāyadiṭṭhiṃ attavādupādānaṃ nāma katvā, sakkāyadiṭṭhipamukhā dvāsaṭṭhi diṭṭhiyo diṭṭhinissayaṃ nāma katvā tikoṭikaṃ suññataṃ dassetuṃ **taṃ, bhikkhave, pariggahanti**-ādimāha. Tattha **pariggahanti** bahiddhā parikkhāraṃ. **Pariggaṇheyyāthāti** yathā viññū manusso pariggaṇheyya (2.0019). **Ahampi kho taṃ, bhikkhave,** bhikkhave, tumhepi na passatha, ahampi na passāmi, iti evarūpo pariggaho natthīti dasseti. Evaṃ sabbattha attho veditabbo.

**244.** Evaṃ tikoṭikaṃ suññataṃ dassetvā idāni ajjhatakkhandhe attāti bahiddhā parikkhāre attaniyanti katvā dvikoṭikaṃ dassento **attani vā, bhikkhave, satīti**-ādimāha. Tattha ayaṃ saṅkhepattho, bhikkhave, attani vā sati idaṃ me parikkhārajātaṃ attaniyanti assa, attaniyeva vā parikkhāre sati ayaṃ me attā imassa parikkhārassa sāmīti, evaṃ ahanti. Sati mamāti, mamāti sati ahanti yuttaṃ bhavēyya. **Saccatoti bhūtato, thetatoti** tathato thirato vā.

Idāni ime pañcakkhandhe aniccaṃ dukkhaṃ anattāti evaṃ tiparivaṭṭavasena aggaṇhanto ayaṃ ariṭṭho viya mayhaṃ sāsane kalalaṃ kacavaraṃ pakkipatīti dassento **taṃ kiṃ maññatha, bhikkhave, rūpaṃ niccaṃ vāti**-ādimāha. Tattha **aniccaṃ, bhanteti,** bhante, yasmā hutvā na hoti, tasmā aniccaṃ. Uppādavayavattito vipariṇāmatāvākālikaniccapaṭikkhepaṭṭhena vāti catūhi kāraṇehi aniccaṃ. **Dukkhaṃ, bhanteti,** bhante, paṭipīlanākārena dukkhaṃ, santāpadukkhama dukkhavattukasukhapaṭikkhepaṭṭhena vāti catūhi kāraṇehi dukkhaṃ. **Vipariṇāmadhammanti** bhavasaṅkanti-upagamanasabhāvaṃ pakatibhāvavijahanasabhāvaṃ. **Kallaṃ nu taṃ samanupassituṃ etaṃ mama, esohamasmi, eso me attāti** yuttaṃ nu kho taṃ imesaṃ tiṇṇaṃ taṅhāmānadiṭṭhiggāhānaṃ vasena ahaṃ mamāti evaṃ gahetuṃ. **No hetam, bhanteti** iminā te bhikkhū avasavattanākārena rūpaṃ, bhante, anattāti paṭijānanti. Suñña-assāmika-anissara-attapaṭikkhepaṭṭhena vāti catūhi kāraṇehi anattā.

Bhagavā hi katthaci aniccavasena anattattaṃ dasseti, katthaci dukkhavasena, katthaci ubhayavasena. “Cakkhu attāti yo vadeyya, taṃ na upapajjati, cakkhussa uppādopi vayopi paññāyati. Yassa kho pana uppādopi vayopi paññāyati, attā me uppajjati ca veti cāti iccassa evamāgataṃ hoti, tasmā taṃ na upapajjati cakkhu

attāti yo vadeyya, iti cakkhu anattā”ti (ma. ni. 3.422) imasmiñhi **chachakkasutte** aniccavasena anattataṃ dasseti. “Rūpañca hidaṃ, bhikkhave (2.0020), attā abhāvissa, nayidaṃ rūpaṃ ābādhāya saṃvatteyya, labbhettha ca rūpe ‘evaṃ me rūpaṃ hotu, evaṃ me rūpaṃ mā ahoṣī”ti. Yasmā ca kho, bhikkhave, rūpaṃ anattā, tasmā rūpaṃ ābādhāya saṃvattati, na ca labbhati rūpe ‘evaṃ me rūpaṃ hotu, evaṃ me rūpaṃ mā ahoṣī”ti (mahāva. 20; saṃ. ni. 3.59) imasmiṃ **anattalakkhaṇasutte** dukkhasena anattataṃ dasseti. “Rūpaṃ, bhikkhave, aniccaṃ, yadaniccaṃ taṃ dukkhaṃ, yaṃ dukkhaṃ tadanattā, yadanattā taṃ ‘nettaṃ mama, nesohamasmi, na meso attā”ti evametataṃ yathābhūtaṃ sammappaññāya daṭṭhabban”ti (saṃ. ni. 3.76) imasmiṃ **arahattasutte** ubhayavasena anattataṃ dasseti. Kasmā? Aniccaṃ dukkhañca pākaṭaṃ. Anattāti na pākaṭaṃ.

Paribhogabhājanādīsu hi bhinnesu aho aniccanti vadanti, aho anattāti vattā nāma natthi. Sarīre gaṇḍapiḷakādīsu vā uṭṭhitāsu kaṇṭakena vā viddhā aho dukkhanti vadanti, aho anattāti pana vattā nāma natthi. Kasmā? Idañhi anattalakkhaṇaṃ nāma avibhūtaṃ duddasaṃ duppaññāpanaṃ. Tena taṃ bhagavā aniccavasena vā dukkhasena vā ubhayavasena vā dasseti. Tayidaṃ imasmimpi te parivaṭṭe aniccadukkhaseneva dassitaṃ. Vedanādīsupi eseva nayo.

**Tasmā tiha, bhikkhavi,** bhikkhave, yasmā etarahi aññadāpi rūpaṃ aniccaṃ dukkhaṃ anattā, tasmāti attho. **Yaṃkiñci rūpanti-**ādīni **visuddhimagge** khandhani-dese vitthāritāneva.

**245. Nibbindatī** Ti ukkaṇṭhati. Ettha ca **nibbidā**ti vuṭṭhānagāminīvipassanā adhippetā. Vuṭṭhānagāminīvipassanāya hi bahūni nāmāni. Esā hi katthaci sañña-gganti vuttā. Katthaci dhammaṭṭhitiñāṇanti. Katthaci pārisuddhipadhāniyaṅganti. Katthaci paṭipadāññadassanavisuddhīti. Katthaci tammayatāpariyādānanti. Katthaci tīhi nāmehi. Katthaci dvīhīti.

Tattha **poṭṭhapādasutte** tāva “saññā kho, poṭṭhapāda, paṭhamaṃ uppajjati, pacchā ñāṇaṃ”ti (dī. ni. 1.416) evaṃ **sañña-gganti** vuttā. **Susimasutte** “pubbe kho, susima, dhammaṭṭhitiñāṇaṃ (2.0021), pacchā nibbāne ñāṇaṃ”ti (saṃ. ni. 2.70) evaṃ **dhammaṭṭhitiñāṇanti** vuttā. **Dasuttarasutte** “paṭipadāññadassanavisuddhipadhāniyaṅgaṃ”ti (dī. ni. 3.359) evaṃ **pārisuddhipadhāniyaṅganti** vuttā. **Rathavinīte** “kiṃ nu kho, āvuso, paṭipadāññadassanavisuddhatthaṃ bhagavati brahmaccariyaṃ vussatī”ti (ma. ni. 1.257) evaṃ **paṭipadāññadassanavisuddhīti** vuttā. **Salāyatanavibhaṅge** “atammayataṃ, bhikkhave, nissāya atammayataṃ āgamma yāyaṃ upekkhā nānattā nānattasitā, taṃ abhinivajjetvā yāyaṃ upekkhā ekattā ekattasitā, taṃ nissāya taṃ āgamma evametissā pahānaṃ hoti, evametissā samatikkamo hoti”ti (dī. ni. 3.310) evaṃ **tammayatāpariyādānanti** vuttā. **Paṭisambhidāmagge** “yā ca muñcitukamyatā, yā ca paṭisaṅkhānupassanā, yā ca saṅkhārupekkhā, ime dhammā ekatthā byañjanaṃ eva nānaṃ”ti (paṭi. ma. 1.54) evaṃ tīhi nāmehi vuttā. **Paṭṭhāne** “anulomaṃ gotrabhussa anantarapaccayena paccayo, anulomaṃ vodānassa anantarapaccayena paccayo”ti (paṭṭhā. 1.1.417) evaṃ dvīhi nāmehi vuttā. Imasmiṃ pana alagaddasutte nibbindatīti nibbidānāmena āgatā.

**Nibbidā virajjatī**ti ettha **virāgoti** maggo **virāgā vimuccatī**ti ettha virāgena

maggena vimuccatīti phalaṃ kathitaṃ. **Vimuttasmiṃ vimuttamiti ñāṇaṃ hotīti** idha paccavekkhaṇā kathitā.

Evaṃ vimuttacittaṃ mahākhīṇāsavaṃ dassetvā idāni tassa yathābhūtehi pañcahi kāraṇehi nāmaṃ gaṇhanto **ayaṃ vuccati, bhikkhaveli-ādimāha. Avijjāti** vaṭṭamūlikā avijjā. Ayañhi durukkhipanaṭṭhena **palighoti** vuccati. Tenesa tassa ukkhittattā **ukkhittapalighoti** vutto. **Tālāvattukātā** Ti sīsacchinnatālo viya katā, samūlaṃ vā tālaṃ uddharitvā tālassa vatthu viya katā, yathā tasmīṃ vatthusmiṃ puna so tālo na paññāyati, evaṃ puna apaññattibhāvaṃ nīṭāti attho. **Ponobbhavi-** **koti** punabbhavadāyako. **Jāti-saṃsāroti-ādīsu** jāyanavasena ceva saṃsaraṇava-sena ca evaṃ laddhanāmānaṃ punabbhava-khandhānaṃ paccayo kammābhisa-ñkhāro. So hi punappunaṃ uppattikaraṇavasena parikkhipitvā ṭhitattā **parikkhāti** vuccati, tenesa tassā saṃkiṇṇattā vikiṇṇattā **saṃkiṇṇaparikkhoti** (2.0022) vutto. **Taṇhāti** vaṭṭamūlikā taṇhā. Ayañhi gambhīrānugataṭṭhena **esikāti** vuccati. Tenesa tassā abbūḷhattā luñcitvā chaḍḍitattā **abbūḷhesikoti** vutto. **Oraṃbhāgiyānīti** oraṃ bhajanakāni kāmabhava upapattipaccayāni. Etāni hi kavāṭaṃ viya nagaradvāraṃ cittaṃ pidahitvā ṭhitattā **aggaḷāti** vuccanti. Tenesa tesam nirākatattā bhinnattā **nira-** **ggaḷoti** vutto. **Ariyoti** nikkilesa parisuddho. **Pannaddhajoti** patitamānaddhajo. **Panna-** **bhāroti** khandhabhāra-kilesabhāra-abhisañkhārabhārapañckāmaguṇabhāra pannā orohitā assāti **pannabhāro**. Apica idha mānabhārasseva oropitattā panna-bhāroti adhippeto. **Visaṃyuttoti** catūhi yogehi sabbakilesehi ca visaṃyutto. Idha pana mānasam-yogeneva visaṃyuttattā visaṃyuttoti adhippeto. **Asmimānoti** rūpe asmīti māno, vedanāya... saññāya... sañkhāresu... viññāṇe asmīti māno.

Ettāvatā bhagavatā maggena kilese khepetvā nirodhasayanavaragatassa nibbā-nārammaṇaṃ phalasaṃpattim appētvā viharato khīṇāsavassa kālo dassito. Yathā hi dve nagarāni ekaṃ coranagaraṃ, ekaṃ khemanagaraṃ. Atha ekassa mahāyodhassa evaṃ bhavēyya- “yāvimaṃ coranagaraṃ tiṭṭhati, tāva khemana-garaṃ bhayato na muccati, coranagaraṃ anagaraṃ karissāmi” ti sannāhaṃ katvā khaggaṃ gahetvā coranagaraṃ upasañkamitvā nagaradvāre ussāpīte esika-tthambhe khaggena chinditvā sadvārabāhakaṃ kavāṭaṃ chinditvā palighaṃ ukkhipitvā pākāraṃ bhindanto parikkhaṃ saṃkiritvā nagarasobhanatthāya ussite dhaje pātētvā nagaraṃ agginā jhāpetvā khemanagaraṃ pavisitvā pāsādaṃ abhi-ruyha ñātigaṇaparivuto surasabhojanaṃ bhuñjēyya, evaṃ coranagaraṃ viya sakkāyo, khemanagaraṃ viya nibbānaṃ, mahāyodho viya yogāvācaro. Tassevaṃ hoti, “yāva sakkāyavaṭṭaṃ vattati, tāva dvattimsakammakāraṇa-aṭṭhanavutirogapa-ñcavīsati-mahābhayehi parimuccanaṃ natthi” ti. So mahāyodho viya sannāhaṃ silasannāhaṃ katvā, paññākhaggaṃ gahetvā khaggena esikatthambhe viya ara-hattamaggena taṇhesikaṃ luñcitvā, so yodho sadvārabāhakaṃ nagarakavāṭaṃ viya pañcorambhāgiyasam-yojanaggaḷaṃ ugghāṭētvā, so yodho palighaṃ viya, avijjāpalighaṃ ukkhipitvā, so yodho pākāraṃ bhindanto parikkhaṃ viya kammā-bhisañkhāraṃ (2.0023) bhindanto jāti-saṃsāraparikkhaṃ saṃkiritvā, so yodho nagarasobhanatthāya ussāpīte dhaje viya mānaddhaje pātētvā sakkāyanagaraṃ jhāpetvā, so yodho khemanagare uparipāsāde surasabhojanaṃ viya kilesani-

bbānaṃ nagaraṃ pavisitvā amatanirodhārammaṇaṃ phalasaṃpattisukhaṃ anubhavamāno kālaṃ vītināmeti.

**246.** Idāni evaṃ vimuttacittassa khīṇāsavassa parehi anadhigamanīyaviññāṇataṃ dassento **evaṃ vimuttacittaṃ khoti-ādimāha.** Tattha **anvesanti** anvesantā gavesantā. **Idaṃ nissitanti** idaṃ nāma nissitaṃ. **Tathāgatassā** Ti ettha sattopi **tathāgatoti** adhippeto, uttamaṃpuggalo khīṇāsavopi. **Ananuvijjoti** asaṃvijjamāno vā avindeyyo vā. Tathāgatoti hi satte gahite asaṃvijjamānoti attho vaṭṭati, khīṇāsava gahite avindeyyoti attho vaṭṭati.

Tattha purimanaye ayamadhippāyo- bhikkhave, ahaṃ diṭṭheva dhamme dharamānakaṃyeva khīṇāsavaṃ tathāgato satto puggaloti na paññapemi. Appaṭisaṇdhikaṃ pana parinibbutaṃ khīṇāsavaṃ sattoti vā puggaloti vā kiṃ paññapeṣṣāmi? Ananuvijjo tathāgato. Na hi paramatthato satto nāma koci atthi, tassa avijjamānassa idaṃ nissitaṃ viññāṇanti anvesantāpi kiṃ adhigacchissanti? Kathaṃ paṭilabhissantīti attho. Dutīyanaye ayamadhippāyo- bhikkhave, ahaṃ diṭṭheva dhamme dharamānakaṃyeva khīṇāsavaṃ viññāṇavasena indādīhi avindiyaṃ vadāmi. Na hi sa-indā devā sabrahmakā sapajāpatikā anvesantāpi khīṇāsavassa vipassanācittaṃ vā maggacittaṃ vā phalacittaṃ vā, idaṃ nāma ārammaṇaṃ nissāya vattatīti jānituṃ sakkonti. Te appaṭisaṇdhikassa parinibbutassa kiṃ jānissantīti?

**Asatāti** asantena. **Tucchāti** tucchakena. **Musāti** musāvādena. **Abhūtenāti** yaṃ natthi, tena. **Abbhācikkhantīti** abhi-ācikkhanti, abhibhavitvā vadanti. **Venayikoti** vinayati vināsetīti **vinayo**, so eva **venayiko**, sattavināsakoti adhippāyo. **Yathā cāhaṃ na, bhikkhave** Ti, bhikkhave, yena vākārena ahaṃ na



sattavināsako. **Yathā cāhaṃ na vadāmīti** yena vā kāraṇena ahaṃ sattavināsaṃ na paññapemi (2.0024). Idaṃ vuttaṃ hoti- yathāhaṃ na sattavināsako, yathā ca na sattavināsaṃ paññapemi, tathā maṃ te bhonto samaṇabrāhmaṇā “venayiko samaṇo gotamo”ti vadantā sattavināsako samaṇo gotamoti ca, “sato sattassa ucchedaṃ vināsaṃ vibhavaṃ paññapeti”ti vadantā sattavināsaṃ paññapetīti ca asatā tucchā musā abhūtena abbhācikkhantīti.

**Pubbe cāti** pubbe mahābodhimaṇḍamhiyeva ca. **Etarahi cāti** etarahi dhammade-sanāyañca. **Dukkhañceva paññapemi, dukkhassa ca nirodhanti** dhammacakkaṃ appavattetvā bodhimaṇḍe viharantopi dhammacakkappavattanato paṭṭhāya dhammaṃ desentopi catusaccameva paññapemīti attho. Ettha hi dukkhaggaha-ṇena tassa mūlabhūto samudayo, nirodhaggahaṇena taṃsampāpako maggo gahitova hotīti veditabbo. **Tatra ceti** tasmīṃ catusaccappakāsane. **Pareti** saccāni ājānituṃ paṭivijjhituṃ asamatthapuggalā. **Akkosantīti** dasahi akkosavatthūhi akko-santi. **Paribhāsantīti** vācāya paribhāsanti. **Rosenti vihesentīti** rosessāma viheses-sāmāti adhippāyena ghaṭṭenti dukkhāpenti. **Tatrāti** tesu akkosādīsu, tesu vā para-puggalesu. **Āghātoti** kopo. **Appaccayoti** domanassaṃ. **Anabhiraddhīti** atuṭṭhi.

**Tatra ceti** catusaccappakāsane yeva. **Pareti** catusaccappakāsanaṃ ājānituṃ paṭivijjhituṃ samatthapuggalā. **Ānandoti** ānandapīti. **Uppilāvitattanti** uppilāpana-pīti. **Tatra ce**ti catusaccappakāsanaṃ hiyeva. **Tatrāti** sakkārādīsu. **Yaṃ kho idaṃ pubbe pariññātanti** idaṃ khandhapañcakaṃ pubbe bodhimaṇḍe tīhi pariññāhi pariññātaṃ. **Tatthameti** tasmīṃ khandhapañcakaṃ ime. Kiṃ vuttaṃ hoti? Tatrāpi tathāgatassa ime sakkārā mayi kariyantīti vā ahaṃ ete anubhavāmīti vā na hoti. Pubbe pariññātakhandhapañcakaṃ yeva ete sakkāre anubhotīti ettakameva hotīti. **Tasmāti** yasmā saccāni paṭivijjhituṃ asamatthā tathāgatampi akkosanti, tasmā. Sesāṃ vuttanayeneva veditabbaṃ.

**247. Tasmā tiha** (2.0025), **bhikkhave, yaṃ na tumhākanti** yasmā attaniyepi chandarāgappahānaṃ dīgharattaṃ hitāya sukhāya saṃvattati, tasmā yaṃ na tumhākaṃ, taṃ pajahathāti attho. **Yathāpaccayaṃ vā kareyyāti** yathā yathā iccheyya tathā tathā kareyya. **Na hi no etaṃ, bhante, attā vāti**, bhante, etaṃ tiṇaka-ṭṭhasākhāpalāsaṃ amhākaṃ neva attā na amhākaṃ rūpaṃ na viññāṇanti vadanti. **Attaniyaṃ vāti** amhākaṃ cīvarādiparikkhāropi na hotīti attho. **Evameva kho, bhikkhave, yaṃ na tumhākaṃ taṃ pajahathāti** bhagavā, khandhapañcakaṃ yeva na tumhākanti dassetvā pajahāpeti, tañca kho na uppāṭetvā, luñcitvā vā. Chanda-rāgavinayena panetaṃ pajahāpeti.

**248. Evaṃ svākkhātoti** ettha tiparivaṭṭato paṭṭhāya yāva imaṃ ṭhānaṃ āhari-tumpi vaṭṭati, paṭilomena pemamattakena saggaparāyaṇato paṭṭhāya yāva imaṃ ṭhānaṃ āharitumpi vaṭṭati. **Svākkhātoti** sukathito. Sukathitattā eva uttāno vivaṇṇo pakāsito. **Chinnapilotikoti** pilotikā vuccati chinnaṃ bhinnaṃ tattha tattha sibbitaṃ gaṇṭhikataṃ jīṇṇaṃ vatthaṃ, taṃ yassa natthi, aṭṭhahatthaṃ vā navahatthaṃ vā ahasāṭakaṃ nivattho, so chinnapilotiko nāma. Ayampi dhammo tādiso, na hettha kohaññādivasena chinnabhinnasibbitagaṇṭhikatabhāvo atthi. Apica kaca-varo pilotikoti vuccati. Imasmiñca sāsane samaṇakacavaraṃ nāma patiṭṭhātuṃ na

labhati. Tenevāha-

“Kāraṇḍavaṃ niddhamatha, kasambuñcāpakassatha;  
tato palāpe vāhetha, assamaṇe samaṇamānine.  
Niddhamitvāna pāpicche, pāpa-ācāragocare;  
suddhā suddhehi saṃvāsaṃ, kappayavho patissatā;  
tato samaggā nipakā, dukkhassantaṃ karissathā”ti. (su. ni. 283-285);

Iti samaṇakacavarassa chinnattāpi ayaṃ dhammo **chinnapilotiko nāma** hoti. **Vaṭṭaṃ tesaṃ natthi paññāpanāyā** Ti tesaṃ vaṭṭaṃ apaññattibhāvaṃ gataṃ nippa-  
ññattikaṃ jātaṃ. Evarūpo mahākhīṇāsavo evaṃ svākkhāte sāsaneveva uppajjati. Yathā ca khīṇāsavo, evaṃ anāgāmi-ādayopi.

Tattha (2.0026) **dhammānusārino saddhānusārinoti** ime dve sotāpattima-  
ggaṭṭhā honti. Yathāha- “katamo ca puggalo dhammānusārī? Yassa puggalassa  
sotāpattiphalasacchikiriyāya paṭipannassa paññindriyaṃ adhimattaṃ hoti, paññā-  
vāhiṃ paññāpubbaṅgamaṃ ariyamaggaṃ bhāveti. Ayaṃ vuccati puggalo  
dhammānusārī. Sotāpattiphalasacchikiriyāya paṭipanno puggalo dhammānusārī,  
phale ṭhito diṭṭhippatto. Katamo ca puggalo saddhānusārī? Yassa puggalassa  
sotāpattiphalasacchikiriyāya paṭipannassa saddhindriyaṃ adhimattaṃ hoti,  
saddhāvāhiṃ saddhāpubbaṅgamaṃ ariyamaggaṃ bhāveti. Ayaṃ vuccati  
puggalo saddhānusārī. Sotāpattiphalasacchikiriyāya paṭipanno puggalo saddhānu-  
sārī, phale ṭhito saddhāvimutto”ti (pu. pa. 30). **Yesaṃ mayi saddhāmattaṃ pema-  
mattanti** iminā yesaṃ añño ariyadhammo natthi, tathāgate pana saddhāmattaṃ  
pemamattameva hoti. Te vipassakapuggalā adhippetā. Vipassakabhikkhūnañhi  
evaṃ vipassanaṃ paṭṭhapetvā nisinnānaṃ dasabale ekā saddhā ekaṃ pemaṃ  
uppajjati. Tāya saddhāya tena pemena hatthe gahetvā sagge ṭhapitā viya honti,  
niyatagatikā kira ete. Porāṇakattherā pana evarūpaṃ bhikkhuṃ cūlasotāpannoti  
vadanti. Sesaṃ sabbattha uttānatthamevāti.

Papañcasūdaniyā majjhimanikāyaṭṭhakathāya

Alagaddūpamasuttavaṇṇanā niṭṭhitā.

### 3. Vammikasuttavaṇṇanā

**249. Evaṃ me sutanti** vammikasuttaṃ. Tattha **āyasmāti** piyavacanamaṃtaṃ.  
**Kumārakassapoti** tassa nāmaṃ. Kumārakāle pabbajitattā pana bhagavatā,  
“kassapaṃ pakkosatha, idaṃ phalaṃ vā khādaniyaṃ vā kassapassa dethā”ti  
vutte, katarassa kassapassāti kumārakassapassāti evaṃ gahitanāmattā tato  
paṭṭhāya vuḍḍhakālepi “kumārakassapo” tveva vuccati. Apica raññā posāvanika-  
puttattāpi taṃ “kumārakassapo”ti sañjāniṃsu. Ayaṃ panassa pubbayogato  
paṭṭhāya āvibhāvakathā-

Thero (2.0027) kira padumuttarassa bhagavato kāle seṭṭhiputto ahosi. Athekadivasam bhagavantam citrakathim ekam attano sāvakaṃ ṭhānantare ṭhapentam disvā bhagavato sattāham dānam datvā, “ahampi bhagavā anāgate ekassa buddhassa ayam thero viya citrakathī sāvako bhaveyyan”ti patthanam katvā puññāni karonto kassapassa bhagavato sāsane pabbajitvā visesam nibbattetum nāsakkhi.

Tadā kira parinibbutassa bhagavato sāsane osakkante pañca bhikkhū nisseṇim bandhitvā pabbatam abhiruyha samaṇadhammam akaṃsu. Saṅghatthero tatiya-divase arahattam patto. Anuthero catutthadivase anāgāmī ahosi. Itare tayo visesam nibbattetum asakkontā devaloke nibbattimisu. Tesam ekam buddhantaram devesu ca manussesu ca sampattim anubhontānam eko takkasilāyam rājakule nibbattitvā pukkusāti nāma rājā hutvā bhagavantam uddissa pabbajitvā rājagham gacchanto kumbhakārasālāyam bhagavato dhammadesanam sutvā anāgāmiphalam patto. Eko ekasmim samuddapaṭṭane kulaghare nibbattitvā nāvam āruyha bhinnanāvo dārucīrāni nivāsetvā lābhasampattim patto, “aham arahā”ti cittam uppādetvā, “na tvam arahā, gaccha satthāram pañham pucchā”ti atthakāmāya devatāya codito tathā katvā arahattaphalam patto.

Eko rājagahe ekissā kuladārikāya kucchimhi uppanno. Sā ca paṭhamam mātā-pitaro yācitvā pabbajjam alabhamānā kulagharam gatā gabbhasaṅṭhitampi ajānantī sāmikam ārādhētva tena anuññātā bhikkhunisu pabbajitā. Tassā gabbhinimittam disvā bhikkhuniyo devadattam pucchimisu, so “assamaṇī”ti āha. Dasabalam pucchimisu, satthā upālittheram paṭicchāpesi. Thero sāvattinagaravāsīni kulāni visākhañca upāsikam pakkosāpetvā sodhento, – “pure laddho gabbho, pabbajjā arogā”ti āha. Satthā “suvinicchitam adhikaraṇan”ti therassa sādhukāram adāsi. Sā bhikkhunī suvaṇṇabimbasisam puttam vijāyi, tam gahetvā rājā pasedi kosalo posāpesi. “Kassapo”ti cassa nāmam katvā aparabhāge alaṅkaritvā (2.0028) satthu santikam netvā pabbājesi. Iti rañño posāvanikaputtattāpi tam “kumārakassapo”ti sañjānimisūti.

**Andhavaneti** evaṃnāmake vane. Tam kira vanam dvinnam buddhānam kāle avijahitanāmam andhavanam tveva paññāyati. Tatrāyam paññattivibhāvanā- appāyukabuddhānañhi sarīradhātu na ekagghanā hoti. Adhiṭṭhānānubhāvena vippakiriyati. Teneva amhākampi bhagavā, – “aham na ciratṭhitiko, appakehi sattehi aham diṭṭho, yehi na diṭṭho, teva bahutarā, te me dhātuyo ādāya tattha tattha pūjentā saggaparāyaṇā bhavissanti”ti parinibbānakāle, “attano sarīram vippakiriyatū”ti adhiṭṭhāsi. Dīghāyukabuddhānam pana suvaṇṇakkhandho viya ekagghanam dhātusarīram tiṭṭhati.

Kassapassāpi bhagavato tatheva aṭṭhāsi. Tato mahājanā sannipatitvā, “dhātuyo ekagghanā na sakkā viyojetum, kiṃ karissāmā”ti sammantayitvā ekagghanameva cetiyam karissāma, kittakam pana hotu tanti āhaṃsu. Eke sattayojaniyanti āhaṃsu. Etaṃ atimahantam, anāgate jaggitum na sakkā, chayojanam hotu, pañcayojanam... catuyojanam... tiyojanam... dviyojanam... ekayojanam hotūti sannipattānam katvā iṭṭhakā kīdisā hontūti bāhirante iṭṭhakā rattasuvaṇṇamayā eka-

gghanā sataśahasagghanikā hontu, abhantarimante paññāsahasagghanikā. Haritālamanosilāhi mattikākiccaṃ kayiratu, telena udakakiccanti niṭṭhaṃ gantvā cattāri mukhāni catudhā vibhajiṃsu. Rājā ekaṃ mukhaṃ gaṇhi, rājaputto pathavi-ndarakumāro ekaṃ, amaccānaṃ jeṭṭhako hutvā senāpati ekaṃ, janapadānaṃ jeṭṭhako hutvā seṭṭhi ekaṃ.

Tattha dhanasampannatāya rājāpi suvaṇṇaṃ nīharāpetvā attanā gahitamukhe kammaṃ ārabhi, uparājāpi, senāpatipi. Seṭṭhinā gahitamukhe pana kammaṃ olīyati. Tato yasorato nāma eko upāsako tepiṭako bhāṇako anāgāmi ariyasāvako, so kammaṃ olīyatīti ñatvā pañca sakaṭasatāni yojāpetvā janapadaṃ gantvā “kassapasammāsambuddho (2.0029) vīsativassasahasāni ṭhatvā parinibbuto. Tassa yojanikaṃ ratanacetiyaṃ kayirati, yo yaṃ dātuṃ ussahati suvaṇṇaṃ vā hiraññaṃ vā sattarataṇaṃ vā haritālaṃ vā manosilaṃ vā, so taṃ detū”ti samādapesi. Manussā attano attano thāmena hiraññasuvaṇṇādīni adaṃsu. Asakkontā telataṇḍulādīni dentiyeva. Upāsako telataṇḍulādīni kammakārānaṃ bhattavetanatthaṃ paḥiṇāti, avasesehi suvaṇṇaṃ cetāpetvā paḥiṇāti, evaṃ sakalajambudīpaṃ acari.

Cetiye kammaṃ niṭṭhitanti cetiyaṭṭhānato paṇṇaṃ paḥiṇiṃsu- “niṭṭhitaṃ kammaṃ ācariyo āgantvā cetiyaṃ vandatū”ti. Sopi paṇṇaṃ paḥiṇi- “mayā sakalajambudīpo samādapito, yaṃ atthi, taṃ gahetvā kammaṃ niṭṭhāpentū”ti. Dvepi paṇṇāni antarāmagge samāgamiṃsu. Ācariyassa paṇṇato pana cetiyaṭṭhānato paṇṇaṃ paṭhamataraṃ ācariyassa hatthaṃ agamāsi. So paṇṇaṃ vācetvā cetiyaṃ vandissāmīti ekakova nikkhami. Antarāmagge aṭaviyaṃ pañca corasatāni utṭhahiṃsu. Tatrekacce taṃ disvā iminā sakalajambudīpato hiraññasuvaṇṇaṃ sampiṇḍitaṃ, nidhikumbhī no pavaṭṭamānā āgatāti avasesānaṃ ārocetvā taṃ aggaheṣuṃ. Kasmā tātā, maṃ gaṇhathāti? Tayā sakalajambudīpato sabbaṃ hiraññasuvaṇṇaṃ sampiṇḍitaṃ, amhākampi thokaṃ thokaṃ dehīti. Kiṃ tumhe na jānātha, kassapo bhagavā parinibbuto, tassa yojanikaṃ ratanacetiyaṃ kayirati, tadatthāya mayā samādapitaṃ, no attano atthāya. Taṃ taṃ laddhaladdhaṭṭhānato tattheva pesitaṃ, mayhaṃ pana nivatthasāṭakamattaṃ ṭhapetvā aññaṃ vittaṃ kākaṇi-kampi natthīti.

Eke, “evametaṃ vissajetha ācariyaṃ”ti āhaṃsu. Eke,

“ayaṃ rājapūjito amaccapūjito, amhesu kañciveva nagaravīthiyaṃ disvā rājarāja-mahāmattādīnaṃ ārocetvā anayavyasanaṃ pāpuṇāpeyyā”ti āhaṃsu. Upāsako, “tātā, nāhaṃ evaṃ karissāmi”ti āha. Tañca kho tesu kāruññaena, na attano jīvitani-kantiyā. Atha tesu gahetabbo vissajjetabboti vivadantesu gahetabboti laddhikā eva bahutarā hutvā jīvitā voropayiṃsu.

Tesaṃ (2.0030) balavaguṇe ariyasāvake aparādhena nibbutadīpasikhā viya akkhīni antaradhāyiṃsu. Te, “kahaṃ bho cakkhu, kahaṃ bho cakkhū”ti vippala-pantā ekacce ñātakehi gehaṃ nītā. Ekacce noñtakā anāthāti tattheva aṭaviyaṃ rukkhamaṇe paṇṇasālāyaṃ vasīṃsu. Aṭaviṃ āgatamanussā kāruññaena tesaṃ taṇḍulaṃ vā puṭabhataṃ vā paribbayaṃ vā denti. Dārupaṇṇādīnaṃ atthāya gantvā āgatā manussā kuhiṃ gatathāti vutte andhavanaṃ gatamhāti vadanti. Evaṃ dvinnampi buddhānaṃ kāle taṃ vanaṃ andhavanaṃtveva paññāyati. Kassapabuddhakāle panetaṃ chaḍḍitajanapade aṭavi ahoṣi. Amhākaṃ bhaga-vato kāle sāvattiyaṃ avidūre jetavanassa piṭṭhibhāge pavivekakāmānaṃ kulapu-ttānaṃ vasanaṭṭhānaṃ padhānagharaṃ ahoṣi, tattha āyasmā kumārakassapo tena samayena sekhaṭṭipadaṃ pūrayamāno viharati. Tena vuttaṃ “andhavane viharati”ti.

**Aññatarā devatāti** nāmagottavasena apākaṭā ekā devatāti attho. “Abhijānāti no, bhante, bhagavā ahuññātaññatarassa mahesakkhassa saṃkhittena taṇhāsaṅkha-yavimuttiṃ bhāsītā”ti (ma. ni. 1.365) ettha pana abhiññāto sakkopi devarājā aññataroti vutto. **Devatāti** ca idaṃ devānampi devadhītānampi sādharmaṇavacanaṃ. Imasmiṃ panatthe devo adhippeto. **Abhikkantāya rattiyā** Ti ettha abhikkantasaddo khayasundarābhirūpa-abbhānumodanādīsu dissati. Tattha- “abhikkantā, bhante, ratti, nikkhanto paṭhamo yāmo, ciraṇisīno bhikkhusaṅgho, uddisatu, bhante, bhagavā bhikkhūnaṃ pātimokkhaṃ”ti evamādīsu (a. ni. 8.20) khaye dissati. “Ayaṃ imesaṃ catunnaṃ puggalānaṃ abhikkantataro ca paṇītataro cā”ti (a. ni. 4.100) evamādīsu sundare.

“Ko me vandati pādāni, iddhiyā yasasā jalaṃ;  
abhikkantena vaṇṇena, sabbā obhāsayaṃ disā”ti. (vi. va. 857)-  
Evamādīsu abhirūpe. “Abhikkantaṃ, bho gotamā”ti evamādīsu (pārā. 15) abbhānumodane. Idha pana khaye. Tena **abhikkantāya rattiyā**ti parikkhīṇāya rattiyāti vuttaṃ hoti. Tatthāyaṃ devaputto majjhimayāmasamanantare āgatoti (2.0031) veditabbo. **Abhikkantavaṇṇā**ti idha abhikkantasaddo abhirūpe. Vaṇṇasaddo pana chavi-thuti-kulavaggakāraṇa-saṅghānapamāṇarūpāyatanaṃ dissati. Tattha, “suvaṇṇavaṇṇosi bhagavā”ti evamādīsu chaviyā. “Kadā saññūḷhā pana te gaha-pati samaṇassa gotamassa vaṇṇā”ti (ma. ni. 2.77) evamādīsu thutiyaṃ. “Cattārome, bho gotama, vaṇṇā”ti evamādīsu (dī. ni. 3.115) kulavagge. “Atha kena nu vaṇṇena, gandhatheṇoti vuccatī”ti evamādīsu (saṃ. ni. 1.234) kāraṇe. “Mahantaṃ hatthirājavaṇṇaṃ abhinimminivā”ti evamādīsu (saṃ. ni. 1.138) saṅghāne. “Tayo pattassa vaṇṇā”ti evamādīsu (pārā. 602) pamāṇe. “Vaṇṇo gandho raso ojā”ti evamādīsu rūpāyatane. So idha chaviyaṃ daṭṭhabbo. Tena **abhikkantavaṇṇā**ti abhirū-pachavi-iṭṭhavaṇṇā, manāpavaṇṇāti vuttaṃ hoti. Devatā hi manussalokaṃ āga-

cchamānā pakatavaṇṇaṃ pakati-iddhiṃ pajahitvā oḷārikaṃ attabhāvaṃ katvā atireka-vaṇṇaṃ atireka-iddhiṃ māpetvā naṭasamajjādīni gacchantā manussā viya abhisāṅkhatena kāyena āgacchanti. Ayampi devaputto tatheva āgato. Tena vuttaṃ “abhikkantavaṇṇā”ti.

**Kevalakappanti** ettha kevalasaddo anavasesa-yebhūyya-abyāmissānatirekadalhattha-visaṃyogādi-anekattho. Tathā hissa, “kevalaparipuṇṇaṃ parisuddhaṃ brahmacariyaṃ”ti (pārā. 1) evamādīsu anavasesattamattho. “Kevalakappā ca aṅgamagadhā pahūtaṃ khādaniyaṃ bhojaniyaṃ ādāya upasaṅkamissanti”ti evamādīsu yebhuyyatā. “Kevalassa dukkhakkhandhassa samudayo hoti”ti (vibha. 225) evamādīsu abyāmissatā. “Kevalaṃ saddhāmatthakaṃ nūna ayamāyasmā”ti (mahāva. 244) evamādīsu anatikatā. “Āyasmato anuruddhassa bāhiyo nāma saddhivihāriko kevalakappaṃ saṅghabhedāya t̥hito”ti (a. ni. 4.243) evamādīsu dalhatthatā. “Kevalī vusitavā uttamapurisoti vuccati”ti (saṃ. ni. 3.57) evamādīsu visaṃyogo. Idha panassa anavasesattamatthoti adhippeto.

Kappasaddo panāyaṃ abhisaddahana-vohāra-kāla-paññatti-chedana-vikappalesa-samantabhāvādi-anekattho. Tathā hissa, “okappaniyametaṃ bhoto (2.0032) gotamassa, yathā taṃ arahato sammāsambuddhassa”ti (ma. ni. 1.387) evamādīsu abhisaddahanamattho. “Anujānāmi, bhikkhave, pañcahi samaṇakappehi phalaṃ paribhuñjitun”ti (cūḷava. 250) evamādīsu vohāro. “Yena sudaṃ niccakkappaṃ viharāmi”ti evamādīsu (ma. ni. 1.387) kālo. “Iccāyasmā kappo”ti (saṃ. ni. 3.124) evamādīsu paññatti. “Alaṅkatā kappitakesamassū”ti (saṃ. ni. 4.365) evamādīsu chedanaṃ. “Kappati dvaṅgulakappo”ti (cūḷava. 446) evamādīsu vikappo. “Atthi kappo nipajjitun”ti (a. ni. 8.80) evamādīsu lesa. “Kevalakappaṃ veḷuvanaṃ obhāsetvā”ti (saṃ. ni. 1.94) evamādīsu samantabhāvo. Idha panassa samantabhāvo attho adhippeto. Tasmā **kevalakappaṃ andhavananti** ettha anavasesaṃ samantato andhavananti evamattho daṭṭhabbo.

**Obhāsetvāti** vatthālaṅkārasarīrasamuṭṭhitāya ābhāya pharivā, candimā viya ca sūriyo viya ca ekobhāsaṃ ekapajjotaṃ karitvāti attho. **Ekamantaṃ aṭṭhāsīti** ekasmiṃ ante, ekasmiṃ okāse aṭṭhāsī. **Etadavocāti** etaṃ “bhikkhu bhikkhū”ti-ādivacanavoca. Kasmā panāyaṃ avanditvā samaṇavohāreneva kathetīti? Samaṇasaññāsamudācāreneva. Evaṃ kirassa ahosi- “ayaṃ antarā kāmāvacare vasi. Ahaṃ pana asmi tato kālato paṭṭhāya brahmacārī”ti samaṇasaññāvassa samudācarati, tasmā avanditvā samaṇavohāreneva katheti. Pubbasahāyo kireso devaputto therassa. Kuto paṭṭhāyāti? Kassapasammāsambuddhakālato paṭṭhāya. Yo hi pubbayoge āgatesu pañcasu sahāyesu anuthero catutthadivase anāgāmī ahosīti vutto, ayaṃ so. Tadā kira tesu saṅghattherassa arahatteneva saddhiṃ abhiññā āgamiṃsu. So, “mayhaṃ kiccaṃ matthakaṃ pattan”ti vehāsaṃ uppativā anotattadahe mukhaṃ dhovivā uttarakuruto piṇḍapātaṃ ādāya āgantvā, “imaṃ, āvuso, piṇḍapātaṃ bhuñjitvā appamattā samaṇadhammaṃ karoṭhā”ti āha. Itare āhaṃsu- “na, āvuso, amhākaṃ evaṃ katikā atthi- ‘yo paṭṭhamaṃ visesaṃ nibbattevā piṇḍapātaṃ āharati, tenābhataṃ bhuñjitvā sesehi samaṇadhammo kātabbo’-ti. Tumhe attano (2.0033) upanissayena kiccaṃ matthakaṃ pāpayittha. Mayampi

sace no upanissayo bhavissati, kiccaṃ matthakaṃ pāpessāma. Papañco esa amhākaṃ, gacchatha tumhe”ti. So yathāphāsukaṃ gantvā āyupariyosāne parinibbāyi.

Punadivase anuthero anāgāmiphalaṃ sacchakāsi, tassa abhiññāyo āgamiṃsu. Sopi tatheva piṇḍapātaṃ āharitvā tehi paṭikkhitto yathāphāsukaṃ gantvā āyupariyosāne suddhāvāse nibbatti. So suddhāvāse ṭhatvā te sahāye olokeno, eko tadāva parinibbuto, eko adhunā bhagavato santike ariyabhūmiṃ patto, eko lābhasakkāraṃ nissāya, “ahaṃ arahā”ti cittaṃ uppādetvā suppārakapaṭṭane vasatīti disvā taṃ upasaṅkamitvā, “na tvaṃ arahā, na arahattamaggaṃ paṭipanno, gaccha bhagavantaṃ upasaṅkamitvā dhammaṃ suṇāhi”ti uyyojesi. Sopi antarghare bhagavantaṃ ovādaṃ yācitvā, “tasmā tiha te bāhiya evaṃ sikkhitabbaṃ diṭṭhe diṭṭhamattaṃ hotū”ti (udā. 10) bhagavatā saṃkhittena ovadito ariyabhūmiṃ sampāpuṇi.

Tato añño eko atthi, so kuhinti olokeno andhavane sekkhapaṭipadaṃ pūrayamāno viharatīti disvā cintesi- “sahāyakassa santike gamissāmīti, gacchantena pana tucchahatthena agantvā kiñci paṇṇākāraṃ gahetvā gantaṃ vaṭṭati, sahāyo kho pana me nirāmisso pabbatamatthake vasanto mayā ākāse ṭhatvā dinnāṃ piṇḍapātampi aparibhuñjitvā samaṇadhammaṃ akāsi, idāni āmisapaṇṇākāraṃ kiṃ gaṇhissati? Dhammapaṇṇākāraṃ gahetvā gamissāmī”ti brahmaloke ṭhitova ratanāvaḷiṃ ganthento viya pannaṃ rasa pañhe vibhajitvā taṃ dhammapaṇṇākāraṃ ādāya āgantvā sahāyassa avidūre ṭhatvā attano samaṇasaññāsamudācāravasena taṃ anabhivādetvāva, “bhikkhu bhikkhū”ti ālapitvā **ayaṃ vammikoti**-ādi-māha. Tattha turitālanavasena bhikkhu bhikkhūti āmeditaṃ veditabbaṃ. Yathā vā ekaneva tilakena nalāṭaṃ na sobhati, taṃ parivāretvā aññesu dinnesu phullitamaṇḍitaṃ viya sobhati, evaṃ ekaneva padena vacanaṃ na sobhati, parivārikapadena saddhiṃ (2.0034) phullitamaṇḍitaṃ viya sobhatīti taṃ parivārikapadavasena vacanaṃ phullitamaṇḍitaṃ viya karontopi evamāha.

**Ayaṃ vammikoti** purato ṭhito vammiko nāma natthi, desanāvasena pana purato ṭhitaṃ dassento viya **ayanti** āha. **Laṅginti** satthaṃ ādāya khaṇanto palighaṃ addasa. **Ukkipeta laṅgiṃ abhikkhaṇa sumedhā**ti tāta, paṇḍita, laṅgi nāma rattiṃ dhūmayati divā pajjalati. Ukkipeta paraṃ parato khaṇāti. Evaṃ sabbapadesu attho daṭṭhabbo. **Uddhumāyikanti** maṇḍūkaṃ. **Caṅkavāranti** khāraparissāvanaṃ. **Kummanti** kacchapaṃ. **Asisūnanti** maṃsacchedakaṃ asiñceva adhikuṭṭanañca. **Maṃsapesinti** nisadapotappamāṇaṃ allamaṃsapiṇḍaṃ. **Nāganti** sumanapupphakalāpasadisamaṃ mahāphaṇaṃ tividhasovatthikaparikkhittaṃ ahināgaṃ addasa. **Mā nāgaṃ ghaṭṭesi**ti daṇḍakakoṭiyā vā vallikoṭiyā vā paṃsucunṇaṃ vā pana khipamāno mā nāgaṃ ghaṭṭayi. **Namo karohi nāgassāti** uparivātato apagamma suddhavatthaṃ nivāsetvā nāgassa namakkāraṃ karohi. Nāgena adhisayitaṃ dhanaṃ nāma yāva sattamā kulaparivaṭṭā khādato na khīyati, nāgo te adhisayitaṃ dhanaṃ dassati, tasmā namo karohi nāgassāti. **Ito vā pana sutvāti** yathā dukkhakkhandhe itoti sāsane nissakaṃ, na tathā idha. Idha pana devaputte nissakkaṃ, tasmā **ito vā panāti** mama vā pana santikā sutvāti ayamettha attho.

**251. Cātumahābhūtikassāti** catumahābhūtamayassa. **Kāyassetam adhivac-**  
**nanti** sarīrassa nāmaṃ. Yatheva hi bāhirako vammiko, vamatīti vantakoti vantussa-  
yoti vantasinehasambandhoti catūhi kāraṇehi **vammikoti** vuccati. So hi ahimaṅgu-  
sa-undūragharagoḷikādayo nānappakāre pāṇake vamatīti vammiko. Upacikāhi  
vantakoti vammiko. Upacikāhi vamtivā mukhatuṇḍakena ukkhittapaṃsucuṇṇena  
kaṭippamāṇenapi porisappamāṇenapi ussitoti vammiko. Upacikāhi vantakheḷasi-  
nehena ābaddhatāya sattasattāhaṃ deve vassantepi na vippakiriyati, nidāghepi  
tato paṃsumuṭṭhiṃ gahetvā tasmimṃ muṭṭhinā pīḷiyamāne sineho nikkhamati, evaṃ  
vantasinehena sambaddhoti vammiko. Evamayaṃ kāyopi, “akkhimhā (2.0035)  
akkhigūthako”ti-ādinā nayena nānappakāraṃ asucikalimalaṃ vamatīti  
vammiko. Buddhapaccekabuddhakhīṇāsavā imasmimṃ attabhāve nikantipariyādā-  
nena attabhāvaṃ chaḍḍetvā gatāti ariyehi vantakotipi vammiko. Yehi cāyaṃ tīhi  
aṭṭhisatehi ussito nhārusambaddho maṃsāvalepano allacamma-pariyonaddho  
chavirañjito satte vañceti, taṃ sabbaṃ ariyehi vantamevāti vantussayotipi  
vammiko. “Taṇhā janeti purisaṃ, cittamassa vidhāvati”ti (saṃ. ni. 1.55) evaṃ  
taṇhāya janitattā ariyehi vanteneva taṇhāsinehena sambaddho ayanti vantasine-  
hena sambaddhotipi vammiko. Yathā ca vammikassa anto nānappakārā pāṇakā  
tattheva jāyanti, uccārapassāvaṃ karonti, gilānā sayanti, matā patanti. Iti so tesam  
sūtigharaṃ vaccakuṭi gilānasālā susānañca hoti. Evaṃ khattiyamahāsālādīnampi  
kāyo ayaṃ gopitarakkhito maṇḍitappasādhito mahānubhāvānaṃ kāyoti acintetvā  
chavinissitā pāṇā cammanissitā pāṇā maṃsanissitā pāṇā nhārunissitā pāṇā aṭṭhi-  
nissitā pāṇā aṭṭhimiñjanissitā pāṇāti evaṃ kulagaṇanāya asītimattāni kimikulasa-  
hassāni antokāyasmimyeva jāyanti, uccārapassāvaṃ karonti, gelaññena āturitāni  
sayanti, matāni patanti, iti ayampi tesam pāṇānaṃ sūtigharaṃ vaccakuṭi gilāna-  
sālā susānañca hotīti “vammiko” tveva saṅkhaṃ gato. Tenāha bhagavā- “vammi-  
koti kho, bhikkhu, imassa cātumahābhūtikassa kāyassetam adhivacanan”ti.



**Mātāpettikasambhavassāti** mātito ca pitito ca nibbattena mātāpettikena sukka-  
soṇitena sambhūtassa. **Odanakummāsūpacayassāti** odanena ceva kummāsena  
ca upacitassa vaḍḍhitassa. **Aniccucchādanaparimaddanabhedanavidhamsana-**  
**dhammassāti** ettha ayaṃ kāyo hutvā abhāvaṭṭhena **aniccadhammo**. Duggandha-  
vighātathāya tanuvilepanena **ucchādanadhammo**. Aṅgapaccaṅgābādhavinodana-  
tthāya khuddakasambāhanena **parimaddanadhammo**. Daharakāle vā ūrūsu sayā-  
petvā gabbhavāsena dussaṅṭhitānaṃ tesaṃ tesaṃ aṅgānaṃ saṅṭhānasampāda-  
natthaṃ añchanapīḷanādivasena parimaddanadhammo. Evaṃ pariharatopi ca  
bhedanavidhamsanadhammo bhijjati ceva vikirati ca, evaṃ sabhāvoti attho.  
Tattha (2.0036) mātāpettikasambhava-odanakummāsūpacaya-ucchādanaparima-  
ddanapadehi samudayo kathito, aniccabhedavidhamsanapadehi atthaṅgamo.  
Evaṃ sattahipi padehi cātumahābhūtikassa kāyassa uccāvacabhāvo vaḍḍhipari-  
hāni samudayatthaṅgamo kathitoti veditabbo.

**Divā kammanteti** divā kattabbakammante. **Dhūmāyanāti** ettha ayaṃ dhūma-  
saddo kodhe taṅhāya vitakke pañcasu kāmagaṇesu dhammadesanāya pakatidhū-  
meti imesu atthesu vattati. “Kodho dhūmo bhasmanimosavajjan”ti (saṃ. ni. 1.165)  
ettha hi kodhe vattati. “Icchādhūmāyitā sattā”ti ettha taṅhāya. “Tena kho pana  
samayena aññataro bhikkhu bhagavato avidūre dhūmāyanto nisinno hoti”ti ettha  
vitakke.

“Pañko ca kāmā palipo ca kāmā,  
bhayañca metaṃ timūlaṃ pavuttaṃ;  
rajo ca dhūmo ca mayā pakāsītā;  
hitvā tuvaṃ pabbaja brahmadattā”ti. (jā. 1.6.14)-

Ettha pañcakāmagaṇesu. “Dhūmaṃ kattā hoti”ti (ma. ni. 1.349) ettha dhammade-  
sanāya. “Dhajo rathassa paññāṇaṃ, dhūmo paññāṇamaggino”ti (saṃ. ni. 1.72)  
ettha pakatidhūme. Idha panāyaṃ vitakke adhippeto. Tenāha “ayaṃ rattiṃ dhūmā-  
yanā”ti.

**Tathāgatassetam adhivacananti** tathāgato hi sattannaṃ dhammānaṃ bāhitattā  
**brāhmaṇo** nāma. Yathāha- “sattannaṃ kho, bhikkhu, dhammānaṃ bāhitattā  
brāhmaṇo. Katamesaṃ sattannaṃ? Rāgo bāhito hoti, doso... moho... māno...  
sakkāyadiṭṭhi... vicikicchā... sīlabbataparāmāso bāhito hoti. Imesaṃ bhikkhu  
sattannaṃ dhammānaṃ bāhitattā brāhmaṇo”ti (cūḷani. mettagūmāṇavapucchāni-  
ddesa 28). **Sumedhoti** sundarapañño. **Sekkhassāti** ettha sikkhatīti sekkho.  
Yathāha- “sikkhatīti kho, bhikkhu, tasmā sekkhoti vuccati. Kiñca sikkhati? Adhisī-  
lampi sikkhati, adhicittampi sikkhati, adhipaññampi sikkhati”ti (a. ni. 3.86).

**Paññāya** (2.0037) **adhivacananti** lokiyalokuttarāya paññāya etaṃ adhivacanaṃ,  
na āvudhasatthassa. **Vīriyārambhassāti** kāyikacetāsikavīriyassa. Taṃ paññāgati-  
kameva hoti. Lokiyāya paññāya lokiyaṃ, lokuttarāya paññāya lokuttaraṃ. Ettha  
panāyaṃ atthadīpanā-

Eko kira jānapado brāhmaṇo pātova māṇavakehi saddhiṃ gāmato nikkhamma  
divasaṃ arañhe mante vācetvā sāyaṃ gāmaṃ āgacchati. Antarāmagge ca eko  
vammiko atthi. So rattiṃ dhūmāyati, divā pajjalati. Brāhmaṇo antevāsiṃ

sumedham māṇavam āha- “tāta, ayaṃ vammiko rattiṃ dhūmāyati, divā pajjalati, vikāramassa passissāma, bhinditvā naṃ cattāro koṭṭhāse katvā khipāhī”ti. So sādhiṭi kudālaṃ gahetvā samehi pādehi pathaviyaṃ patiṭṭhāya tathā akāsi. Tatra ācariyabrāhmaṇo viya bhagavā. Sumedhamāṇavako viya sekkho bhikkhu. Vammiko viya kāyo. “Tāta, ayaṃ vammiko rattiṃ dhūmāyati, divā pajjalati, vikāramassa passissāma, bhinditvā naṃ cattāro koṭṭhāse katvā khipāhī”ti brāhmaṇena vuttakālo viya, “bhikkhu cātumahābhūtikaṃ kāyaṃ cattāro koṭṭhāse katvā pariggaṇhāhī”ti bhagavatā vuttakālo. Tassa sādhiṭi kudālaṃ gahetvā tathākaraṇaṃ viya sekkhassa bhikkhuno, “yo vīsatiyā koṭṭhāsesu thaddhabhāvo, ayaṃ pathavīdhātu. Yo dvādasasu koṭṭhāsesu ābandhanabhāvo, ayaṃ āpodhātu. Yo catūsu koṭṭhāsesu paripācanabhāvo, ayaṃ tejodhātu. Yo chasu koṭṭhāsesu vitthambhanabhāvo, ayaṃ vāyodhātū”ti evaṃ catudhātuvavatthānavasena kāyapariggaho veditabbo.

**Laṅgīti kho, bhikkhūti** kasmā bhagavā avijjaṃ laṅgīti katvā dassesīti? Yathā hi nagarassa dvāraṃ pidhāya palighe yojite mahājanassa gamanaṃ pacchijjati, ye nagarassa anto, te antoyeva honti. Ye bahi, te bahiyeva. Evameva yassa ñāṇa-mukhe avijjālaṅgī patati, tassa nibbānasampāpakaṃ ñāṇagamanaṃ pacchijjati, tasmā avijjaṃ laṅgīti katvā dassesi. **Pajaha avijjanti** ettha kammaṭṭhāna-uggahaparipucchāvasena avijjāpahānaṃ kathitaṃ.

**Uddhumāyikāti** (2.0038) **kho, bhikkhūti** ettha **uddhumāyikamaṇḍūko** nāma no mahanto, nakhapiṭṭhippamāṇo hoti, purāṇapaṇṇantare vā gacchantare vā valli-antare vā vasati. So daṇḍakoṭiyā vā vallikoṭiyā vā paṃsucunṇakena vā ghaṭṭito āyāmitvā mahanto parimaṇḍalo beluvapakkappamāṇo hutvā cattāro pāde ākāsagate katvā pacchinnagamano hutvā amittavasam yāti, kākakulalādibhattameva hoti. Evameva ayaṃ kodho paṭhamaṃ uppajjanto cittāvilamattakova hoti. Tasmīṃ khaṇe aniggahito vaḍḍhitvā mukhavikulanaṃ pāpeti. Tadā aniggahito hanusañcopanaṃ pāpeti. Tadā aniggahito pharusavācānicchāraṇaṃ pāpeti. Tadā aniggahito disāvilocanaṃ pāpeti. Tadā aniggahito ākaḍḍhanaparikaḍḍhanaṃ pāpeti. Tadā aniggahito pāṇinā leḍḍudaṇḍasatthaparāmasanaṃ pāpeti. Tadā aniggahito daṇḍasatthābhiniṭātaṃ pāpeti. Tadā aniggahito paraghātanampi attaghātanampi pāpeti. Vuttampi hetam- “yato ayaṃ kodho param ghātetvā attānaṃ ghāteti, ettāvatāyaṃ kodho paramussadagato hoti paramavepullappatto”ti. Tattha yathā uddhumāyikāya catūsu pādesu ākāsagatesu gamanaṃ pacchijjati, uddhumāyikā amittavasam gantvā kākādibhattaṃ hoti, evameva kodhasamaṅgīpuggalo kammaṭṭhānaṃ gahetvā vaḍḍhetuṃ na sakkoti, amittavasam yāti, sabbesaṃ mārānaṃ yathākāmakaraṇīyo hoti. Tenāha bhagavā- “uddhumāyikāti kho, bhikkhu, kodhūpāyāsassetam adhivacanan”ti. Tattha balavappatto kodhova kodhūpāyāso. **Pajaha kodhūpāyāsanti** ettha paṭisaṅkhānappahānaṃ kathitaṃ.

**Dvidhāpathoti** ettha, yathā puriso sadhano sabhogo kantāraddhānamaggappaṭipanno dvedhāpathaṃ patvā, “iminā nu kho gantabbaṃ, iminā gantabban”ti nicchetuṃ asakkonto tattheva tiṭṭhati, atha naṃ corā uṭṭhahitvā anayabyasanaṃ pāpenti, evameva kho mūlakammaṭṭhānaṃ gahetvā nisinna bhikkhu buddhādīsu kaṅkhāya uppannāya kammaṭṭhānaṃ vaḍḍhetuṃ na sakkoti, atha naṃ kilesamā-

rādayo sabbe mārā anayabyasanaṃ pāpenti, iti vicikicchā dvedhāpathasamā hoti. Tenāha bhagavā- “dvidhāpathoti kho, bhikkhu, vicikicchāyetaṃ (2.0039) adhivacanan”ti. **Pajaha vicikicchanti** ettha kammaṭṭhāna-uggahaparipucchāvasena vicikicchāpahānaṃ kathitaṃ.

**Caṅgavāranti** ettha, yathā rajakehi khāraparissāvanamhi uduke pakkhitte eko udakaghaṭṭo dvepi dasapi vīsati pi ghaṭasatampi paggharatiyeva, pasaṭamattampi udakaṃ na tiṭṭhati, evameva nīvaraṇasamaṅgino puggalassa abbhantare kusala-dhammo na tiṭṭhati. Tenāha bhagavā- “caṅgavāranti kho, bhikkhu, pañcannetaṃ nīvaraṇānaṃ adhivacanan”ti. **Pajaha pañcanīvaraṇeti** ettha vikkhambhanatadaṅgavasena nīvaraṇappahānaṃ kathitaṃ.

**Kummoti** ettha, yathā kacchapassa cattāro pādā sīsanti pañceva aṅgāni honti, evameva sabbepi saṅkhatā dhammā gayhamānā pañceva khandhā bhavanti. Tenāha bhagavā- “kummoti kho, bhikkhu, pañcannetaṃ upādānakkhandhānaṃ adhivacanan”ti. **Pajaha pañcupādānakkhandheti** ettha pañcasu khandhesu chandarāgappahānaṃ kathitaṃ.

**Asisūnāti** ettha, yathā sūnāya upari maṃsaṃ ṭhapetvā asinā koṭṭenti, evamime sattā vatthukāmatthāya kilesakāmehi ghātayamānā vatthukāmānaṃ upari katvā kilesakāmehi kantitā koṭṭitā ca honti. Tenāha bhagavā- “asisūnāti kho, bhikkhu, pañcannetaṃ kāmaguṇānaṃ adhivacanan”ti. **Pajaha pañca kāmaguṇeti** ettha pañcasu kāmaguṇesu chandarāgappahānaṃ kathitaṃ.

**Maṃsapesīti kho, bhikkhūti** ettha ayaṃ **maṃsapesi** nāma bahujanapatthitā khattiyādayo manussāpi naṃ patthenti kākādayo tiracchānāpi. Ime hi sattā avijjāya sammattā nandirāgaṃ upagamma vaṭṭaṃ vaḍḍhenti. Yathā vā maṃsapesi ṭhapitaṭhapitaṭṭhāne laggati, evamime sattā nandirāgabaddhā vaṭṭe lagganti, dukkhaṃ patvāpi na ukkaṇṭhanti, iti nandirāgo maṃsapesisadisō hoti. Tenāha bhagavā- “maṃsapesīti kho, bhikkhu, nandirāgassetāṃ adhivacanan”ti. **Pajaha nandirāganti** ettha catutthamaggena nandirāgappahānaṃ kathitaṃ.

**Nāgoti kho, bhikkhu, khīṇāsavassetāṃ bhikkhuno adhivacananti** ettha yena tthena khīṇāsavo nāgoti vuccati, so anaṅgaṇasutte (ma. ni. aṭṭha. 1.63) pakāsito eva. **Namo karohi nāgassāti** khīṇāsavassa buddhanāgassa, “buddho (2.0040) so bhagavā bodhāya dhammaṃ deseti, danto so bhagavā damathāya dhammaṃ deseti, santo so bhagavā samathāya dhammaṃ deseti, tiṇṇo so bhagavā taraṇāya dhammaṃ deseti, parinibbuto so bhagavā parinibbānāya dhammaṃ deseti”ti (ma. ni. 1.361) evaṃ namakkāraṃ karohīti ayamettha attho. Iti idaṃ suttaṃ therassa kammaṭṭhānaṃ ahosi. Theropi idameva suttaṃ kammaṭṭhānaṃ katvā vipassanaṃ vaḍḍhetvā arahattaṃ patto. **Ayametassa atthoti** ayaṃ etassa pañhassa attho. Iti bhagavā ratanarāsīmhi maṇikūṭaṃ gaṇhanto viya yathānusaṅghināva desanaṃ niṭṭhapesīti.

Papañcasūdaniyā majjhimanikāyaṭṭhakathāya

#### 4. Rathavinītasuttavaṇṇanā

**252. Evaṃ me sutanti** rathavinītasuttaṃ. Tattha **rājagaheti** evaṃnāmake nagare, tañhi mandhātumahāgovindādīhi pariggahitattā **rājagahanti** vuccati. Aññepettha pakāre vaṇṇayanti. Kiṃ tehi? Nāmametaṃ tassa nagarassa. Taṃ panetaṃ buddhakāle ca cakkavattikāle ca nagaraṃ hoti, sesakāle suññaṃ hoti yakkhapari-ggahitaṃ, tesam vasantavanaṃ hutvā tiṭṭhati. **Veļuvane kalandakanivāpeti veļuvananti** tassa uyyānassa nāmaṃ, taṃ kira veļūhi parikkhittaṃ ahosi aṭṭhārasaha-tthena ca pākārena, gopuraṭṭālakayuttaṃ nilobhāsaṃ manoramaṃ, tena **veļuvananti** vuccati. Kalandakānañcetha nivāpaṃ adaṃsu, tena **kalandakanivāpoti** vuccati.

Pubbe kira aññataro rājā tattha uyyānakīlanatthaṃ āgato surāmadena matto divāseyyaṃ upagato supi. Parijanopissa, “sutto rājā”ti pupphaphalādīhi palobhiya-māno ito cito ca pakkāmi, atha surāgandhena aññatarasmā susirarukkā kaṇhasappo nikkhamitvā raññābhimukho āgacchati. Taṃ disvā rukkhadevatā, “rañño jīvitaṃ dammi”ti kālakavesena āgantvā kaṇṇamūle saddamakāsi. Rājā paṭibujjhi, kaṇhasappo (2.0041) nivatto. So taṃ disvā, “imāya mama jīvitaṃ dinnan”ti kālakānaṃ tattha nivāpaṃ paṭṭhapesi, abhayaghosanañca ghosāpesi. Tasmā taṃ tato pabhuti **kalandakanivāpanti** saṅkhyāṃ gataṃ. **Kalandakāti** kālakānaṃ nāmaṃ.

**Jātibhūmikāti** jātibhūmivāsino. Tattha **jātibhūmīti** jātaṭṭhānaṃ. Taṃ kho panetaṃ neva kosalamahārājādīnaṃ na caṅkībrāhamaṇādīnaṃ na sakkasuyāmasantusitādīnaṃ na asītimahāsāvakādīnaṃ na aññesaṃ sattānaṃ jātaṭṭhānaṃ “jātibhūmī”ti vuccati. Yassa pana jātadivase

dasasahassilokadhātu ekaddhajamālāvippakiṇṇakusumavāsacunṇagandhasu-  
gandhā sabbapāliphullamiva nandanavanaṃ virocamānā paduminipaṇṇe udaka-  
bindu viya akampittha, jaccandhādīnañca rūpadassanādīni anekāni pāṭihāriyāni  
pavattiṃsu, tassa sabbaññubodhisattassa jātaṭṭhānasākiyajanapado kapilavatthā-  
hāro, sā “jātibhūmī”ti vuccati.

## Dhammagarubhāvavaṇṇanā

**Vassaṃvuṭṭhā**ti temāsaṃ vassaṃvuṭṭhā pavāritapavāraṇā hutvā. **Bhagavā etada-  
vocā**ti “kacci, bhikkhave, khamaṇīyaṃ”ti-ādīhi vacanehi āgantukapaṭisaṅgāraṃ  
katvā etaṃ, “ko nu kho, bhikkhave”ti-ādivacanamavoca. Te kira bhikkhu,- “kacci,  
bhikkhave, khamaṇīyaṃ kacci yāpaṇīyaṃ, kaccittha appakilamathena addhānaṃ  
āgatā, na ca piṇḍakena kilamittha, kuto ca tumhe, bhikkhave, āgacchathā”ti paṭisa-  
ṅgāraṃ avasena pucchitā- “bhagavā sākiyajanapade kapilavatthāhārato jātibhūmito  
āgacchāmā”ti āhaṃsu. Atha bhagavā neva suddhodanamahārājassa, na sakkoda-  
nassa, na sukkodanassa, na dhotodanassa, na amitodanassa, na amittāya deviyā,  
na mahāpajāpatiyā, na sakalassa sākiyamaṇḍalassa ārogyaṃ pucchi. Atha kho  
attanā ca dasakathāvatthulābhiṃ parañca tattha samādapetāraṃ paṭipattisa-  
mpannaṃ bhikkhuṃ pucchanto idaṃ- “ko nu kho, bhikkhave”ti-ādivacanaṃ  
avoca.

Kasmā (2.0042) pana bhagavā suddhodanādīnaṃ ārogyaṃ apucchitvā eva-  
rūpaṃ bhikkhumeva pucchati? Piyatāya. Buddhānañhi paṭipannakā bhikkhū  
bhikkhuniyo upāsakā upāsikāyo ca piyā honti manāpā. Kiṃ kāraṇā? Dhammagar-  
utāya. Dhammagaruno hi tathāgatā, so ca nesaṃ dhammagarubhāvo, “dukkhaṃ  
kho agāravo viharati, appatisso”ti (a. ni. 4.21) iminā ajapālanigrodhamūle uppa-  
nnajjhāsayena veditabbo. Dhammagarutāyeva hi bhagavā mahākassapatthe-  
rassa abhinikkhamaṇādivase paccuggamaṃ karonto tigāvutaṃ maggaṃ aga-  
māsi. Atirekatiyojanasataṃ maggaṃ gantvā gaṅgātīre dhammaṃ desevā mahā-  
kappaṇaṃ sapariṣaṃ arahatte paṭiṭṭhapesi. Ekasmiṃ pacchābhatte pañcacattālīsa-  
yojanaṃ maggaṃ gantvā kumbhakārassa nivesane tiyāmarattiṃ dhammakathaṃ  
katvā pukkusātikulaputtaṃ anāgāmiphale paṭiṭṭhapesi. Vīsayojanasataṃ gantvā  
vanavāsīsāmaṇerassa anuggahaṃ akāsi. Saṭṭhiyojanamaggaṃ gantvā khadirava-  
niyattherassa dhammaṃ desesi. Anuruddhatthero pācīnavaṃsadāye nisinno  
mahāpurisavitakkaṃ vitakketīti ñatvā tattha ākāsena gantvā therassa purato  
oruyha sādhu-kāramadāsi. Koṭikaṇṇasoṇattherassa ekagandhakuṭiyaṃ senā-  
sanaṃ paññapāpetvā paccūsakāle dhammadesanaṃ ajjhesitvā sarabhaññapari-  
yosāne sādhu-kāramadāsi. Tigāvutaṃ maggaṃ gantvā tiṇṇaṃ kulaputtānaṃ vasa-  
naṭṭhāne gosiṅgasālavane sāmaggirasānisamaṃsaṃ kathesi. Kassapopi bhagavā-  
“anāgāmiphale paṭiṭṭhito ariyasāvako ayan”ti vissāsaṃ uppādetvā ghaṭikārassa  
kumbhakārassa nivesanaṃ gantvā sahatthā āmisaṃ gahetvā paribhuñji.

Amhākaṃyeva bhagavā upakaṭṭhāya vassūpanāyikāya jetavanato bhikkhusa-  
ṅghaparivuto cārikaṃ nikkhami. Kosalamahārāja-anāthapiṇḍikādayo nivattetuṃ

nāsakkhiṃsu. Anāthapiṇḍiko gharaṃ āgantvā domanassappatto nisīdi. Atha naṃ puṇṇā nāma dāsī domanassappattosi sāmīti āha. “Āma je, satthāraṃ nivattetuṃ nāsakkhiṃ, atha me imaṃ temāsaṃ dhammaṃ vā sotuṃ, yathādhippāyaṃ vā dānaṃ dātuṃ na labhissāmi”ti cintā uppunnāti. Ahampi sāmī satthāraṃ nivattessā-mīti. Sace nivattetuṃ sakkosi, bhujissāyeva tvanti. Sā gantvā dasabalassa pādā-mūle nipajjitvā “nivattatha bhagavā”ti āha. Puṇṇe tvaṃ parapaṭibaddhajīvikā kiṃ me karissasīti. Bhagavā (2.0043) mayhaṃ deyyadhammo natthīti tumhepi jānātha, tumhākaṃ nivattanapaccayā panāhaṃ tīsu saraṇesu pañcasu sīlesu paṭiṭṭhahissā-mīti. Bhagavā sādhu sādhu puṇṇeti sādhu-kāraṃ katvā nivattetvā jetavanameva pavīṭṭho. Ayaṃ kathā pākaṭā ahosi. Seṭṭhi sutvā puṇṇāya kira bhagavā nivattitoti taṃ bhujissaṃ katvā dhītuṭṭhāne ṭhapesi. Sā pabbajjaṃ yācitvā pabbaji, pabbajitvā vipassanaṃ ārabhi. Athassā satthā āraddhavipassakabhāvaṃ ṇatvā imaṃ obhāsagāthaṃ vissajjesi-

“Puṇṇe pūresi saddhammaṃ, cando pannaraso yathā;

paripuṇṇāya paññāya, dukkhassantaṃ karissasī”ti. (therīgā. 3);

Gāthāpariyosāne arahattaṃ patvā abhiññātā sāvīkā ahosīti. Evaṃ dhammagaruno tathāgatā.

Nandakatthere upaṭṭhānasālāyaṃ dhammaṃ desetepi bhagavā anahātova gantvā tiyāmarattiṃ ṭhitakova dhammakathaṃ sutvā desanāpariyosāne sādhu-kā-ramadāsī. Thero āgantvā vanditvā, “kāya velāya, bhante, āgatathā”ti pucchi. Tayā suttante āraddhamatteti. Dukkaraṃ karittha, bhante, buddhasukhumālā tumheti. Sace tvaṃ, nanda, kappāṃ desetūṃ sakkuṇeyyāsi, kappamattampāhaṃ ṭhitakova suṇeyyanti bhagavā avoca. Evaṃ dhammagaruno tathāgatā. Tesāṃ dhammagarutāya paṭipannakā piyā honti, tasmā paṭipannake pucchi. Paṭipannako ca nāma attahitāya paṭipanno no parahitāya, parahitāya paṭipanno no attahitāya, no attahitāya ca paṭipanno no parahitāya ca, attahitāya ca paṭipanno parahitāya cāti catubbidho hoti.

Tattha yo sayāṃ dasannaṃ kathāvatthūnaṃ lābhī hoti, paraṃ tattha na ovadati na anusāsati āyasmā bākulo viya. Ayaṃ attahitāya paṭipanno nāma no parahitāya paṭipanno, evarūpaṃ bhikkhuṃ bhagavā na pucchati. Kasmā? Na mayhaṃ sāsana-sa vaḍḍhipakkhe ṭhitoti.

Yo pana dasannaṃ kathāvatthūnaṃ alābhī, paraṃ tehi ovadati tena katavattasā-diyanaṭṭhaṃ upanando sakyaputto viya, ayaṃ parahitāya paṭipanno (2.0044) nāma no attahitāya, evarūpampi na pucchati. Kasmā? Assa taṇhā mahāpacchi viya appahīnāti.

Yo attanāpi dasannaṃ kathāvatthūnaṃ alābhī, parampi tehi na ovadati, lāḷu-dāyī viya, ayaṃ neva attahitāya paṭipanno na parahitāya, evarūpampi na pucchati. Kasmā? Assa anto kilesā pharasucchejjā viya mahantāti.

Yo pana sayāṃ dasannaṃ kathāvatthūnaṃ lābhī, parampi tehi ovadati, ayaṃ attahitāya ceva parahitāya ca paṭipanno nāma sārīputtamoggallānamahākassapā-dayo asītimahātherā viya, evarūpaṃ bhikkhuṃ pucchati. Kasmā? Mayhaṃ sāsana-sa vuḍḍhipakkhe ṭhitoti. Idhāpi evarūpameva pucchanto- “ko nu kho, bhikkha-

ve”ti-ādimāha.

Evam bhagavatā puṭṭhānaṃ pana tesam bhikkhūnaṃ bhagavā attano jātibhūmiyaṃ ubhayahitāya paṭipannaṃ dasakathāvatthulābhiṃ bhikkhuṃ pucchati, ko nu kho tattha evarūpoti na aññaṃaññaṃ cintanā vā samantanā vā ahosi. Kasmā? Āyasmā hi mantāṇiputto tasmim janapade ākāsamajjhe t̥hito cando viya sūriyo viya ca pākaṭo paññāto. Tasmā te bhikkhū meghasaddaṃ sutvā ekajjhaṃ sannipattitamoraḡhaṭā viya ghanasajjhāyaṃ kātuṃ, āradhabhikkhū viya ca attano ācariyaṃ puṇṇattheraṃ bhagavato ārocentā therassa ca guṇaṃ bhāsituṃ appahonthehi mukhehi ekappahāreneva **puṇṇo nāma, bhante, āyasmā**ti-ādimāhaṃsu. Tattha **puṇṇoti** tassa therassa nāmaṃ. Mantāṇiyā pana so putto, tasmā **mantāṇiputtoti** vuccati. **Sambhāvitoti** guṇasambhāvanāya sambhāvito.

### Appicchatādivaṇṇanā

**Appicchoti** icchāviraḡhito ni-iccho nittaṇho. Ettha hi byañjanaṃ sāvasesaṃ viya, attho pana niravaseso. Na hi tassa anto aṇumattāpi pāpikā icchā nāma atthi. Khīṇāsavo hesa sabbaso pahīnataṇho. Apicettha atricchatā pāpicchatā mahicchatā appicchatāti ayaṃ bhedo veditabbo.

Tattha (2.0045) sakalābhe atittassa paralābhe patthanā **atricchatā** nāma. Tāya samannāgatassa ekabhājena pakkapūvopi attano patte patito na supakko viya khuddako viya ca khāyati. Sveva parassa patte pakkhitto supakko viya mahanto viya ca khāyati. Asantaguṇasambhāvanatā pana paṭiggahaṇe ca amattaññutā **pāpicchatā** nāma, sā, “idhekacco assaddho samāno saddhoti maṃ jano jānātū”ti-ādinā nayena abhidhamme āgatāyeva, tāya samannāgato puggalo kohaṇṇe patiṭṭhāti. Santaguṇasambhāvanā pana paṭiggahaṇe ca amattaññutā **mahicchatā** nāma. Sāpi, “idhekacco saddho samāno saddhoti maṃ jano jānātūti icchati, silavā samāno silavāti maṃ jano jānātū”ti (vibha. 851) iminā nayena āgatāyeva, tāya samannāgato puggalo dussantappayo hoti, vijātamātāpissa cittaṃ gaḡhetuṃ na sakkoti. Tenetaṃ vuccati-

“Aggikkhandho samuddo ca, mahiccho cāpi puggalo; sakaṭena paccayaṃ detu, tayopete atappayā”ti.

Santaguṇanigūhanatā pana paṭiggahaṇe ca mattaññutā **appicchatā** nāma, tāya samannāgato puggalo attani vijjamānampi guṇaṃ paṭicchādetukāmatāya, “saddho samāno saddhoti maṃ jano jānātūti na icchati. Silavā, pavivitto, bahuṣsuto, āradhavīriyo, samādhisampanno, paññavā, khīṇāsavo samāno khīṇāsavoti maṃ jano jānātū”ti na icchati, seyyathāpi majjhantikatthero.

Thero kira mahākhīṇāsavo ahosi, pattacīvaraṃ panassa pādamaṭṭameva agghati, so asokassa dhammaraṇṇo vihāramahadivase saṅghatthero ahosi. Athassa atilūkhabhāvaṃ disvā manussā, “bhante, thokaṃ bahi hothā”ti āhaṃsu. Thero, “mādise khīṇāsavo raṇṇo saṅghaṃ akaronte añño ko karissati”ti pathaviyaṃ nimujjitvā saṅghattherassa ukkhittapiṇḡaṃ gaṇhantoyeva ummujji. Evam khīṇāsavo samāno, “khīṇāsavoti maṃ jano jānātū”ti na icchati. Evam appiccho

pana bhikkhu anuppannaṃ lābhaṃ uppādeti, uppannaṃ lābhaṃ thāvaram karoti, dāyakānaṃ (2.0046) cittaṃ ārādheti, yathā yathā hi so attano appicchatāya appaṃ gaṇhāti, tathā tathā tassa vatte pasannā manussā bahū denti.

Aparopi catubbidho appiccho- paccaya-appiccho dhutaṅga-appiccho pariyatti-appiccho adhigama-appicchoti. Tattha catūsu paccayesu appiccho **paccaya-appiccho** nāma, so dāyakassa vasaṃ jānāti, deyyadhammassa vasaṃ jānāti, attano thāmaṃ jānāti. Yadi hi deyyadhammo bahu hoti, dāyako appaṃ dātukāmo, dāyakassa vasena appaṃ gaṇhāti. Deyyadhammo appo, dāyako bahuṃ dātukāmo, deyyadhammassa vasena appaṃ gaṇhāti. Deyyadhammopi bahu, dāyako bahuṃ dātukāmo, attano thāmaṃ ñatvā pamāṇeneva gaṇhāti.

Dhutaṅgasamādānassa attani atthibhāvaṃ najānāpetukāmo **dhutaṅga-appiccho** nāma. Tassa vibhāvanatthaṃ imāni vatthūni- sosānikamahāsumanatthero kira saṭṭhi vassāni susāne vasi, añño ekabhikkhupi na aññāsi, tenevāha-

“Susāne saṭṭhi vassāni, abbokiṇṇaṃ vasāmahaṃ;  
dutiyo maṃ na jāneyya, aho sosānikuttamo” ti.

Cetiyaṃ pabbate dvebhātiyattherā vasiṃsu. Tesu kaniṭṭho upaṭṭhākena pesitā ucchukhaṇḍikā gahetvā jeṭṭhassa santikaṃ agamāsi. Paribhogaṃ, bhante, karothāti. Therassa ca bhattakiccaṃ katvā mukhaṃ vikkhālanakālo ahosi. So alaṃ, āvusoti āha. Kacci, bhante, ekāsanikatthāti. Āharāvuso, ucchukhaṇḍikāti paññāsa vassāni ekāsaniko samānopi dhutaṅgaṃ nigūhamāno paribhogaṃ katvā mukhaṃ vikkhāletvā puna dhutaṅgaṃ adhiṭṭhāya gato.

Yo pana sāketakatissatthero viya bahussutabhāvaṃ jānāpetuṃ na icchati, ayaṃ **pariyatti-appiccho** nāma. Thero kira khaṇo natthīti uddesaparipucchāsu okāsaṃ akaronto maraṇakkhayaṃ, bhante, labhissathāti codito gaṇaṃ vissajjetvā kaṇikāravālikasamuddavīhāraṃ gato. Tattha antovassaṃ theranavamajjhimānaṃ upakāro hutvā



(2.0047) mahāpavāraṇāya uposathadivase dhammakathāya janataṃ khobhetvā gato.

Yo pana sotāpannādīsu aññataro hutvā sotāpannādibhāvaṃ jānāpetuṃ na icchati, ayaṃ **adhigama-appiccho** nāma, tayo kulaputtā viya ghaṭikārakumbhakāro viya ca.

Āyasmā pana puṇṇo atricchataṃ pāpicchataṃ mahicchatañca pahāya sabbaso icchāpaṭipakkhabhūtāya alobhasaṅkhātāya parisuddhāya appicchatāya samannāgatattā appiccho nāma ahosi. Bhikkhūnampi, “āvuso, atricchatā pāpicchata mahicchataṃ ime dhammā pahātabbā”ti tesu ādīnavaṃ dassetvā evarūpaṃ appicchataṃ samādāya vattitabbanti appicchakathaṃ kathesi. Tena vuttaṃ “attanā ca appiccho appicchakathañca bhikkhūnaṃ kattā”ti.

### Dvādasavidhasantosavaṇṇanā

Idāni **attanā ca santuṭṭhoti**-ādīsu visesatthameva dīpayissāma. Yojanā pana vuttanayeneva veditabbā. **Santuṭṭhoti** itarītarapaccayasantosena samannāgato. So panesa santoso dvādasavidho hoti. Seyyathidaṃ, cīvare yathālābhasantoso yathābalasantoso yathāsāruppasantosoti tividho, evaṃ piṇḍapātādīsu. Tassāyaṃ pabhedasaṃvaṇṇanā.

Idha bhikkhu cīvaraṃ labhati sundaraṃ vā asundaraṃ vā. So teneva yāpeti aññaṃ na pattheti, labhantopi na gaṇhāti, ayamassa cīvare **yathālābhasantoso**. Atha yo pakatidubbalo vā hoti ābādhajarābhībhūto vā, garucīvaraṃ pārupanto kilamati, so sabhāgena bhikkhunā saddhiṃ taṃ parivattetvā lahukena yāpentopi santuṭṭhova hoti, ayamassa cīvare **yathābalasantoso**. Aparo paṇītapaccayalābhī hoti, so paṭṭacīvarādīnaṃ aññataraṃ mahagghacīvaraṃ bahūni vā pana cīvarāni labhitvā idaṃ therānaṃ cirapabbajitānaṃ idaṃ bahussutānaṃ anurūpaṃ, idaṃ gilānānaṃ idaṃ appalābhānaṃ hotūti datvā tesāṃ purāṇacīvaraṃ vā (2.0048) saṅkārakūṭādito vā nantakāni uccinitvā tehi saṅghāṭiṃ katvā dhārentopi santuṭṭhova hoti, ayamassa cīvare **yathāsāruppasantoso**.

Idha pana bhikkhu piṇḍapātaṃ labhati lūkhaṃ vā paṇītaṃ vā, so teneva yāpeti, aññaṃ na pattheti, labhantopi na gaṇhāti, ayamassa piṇḍapāte **yathālābhasantoso**. **Yo pana attano pakativiruddhaṃ vā byādhiviruddhaṃ vā piṇḍapātaṃ labhati, yenassa paribhuttana aphāsu hoti, so sabhāgassa bhikkhuno taṃ datvā tassa hatthato sappāyabhojanaṃ bhuñjitvā samaṇadhammaṃ karontopi santuṭṭhova hoti, ayamassa piṇḍapāte yathābalasantoso**. Aparo bahuṃ paṇītaṃ piṇḍapātaṃ labhati, so taṃ cīvaraṃ viya cirapabbajitabahussuta-appalābhigilānānaṃ datvā tesāṃ vā sesakaṃ piṇḍāya vā caritvā missakāhāraṃ bhuñjantopi santuṭṭhova hoti, ayamassa piṇḍapāte **yathāsāruppasantoso**.

Idha pana bhikkhu senāsanāṃ labhati manāpaṃ vā amanāpaṃ vā, so tena neva somanassaṃ na paṭighaṃ uppādeti, antamaso tiṇasanthārakenāpi yathāladheneva tussati, ayamassa senāsane **yathālābhasantoso**. Yo pana attano pakativiruddhaṃ vā byādhiviruddhaṃ vā senāsanāṃ labhati, yatthassa vasato aphāsu

hoti, so taṃ sabhāgassa bhikkhuno datvā tassa santake sappāyāsenāsane vasa-  
ntopi santuṭṭhova hoti, ayamassa senāsane **yathābalasantoso**. Aparo mahāpuñño  
leṇamaṇḍapakūṭāgārādīni bahūni paṇītasenāsānāni labhati, so tāni cīvarādīni viya  
cirapabbajitabahussuta-appalābhigilānānaṃ datvā yattha katthaci vasantopi  
santuṭṭhova hoti, ayamassa senāsane **yathāsāruppasantoso**. Yopi, “uttamasenā-  
sanaṃ nāma pamādaṭṭhānaṃ, tattha nisinnassa thinamiddhaṃ okkamati, niddā-  
bhībhūtassa puna paṭibujjhato pāpavitakkā pātubhavanti”ti paṭisañcikkhitvā  
tādisaṃ senāsanaṃ pattampi na sampaṭicchati, so taṃ paṭikkhipitvā abbhokāsarū-  
kkhamūlādīsu vasantopi santuṭṭhova hoti, ayampissa senāsane **yathāsāruppasa-  
ntoso**.

Idha pana bhikkhu bhesajjaṃ labhati lūkhaṃ vā paṇītaṃ vā, so yaṃ labhati,  
teneva santussati, aññaṃ na pattheti, labhantopi na gaṇhāti, ayamassa gilānapa-  
ccaye **yathālābhasantoso**. Yo pana telena atthiko phāṇitaṃ (2.0049) labhati, so  
taṃ sabhāgassa bhikkhuno datvā tassa hatthato telaṃ gahetvā aññadeva vā pari-  
yesitvā tehi bhesajjaṃ karontopi santuṭṭhova hoti, ayamassa gilānapaccaye **yathā-  
balasantoso**. Aparo mahāpuñño bahuṃ telamadhuphāṇitādīpaṇītabhesajjaṃ  
labhati, so taṃ cīvaraṃ viya cirapabbajitabahussuta-appalābhigilānānaṃ datvā  
tesaṃ ābhatakena yena kenaci yāpentopi santuṭṭhova hoti. Yo pana ekasmiṃ  
bhājane muttahaṛitakaṃ ṭhapetvā ekasmiṃ catumadhuraṃ, “gaṇha, bhante, yadi-  
cchasi”ti vuccamāno sacassa tesu aññatarenapi rogo vūpasammati, atha muttaha-  
rītakaṃ nāma buddhādīhi vaṇṇitanti catumadhuraṃ paṭikkhipitvā muttahaṛitake-  
neva bhesajjaṃ karonto paramasantuṭṭhova hoti, ayamassa gilānapaccaye **yathā-  
sāruppasantoso**.

Imesaṃ pana paccekaṃ paccayesu tiṇṇaṃ tiṇṇaṃ santosānaṃ yathāsārūppa-  
santosova aggo. Āyasmā puṇṇo ekekasmiṃ paccaye imehi tīhi santosehi  
santuṭṭho ahosi. **Santuṭṭhikathañcāti** bhikkhūnampi ca imaṃ santuṭṭhikathaṃ  
kattāva ahosi.

### Tividhapavivekavaṇṇanā

**Pavivittoti** kāyapaviveko cittapaviveko upadhipavivekoti imehi tīhi pavivekehi  
samannāgato. Tattha eko gacchati, eko tiṭṭhati, eko nisīdati, eko seyyaṃ kappeti,  
eko gāmaṃ piṇḍāya pavisati, eko paṭikkamati, eko caṅkamamadhiṭṭhāti, eko  
carati, eko viharatīti ayaṃ **kāyapaviveko** nāma. Aṭṭha samāpattiyo pana **cittapavi-  
veko** nāma. Nibbānaṃ **upadhipaviveko** nāma. Vuttampi hetamaṃ- “kāyapaviveko ca  
vivekaṭṭhakāyānaṃ nekkhammābhiratānaṃ. Cittapaviveko ca parisuddhacittānaṃ  
paramavodānappattānaṃ. Upadhiviveko ca nirupadhīnaṃ puggalānaṃ visaṅkhā-  
ragatānaṃ”ti (mahāni. 57). **Pavivekakathanti** bhikkhūnampi ca imaṃ paviveka-  
kathaṃ kattā.

### Pañcavidhasaṃsaggavaṇṇanā

**Asamsatthoti** (2.0050) pañcavidhena saṃsaggena virahito. Savanasaṃsaggo dassanasaṃsaggo samullapanasaṃsaggo sambhogasaṃsaggo kāyasaṃsaggoti pañcavidho saṃsaggo. Tesu idha bhikkhu suṇāti, “asukasmiṃ gāme vā nigame vā itthi vā kumārikā vā abhirūpā dassaniyā pāsādikā paramāya vaṇṇapokkharatāya samannāgatā”ti. So taṃ sutvā saṃsīdati visīdati na sakkoti brahmacariyaṃ sandhāretuṃ, sikkhādubbalyaṃ anāvikatvā hīnāyāvattatīti evaṃ parehi vā kathiyamānaṃ rūpādisampattiṃ attanā vā hasitalapitagītasaddaṃ suṇantassa sotaviññāṇavīthivasena uppanno rāgo **savanasaṃsaggo** nāma. So anitthigandhapaccekabodhisattassa ca pañcaggaḷaṇavāsītissadaharassa ca vasena vedītabbo-

Daharo kira ākāseṇa gacchanto girigāmaṃvāsikammārādhītāya pañcahi kumārīhi saddhiṃ padumasaraṃ gantvā nhatvā padumāni ca pilandhitvā madhurassa-rena gāyantiyā saddaṃ sutvā kāmarāgeṇa viddho viśesā parihāyitvā anayabyasanaṃ pāpuṇi. Idha bhikkhu na heva kho suṇāti, apica kho sāmaṃ passati itthiṃ vā kumāriṃ vā abhirūpaṃ dassaniyaṃ pāsādikaṃ paramāya vaṇṇapokkharatāya samannāgataṃ. So taṃ disvā saṃsīdati visīdati na sakkoti brahmacariyaṃ sandhāretuṃ, sikkhādubbalyaṃ anāvikatvā hīnāyāvattatīti evaṃ visabhāgarūpaṃ oloketassa pana cakkhuviññāṇavīthivasena uppannarāgo **dassanasaṃsaggo** nāma. So evaṃ vedītabbo-

Eko kira daharo kāladīghavāpidvāravīhāraṃ uddesatthāya gato. Ācariyo tassa antarāyaṃ disvā okāsaṃ na karoti. So punappunnaṃ anubandhati. Ācariyo sace antogāme na carissasi. Dassāmi te uddesanti āha. So sādhiṃ sampatīcchitvā uddese niṭṭhite ācariyaṃ vanditvā gacchanto ācariyo me imasmiṃ gāme caritūṃ na deti, kiṃ nu kho kāraṇanti cīvaraṃ pārupitvā gāmaṃ pāvīsi, ekā kuladhītā pīta-kavatthaṃ nivāsetvā gehe tīthā daharaṃ disvā sañjātarāgā ulūkenā yāguṃ āharitvā tassa patte pakkhipitvā nivattitvā mañcake nipajji. Atha naṃ mātāpitaro (2.0051) kiṃ ammāti pucchiṃsu, dvāreṇa gataṃ daharaṃ labhamānā jīvissāmi, alabhamānā marissāmi. Mātāpitaro vegena gantvā gāmadvāre daharaṃ patvā vanditvā, “nivattatha, bhante, bhikkhaṃ gaṇhāhi”ti āhaṃsu. Daharo alaṃ gacchāmi. Te, “idaṃ nāma, bhante, kāraṇaṃ”ti yācitvā- “amhākaṃ, bhante, gehe ettakaṃ nāma dhanam atthi, ekāyeva no dhītā, tvaṃ no jeṭṭhaputtatthāne tthassasi, sukheṇa sakkā jīvitun”ti āhaṃsu. Daharo, “na mayhaṃ iminā palibodhena attho”ti anādiyitvāva pakkanto.

Mātāpitaro gantvā, “amma, nāsakkhimhā daharaṃ nivattetuṃ, yaṃ aññaṃ sāmikaṃ icchasi, taṃ labhissasi, uttāhehi khāda ca piva cā”ti āhaṃsu. Sā anīcchantī sattāhaṃ nirāhārā hutvā kālamakāsi. Mātāpitaro tassā sarīrakiccaṃ katvā taṃ pītakavatthaṃ dhuravīhāre bhikkhusaṅghassa adaṃsu, bhikkhū vatthaṃ khaṇḍākhaṇḍaṃ katvā bhājayiṃsu. Eko mahallako attano koṭṭhāsaṃ gahetvā kalyāṇavīhāraṃ āgato. Sopi daharo cetiyaṃ vandissāmi tattheva gantvā divā tthāne nisīdi. Mahallako taṃ vatthakhaṇḍaṃ gahetvā, “iminā me parissāvanaṃ vicārethā”ti daharaṃ avoca. Daharo mahāthera “kuhiṃ laddhan”ti āha. So sabbaṃ pavattiṃ kathesi. So taṃ sutvāva, “evarūpāya nāma saddhiṃ saṃvāsaṃ

nālatthan”ti rāgagginā daḍḍho tattheva kālamakāsi.

Aññamaññaṃ ālāpasallāpavasena uppannarāgo pana **samullapanasamsaggo** nāma. Bhikkhuno bhikkhuniyā santakaṃ, bhikkhuniyā vā bhikkhussa santakaṃ gahetvā paribhogakaraṇavasena uppannarāgo **sambhogasamsaggo** Nāma. So evaṃ veditabbo- maricavaṭṭivihāramahe kira bhikkhūnaṃ satasahassaṃ bhikkhuniṇaṃ navutisahassāni eva ahesuṃ. Eko sāmaṇero uṇhayāguṃ gahetvā gacchanto sakiṃ cīvarakaṇṇe ṭhapesi, sakiṃ bhūmiyaṃ. Ekā sāmaṇerī disvā ettha pattaṃ ṭhapetvā yāhīti thālakaṃ adāsi. Te aparabhāge ekasmiṃ bhaye uppanne parasamuddaṃ agamaṃsu. Tesu bhikkhunī puretaraṃ agamāsi. Sā, “eko kira sīhaḷabhikkhu āgato”ti sutvā therassa santikaṃ gantvā paṭisanthāraṃ katvā nisinnā,- “bhante, maricavaṭṭivihāramahakāle tumhe kativassā”ti pucchi. Tadāhaṃ sattavassikasāmaṇero. Tvaṃ pana kativassāti? Ahaṃ sattavassikasāmaṇerīyeva ekassa (2.0052) sāmaṇerassa uṇhayāguṃ gahetvā gacchantassa pattaṭhapanatthaṃ thālakamadāsinti. Thero, “ahaṃ so”ti vatvā thālakaṃ nīharitvā dassesi. Te ettakeneva saṃsaggena brahmacariyaṃ sandhāretuṃ asakkontā dvepi saṭṭhivassakāle vibbhamiṃsu.

Hatthagāhādivasena pana uppannarāgo **kāyasamsaggo** nāma. Tatridaṃ vatthumahācetiyaṅgaṇe kira daharabhikkhū sajjhāyaṃ gaṇhanti. Tesu piṭṭhipasse daharabhikkhuniyo dhammaṃ suṇanti. Tatreko daharo hatthaṃ pasārento ekissā daharabhikkhuniyā kāyaṃ chupi. Sā taṃ hatthaṃ gahetvā attano urasmiṃ ṭhapesi, ettakena saṃsaggena dvepi vibbhamitvā gihibhāvaṃ pattā.

### Gāhagāhakādivaṇṇanā

Imesu pana pañcasu saṃsaggesu bhikkhuno bhikkhūhi saddhiṃ savanadassanasaṃsamullapanasambhogakāyaparāmāsā nīcācampi hontiyeva, bhikkhunīhi saddhiṃ ṭhapetvā kāyasamsaggaṃ sesā kālena kālaṃ honti; tathā upāsaka-upāsikāhi saddhiṃ sabbepi kālena kālaṃ honti. Tesu hi kilesuppattito cittaṃ rakkhitaṃ. Eko hi bhikkhu gāhagāhako hoti, eko gāhamuttako, eko muttagāhako, eko muttamuttako.

Tattha yaṃ bhikkhuṃ manussāpi āmisena upalāpetvā gahaṇavasena upasaṅkamanti, bhikkhupi pupphaphalādīhi upalāpetvā gahaṇavasena upasaṅkamanti, ayaṃ **gāhagāhako** nāma. Yaṃ pana manussā vuttanayena upasaṅkamanti, bhikkhu dakkhiṇeyyavasena upasaṅkamanti, ayaṃ **gāhamuttako** nāma. Yassa manussā dakkhiṇeyyavasena cattāro paccaye denti, bhikkhu pupphaphalādīhi upalāpetvā gahaṇavasena upasaṅkamanti, ayaṃ **muttagāhako** nāma. Yassa manussāpi dakkhiṇeyyavasena cattāro paccaye denti, bhikkhupi

cūḷapiṇḍapātiyatissatthero viya dakkhiṇeyyavasena paribhuñjati, ayaṃ **muttamuttako** nāma.

Theraṃ kira ekā upāsikā dvādasa vassāni upaṭṭhahi. Ekadivasam tasmim gāme aggi utṭhahitvā gehāni jhāpesi. Aññesaṃ kulūpakabhikkhū āgantvā (2.0053)– “kiṃ upāsike, api kiñci bhaṇḍakaṃ arogaṃ kātuṃ asakkhitthā”ti paṭisanthāraṃ akaṃsu. Manussā, “amhākaṃ mātu kulūpakatthero bhuñjanavelāyameva āgami-ssati”ti āhaṃsu. Theropi punadivase bhikkhācāraṇaṃ sallakkhetvā āgato. Upāsikā koṭṭhacchāyāya nisīdāpetvā bhikkhaṃ sampādetvā adāsi. There bhattakiccaṃ katvā pakkante manussā āhaṃsu– “amhākaṃ mātu kulūpakatthero bhuñjanavelāyameva āgato”ti. Upāsikā, “tumhākaṃ kulūpakā tumhākaṃyeva anucchavikā, mayhaṃ thero mayheva anucchaviko”ti āha. Āyasmā pana mantāṇiputto imehi pañcahi saṃsaggehi catūhipi parisāhi saddhiṃ asaṃsaṭṭho gāhamuttako ceva muttamuttako ca ahosi. Yathā ca sayam asaṃsaṭṭho, evaṃ bhikkhūnampi tam asaṃsaggakathaṃ kattā ahosi.

**Āraddhavīriyoti** paggaḥitavīriyo, paripuṇṇakāyikacetavīriyoti attho. Yo hi bhikkhu gamane uppanakilesaṃ ṭhānaṃ pāpuṇitum na deti, ṭhāne uppanakilesaṃ nisajjaṃ, nisajjāya uppanakilesaṃ sayanaṃ pāpuṇitum na deti, mantena kaṇhasappaṃ uppīletvā gaṇhanto viya, amittaṃ gīvāya akkamanto viya ca vicarati, ayaṃ **āraddhavīriyo** Nāma. Thero ca tādiso ahosi. Bhikkhūnampi tatheva vīriyārambhakathaṃ kattā ahosi.

**Sīlasampannoti**–ādīsu **sīlanti** catupārisuddhisīlaṃ. **Samādhīti** vipassanāpādaḥ aṭṭha samāpattiyo. **Paññāti** lokiyalokuttaraññaṃ. **Vimuttīti** ariyaphalaṃ. **Vimuttiñānadassananti** ekūnavīsatividhaṃ paccavekkhaṇaṇaṃ. Thero sayampi sīlādīhi sampanno ahosi bhikkhūnampi sīlādīkathaṃ kattā. Svāyaṃ dasahi kathāvatthūhi ovadatīti **ovādako**. Yathā pana eko ovadatiyeva, sukhumaṃ atthaṃ parivattetvā jānāpetum na sakkoti. Na evaṃ thero. Thero pana tāni dasa kathāvatthūni viññāpetīti **viññāpako**. Eko viññāpetum sakkoti, kāraṇaṃ dassetum na sakkoti. Thero kāraṇampi sandassetīti **sandassako**. Eko vijjamānaṃ kāraṇaṃ dasseti, gāhetum pana na sakkoti. Thero gāhetumpi sakkotīti **samādapako**. Evaṃ samādapetvā (2.005) pana tesu kathāvatthūsu ussāhajanavasena bhikkhū samuttejetīti **samuttejako**. Ussāhajāte vaṇṇaṃ vatvā sampahaṃsetīti **sampahaṃsako**.

## Pañcalābhavaṇṇanā

**253. Suladdhalābhāti** aññesaṃpi manussattabhāvaṃ pabbajjādiguṇalābhā nāma honti. Āyasmato pana puṇṇassa suladdhalābhā ete, yassa satthu sammukhā evaṃ vaṇṇo abbhuggatoti attho. Apica apaṇḍitehi vaṇṇakathanaṃ nāma na tathā lābho, paṇḍitehi vaṇṇakathanaṃ pana lābho. Gihī hi vā vaṇṇakathanaṃ na tathā lābho, gihī hi “vaṇṇaṃ kathessāmī”ti, “amhākaṃ ayyo saṇho sakhilo sukhasambhāso, vihāraṃ āgatānaṃ yāgubhattaphāṇitādīhi saṅghaṃ karotī”ti kathento avaṇṇameva katheti. “Avaṇṇaṃ kathessāmī”ti “ayaṃ thero mandamando viya abalabalo viya bhākuṭīkabhākuṭīko viya natthi iminā saddhiṃ vissāso”ti kathento

vaṇṇameva katheti. Sabrahmacārīhipi satthu parammukhā vaṇṇakathanam na tathā lābho, satthu sammukhā pana atilābhoti imampi atthavasam paṭicca “suladdhalābhā”ti āha. **Anumassa anumassā**ti dasa kathāvattūni anupavisitvā anupavisitvā. **Tañca satthā abbhanumodatī**ti tañcassa vaṇṇam evametaṃ appiccho ca so bhikkhu santuṭṭho ca so bhikkhūti anumodati. Iti viññūhi vaṇṇabhāsanam eko lābho, sabrahmacārīhi eko, satthu sammukhā eko, anumassa anumassa eko, satthārā abbhanumodanam ekoti ime pañca lābhe sandhāya “suladdhalābhā”ti āha. **Kadācī**ti kismiñcideva kāle. **Karahacī**ti tasseva vevacanam. **Appeva nāma siyā kocideva kathāsallāpoti** api nāma koci kathāsamudācāropi bhaveyya. Therena kira āyasmā puṇṇo neva diṭṭhapubbo, nassa dhammakathā sutapubbā. Iti so tassa dassanampi dhammakathampi patthayamāno evamāha.

### Cārikādivaṇṇanā

**254. Yathābhirantanti** yathā-ajjhāsayaṃ viharitvā. Buddhānañhi ekasmiṃ ṭhāne vasantānam chāyūdakādivipattim vā apphāsukasenāsanam vā, manussānam assaddhādibhāvam (2.0055) vā āgamma anabhirati nāma natthi. Tesam sampattiyā “idha phāsu viharāmā”ti abhiramitvā ciravīhāropi natthi. Yattha pana tathāgate viharante sattā saraṇesu vā patitṭhahanti, sīlāni vā samādiyanti, pabbajanti vā, tato sotāpattimaggādīnam vā pana tesam upanissayo hoti. Tattha buddhā satte tāsū sampattīsū patitṭhāpana-ajjhāsayena vasanti; tāsam abhāve pakkamanti. Tena vuttam- “yathā-ajjhāsayaṃ viharitvā”ti. **Cārikam caramānoti** addhānagamanaṃ gacchanto. Cārikā ca nāmesā bhagavato duvidhā hoti turitacārikā ca, aturitacārikā ca.

Tattha dūrepi bodhaneyyapuggalam disvā tassa bodhanatthāya sahasā gamanaṃ **turitacārikā** nāma. Sā mahākassapapaccuggamanādīsū daṭṭhabbā. Bhagavā hi mahākassapaṃ paccuggacchanto muhuttaṃ tigāvutaṃ maggaṃ agamāsi, āḷavakassatthāya tiṃsayojanaṃ, tathā aṅgulimālassa. Pukkusātissa pana pañcacattālisayojanaṃ, mahākappinassa vīsyojanasataṃ, khadiravaniyassa tthāya satta yojanasatāni agamāsi; dhammasenāpatino saddhivīhārikassa vanavāsītissasāmaṇerassa tigāvutādhiḱam vīsyojanasataṃ.

Ekadivasam kira thero, “tissasāmaṇerassa santikaṃ, bhante, gacchāmi”ti āha. Bhagavā, “ahampi gamissāmi”ti vatvā āyasmantaṃ ānandaṃ āmantesi- “ānanda, vīsatisahassānam chaḷabhiññānam ārocehi- ‘bhagavā vanavāsītissasāmaṇerassa santikaṃ gamissatī”ti. Tato dutiyadivase vīsatisahassakhīṇāsavaparivuto ākāse uppatitvā vīsyojanasatamatthake tassa gocaragāmadvāre otarivā cīvaraṃ pārupi. Kammantaṃ gacchamānā manussā disvā, “satthā, bho, āgato, mā kammantaṃ agamithā”ti vatvā āsanāni paññapetvā yāguṃ datvā pānavattaṃ karontā, “kuhiṃ, bhante, bhagavā gacchatī”ti daharabhikkhū pucchiṃsu. Upāsakā, na bhagavā aññattha gacchati, idheva tissasāmaṇerassa dassanatthāya āgatoti. Te “amhākaṃ kira kulūpakattherassa dassanatthāya satthā āgato, no vata no thero oramattako”ti somanassajātā ahesuṃ.

Atha (2.0056) bhagavato bhattakiccapariyosāne sāmaṇero gāmaṃ piṇḍāya caritvā “upāsakā mahā bhikkhusaṅgho”ti pucchi. Athassa te, “satthā, bhante, āgato”ti ārocesuṃ, so bhagavantam upasaṅkamitvā piṇḍapātena āpucchi. Satthā tassa pattam hatthena gahetvā, “alam, tissa, niṭṭhitam bhattakiccan”ti āha. Tato upajjhāyam āpucchitvā attano pattāsane nisīditvā bhattakiccamakāsi. Athassa bhattakiccapariyosāne satthā maṅgalam vatvā nikkhamitvā gāmadvāre ṭhatvā, “kataro te, tissa, vasanaṭṭhānam gamanamaggo”ti āha. “Ayaṃ bhagavā”ti. Maggam desayamāno purato yāhi tissāti. Bhagavā kira sadevakassa lokassa maggadesako samānopi “sakalatigāvute magge sāmaṇeram daṭṭhum lacchāmī”ti tam maggadesakamakāsi.

So attano vasanaṭṭhānam gantvā bhagavato vattamakāsi. Atha nam bhagavā, “kataro te, tissa, caṅkamo”ti pucchitvā tattha gantvā sāmaṇerassa nisīdanapāsāne nisīditvā, “tissa, imasmim ṭhāne sukham vasasi”ti pucchi. So āha- “āma, bhante, imasmim me ṭhāne vasantassa sīhabyagghahatthimigamorādīnam saddam suṇato araṅṅasaṅṅā uppajjati, tāya sukham vasāmī”ti. Atha nam bhagavā, “tissa, bhikkhusaṅgham sannipātehi, buddhadāyajjam te dassāmī”ti vatvā sannipatite bhikkhusaṅghe upasampādetvā attano vasanaṭṭhānameva agamāsīti. Ayaṃ **turitacārikā** nāma.

Yaṃ pana gāmanigamapaṭipāṭiyā devasikam yojanaḍḍhayaohanavasena piṇḍapātacariyādīhi lokam anuggaṇhantassa gamanam, ayaṃ **aturitacārikā** nāma. Imaṃ pana cārikam caranto bhagavā mahāmaṇḍalam majjhimamaṇḍalam antimamaṇḍalanti imesam tiṇṇam maṇḍalānam aṅṅatarasmim carati. Tattha mahāmaṇḍalam navayojanasatikam, majjhimamaṇḍalam chayojanasatikam, antimamaṇḍalam tiyojanasatikam. Yadā mahāmaṇḍale cārikam caritukāmo hoti, mahāpavāraṇāya pavāretvā pāṭipadadivase mahābhikkhusaṅghaparivāro nikkhamati. Samantā yojanasatam ekakolāhalam ahosi, purimam purimam āgatā nimantetum labhanti; itaresu dvīsu maṇḍalesu sakkāro mahāmaṇḍale osarati. Tatra bhagavā tesu tesu gāmanigamesu ekāham dvīham vasanto mahājanam āmisapaṭiggahena anuggaṇhanto dhammadānena cassa vivaṭṭūpanissitam (2.0057) kusalam vaḍḍhento navahi māsehi cārikam pariyosāpeti.

Sace pana antovasse bhikkhūnam samathavipassanā taruṇā hoti, mahāpavāraṇāya apavāretvā pavāraṇāsaṅgham datvā kattikapuṇṇamāya pavāretvā migasirassa paṭhamadivase mahābhikkhusaṅghaparivāro nikkhamitvā majjhimamaṇḍalam osarati. Aṅṅenapi kāraṇena majjhimamaṇḍale cārikam caritukāmo catumāsam vasitvāva nikkhamati. Vuttanayeneva itaresu dvīsu maṇḍalesu sakkāro majjhimamaṇḍale osarati. Bhagavā purimanayeneva lokam anuggaṇhanto aṭṭhahi māsehi cārikam pariyosāpeti.

Sace pana catumāsam vuṭṭhavassassāpi bhagavato veneyyasattā aparipakkindriyā honti, tesam indriyaparipākam āgamayamāno aparampi ekam māsam vā dviticutumāsam vā tattheva vasitvā mahābhikkhusaṅghaparivāro nikkhamati. Vuttanayeneva itaresu dvīsu maṇḍalesu sakkāro antomaṇḍale osarati. Bhagavā purimanayeneva lokam anuggaṇhanto sattahi vā chahi vā pañcahi vā catūhi vā

māsehi cārikaṃ pariyosāpeti. Iti imesu tīsu maṇḍalesu yattha katthaci cārikaṃ caranto na cīvarādihetu carati. Atha kho ye duggatā bālā jiṇṇā byādhitā, te kadā tathāgataṃ āgantvā passissantī? Mayi pana cārikaṃ carante mahājano tathāgata-dassanaṃ labhissati, tattha keci cittāni pasādessanti, keci mālādīhi pūjessanti, keci kaṭacchubhikkhaṃ dassanti, keci micchādassanaṃ pahāya sammādiṭṭhikā bhavissantī, taṃ tesam bhavissati dīgharattaṃ hitāya sukhāyāti evaṃ lokānukampāya cārikaṃ carati.

Apica catūhi kāraṇehi buddhā bhagavanto cārikaṃ caranti- jaṅghāvihārava-sena sarīraphāsukatthāya, atthuppattikālaṃ abhikaṅkhanatthāya, bhikkhūnaṃ sikkhāpadaṃ paññāpanatthāya, tattha tattha paripākagatindriye bodhaneyyasatte bodhanatthāyāti. Aparehipi catūhi kāraṇehi buddhā bhagavanto cārikaṃ caranti- buddhaṃ saraṇaṃ gacchissantīti vā, dhammaṃ saraṇaṃ gacchissantīti vā, saṅghaṃ saraṇaṃ gacchissantīti vā, mahatā dhammavassena catasso parisā santappessāmīti vāti. Aparehi pañcahi kāraṇehi buddhā bhagavanto cārikaṃ caranti (2.0058)- pāṇātipātā viramissantīti vā, adinnādānā... kāmesumicchācārā... musāvādā... surāmerayamajjapamādaṭṭhānā viramissantīti vāti. Aparehi aṭṭhahi kāraṇehi buddhā bhagavanto cārikaṃ caranti- paṭhamajjhānaṃ paṭilabhissantīti vā, dutiyaṃ ...pe... nevasaññānāsaññāyatanaṃ samāpattiṃ paṭilabhissantīti vāti. Aparehi aṭṭhahi kāraṇehi buddhā bhagavanto cārikaṃ caranti- sotāpattimaggaṃ adhigamissantīti vā, sotāpattiphalaṃ ...pe... arahattaphalaṃ sacchikarissantīti vāti. Ayaṃ **aturitacārikā**, sā idha adhippetā. Sā panesā duvidhā hoti nibaddhacārikā, anibaddhacārikā ca. Tattha yaṃ ekasseva bodhaneyyasattassa atthāya gacchati, ayaṃ nibaddhacārikā nāma. Yaṃ pana gāmanigamanagarapaṭipāṭiva-sena carati, ayaṃ anibaddhacārikā nāma. Esā idha adhippetā.

**Senāsanam saṃsāmetvāti** senāsanam paṭisāmetvā. Taṃ pana paṭisāmento therō na cūḷapattamahāpatta-cūḷathālakamahāthālaka-paṭṭuṇṇacīvara-dukūlacīvarādīnaṃ bhaṇḍikaṃ katvā sappitelādīnaṃ vā pana ghaṭe pūrāpetvā gabbhe nida-hitvā dvāraṃ pidhāya kuṅcikaṃ muddikādīni yojāpesi. “Sace na hoti bhikkhu vā sāmaṇero vā ārāmiko vā upāsako vā, catūsu pāsāṇesu mañce mañcaṃ āropetvā piṭhe piṭhaṃ āropetvā cīvaravaṃse vā cīvararajjuyā vā upari puñjaṃ katvā dvāra-vātapānaṃ thaketvā pakkamitabban”ti (cūḷava. 361) vacanato pana nevāsikaṃ bhikkhuṃ āpucchanamattakeneva paṭisāmesi.



**Yena sāvatti tena cārikaṃ pakkāmi**ti satthu dassanakāmo hutvā yena disābhāgena sāvatti tena pakkāmi. Pakkamanto ca na suddhodanamahārājassa ārocāpetvā sappitelamadhuphāṇitādīni gāhāpetvā pakkanto. Yūthaṃ pahāya nikkhanto pana mattahatti viya, asahāyakkicco siho viya, pattacivaramattaṃ ādāya ekakova pakkāmi. Kasmā panesa pañcasatehi attano antevāsikehi saddhiṃ rājagahaṃ agantvā idāni nikkhantoti? Rājagahaṃ kapilavatthuto dūraṃ saṭṭhiyojanāni, sāvatti pana pañcadasa. Satthā rājagahato pañcacattālīsayojanaṃ āgantvā sāvattiyaṃ viharati, idāni āsanno jātoti sutvā nikkhamīti akāraṇametaṃ. Buddhānaṃ santikaṃ gacchanto hi esa yojanasahassampi gaccheyya, tadā pana (2.0059) kāyaviveko na sakkā laddhanti. Bahūhi saddhiṃ gamanakāle hi ekasmiṃ gacchāmāti vadante eko idheva vasāmāti vadati. Ekasmiṃ vasāmāti vadante eko gacchāmāti vadati. Tasmā icchiticchitakkhaṇe samāpattiṃ appētvā nisīdituṃ vā phāsukasenāsane kāyavivekaṃ laddhuṃ vā na sakkā hoti, ekakassa pana taṃ sabbaṃ sulabhaṃ hotiti tadā agantvā idāni pakkāmi.

**Cārikaṃ caramānoti** ettha kiñcāpi ayaṃ cārikā nāma mahājanasaṅgahattaṃ buddhānaṃyeva labbhati, buddhe upādāya pana ruḥhisaddena sāvakānampi vuccati kilañjādīhi kataṃ bijanampi tālavaṇṭaṃ viya. **Yena bhagavāti** sāvattiyā avidūre ekasmiṃ gāmake piṇḍāya caritvā katabhattakicco jetavanaṃ pavisitvā sārīputtattherassa vā mahāmoggallānattherassa vā vasanaṭṭhānaṃ gantvā pāde dhovitvā makkhetvā pāniyaṃ vā pānakaṃ vā pivitvā thokaṃ vissamitvā satthāraṃ passissāmīti cittampi anuppādetvā ujukaṃ gandhakuṭipariveṇameva agamāsi. Therassa hi satthāraṃ daṭṭhukāmassa aññaena bhikkhunā kiccaṃ natthi. Tasmā rāhulaṃ vā ānandaṃ vā gahetvā okāsaṃ kāretvā satthāraṃ passissāmīti evampi cittaṃ na uppādesi.

Thero hi sayameva buddhasāsane vallabho rañño saṅgāma vijayamahāyodho viya. Yathā hi tādisassa yodhassa rājānaṃ daṭṭhukāmassa aññaṃ sevitvā dassanakammaṃ nāma natthi; vallabhatāya sayameva passati. Evaṃ theropi buddhasāsane vallabho, tassa aññaṃ sevitvā satthudassanakiccaṃ natthiti pāde dhovitvā pādapuñchanamhi puñchitvā yena bhagavā tenupasaṅkami. Bhagavāpi “paccūsakāleyeva mantāṇiputto āgamissati”ti addasa. Tasmā gandhakuṭiṃ pavisitvā sūci-ghaṭikaṃ adatvāva darathaṃ paṭippassambhetvā uṭṭhāya nisīdi. Thero kavāṭaṃ paṇāmetvā gandhakuṭiṃ pavisitvā bhagavantaṃ abhivādetvā ekamantaṃ nisīdi. **Dhammiyā kathāyāti** bhagavā dhammiṃ kathaṃ kathento cūḷagosīngasutte (ma. ni. 1.325 ādayo) tiṇṇaṃ kulaputtānaṃ sāmaggirasānisamaṃsaṃ kathesi; sekkhasutte (ma. ni. 2.22 ādayo) āvasathānisamaṃsaṃ, ghaṭikārasutte (ma. ni. 2.282 ādayo) satipaṭilābhikaṃ pubbenivāsappaṭisaṃyuttakathaṃ; raṭṭhapālasutte (ma. ni. 2.304) cattāro (2.0060) dhammuddese, selasutte (ma. ni. 2.396 ādayo) pānakānisamaṃsa-kathaṃ, upakkilesasutte (ma. ni. 3.236 ādayo) bhaguttherassa dhammakathaṃ kathento ekībhāve ānisamaṃsaṃ kathesi. Imasmiṃ pana rathavinīte āyasmato puṇṇassa kathento dasakathāvattunissayaṃ anantanayaṃ nāma dassesi puṇṇa, ayampi appicchakathāyeva santosakathāyevāti. Paṭisambhidāpattassa sāvā-kassa velante ṭhatvā mahāsamudde hatthappasāraṇaṃ viya ahosi.

**Yena andhavananti** tadā kira pacchābhatte jetavanaṃ ākiṇṇaṃ hoti, bahū khattiyabrāhmaṇādayo jetavanaṃ osaranti; rañño cakkavattissa khandhāvāraṭṭhānaṃ viya hoti, na sakkā pavivekaṃ labhituṃ. Andhavanaṃ pana padhānagharasadisamaṃ pavivittaṃ, tasmā yenandhavanaṃ tenupasaṅkami. Kasmā pana mahāthere na addasa? Evaṃ kirassa ahosi- “sāyanhasamaye āgantvā mahāthere disvā puna dasabalaṃ passissāmi, evaṃ mahātherānaṃ ekaṃ upaṭṭhānaṃ bhavissati, satthu dve bhavissanti, tato satthāraṃ vanditvā mama vasanaṭṭhāna-meva gamissāmi”ti.

### Sattavisuddhipañhavaṇṇanā

**256. Abhiṇhaṃ kittayamāno ahoṣīti** punappunaṃ vaṇṇaṃ kittayamāno vihāsi. Thero kira tato paṭṭhāya divase divase saṅghamajjhe “puṇṇo kira nāma mantāṇi-putto catūhi parisāhi saddhiṃ asaṃsaṭṭho, so dasabalassa dassanattāya āgami-ssati; kacci nu kho maṃ adisvāva gamissati”ti theranavamajjhimaṃ satikaraṇatthaṃ āyasmato puṇṇassa guṇaṃ bhāsati. Evaṃ kirassa ahosi- “mahallakabhikkhū nāma na sabbakālaṃ antovihāre honti; guṇakathāya panassa kathitāya yo ca naṃ bhikkhuṃ passissati; so āgantvā ārocessati”ti. Athāyaṃ therasseva saddhivihāriko taṃ āyasmantaṃ mantāṇi-puttaṃ pattacīvaramādāya gandhakuṭiṃ pavisaṇaṃ addasa. Kathaṃ pana naṃ esa aññāsīti? Puṇṇa, puṇṇāti vatvā kathe-ntassa bhagavato dhammakathāya aññāsī- “ayaṃ so thero, yassa me upajjhāyo abhiṇhaṃ kittayamāno hoti”ti. Iti so āgantvā therassa ārocesi. **Nisīdanaṃ ādāyā**Ti **nisīdanaṃ** nāma sadasaṃ vuccati avāyimaṃ. Thero pana cammakhaṇḍaṃ gahetvā agamāsi. **Piṭṭhito piṭṭhitoti** (2.0061) pacchato pacchato. **Sīsānulokīti** yo unnataṭṭhāne piṭṭhiṃ passanto ninnataṭṭhāne sīsaṃ passanto gacchati, ayampi sīsānulokīti vuccati. Tādiso hutvā anubandhi. Thero hi kiñcāpi saṃyatapadasaddatāya accāsanno hutvā gacchantopi padasaddena na bādhati, “nāyaṃ sammodanakālo”-ti ṇatvā pana na accāsanno, andhavanaṃ nāma mahantaṃ, ekasmiṃ ṭhāne nilīnaṃ apassantena, āvuso puṇṇa, puṇṇāti aphāsukasaddo kātabbo hotīti nisinnataṭṭhānajānanatthaṃ nātidūre hutvā sīsānulokī agamāsi. **Divāvihāraṃ nisīdīti** divāvihāratthāya nisīdi.

Tattha āyasmāpi puṇṇo udiccabrāhmaṇajacco, sārīputtattheropi. Puṇṇattheropi suvaṇṇavaṇṇo, sārīputtattheropi. Puṇṇattheropi arahattaphalasaṃpattisaṃpānaṃ, sārīputtattheropi. Puṇṇattheropi kappasatasahassaṃ abhinīhārasaṃpānaṃ, sārīputtattheropi kappasatasahassādhikaṃ ekamasāṅkhyeyaṃ. Puṇṇattheropi paṭisaṃbhidāpatto mahākhīṇāsavo, sārīputtattheropi. Iti ekaṃ kanaka-guhaṃ pavīṭṭhā dve sīhā viya, ekaṃ vijambhanabhūmiṃ otiṇṇā dve byagghā viya, ekaṃ supupphitasālavanaṃ pavīṭṭhā dve chaddantaṅgarājāno viya, ekaṃ simbalivanaṃ pavīṭṭhā dve supaṇṇarājāno viya, ekaṃ naravāhanayānaṃ abhiruḥhā dve vessavaṇā viya, ekaṃ paṇḍukambalasiṃ abhinisinnā dve sakkā viya, ekavimānabbhantaragatā dve hāritamahābrahmāno viya ca te dve pi brāhmaṇajaccā dve pi suvaṇṇavaṇṇā dve pi samāpattilābhino dve pi abhinīhārasaṃpānaṃ dve pi

paṭisambhidāpattā mahākhīṇāsavā ekaṃ vanasaṇḍaṃ anupaviṭṭhā taṃ vana-  
ṭṭhānaṃ sobhayiṃsu.

**Bhagavati no, āvuso, brahmacariyaṃ vussatīti**, āvuso, kiṃ amhākaṃ bhagavato santike āyasmatā brahmacariyaṃ vussatīti? Idaṃ āyasmā sārīputto tassa bhagavati brahmacariyavāsaṃ jānantopi kathāsamuṭṭhāpanatthaṃ pucchi. Purimakathāya hi appatiṭṭhitāya pacchimakathā na jāyati, tasmā evaṃ pucchi. Thero anujānanto “evamāvuso”ti āha. Athassa pañhavissajjanaṃ sotukāmo āyasmā sārīputto “kiṃ nu kho āvuso sīlavisuddhatthaṃ bhagavati brahmacariyaṃ vussatīti”ti paṭipāṭiyā satta visuddhiyo pucchi. Tāsaṃ vitthārakathā **visuddhimagge** vuttā. Āyasmā pana puṇṇo (2.0062) yasmā catupārisuddhisīlādīsu ṭhitassāpi brahmacariyavāso matthakaṃ na pāpuṇāti, tasmā, “no hidaṃ, āvuso”ti sabbaṃ paṭikkhipi.

**Kimatthaṃ carahāvusoti** yadi sīlavisuddhi-ādīnaṃ atthāya brahmacariyaṃ na vussati, atha kimatthaṃ vussatīti pucchi. **Anupādāparinibbānatthaṃ kho, āvusoti** ettha **anupādāparinibbānaṃ** nāma appaccayaparinibbānaṃ. Dvedhā upādānāni gahaṇūpādānañca paccayūpādānañca. **Gahaṇūpādānaṃ** nāma kāmupādānādikaṃ catubbidhaṃ, **paccayūpādānaṃ** nāma avijjāpaccayā saṅkhārāti evaṃ vuttapaccayā. Tattha gahaṇūpādānavādino ācariyā anupādāparinibbānanti catūsu upādānesu aññatarenāpi kañci dhammaṃ aggahetvā pavattaṃ arahattaphalaṃ anupādāparinibbānanti kathenti. Tañhi na ca upādānasampayuttaṃ hutvā kañci dhammaṃ upādiyati, kilesānañca parinibbutante jātattā parinibbānanti vuccati. Paccayūpādānavādino pana anupādāparinibbānanti appaccayaparinibbānaṃ. Paccayavasena anuppannaṃ asaṅkhataṃ amatadhātumeva anupādāparinibbānanti kathenti. Ayaṃ anto, ayaṃ koṭi, ayaṃ niṭṭhā. Appaccayaparinibbānaṃ pattassa hi brahmacariyavāso matthakaṃ patto nāma hoti, tasmā thero “anupādāparinibbānatthan”ti āha. Atha naṃ anuyuñjanto āyasmā sārīputto “kiṃ nu kho, āvuso, sīlavisuddhi anupādāparinibbānan”ti puna pucchaṃ ārabhi.

**258.** Theropi sabbaparivattesu tatheva paṭikkhipitvā pariyosāne dosaṃ dassento **sīlavisuddhiṃ ce, āvusoti-ādīmāha**. Tattha **paññapeyyāti** yadi paññapeyya. **Sa-upādānaṃyeva samānaṃ anupādāparinibbānaṃ paññapeyyāti** saṅghaṇadhammameva niggahaṇadhammaṃ sappaccayadhammameva appaccayadhammaṃ saṅkhatadhammameva asaṅkhatadhammanti paññapeyyāti attho. **Ñāṇadassanavisuddhiyaṃ** pana sappaccayadhammameva appaccayadhammaṃ saṅkhatadhammameva asaṅkhatadhammanti paññapeyyāti ayameva attho gaheṭṭabbo. **Puthujjano hi, āvusoti** ettha vaṭṭānugato lokiyabālaputhujjano daṭṭhabbo. So hi catupārisuddhisīlamattassāpi abhāvato sabbaso aññatra imehi dhammehi. **Tena hīti** yena kāraṇena ekacce paṇḍitā upamāya atthaṃ jānanti, tena kāraṇena upamaṃ te karissāmīti attho.

### Sattarathavinītavaṇṇanā

**259. Satta** (2.0063) **rathavinītanīti** vinīta-assājāniyayutte satta rathe. **Yāvadeva, cittavisuddhatthāti**, āvuso, ayaṃ sīlavisuddhi nāma, yāvadeva, cittavisuddhatthā.

**Cittavisuddhatthā**ti nissakkavacanametam. Ayam panettha attho, yāvadeva, citta-visuddhisankhātā atthā, tāva ayam silavisuddhi nāma icchitabbā. Yā pana ayam cittavisuddhi, esā silavisuddhiyā attho, ayam koṭi, idaṃ pariyosānaṃ, cittavisuddhiyaṃ t̥hitassa hi silavisuddhikiccaṃ kataṃ nāma hotīti. Esa nayo sabbapadesu.

Idaṃ panettha opammasaṃsandanaṃ- rājā pasenadi kosalo viya hi jarāmaranabhīruko yogāvacarō daṭṭhabbo. Sāvattinagaraṃ viya sakkāyanagaraṃ, sāketa-nagaraṃ viya nibbānagaraṃ, rañño sākete vaḍḍhi-āvahassa sīghaṃ gantvā pāpuṇitabbassa accāyikassa kiccassa uppādakālo viya yogino anabhisametānaṃ catunnaṃ ariyasaccānaṃ abhisamayakiccassa uppādakālo. Satta rathavinītaṃ viya satta visuddhiyo, paṭhamam rathavinītaṃ āruḥhakālo viya silavisuddhiyaṃ t̥hitakālo, paṭhamarathavinītādīhi dutiyādīni āruḥhakālo viya silavisuddhi-ādīhi citta-visuddhi-ādīsu t̥hitakālo. Sattamena rathavinītena sākete antepuradvāre oruyha uparipāsāde ñātimittagaṇaparivutassa surasabhojanaparibhogakālo viya yogino ñāṇadassanavisuddhiyā sabbakilese khepetvā dhammavarapāsādaṃ āruyha paropaṇṇāsakusaladhammaparivārassa nibbānārammaṇaṃ phalasaṃpattim appetvā nirodhasayane nisinnassa lokuttarasukhānubhavanakālo daṭṭhabbo.

Iti āyasmantaṃ puṇṇaṃ dasakathāvatthulābhiṃ dhammasenāpatisāriputta-thero satta visuddhiyo pucchi. Āyasmā puṇṇo dasa kathāvatthūni vissajjesi. Evaṃ pucchanto pana dhammasenāpati kiṃ jānitvā pucchi, udāhu ajānitvā? Titthakusalo vā pana hutvā visayasmim pucchi, udāhu atitthakusalo hutvā avisayasmim? Puṇṇattheropi ca kiṃ jānitvā vissajjesi, udāhu ajānitvā? Titthakusalo vā pana hutvā visayasmim vissajjesi, udāhu atitthakusalo hutvā avisayeti? Jānitvā titthakusalo hutvā visaye pucchīti hi vadamāno dhammasenāpatiṃyeva vadeyya. Jānitvā titthakusalo hutvā visaye vissajjesīti vadamāno puṇṇattheraṃyeva (2.0064) vadeyya. Yañhi visuddhīsu saṃkhittaṃ, taṃ kathāvatthūsu vitthiṇṇaṃ. Yaṃ kathāvatthūsu saṃkhittaṃ, taṃ visuddhīsu vitthiṇṇaṃ. Tadaminā nayena veditabbaṃ.

Visuddhīsu hi ekā silavisuddhi cattāri kathāvatthūni hutvā āgatā appicchakathā santuṭṭhikathā asaṃsaggakathā, silakathāti. Ekā cittavisuddhi tiṇi kathāvatthūni hutvā āgatā- pavivekakathā, vīriyārambhakathā, samādhikathāti, evaṃ tāva yaṃ visuddhīsu saṃkhittaṃ, taṃ kathāvatthūsu vitthiṇṇaṃ. Kathāvatthūsu pana ekā paññākathā pañca visuddhiyo hutvā āgatā- diṭṭhivissuddhi, kaṅkhāvitaraṇavissuddhi, maggāmaggañāṇadassanavisuddhi, paṭipadāñāṇadassanavisuddhi, ñāṇadassanavisuddhīti, evaṃ yaṃ kathāvatthūsu saṃkhittaṃ, taṃ visuddhīsu vitthiṇṇaṃ. Tasmā sāriputtatthero satta visuddhiyo pucchanto na aññaṃ pucchi, dasa kathāvatthūniyeva pucchi. Puṇṇattheropi satta visuddhiyo

vissajjento na aññaṃ vissajjesi, dasa kathāvatthūniyeva vissajjesīti. Iti ubhopete jānitvā titthakusalā hutvā visayeva pañhaṃ pucchimṣu ceva vissajjesuṃ cāti vedītabbo.

**260. Ko nāmo āyasmā** Ti na thero tassa nāmaṃ na jānāti. Jānantoyeva pana sammodituṃ labhissāmīti pucchi. **Kathañca panāyasmantanti** idaṃ pana thero sammodamāno āha. **Mantāṇiputtoti** mantāṇiyā brāhmaṇiyā putto. **Yathā tanti** ettha **tanti** nipātamattaṃ, yathā sutavatā sāvakena byākātabbā, evameva byākātāti ayamettha saṅkhepattho. **Anumassa anumassāti** dasa kathāvatthūni ogāhetvā anupavisitvā. **Celaṇḍupakenāti** ettha **celaṃ** vuccati vatthaṃ, **aṇḍupakaṃ** cumbaṭakaṃ. Vatthacumbaṭakaṃ sīse katvā āyasmantaṃ tattha nisīdāpetvā pariharaṇtāpi sabrahmacārī dassanāya labheyyuṃ, evaṃ laddhadassanampi tesam lābhāyevāti aṭṭhānaparikappena abhiñhadassanassa upāyaṃ dassesi. Evaṃ apariharaṇtena hi pañhaṃ vā pucchitukāmena dhammaṃ vā sotukāmena “thero kattha ṭhito kattha nisinno”ti pariyesantena caritabbaṃ hoti. Evaṃ pariharaṇtā pana icchiticchitakkhaṇeyeva sīsato oropetvā mahārahe āsane nisīdāpetvā sakkā honti pañhaṃ vā pucchituṃ dhammaṃ vā sotuṃ. Iti aṭṭhānaparikappena abhiñhadassanassa upāyaṃ dassesi.

**Sāriputtoti ca pana manti** sāriyā brāhmaṇiyā puttoti ca pana evaṃ maṃ sabrahmacārī jānanti. **Satthukappena**ti satthusadisena. Iti ekapadeneva āyasmā (2.0065) puṇṇo sāriputtattheraṃ candamaṇḍalaṃ āhacca ṭhapento viya ukkhipi. Therassa hi imasmiṃ ṭhāne ekantadhammakathikabhāvo pākaṭo ahosi. Amaccañhi purohitam mahantoti vadamāno rājasadisoti vadeyya, goṇam hatthippamāṇoti, vāpiṃ samuddappamāṇoti, ālokaṃ candimasūriyālokappamāṇoti, ito paraṃ etesaṃ mahantabhāvakathā nāma natthi. Sāvakaṃpi mahāti vadanto satthupaṭibhāgoti vadeyya, ito paraṃ tassa mahantabhāvakathā nāma natthi. Iccāyasmā puṇṇo ekapadeneva theraṃ candamaṇḍalaṃ āhacca ṭhapento viya ukkhipi.

**Ettakampi no nappaṭibhāseyyāti** paṭisambhidāpattassa appaṭibhānaṃ nāma natthi. Yā panāyaṃ upamā āhaṭā, taṃ na āhareyyāma, atthameva katheyyāma. Upamā hi ajānantānaṃ āhariyatīti ayamettha adhippāyo. Aṭṭhakathāyaṃ pana idampi paṭikkhipitvā upamā nāma buddhānampi santike āhariyati, theraṃ panesa apacāyamāno evamāhāti.

**Anumassa anumassa pucchitāti** dasa kathāvatthūni ogāhetvā ogāhetvā pucchitā. Kiṃ pana pañhassa pucchanaṃ bhāriyaṃ, udāhu vissajjananti? Ugga-hetvā pucchanaṃ no bhāriyaṃ, vissajjanaṃ pana bhāriyaṃ. Sahetukaṃ vā sakāraṇaṃ katvā pucchanaṃpi vissajjanaṃpi bhāriyameva. **Samanumodiṃsūti** samacittā hutvā anumodiṃsu. Iti yathānusandhināva desanā niṭṭhitāti.

Papañcasūdaniyā majjhimanikāyaṭṭhakathāya

Rathavinītasuttavaṇṇanā niṭṭhitā.

## 5. Nivāpasuttavaṇṇanā

**261. Evaṃ me sutanti** nivāpasuttam. Tattha **nevāpikoti** yo migānaṃ gahaṇa-tthāya araṇṇe tiṇabijāni vapati “idaṃ tiṇaṃ khādituṃ āgate mige sukhaṃ gaṇhi-ssāmi”ti. **Nivāpanti** vappaṃ. **Nivuttanti** vapitaṃ. **Migajātāti** migaghaṭā. **Anupakha-jjāti** anupavisitvā. **Mucchitāti** taṇhāmucchanāya mucchitā, taṇhāya hadayaṃ pavisitvā mucchanākāraṃ pāpitāti (2.0066) attho. **Madam āpajjissanti** mānamadaṃ āpajjissanti. **Pamādanti** vissaṭṭhasatibhāvaṃ. **Yathākāmakaraṇīyā bhavissanti**ti yathā icchissāma, tathā kātabbā bhavissanti. **Imasmiṃ nivāpe** Ti imasmiṃ nivāpa-tṭhāne. Ekaṃ kira nivāpatiṇaṃ nāma atthi nidāghabhaddakaṃ, taṃ yathā yathā nidāgho hoti, tathā tathā nivāraṇaṃ viya meghamālā viya ca ekagghanaṃ hoti, taṃ luddakā ekasmiṃ udakaphāsukaṭṭhāne kasitvā vapitvā vatim katvā dvāraṃ yojetvā rakkhanti. Atha yadā mahānidāghe sabbatiṇāni sukkhāni honti, jivhātema-namattampi udakaṃ dullabhaṃ hoti, tadā migajātā sukkhatiṇāni ceva purāṇapa-ṇṇāni ca khādantā kampamānā viya vicarantā nivāpatiṇassa gandhaṃ ghāyitvā vadhabandhanādīni agaṇayitvā vatim ajjhottharantā pavisanti. Tesaṃhi nivāpa-tiṇaṃ ativiya piyaṃ hoti manāpaṃ. Nevāpiko te disvā dve tīṇi divasāni pamatto viya hoti, dvāraṃ vivaritvā tiṭṭhati. Antonivāpaṭṭhāne taḥim taḥim udaka-āvāṭakāpi honti, migā vivaṭadvārena pavisitvā khāditamattakaṃ pivitamattakameva katvā pakkamanti, punadivase kiñci na karontīti kaṇṇe cālayamānā khāditvā pivitvā atar-amānā gacchanti, punadivase koci kiñci kattā natthīti yāvadatthaṃ khāditvā pivitvā maṇḍalagumbaṃ pavisitvā nipajjanti. Luddakā tesam pamattabhāvaṃ jānitvā dvāraṃ pidhāya samparivāretvā koṭito paṭṭhāya koṭtetvā gacchanti, evaṃ te tasmim nivāpe nevāpikassa yathākāmakaraṇīyā bhavanti.

**262. Tatra, bhikkhave** Ti, bhikkhave, tesu migajātesu. **Paṭhamā migajātāti**, migajātā paṭhamadutiya nāma natthi. Bhagavā pana āgatapaṭipāṭivasena kappetvā paṭhamā, dutiyā, tatiyā, catutthāti nāmaṃ āropetvā dassesi. **Iddhānubhāvāti** yathā-kāmaṃ kattabbabhāvato; vasībhāvoyeva hi ettha iddhīti ca ānubhāvoti ca adhi-ppeto.

**263. Bhayabhogāti** bhayena bhogato. **Balavīriyanti** aparāparaṃ sañcaraṇavāyo-dhātu, sā parihāyīti attho.

**264. Upanissāya āsayaṃ kappeyyāmāti** anto nipajjitvā khādantānampi bhaya-meva, bāhirato āgantvā khādantānampi bhayameva, mayaṃ pana amuṃ nivāpa-tṭhānaṃ nissāya ekamante āsayaṃ kappeyyāmāti cintayimṣu. **Upanissāya** (2.0067) **āsayaṃ kappayimṣūti** luddakā nāma na sabbakālaṃ appamattā honti. Mayaṃ tattha tattha maṇḍalagumbesu ceva vatipādesu ca nipajjitvā etesu mukhadhova-natthaṃ vā āhāra-kiccarāṇatthaṃ vā pakkantesu nivāpavatthuṃ pavisitvā khādi-tamattaṃ katvā amhākaṃ vasanaṭṭhānaṃ pavississāmāti nivāpavatthuṃ upani-ssāya gahanesu gumbavatipādādīsu āsayaṃ kappayimṣu. **Bhuñjimsūti** vuttana-yena luddakānaṃ pamādakālaṃ ṇatvā sīghaṃ sīghaṃ pavisitvā bhuñjimsu. **Keta-binoti** sikkhitakerāṭikā. **Iddhimantāti** iddhimanto viya. **Parajanā** Ti yakkhā. Ime na

migajātāti. **Āgatiṃ vā gatiṃ vāti** iminā nāma ṭhānena āgacchanti, amutra gacchantīti idaṃ nesam na jānāma. **Daṇḍavākarāhīti** daṇḍavākarajālehi. **Samantā sappadesaṃ anuparivāresunti** atimāyāvino ete, na dūraṃ gamissantī, santikeyeva nipannā bhavissantīti nivāpakkhettassa samantā sappadesaṃ mahantaṃ okāsaṃ anuparivāresuṃ. **Addasaṃsūti** evaṃ parivāretvā vākarajālaṃ samantato cāletvā olokontā addasaṃsu. **Yattha teti** yasmim ṭhāne te gāhaṃ agamaṃsu, taṃ ṭhānaṃ addasaṃsūti attho.

**265. Yaṃnūna mayaṃ yattha agatīti** te kira evaṃ cintayimṃsu- “anto nipajjitvā anto khādantānampi bhayameva, bāhirato āgantvā khādantānampi santike vasitvā khādantānampi bhayameva, tepi hi vākarajālena parikkhipitvā gahitāyevā”-ti, tena tesam etadahosi- “yaṃnūna mayaṃ yattha nevāpikassa ca nevāpikaparisāya ca agati avisayo, tattha tattha seyyaṃ kappeyyāmā”ti. **Aññe ghaṭṭessantīti** tato tato dūrataravāsino aññe ghaṭṭessanti. **Te ghaṭṭitā aññeti** tepi ghaṭṭitā aññe tato dūrataravāsino ghaṭṭessanti. **Evaṃ imaṃ nivāpaṃ nivuttaṃ sabbaso migajātā parimuccissantīti** evaṃ imaṃ amhehi nivuttaṃ nivāpaṃ sabbe migaghaṭṭā migasaṅghā vissajjessanti pariccajissanti. **Ajjhupekkheyyāmāti** tesam gahaṇe abyāvaṭṭā haveyyāmāti; yathā tathā āgacchantesu hi taruṇapotako vā mahallako vā dubbalo vā yūthaparihīno vā sakkā honti laddhuṃ, anāgacchantesu kiñci natthi. **Ajjhupekkhimṃsu kho, bhikkhave**ti evaṃ cintetvā abyāvaṭṭāva ahesuṃ.

**267. Amuṃ (2.0068) nivāpaṃ nivuttaṃ mārassa amūni ca lokāmisānīti** ettha nivāpoti vā lokāmisānīti vā vaṭṭāmisabhūtānaṃ pañcannaṃ kāmaguṇānametaṃ adhivacanaṃ. Māro na ca bijāni viya kāmaguṇe vapento āhiṇḍati, kāmaguṇagiddhānaṃ pana upari vasaṃ vatteti, tasmā kāmaguṇā mārassa nivāpā nāma honti. Tena vuttaṃ- “amuṃ nivāpaṃ nivuttaṃ mārassā”ti. **Na parimuccimṃsu mārassa iddhānubhāvāti** mārassa vasaṃ gatā ahesuṃ, yathākāmakaraṇīyā. Ayaṃ saputtabhariyapabbajjāya āgata-upamā.

**268. Cetovimutti parihāyīti** ettha cetovimutti nāma araññe vasissāmāti uppanna-ajjhāsayo; so parihāyīti attho. **Tathūpame ahaṃ ime dutiyeti** ayaṃ brāhmaṇa-dhammikapabbajjāya upamā. Brāhmaṇā hi aṭṭhacattālisavassāni komārabrahmacariyaṃ caritvā vaṭṭupacchedabhayena paveṇim ghaṭṭayissāmāti dhaṇaṃ pariyesitvā bhariyaṃ gahetvā agāramajjhe vasantā ekasmim putte jāte “amhākaṃ putto jāto vaṭṭaṃ na ucchinnaṃ paveṇi ghaṭṭitā”ti puna nikkhamitvā pabbajanti vā tameva vā sa’kalattavāsaṃ vasanti.

**269. Evañhi te, bhikkhave, tatiyāpi samaṇabrāhmaṇā na parimuccimṃsūti** purimā viya tepi mārassa iddhānubhāvā na muccimṃsu; yathākāmakaraṇīyāva ahesuṃ. Kiṃ pana te akaṃsūti? Gāmanigamarājadhāniyo osaritvā tesu tesu ārāma-uyyānaṭṭhānesu assamaṃ māpetvā nivasantā kuladārake hatthi-assarathasippādīni nānappakārāni sippāni sikkhāpesuṃ. Iti te vākarajālena tatiyā migajātā viya mārassa pāpimato diṭṭhijālena parikkhipitvā yathākāmakaraṇīyā ahesuṃ.

**270. Tathūpame ahaṃ ime catuttheti** ayaṃ imassa sāsanaṃ upamā āhaṭṭā.

**271. Andhamakāsi māranti** na mārassa akkhīni bhindi. Vipassanāpādaka-jjhānaṃ samāpannaṃ pana bhikkhuno imaṃ nāma ārammaṇaṃ nissāya cittaṃ

vattatīti māro passitum na sakkoti. Tena vuttam- “andhamakāsi māran”ti. **Apadam vadhitvā māraccakkhanti** teneva pariyāyena yathā mārassa cakkhu apadam (2.0069) hoti nippadam, appatiṭṭham, nirārammaṇam, evaṃ vadhitvāti attho. **Adassanam gato pāpimatoti** teneva pariyāyena mārassa pāpimato adassanam gato. Na hi so attano maṃsacakkhunā tassa vipassanāpādakajjhānam samāpannassa bhikkhuno ñāṇasarīram daṭṭhum sakkoti. **Paññāya cassa disvā āsavā parikkhīṇā hontīti** maggapaññāya cattāri ariyasaccāni disvā cattāro āsavā parikkhīṇā honti. **Tiṇṇo loke visattikanti** loke sattavisattabhāvena visattikāti evaṃ saṅkham gataṃ. Atha vā “visattikāti kenatṭhena visattikā? Visatāti visattikā visaṭāti visattikā, vipulāti visattikā, visālāti visattikā, visamāti visattikā, visakkatīti visattikā, visaṃ haratīti visattikā, visaṃvādikāti visattikā, visamūlāti visattikā, visaphalāti visattikā, visaparibhogāti visattikā, visālā vā pana sā taṇhā rūpe sadde gandhe rase phoṭṭhabbe”ti (mahāni. 3; cūḷani. mettagūmāṇavapucchāniddeśa 22, khaggavisāṇasuttaniddeśa 124) visattikā. Evaṃ visattikāti saṅkham gataṃ taṇham tiṇṇo nittiṇṇo uttiṇṇo. Tena vuccati- “tiṇṇo loke visattikan”ti.

Papañcasūdaniyā majjhimanikāyaṭṭhakathāya

Nivāpasuttavaṇṇanā niṭṭhitā.

## 6. Pāsarāsisuttavaṇṇanā

**272. Evaṃ me sutanti** pāsarāsisuttam. Tattha **sādhu mayam, āvusoti** āyācantā bhaṇanti. Ete kira pañcasatā bhikkhū janapadavāsino “dasabalam passissāmā”ti sāvattim anuppattā. Satthudassanam pana etehi laddham, dhammiṃ katham na tāva suṇanti. Te satthugāravena “amhākaṃ, bhante, dhammakatham kathethā”ti vattum na sakkonti. Buddhā hi garū honti, ekacāriko sīho migarājā viya, pabhinnakuñjaro viya, phaṇakata-āsiviso viya, mahā-aggikkhandho viya ca durāsadā vuttampi



cetaṃ-

“Āsīviso yathā ghorō, migarājāva kesarī;  
nāgoṃva kuñjaro danti, evaṃ buddhā durāsada”ti.

Evam (2.0070) durāsadaṃ satthāraṃ te bhikkhū sayam yācituṃ asakkontā āya-  
smantaṃ ānandaṃ yācamānā “sādhu mayaṃ, āvuso”ti āhaṃsu.

**Appeva nāmāti** api nāma labheyyātha. Kasmā pana therō te bhikkhū “ramma-  
kassa brāhmaṇassa assamaṃ upasaṅkameyyāthā”ti āha? Pākaṭakiriyaṭāya.  
Dasabalassa hi kiriyaṭ therassa pākaṭā hoti; jānāti therō, “ajja satthā jetavane  
vasitvā pubbārāme divāvihāraṃ karissati; ajja pubbārāme vasitvā jetavane divāvi-  
hāraṃ karissati; ajja ekakova piṇḍāya pavissati; ajja bhikkhusaṅghaparivuto  
imasmim kāle janapadacārikaṃ nikkhamissati”ti. Kim panassa evaṃ jānanatthaṃ  
cetopariyaññaṃ atthīti? Natthi. Anumānabuddhiyā pana katakiriyaṭāya nayaggā-  
hena jānāti. Yañhi divasaṃ bhagavā jetavane vasitvā pubbārāme divāvihāraṃ  
kātukāmo hoti, tadā senāsanaparikkhārabhaṇḍānaṃ paṭisāmanākāraṃ dasseti,  
therō sammajjanisaṅkārachaḍḍanakādīni paṭisāmeti. Pubbārāme vasitvā jeta-  
vanaṃ divāvihārāya āgamanakālepi eseṃva nayo.

Yadā pana ekako piṇḍāya pavisitukāmo hoti, tadā pātova sarīrapaṭijagganaṃ  
katvā gandhakuṭim pavisitvā dvāraṃ pidhāya phalasaṃpattim appetvā nisīdati.  
Therō “ajja bhagavā bodhaneyyabandhavaṃ disvā nisinno”ti tāya saññāya ñatvā  
“ajja, āvuso, bhagavā ekako pavisitukāmo, tumhe bhikkhācārasajjā hothā”ti  
bhikkhūnaṃ saññaṃ deti. Yadā pana bhikkhusaṅghaparivāro pavisitukāmo hoti,  
tadā gandhakuṭidvāraṃ upaḍḍhapidahitaṃ katvā phalasaṃpattim appetvā nisī-  
dati, therō tāya saññāya ñatvā pattacīvaraggahaṇatthāya bhikkhūnaṃ saññaṃ  
deti. Yadā janapadacārikaṃ nikkhamitukāmo hoti, tadā ekaṃ dve ālope atirekaṃ  
bhujjati, sabbakālaṃ caṅkamaṇācārūya aparāparaṃ caṅkamati, therō tāya  
saññāya ñatvā “bhagavā, āvuso, janapadacārikaṃ caritukāmo, tumhākaṃ  
kattabbaṃ karoṭhā”ti bhikkhūnaṃ saññaṃ deti.

Bhagavā paṭhamabodhiyaṃ vīsati vassāni anibaddhavāso ahoṣi, pacchā pañca-  
vīsati vassāni abbokijjaṃ sāvattimyeṃva upanissāya vasanto ekadivase (2.0071)  
dve ṭhānāni paribhujjati. Jetavane rattim vasitvā punadivase bhikkhusaṅgha-  
parivuto dakkhiṇadvārena sāvattim piṇḍāya pavisitvā pācīnadvārena nikkhamitvā  
pubbārāme divāvihāraṃ karoti. Pubbārāme rattim vasitvā punadivase pācīnadvā-  
rena sāvattim piṇḍāya pavisitvā dakkhiṇadvārena nikkhamitvā jetavane divāvi-  
hāraṃ karoti. Kasmā? Dvinnaṃ kulānaṃ anukampāya. Manussattabhāve ṭhitena  
hi anāthapiṇḍikena viya aññaṃ kenaci, mātugāmattabhāve ṭhitāya ca visākhāya  
viya aññaṃ itthiyā tathāgataṃ uddissa dhanapariccāgo kato nāma natthi, tasmā  
bhagavā tesam anukampāya ekadivase imāni dve ṭhānāni paribhujjati. Tasmim  
pana divase jetavane vasi, tasmā therō- “ajja bhagavā sāvattiyaṃ piṇḍāya  
caritvā sāyanhakāle gattāni parisīcānatthāya pubbakoṭṭhakaṃ gamissati;  
athāhaṃ gattāni parisīcivā ṭhitaṃ bhagavantaṃ yācivā rammakassa brāhma-  
ṇassa assamaṃ gahetvā gamissāmi. Evamime bhikkhū bhagavato sammukhā

labhissanti dhammakatham savanāyā”ti cintetvā te bhikkhū evamāha.

**Migāramātupāsādoti** visākhāya pāsādo. Sā hi migārena seṭṭhinā mātutṭhāne ṭhapitattā **migāramātāti** vuccati. **Paṭisallānā vuṭṭhitoti** tasmim kira pāsāde dvinnam mahāsāvakanam sirigabbhānam majjhe bhagavato sirigabbho ahosi. Thero dvāram vivarivā antogabbham sammajjitvā mālākacavaram nīharivā mañcapīṭham pañnapetvā satthu sañnam adāsi. Satthā sirigabbham pavisitvā dakkhiṇena passena sato sampajāno sīhaseyyam upagamma daratham paṭippassambhetvā utṭhāya phalasangāhānam appetvā nisīditvā sāyanhasamaye tato vuṭṭhāsi. Tam sandhāya vuttam “paṭisallānā vuṭṭhito”ti.

**Parisiñcitunti** yo hi cuṇṇamattikādīhi gattāni ubbaṭṭento mallakamuṭṭhādīhi vā ghaṃsanto nhāyati, so **nhāyatīti** vuccati. Yo tathā akatvā pakatiyāva nhāyati, so **parisiñcatīti** vuccati. Bhagavatopi sarīre tathā haritabham rajojallam nāma na upalimpati, utuggahaṇattham pana bhagavā kevalam udakam otarati. Tenāha- “gattāni parisiñcituṇ”ti. **Pubbakoṭṭhako**ti pācīnakoṭṭhako.

Sāvattiyam (2.0072) kira vihāro kadāci mahā hoti kadāci khuddako. Tathā hi so vipassissa bhagavato kāle yojaniko ahosi, sikhissa tigāvuto, vessabhussa aḍḍhayaohaniko, kakusandhassa gāvutappamāṇo, koṇāgamanassa aḍḍhagāvutappamāṇo, kassapassa vīsati-usabhappamāṇo, amhākam bhagavato kāle aṭṭhakarīsappamāṇo jāto. Tampi nagaram tassa vihārassa kadāci pācīnato hoti, kadāci dakkhiṇato, kadāci pacchimato, kadāci uttarato. Jetavane gandhakuṭiyam pana catunnam mañcapādānam patitṭhitatṭhānam acalameva.

Cattāri hi **acalacetiyatṭhānāni** nāma mahābodhipallaṅkatṭhānam isipatane dhammacakkappavattanatṭhānam saṅkassanagaradvāre devorohaṇakāle sopānassa patitṭhatṭhānam mañcapādatṭhānanti. Ayam pana pubbakoṭṭhako kassapadasabalassa vīsati-usabhavihārakāle pācīnadvāre koṭṭhako ahosi. So idānipi pubbakoṭṭhakotveva paññāyati. Kassapadasabalassa kāle aciravatī nagaram parikkhipitvā sandamānā pubbakoṭṭhakam patvā udakena bhinditvā mahantam udakarahadam māpesi samatittham anupubbagamānam. Tattha ekam rañño nhānatittham, ekam nāgarānam, ekam bhikkhusaṅghassa, ekam buddhānanti evam pāṭiyekkāni nhānatitthāni honti ramaṇiyāni vippakiṇṇarajatapaṭṭasadisavālikāni. Iti bhagavā āyasmatā ānandena saddhim yena ayam evarūpo pubbakoṭṭhako tenupasaṅkami gattāni parisiñcituṇ. Athāyasmā ānando udakasāṭikam upanesi. Bhagavā rattadupaṭṭam apanetvā udakasāṭikam nivāsesi. Thero dupaṭṭena saddhim mahācīvaram attano hatthagatamakāsi. Bhagavā udakam otari. Sahota- raṇenevassa udake macchakacchapā sabbe suvaṇṇavaṇṇā ahesuṇ. Yantanālikāhi suvaṇṇarasadhārānisiñcamānakālo viya suvaṇṇapaṭapasāraṇakālo viya ca ahosi. Atha bhagavato nhānavattam dassetvā nhatvā paccuttiṇṇassa thero rattadupaṭṭam upanesi. Bhagavā tam nivāsetvā vijjulatāsadisam kāyabandhanam bandhitvā mahācīvaram antantena samharitvā padumagabbhasadisam katvā upanītam dvīsu kaṇṇesu gahetvā aṭṭhāsi. Tena vuttam- “pubbakoṭṭhake gattāni parisiñcivā paccuttarivā ekacīvaro aṭṭhāsī”ti.

Evam (2.0073) ṭhitassa pana bhagavato sarīram vīkāsītakamaluppasaram

sabbapāliphullaṃ pāricchattakaṃ tārāmarīcivikasitaṃ ca gaganatalaṃ siriyā avahasamānaṃ viya virocittha. Byāmapabbhāparikkhepavilāsiniṃ cassa dvattiṃsavara-lakkhaṇamālā ganthetvā ṭhapitā dvattiṃsacandamālā viya, dvattiṃsasūriyamālā viya, paṭipāṭiyā ṭhapitā dvattiṃsacakkavatti dvattiṃsadevarājā dvattiṃsamahābrahmāno viya ca ativiya virocittha, vaṇṇabhūmināmesā. Evarūpesu ṭhānesu buddhānaṃ sarīravaṇṇaṃ vā guṇavaṇṇaṃ vā cuṇṇiyapadehi vā gāthāhi vā atthañca upamāyo ca kāraṇāni ca āharitvā paṭibalena dhammakathikena pūretvā kathetuṃ vaṭṭatīti evarūpesu ṭhānesu dhammakathikassa thāmo veditabbo.

**273. Gattāni pubbāpayamānoti** pakatibhāvaṃ gamayamāno nirudakāni kurumāno, sukkhāpayamānoti attho. Sodakena gattena cīvaraṃ pārupantassa hi cīvare kaṇṇikā uṭṭhahanti, parikkhārabhaṇḍaṃ dussati. Buddhānaṃ pana sarīre rajojallaṃ na upalimpati; padumapatte pakkhitta-udakabindu viya udakaṃ vinivattetvā gacchati, evaṃ santepi sikkhāgāravatāya bhagavā, “pabbajitavattaṃ nāmetan”ti mahācīvaraṃ ubhosu kaṇṇesu gahetvā purato kāyaṃ paṭicchādetvā aṭṭhāsi. Tasmim̐ khaṇe thero cintesi- “bhagavā mahācīvaraṃ pārupitvā migāramā-tupāsādaṃ ārabha gamanābhīhārato paṭṭhāya dunnivattiyo bhavissati; buddhānañhi adhippāyakopanaṃ nāma ekacārikasīhassa gahaṇatthaṃ hatthappasāraṇaṃ viya; pabhinnavaravāraṇassa soṇḍāya parāmasanaṃ viya; uggatejassa āsīvisassa gīvāya gahaṇaṃ viya ca bhāriyaṃ hoti. Idheva rammakassa brāhmaṇassa assamassa vaṇṇaṃ kathetvā tattha gamanatthāya bhagavantaṃ yācissāmi”ti. So tathā akāsi. Tena vuttaṃ- “atha kho āyasmā ānando ...pe... anukampaṃ upādāyā”ti.

Tattha **anukampaṃ upādāyāti** bhagavato sammukhā dhammiṃ kathaṃ sossāmāti taṃ assamaṃ gatānaṃ pañcannaṃ bhikkhusatānaṃ anukampaṃ paṭicca, tesu kāruṇṇaṃ katvāti attho. **Dhammiyā kathāyāti** dasasu pāramitāsu aññatarāya (2.0074) pāramiyā ceva mahābhīnikkhamanassa ca vaṇṇaṃ kathayamānā sannisinnā honti. **Āgamayamānoti** olokayamāno. Ahaṃ buddhoti sahasā appavisitvā yāva sā kathā niṭṭhāti, tāva aṭṭhāsīti attho. **Aggaḷaṃ ākoṭesīti** agganakhena kavāṭe saññaṃ adāsi. **Vivarim̐sūti** sotaṃ odahitvāva nisinnattā taṅkhaṇaṃyeva āgantvā vivarim̐su.

**Paññatte āsaneti** buddhakāle kira yattha yattha ekopi bhikkhu viharati, sabbattha buddhāsaṇaṃ paññattameva hoti. Kasmā? Bhagavā kira attano santike kammaṭṭhānaṃ gahetvā phāsukaṭṭhāne viharante manasi karoti “asuko mayhaṃ santike kammaṭṭhānaṃ gahetvā gato, sakkhissati nu kho visesaṃ nibbattetuṃ no vā”ti. Atha naṃ passati kammaṭṭhānaṃ vissajjetvā akusalavitakke vitakkayamānaṃ, tato “kathañhi nāma mādisassa satthu santike kammaṭṭhānaṃ gahetvā viharantaṃ imaṃ kulaputtaṃ akusalavitakkā abhibhavitvā anamatagge vaṭṭadukkhe saṃsāressanti”ti tassa anuggahatthaṃ tattheva attānaṃ dassetvā taṃ kulaputtaṃ ovaditvā ākāsaṃ uppatitvā puna attano vasanaṭṭhānameva gacchati. Athevaṃ ovadiyamānā te bhikkhū cintayim̐su- “sathā amhākaṃ manaṃ jānitvā āgantvā amhākaṃ samīpe ṭhitameva attānaṃ dasseti; tasmim̐ khaṇe, bhante, idha nisīdatha, idha nisīdathā”ti āsanapariyesanaṃ nāma bhāro”ti. Te āsanaṃ

paññapetvāva viharanti. Yassa piṭham atthi, so taṃ paññapeti. Yassa natthi, so mañcam vā phalakaṃ vā kaṭṭham vā pāsāṇaṃ vā vālikapuñjaṃ vā paññapeti. Taṃ alabhamānā purāṇapaṇṇānipi saṅkaḍḍhitvā tattha paṃsukūlaṃ pattharivā ṭhapenti. Idha pana pakatipaññattameva āsanaṃ ahosi, taṃ sandhāya vuttaṃ-  
“paññatte āsane nisīdī”ti.

**Kāya nutthāti** katamāya nu kathāya sannisinnā bhavathāti attho. “Kāya netthā”-  
tipi pāḷi, tassā katamāya nu etthāti attho. “Kāya notthā”tipi pāḷi, tassāpi purimo-  
yeva attho. **Antarā kathāti** kammaṭṭhānamanasikāra-uddesaparipucchādīnaṃ  
antarā aññā ekā kathā. **Vippakatā** Ti mama āgamanapaccayā apariniṭṭhitā sikhaṃ  
appattā. **Atha bhagavā anuppattoti** (2.0075) atha etasmiṃ kāle bhagavā āgato.  
**Dhammī vā kathāti** dasakathāvatthunissitā vā dhammī kathā. **Ariyo vā tuṇhībhā-**  
**voti** ettha pana dutiyajjhānampi ariyo tuṇhībhāvo mūlakammaṭṭhānampi. Tasmā  
taṃ jhānaṃ appetvā nisinnopi, mūlakammaṭṭhānaṃ gahetvā nisinnopi bhikkhu  
ariyena tuṇhībhāvena nisinnoti veditabbo.

**274. Dvemā, bhikkhave, pariyesanāti** ko anusandhi? Te bhikkhū sammukhā  
dhammiṃ kathaṃ sossāmāti therassa bhāraṃ akaṃsu, thero tesam assamagama-  
namakāsi. Te tattha nisīditvā atiracchānakathikā hutvā dhammiyā kathāya nisī-  
diṃsu. Atha bhagavā “ayaṃ tumhākaṃ pariyesanā ariyapariyesanā nāmā”ti  
dassetuṃ imaṃ desanaṃ ārabhi. Tattha **katamā ca, bhikkhave, anariyapariyesa-**  
**nāti** ettha yathā maggakusalo puriso paṭhamaṃ vajjetabbaṃ apāyamaggaṃ  
dassento “vāmaṃ muñcitvā dakkhiṇaṃ gaṇhā”ti vadati. Evaṃ bhagavā desanāku-  
salatāya paṭhamaṃ vajjetabbaṃ anariyapariyesanaṃ ācikkhitvā pacchā itaraṃ  
ācikkhissāmīti uddesānukkamaṃ bhinditvā evamāha. **Jātidhammoti** jāyanasa-  
bhāvo. **Jarādhammoti** jīraṇasabhāvo. **Byādhidhammoti** byādhisabhāvo. **Maraṇa-**  
**dhammo** Ti maraṇasabhāvo. **Sokadhammoti** socanakasabhāvo. **Samkilesadha-**  
**mmoti** samkilissanasabhāvo.

**Puttabhariyanti** puttā ca bhariyā ca. Esa nayo sabbattha. **Jātarūparajatanti** ettha  
pana **jātarūpanti** suvaṇṇaṃ. **Rajatanti** yaṃkiñci vohārūpagaṃ lohamāsakādi. **Jāti-**  
**dhammā hete, bhikkhave, upadhayoti** ete pañcakāmaguṇūpadhayo nāma honti,  
te

sabbepi jātidhammāti dasseti. Byādhidhammavārādīsu jātarūparajataṃ na gahitaṃ, na hetassa sīsarogādayo byādhayo nāma honti, na sattānaṃ viya cutisa-  
ñkhātaṃ maraṇaṃ, na soko uppajjati. Ayādīhi pana saṃkilesehi saṃkilissatīti  
saṃkilesadhammavāre gahitaṃ. Tathā utusamuṭṭhānattā jātidhammavāre. Malaṃ  
gahetvā jīraṇato jarādhammavāre ca.

**275. Ayaṃ** (2.0076), bhikkhave, ariyā pariyesanāti, bhikkhave, ayaṃ niddosatā-  
yapi ariyehi pariyesitabbatāyapi ariyapariyesanāti veditabbā.

**276. Ahampi sudaṃ, bhikkhaveli** kasmā ārabhi? Mūlato paṭṭhāya mahābhini-  
kkhamaṇaṃ dassetuṃ. Evaṃ kirassa ahosi- “bhikkhave, ahampi pubbe anariya-  
pariyesanaṃ pariyesiṃ. Svāhaṃ taṃ pahāya ariyapariyesanaṃ pariyesitvā sabba-  
ññutaṃ patto. Pañcavaggiyāpi anariyapariyesanaṃ pariyesiṃsu. Te taṃ pahāya  
ariyapariyesanaṃ pariyesitvā khīṇāsavabhūmiṃ pattā. Tumhepi mama ceva  
pañcavaggiyānañca maggaṃ āruḷhā. Ariyapariyesanā tumhākaṃ pariyesanā”ti  
mūlato paṭṭhāya attano mahābhinnikkhamaṇaṃ dassetuṃ imaṃ desanaṃ ārabhi.

**277. Tattha daharova samānoti** taruṇova samāno. **Susukāḷakesoti** suṭṭhu kāḷa-  
keso, añjanaṇṇakesova hutvāti attho. **Bhadrenāti** bhaddakena. **Paṭhamena vaya-**  
**sāti** tiṇṇaṃ vayānaṃ paṭhamavayena. **Akāmakānanti** anicchamānānaṃ, anāda-  
ratthe sāmivacanaṃ. Assūni mukhe etesanti assumukhā; tesaṃ **assumukhānaṃ**,  
assukilinnamukhānanti attho. **Rudantānanti** kanditvā rodamānānaṃ. **Kiṃ kusalaga-**  
**vesīti** kiṃ kusalanti gavesamāno. **Anuttaraṃ santivarapadanti** uttamaṃ santisa-  
ñkhātaṃ varapadaṃ, nibbānaṃ pariyesamānoti attho. **Yena āḷāro kālāmoti** ettha  
**āḷāro**ti tassa nāmaṃ, dīghapiṅgalo kireso. Tenassa **āḷāro**ti nāmaṃ ahosi. **Kālā-**  
**moti** gottaṃ. **Viharatāyasmāti** viharatu āyasmā. **Yattha viññū purisoti** yasmiṃ  
dhamme paṇḍito puriso. **Sakaṃ ācariyakanti** attano ācariyasamayaṃ. **Upasa-**  
**mpajja vihareyyāti** paṭilabhivā vihareyya. Ettāvataṃ tena okāso kato hoti. **Taṃ**  
**dhammanti** taṃ tesaṃ samayaṃ tantim. **Pariyāpuṇinti** sutvāva uggaṇhiṃ.

**Oṭṭhapahatamattenāti** tena vuttassa paṭiggahaṇatthaṃ oṭṭhapaharaṇamattena;  
aparāparaṃ katvā oṭṭhasañcaraṇamattakenāti attho. **Lapitalāpanamattenāti** tena  
lapitassa paṭilāpanamattakena. **Nāṇavādanti** jānāmīti vādaṃ (2.0077). **Theravā-**  
**danti** thirabhāvavādaṃ, thero ahametthāti etaṃ vacanaṃ. **Ahañceva aññe cāti** na  
kevalaṃ ahaṃ, aññepi bahū evaṃ vadanti. **Kevalaṃ saddhāmattakenāti** paññāya  
asacchikatvā suddhena saddhāmattakeneva. Bodhisatto kira vācāya dhammaṃ  
uggaṇhantoyeva, “na kālāmassa vācāya pariyattimattameva asmiṃ dhamme,  
addhā esa sattannaṃ samāpattīnaṃ lābhī”ti aññāsi, tenassa etadahosi.

**Ākiñcaññāyatanam pavedesīti** ākiñcaññāyatanapariyosānā satta samāpattiyo  
maṃ jānāpesi. **Saddhāti** imāsaṃ sattannaṃ samāpattīnaṃ nibbattanatthāya  
saddhā. **Vīriyādīsupi** eseva nayo. **Padaheyyanti** payogaṃ kareyyaṃ. **Nacirasseva**  
**taṃ dhammaṃ sayam abhiññā sacchikatvā upasampajja vihāsinti** bodhisatto kira  
vīriyaṃ paggaḥetvā katipāhaññeva satta suvaṇṇanisseṇiyo pasārento viya satta  
samāpattiyo nibbattesī; tasmā evamāha.

**Lābhā no, āvusoti** anusūyako kiresa kālāmo. Tasmā “ayaṃ adhunāgato, kinti  
katvā imaṃ dhammaṃ nibbattesī”ti usūyaṃ akatvā pasanno pasādaṃ pavedento

evamāha. **Ubhova santā imaṃ gaṇaṃ pariharāmā**ti “mahā ayaṃ gaṇo, dvepi janā pariharāmā”ti vatvā gaṇassa saññaṃ adāsi, “ahampi sattannaṃ samāpattinaṃ lābhī, mahāpurisopi sattannameva, ettakā janā mahāpurisassa santike parikkammaṃ uggaṇhatha, ettakā mayhan”ti majjhe bhinditvā adāsi. **Uḷārāyāti** uttamāya. **Pūjāyāti** kālāmassa kira upaṭṭhākā itthiyopi purisāpi gandhamālādīni gahetvā āgacchanti. Kālāmo- “gacchatha, mahāpurisaṃ pūjethā”ti vadati. Te taṃ pūjetvā yaṃ avasiṭṭhaṃ hoti, tena kālāmaṃ pūjenti. Mahagghāni mañcapīṭhāni āharanti; tānipi mahāpurisassa dāpetvā yadi avasiṭṭhaṃ hoti, attanā gaṇhāti. Gata-gataṭṭhāne varasenāsanam bodhisattassa jaggāpetvā sesakaṃ attanā gaṇhāti. Evaṃ uḷārāya pūjāya pūjesi. **Nāyaṃ dhammo nibbidāyāti**-ādīsu ayaṃ satta samāpattidhammo neva vaṭṭe nibbindanattāya, na virajjanattāya, na rāgādinirodhattāya, na (2.0078) upasamatthāya, na abhiññeyyadhammaṃ abhijānanattāya, na catumaggasambodhāya, na nibbānasacchikiriyāya saṃvattatīti attho.

**Yāvadeva ākiñcaññāyatanūpapattiyāti** yāva saṭṭhikappasahassāyuparimāṇe ākiñcaññāyatanabhava upapatti, tāvadeva saṃvattati, na tato uddham. Evamayaṃ punarāvattanadhammoyeva; yañca ṭhānaṃ pāpeti, taṃ jātijarāmarāṇehi aparimuttameva maccupāsaparikkhattamevāti. Tato paṭṭhāya ca pana mahāsatto yathā nāma chātajjhappuriso manuññabhojanaṃ labhitvā sampiyāyamānopi bhuñjitvā pittavasena vā semhavasena vā makkhikāvasena vā chaḍḍetvā puna ekaṃ piṇḍampi bhuñjissāmīti manam na uppādeti; evameva imā satta samāpattiyō mahantena ussāhena nibbattetvāpi, tāsu imaṃ punarāvattikādibhedam ādīnavam disvā, puna imaṃ dhammaṃ āvajjissāmi vā samāpajjissāmi vā adhiṭṭhahissāmi vā vuṭṭhahissāmi vā paccavekkhissāmi vāti cittameva na uppādesi. **Analaṅkaritvāti** alaṃ iminā, alaṃ imināti punappunaṃ alaṅkaritvā. **Nibbijāti** nibbinditvā. **Apakka-**  
**minti** agamāsīṃ.

**278. Na kho rāmo imaṃ dhammanti** idhāpi bodhisatto taṃ dhammaṃ uggaṇhantoyeva aññāsi- “nāyaṃ aṭṭhasamāpattidhammo udakassa vācāya uggaḥitamattova, addhā panesa aṭṭhasamāpattilābhī”ti. Tenassa etadahosi- “na kho rāmo ...pe... jānaṃ passaṃ vihāsi”ti. Sesamettha purimavāre vuttanayeneva vedittabbaṃ.

**279. Yena uruvelā senānigamoti** ettha **uruvelāti** mahāvelā, mahāvālikarāsīti attho. Atha vā **urūti** vālikā vuccati; **velāti** mariyādā, velātikkananahetu āhaṭṭa uru **uruvelāti** evamettha attho daṭṭhabbo. Atīte kira anuppanne buddhe dasasahassā kulaputtā tāpasapabbajam pabbajitvā tasmīṃ padese viharantā ekadivasam sannipatitvā katikavattam akaṃsu- “kāyakammavacīkammāni nāma paresampi pākaṭāni honti, manokammaṃ pana apākaṭam. Tasmā yo kāmavitakkaṃ vā byāpādavitakkaṃ vā vihiṃsāvitakkaṃ vā vitakketi, tassa añño codako (2.0079) nāma natthi; so attanāva attānaṃ codetvā pattapuṭena vālikaṃ āharitvā imasmīṃ ṭhāne ākiratu, idamassa daṇḍakammaṃ”ti. Tato paṭṭhāya yo tādisam vitakkaṃ vitakketi, so tatha pattapuṭena vālikaṃ ākirati, evam tatha anukkamena mahāvālikarāsī jāto. Tato taṃ pacchimā janatā parikkhipitvā cetiyatṭhānamakāsi; taṃ sandhāya vuttam- “**uruvelāti** mahāvelā, mahāvālikarāsīti attho”ti. Tameva

sandhāya vuttaṃ- “atha vā **urūti** vālikā vuccati, **velāti** mariyādā. Velātikkamana-  
hetu āhaṭṭā uru uruvelāti evamettha attho daṭṭhabbo”ti.

**Senānigamoti** senāya nigamo. Paṭhamakappikānaṃ kira tasmiṃ ṭhāne senāni-  
veso ahosi; tasmā so padeso **senānigamoti** vuccati. “Senāni-gāmo”tipi pāṭho.  
**Senānī** nāma sujātāya pitā, tassa gāmoti attho. **Tadavasarinti** tattha osariṃ. **Rama-  
ṇīyaṃ bhūmibhāganti** supupphitanānappakārajalajathalajapupphavicittaṃ mano-  
rammaṃ bhūmibhāgaṃ. **Pāsādikañca vanasaṇḍanti** morapiñchakalāpasadisam  
pasādajananavanasaṇḍañca addasaṃ. **Nadiñca sandantinti** sandamānañca  
maṇikkhandhasadisam vimalanilasitalasalilaṃ nerañjaraṃ nadiṃ addasaṃ. **Seta-  
kanti** parisuddhaṃ nikkaddamaṃ. **Supatitthanti** anupubbagaṃbhīrehi sundarehi  
titthehi upetaṃ. **Ramaṇīyanti** rajatapaṭṭasadisam vippakiṇṇavālikaṃ pahūtama-  
cchakacchapaṃ abhirāmadassanaṃ. **Samantā ca gocaragāmanti** tassa pade-  
sassa samantā avidūre gamanāgamanasampannaṃ sampattapabbajitānaṃ sula-  
bhapiṇḍaṃ gocaragāmañca addasaṃ. **Alaṃ vatāti** samatthaṃ vata. **Tattheva nisī-  
dinti** bodhipallaṅke nisajjaṃ sandhāyāha. Uparisuttasmiñhi **tatthevāti** dukkarakāri-  
kaṭṭhānaṃ adhippettaṃ, idha pana bodhipallaṅko. Tenāha- “tattheva nisīdin”ti. **Ala-  
midam padhānāyāti** idaṃ ṭhānaṃ padhānatthāya samatthanti evaṃ cintetvā nisī-  
dinti attho.

**280. Ajjhagamanti** adhigacchiṃ paṭilabhiṃ. **Ñāṇaṃca pana me dassananti**  
sabbadhammadassanasamatthañca me sabbaññutaññāṇaṃ udapādi. **Akuppā me**  
**vimuttīti** mayhaṃ arahattaphalavimutti akuppatāya ca akuppārammaṇatāya ca  
akuppā, sā hi rāgādīhi na kuppatīti akuppatāyapi akuppā, akuppaṃ nibbānama-  
ssārammaṇantipi akuppā. **Ayamantimā jātīti** ayaṃ sabbapacchimā jāti. **Natthi** (2.008  
**dāni punabbhavo**Ti idāni me puna paṭisandhi nāma natthīti evaṃ paccavekkhaṇa-  
ñāṇampi me uppannanti dasseti.

**281. Adhigatoti** paṭividdho. **Dhammoti** catusaccadhammo. **Gambhīroti** uttāna-  
bhāvapaṭikkhepavacanamaṃ. **Duddasoti** gambhīrattāva duddaso dukkhena  
daṭṭhabbo, na sakkā sukhena daṭṭhuṃ. Duddasattāva **duranubodho**, dukkhena  
avabujjhitaṃ, na sakkā sukhena avabujjhitaṃ. **Santoti** nibbuto. **Paṇitoti** ata-  
ppako. Idaṃ dvayaṃ lokuttarameva sandhāya vuttaṃ. **Atakkāvacaroti** takkena  
avacaritaṃ ogāhitaṃ na hoti, ñāṇeneva avacaritaṃ. **Nipuṇoti** saṅho. **Paṇḍita-  
vedanīyoti** sammāpaṭipadaṃ paṭipannehi paṇḍitehi veditaṃ. **Ālayarāmāti** sattā  
pañcasu kāmaguṇesu allīyanti. Tasmā te **ālayāti** vuccanti. Aṭṭhasatataṇhāvicari-  
tāni ālayanti, tasmā ālayāti vuccanti. Tehi ālayehi ramantīti **ālayarāmā**. Ālayesu  
ratāti **ālayaratā**. Ālayesu suṭṭhu muditāti **ālayasammuditā**. Yatheva hi susajjitaṃ  
pupphaphalabharitarukkhādisampannaṃ uyyānaṃ pavīṭṭho rājā tāya tāya sampa-  
tṭiyā ramati, sammudito āmoditapamodito hoti, na ukkaṇṭhati, sāyampi nikkha-  
mituṃ na icchati; evamimehipi kāmālayataṇhālayehi sattā ramanti, saṃsāravaṭṭe  
sammuditā anukkaṇṭhitā vasanti. Tena nesaṃ bhagavā duvidhampi ālayaṃ uyyā-  
nabhūmiṃ viya dassento “ālayarāmā”ti-ādimāha.

**Yadidanti** nipāto, tassa ṭhānaṃ sandhāya “yaṃ idan”ti, paṭiccasamuppādaṃ  
sandhāya “yo ayan”ti evamattho daṭṭhabbo. **Idappaccayatāpaṭiccasamuppādoti**

imesaṃ paccayā idappaccayā; idappaccayā eva idappaccayatā; idappaccayatā ca sā paṭiccasamuppādo cāti **idappaccayatāpaṭiccasamuppādo**. Saṅkhārādipa-ccayānametaṃ adhivacanaṃ. **Sabbasaṅkhārasamathoti**-ādi sabbam nibbāna-meva. Yasmā hi taṃ āgamma sabbasaṅkhāravipphanditāni sammanti vūpasa-mmanti, tasmā **sabbasaṅkhārasamathoti** vuccati. Yasmā ca taṃ āgamma sabbe upadhayo paṭinissaṭṭhā honti, sabbā taṇhā khīyanti, sabbe kilesarāgā virajjanti, sabbam dukkham nirujjhati; tasmā **sabbūpadhipaṭinissaggo taṇhākkhayo virāgo nirodho**Ti vuccati. Sā panesā taṇhā bhavena bhavaṃ, phalena vā saddhiṃ kammaṃ vinati saṃsibbatīti (2.0081) katvā **vānanti** vuccati, tato nikkhantaṃ vāna-toti **nibbānaṃ**. **So mamassa kilamathoti** yā ajānantānaṃ desanā nāma, so mama kilamatho assa, sā mama vihesā assāti attho. Kāyakilamatho ceva kāyavihesā ca assāti vuttaṃ hoti. Citte pana ubhayampetaṃ buddhānaṃ natthi. **Apissūti** anubrūhanatthe nipāto, so “na kevalaṃ etadahosi, imāpi gāthā paṭibhaṃsū”ti dīpeti. **Manti** mama. **Anacchariyāti** anu-acchariyā. **Paṭibhaṃsūti** paṭibhānasāṅkhātassa ṅāṇassa gocharā ahesuṃ; parivitakkayitabbataṃ pāpuṇiṃsu.

**Kicchenāti** dukkhena, na dukkhāya paṭipadāya. Buddhānañhi cattāropi maggā sukhappaṭipadāva honti. Pāramipūraṇakāle pana sarāgasadosasamohasseva sato āgatāgatānaṃ yācakānaṃ, alaṅkatappaṭiyattaṃ sīsaṃ kantivā, galalohitaṃ nīharitvā, su-añjitāni



akkhīni uppāṭetvā, kulavaṃsappadīpaṃ puttamaṃ manāpacāriṇiṃ bhariyanti evamā-dīni dentassa, aññāni ca khantivādisadesu attabhāvesu chejjabhejjādīni pāpuṇa-ntassa āgamanīyapaṭipadaṃ sandhāyetaṃ vuttaṃ. **Halanti** ettha **ha-kāro** nipāta-matto, **alanti** attho. **Pakāsitunti** desitumaṃ, evamaṃ kicchena adhigatassa dhammassa alaṃ desitumaṃ, pariyattaṃ desitumaṃ, ko attho desitenāti vuttaṃ hoti. **Rāgadosaparete-hīti** rāgadosapariphuṭṭhehi rāgadosānugatehi vā.

**Paṭisotagāminti** niccādīnaṃ paṭisotaṃ aniccaṃ dukkhamanattā asubhanti evamaṃ gataṃ catusaccadhammaṃ. **Rāgarattāti** kāmarāgena bhavarāgena diṭṭhirāgena ca rattā. **Na dakkhantīti** aniccaṃ dukkhamanattā asubhanti iminā sabhāvena na passissanti, te apassante ko sakkhissati evamaṃ gāhāpetumaṃ. **Tamokhandhena āvu-ṭṭāti** avijjārāsinaṃ ajjhotthatā.

**282. Appossukkatāyā** Ti nirussukkabhāvena, adesetukāmatāyāti attho. Kasmā panassa evamaṃ cittaṃ nami, nanu esa mutto mocessāmi, tiṇṇo tāressāmi.

“Kiṃ me aññātaveseṇa, dhammaṃ sacchikatenidha;

sabbaññutaṃ pāpuṇitvā, tārayissaṃ sadevakan” ti. (bu. vaṃ. 2.56)–

Patthanaṃ (2.0082) katvā pāramiyo pūretvā sabbaññutaṃ pattoti. Saccametaṃ, tadevaṃ paccavekkhaṇānubhāvena panassa evamaṃ cittaṃ nami. Tassa hi sabbaññutaṃ patvā sattānaṃ kilesagahanataṃ, dhammassa ca gambhīrataṃ paccavekkhantassa sattānaṃ kilesagahanatā ca dhammagambhīratā ca sabbākārena pākaṭā jātā. Athassa “ime sattā kañjikapuṇṇā lābu viya, takkabharitā cāṭi viya, vasātelapītapilotikā viya, añjanamakkhitaṭṭho viya ca kilesabharitā atisaṃkiliṭṭhā rāgarattā dosaduṭṭhā mohamūḷhā, te kiṃ nāma paṭivijjhissanti” ti cintayato kilesagahanapaccavekkhaṇānubhāvenāpi evamaṃ cittaṃ nami.

“Ayañca dhammo pathavīsandhāraka-udakakkhandho viya gambhīro, pabbatena paṭicchādetvā ṭhapito sāsapo viya duddaso, satadhā bhinnassa vālassa koṭiyā koṭipaṭipādanaṃ viya duranubodho. Nanu mayā hi imaṃ dhammaṃ paṭivijjhitaṃ vāyamantena adinnaṃ dānaṃ nāma natthi, arakkhitaṃ sīlaṃ nāma natthi, aparipūritā kāci pāramī nāma natthi? Tassa me nirussāhaṃ viya mārabalaṃ vidhamantassāpi pathavī na kampittha, paṭhamayāme pubbenivāsaṃ anussaranta-ssāpi na kampittha, majjhimayāme dibbacakkuṃ sodhentassāpi na kampittha, pacchimayāme pana paṭiccasamuppādaṃ paṭivijjhantasseva me dasasahasiloka-dhātu kampittha. Iti mādisenāpi tikkhaññāṇena kicchenevāyamaṃ dhammo paṭividdho, taṃ lokiyamahājanā kathaṃ paṭivijjhissanti” ti dhammagambhīratāpaccavekkhaṇānubhāvenāpi evamaṃ cittaṃ namīti veditabbaṃ.

Apica brahmunā yācite desetukāmatāyapissa evamaṃ cittaṃ nami. Jānāti hi bhagavā– “mama appossukkatāya citte namamāne maṃ mahābrahmā dhamma-desanaṃ yācissati, ime ca sattā brahmagarukā, te ‘satthā kira dhammaṃ na desetukāmo ahosi, atha maṃ mahābrahmā yācitvā desāpesi, santo vata, bho, dhammo paṇīto vata, bho, dhammo’ ti maññamānā sussūsissanti” ti. Idappissa kāraṇaṃ paṭicca appossukkatāya cittaṃ nami, no dhammadesanāyāti veditabbaṃ.

**Sahampatissāti** so kira kassapassa bhagavato sāsane sahako nāma thero paṭhamajjhānaṃ nibbattetvā paṭhamajjhānabhūmiyaṃ kappāyukabrahmā hutvā

nibbatto. Tatra naṃ sahaṃpatibrahmāti paṭisañjānanti, taṃ sandhāyāha-  
“brahmuno (2.0083) sahaṃpatissā”ti. **Nassati vata, bhoti** so kira imaṃ saddaṃ  
tathā nicchāresi, yathā dasasahassilokadhātubrahmāno sutvā sabbe sannipa-  
tiṃsu. **Yatra hi nāmāti** yasmiṃ nāma loke. **Purato pāturahosīti** tehi dasahi brahma-  
sahasseehi saddhiṃ pāturahosi. **Apparajakkhajātikāti** paññāmaye akkhimhi appaṃ  
parittaṃ rāgadosamoharajaṃ etesaṃ, evaṃsabhāvāti **apparajakkhajātikā**. **Assava-**  
**natāti** assavanatāya. **Bhavissanti** Ti purimabuddhesu dasapuññakiriyavasena katā-  
dhikārā paripākagatapadumāni viya sūriyasmisamphassaṃ, dhammadesanaṃ-  
yeva ākaṅkhamānā catuppadikagāthāvasāne ariyabhūmiṃ okkamanārahā na eko,  
na dve, anekasatasahassā dhammassa aññātāro bhavissantīti dasseti.

**Pāturahosīti** pātubhavi. **Samalehi cintitoti** samalehi chahi satthārehi cintito. Te  
hi puretaraṃ uppajjitvā sakalajambudīpe kaṅṭake pattharamānā viya, viyaṃ siñca-  
mānā viya ca samalaṃ micchādīṭṭhidhammaṃ desayiṃsu. **Apāpuretanti** vivara  
etaṃ. **Amatassa dvāranti** amatassa nibbānassa dvārabhūtaṃ ariyamaggaṃ.  
**Suṇantu dhammaṃ vimalenānubuddhanti** ime sattā rāgādimalānaṃ abhāvato  
vimalena sammāsambuddhena anubuddhaṃ catusaccadhammaṃ suṇantu tāva  
bhagavāti yācati.

**Sele yathā pabbatamuddhaniṭṭhitoti** selamaye ekagghane pabbatamuddhani  
yathā ṭhitova. Na hi tassa ṭhitassa dassanattaṃ gīvukkipanapasāraṇādikiccaṃ  
atthi. **Tathūpamanti** tappaṭibhāgaṃ selapabbatūpamaṃ. Ayaṃ panettha saṅkhe-  
pattho- yathā selapabbatamuddhani ṭhitova cakkhumā puriso samantato janataṃ  
passeyya, tathā tvampi, sumedha, sundarapañña-sabbaññutaññāṇena samanta-  
cakkhu bhagavā dhammamayaṃ pāsādamāruya sayaṃ apetasoko sokāva-  
tiṇṇaṃ jātijarābhībhūtaṃ janataṃ avekkhassu upadhāraya upaparikkha. Ayaṃ  
panettha adhippāyo- yathā hi pabbatapāde samantā mahantaṃ khettaṃ katvā  
tattha kedārapālīsu kuṭikāyo katvā rattiṃ aggim jāleyyūṃ. Caturaṅgasamannāga-  
tañca andhakāraṃ assa, atha tassa pabbatassa matthake ṭhatvā cakkhumato  
purisassa bhūmiṃ olokayato neva khettaṃ, na kedārapālīyo, na kuṭīyo, na tattha  
sayitamanussā paññāyeyyūṃ. Kuṭikāsu pana (2.0084) aggijālāmattakameva  
paññāyeyya. Evaṃ dhammapāsādaṃ āruya sattanikāyaṃ olokayato tathāga-  
tassa, ye te akatakalyāṇā sattā, te ekavihāre dakkhiṇajāṇupasse nisinnāpi buddha-  
cakkhussa āpāthaṃ nāgacchanti, rattiṃ khittā sarā viya honti. Ye pana kataka-  
lyāṇā veneyyapuggalā, te evassa dūrepi ṭhitā āpāthaṃ āgacchanti, so aggi viya  
himavantapabbato viya ca. Vuttampi cetaṃ-

“Dūre santo pakāsentī, himavantova pabbato;

asantettha na dissanti, rattiṃ khittā yathā sarā”ti. (dha. pa. 304);

**Uṭṭhehīti** bhagavato dhammadesanattaṃ cārikacaraṇaṃ yācanto bhaṇati. **Vīrā-**  
**ti-ādīsu** bhagavā vīriyavantatāya **vīro**. Devaputtamaccukilesamārānaṃ vijitattā **vijita-**  
**saṅgāmo**. Jātikantārādinittharaṇatthāya veneyyasatthavāhanasamatthatāya **sattha-**  
**vāho**. Kāmacchanda-iṇassa abhāvato **aṇaṇoti** veditabbo.

**283. Ajjhesananti** yācanaṃ. **Buddhacakkhunāti** indriyaparopariyattañāṇena ca  
āsayānusayañāṇena ca. Imesañhi dvinnaṃ ñāṇānaṃ buddhacakkhūti nāmaṃ,

sabbaññutaññāṇassa samantacakkhūti, tiṇṇaṃ maggaññāṇaṃ dhammacakkhūti. **Apparajakkheti**-ādīsu yesaṃ vuttanayeneva paññācakkhumhi rāgādirajaṃ appaṃ, te **apparajakkhā**. Yesaṃ taṃ mahantaṃ, te **mahārajakkhā**. Yesaṃ saddhādīni indriyāni tikkhāni, te **tikkhindriyā**. Yesaṃ tāni mudūni, te **mudindriyā**. Yesaṃ teyeva saddhādayo ākārā sundarā, te **svākārā**. Ye kathitakāraṇaṃ salla-kkhenti, sukkena sakkā honti viññāpetuṃ, te **suviññāpayā**. Ye paralokañceva vajjañca bhayato passanti, te **paralokavajjabhayadassāvino** nāma.

Ayaṃ panettha pāḷi- “saddho puggalo apparajakkho, assaddho puggalo mahārajakkho. Āraddhavīriyo..., kusito..., upaṭṭhitassati..., muṭṭhassati..., samāhito..., asamāhito..., paññavā..., duppañño puggalo mahārajakkho. Tathā saddho puggalo tikkhindriyo ...pe... paññavā puggalo paralokavajjabhayadassāvī, duppañño puggalo na paralokavajjabhayadassāvī. **Loko**Ti (2.0085) khandhaloko, āyatanaloko, dhātuloko, sampattibhavaloko, sampattisambhavaloko, vipattibhavaloko, vipattisambhavaloko, eko loko sabbe sattā āhāraṭṭhitikā. Dve lokā- nāmañca rūpañca. Tayo lokā- tisso vedanā. Cattāro lokā- cattāro āhārā. Pañca lokā- pañcu-pādānakkhandhā. Cha lokā- cha ajjhattikāni āyatanāni. Satta lokā- satta viññāṇa-ṭṭhitiyo. Aṭṭha lokā- aṭṭha lokadhammā. Nava lokā- nava sattāvāsā. Dasa lokā- dasāyatanāni. Dvādasa lokā- dvādasāyatanāni. Aṭṭhārassa lokā- aṭṭhārassa dhātuyo. Vajjanti sabbe kilesā vajjā, sabbe duccharitā vajjā, sabbe abhisankhārā vajjā, sabbe bhavagāmikammā vajjā. Iti imasmiñca loke imasmiñca vaje tibbā bhayasaññā paccupaṭṭhitā hoti, seyyathāpi ukkhittāsike vadhake. Imehi paññā-sāya ākārehi imāni pañcindriyāni jānāti passati aññāsi paṭivijjhi. Idaṃ tathāgata-ssa indriyaparopariyatte ñāṇaṃ”ti (paṭi. ma. 1.112).

**Uppaliniyanti** uppalavane. Itaresupi eseva nayo. **Antonimuggaposinīti** yāni anto-nimuggāneva posiyanti. **Udakaṃ accuggamma ṭhitānīti** udakaṃ atikkamitvā ṭhitāni. Tattha yāni accuggamma ṭhitāni, tāni sūriyasmisamphassaṃ āgamayamānāni ṭhitāni ajja pupphanakāni. Yāni samodakaṃ ṭhitāni, tāni sve pupphanakāni. Yāni udakānuggatāni antonimuggaposīni, tāni tatiyadivase pupphanakāni. Udakā pana anuggatāni aññānipi saroga-uppalādīni nāma atthi, yāni neva pupphissanti, macchakacchapabhakkhāneva bhavissanti. Tāni pāḷiṃ nāruḷhāni. Āharitvā pana dīpetabbānīti dīpitāni.

Yatheva hi tāni catubbidhāni pupphāni, evameva ugghaṭitaññū vipañcitaññū neyyo padaparamoti cattāro puggalā. Tattha “yassa puggalassa saha udāhaṭavelāya dhammābhisamayo hoti, ayaṃ vuccati puggalo **ugghaṭitaññū**. Yassa puggalassa saṃkhittena bhāsītassa vitthārena atthe vibhajiyamāne dhammābhisamayo hoti, ayaṃ vuccati puggalo **vipañcitaññū**. Yassa puggalassa uddesato paripu-cchato yoniso manasikaroto kalyāṇamitte (2.0086) sevato bhajato payirupāsato anupubbena dhammābhisamayo hoti, ayaṃ vuccati puggalo **neyyo**. Yassa puggalassa bahumpi suṇato bahumpi bhaṇato bahumpi dhārayato bahumpi vācayato na tāya jātiyā dhammābhisamayo hoti, ayaṃ vuccati puggalo **padaparamo**” (pu. pa. 151). Tattha bhagavā uppalavanādisadisam dasasahasilokadhātuṃ olokento “ajja pupphanakāni viya ugghaṭitaññū, sve pupphanakāni viya vipañcitaññū, tatiya-

divase pupphanakāni viya neyyo, macchakacchapabhakkhāni pupphāni viya pada-  
paramo”ti addasa. Passanto ca “ettakā apparajakkhā, ettakā mahārajakkhā,  
tatrāpi ettakā ugghaṭitaññū”ti evaṃ sabbākāratova addasa.

Tattha tiṇṇaṃ puggalānaṃ imasmimyeva attabhāve bhagavato dhammade-  
sanā atthaṃ sādheti. Padaparamānaṃ anāgate vāsanatthāya hoti. Atha bhagavā  
imesaṃ catunnaṃ puggalānaṃ atthāvahaṃ dhammadesanaṃ viditvā desetuka-  
myataṃ uppādetvā puna sabbepi tīsu bhavesu satte bhabbābhabbavasena dve  
koṭṭhāse akāsi. Ye sandhāya vuttaṃ- “katame te sattā abhabbā, ye te sattā  
kammāvaraṇena samannāgatā kilesāvaraṇena samannāgatā vipākāvaraṇena  
samannāgatā assaddhā acchandikā duppaññā abhabbā niyāmaṃ okkamituṃ  
kusalesu dhammesu sammattaṃ, ime te sattā abhabbā. Katame te sattā bhabbā?  
Ye te sattā na kammāvaraṇena ...pe... ime te sattā bhabbā”ti (vibha. 827; paṭi.  
ma. 1.115). Tattha sabbepi abhabbapuggale pahāya bhabbapuggaleyeva ñāṇena  
pariggahetvā “ettakā rāgacaritā, ettakā dosamohacaritā vitakkasaddhābuddhicari-  
tā”ti cha koṭṭhāse akāsi; evaṃ katvā dhammaṃ desissāmīti cintesi.

**Paccabhāsinti** pati-abhāsiṃ. **Apārutāti** vivaṭā. **Amatassa dvārāti** ariyamaggo. So  
hi amataśāṅkhātassa nibbānassa dvāraṃ, so mayā vivaritvā ṭhapitoti dasseti.  
**Pamuñcantu saddhanti** sabbe attano saddhaṃ pamuñcantu, vissajjentu. Pacchi-  
mapadadvaye ayamattho, ahañhi attano paguṇaṃ suppvattitampi imaṃ paṇītaṃ  
uttamaṃ dhammaṃ kāyavācākilamathasaññi hutvā na bhāsiṃ

(2.0087). Idāni pana sabbo jano saddhābhājanam upanetu, pūressāmi nesaṃ saṅkappanti.

**284. Tassa mayhaṃ, bhikkhave, etadahosīti etaṃ ahosi- kassa nu kho ahaṃ paṭhamam dhammam deseyyanti** ayaṃ dhammadesanāpaṭisaṃyutto vitakko udapādīti attho. Kadā panesa udapādīti? Buddhabhūtaṃ aṭṭhame sattāhe.

Tatrāyaṃ anupubbikathā- bodhisatto kira mahābhinnikkhamanadivase vivaṭaṃ itthāgāraṃ disvā saṃviggahadayo, “kaṇḍakaṃ āharā”ti channaṃ āmantetvā channasahāyo assarājapiṭṭhigato nagarato nikkhamitvā kaṇḍakanivattanacetiyatṭhānaṃ nāma dassetvā tiṇi rajjāni atikkamma anomānadīre pabbajitvā anupubbena cārikaṃ caramāno rājagahe piṇḍāya caritvā paṇḍavapabbate nisinno magadhissarena raññā nāmagottaṃ pucchitvā, “imaṃ rajjaṃ sampaṭicchāhi”ti vutto, “alaṃ mahārāja, na mayhaṃ rajjena attho, ahaṃ rajjaṃ pahāya lokahita-tthāya padhānaṃ anuyuñjitvā loka vivaṭacchado bhavissāmīti nikkhanto”ti vatvā, “tena hi buddho hutvā paṭhamam mayhaṃ vijitam osareyyāsi”ti paṭiññaṃ gahito kālāmañca udakañca upasaṅkamtivā tesam dhammadesanāya sāraṃ avindanto tato pakkamtivā uruvelāya chabbassāni dukkarakārikaṃ karontopi amataṃ paṭivijhituṃ asakkonto oḷārikāhārapaṭisevanena kāyaṃ santappesi.

Tadā ca uruvelagāme **sujātā** nāma kuṭumbiyadhītā ekasmiṃ nigrodharukkhe patthanamakāsi- “sacāhaṃ samānajātikaṃ kulagharaṃ gantvā paṭhamagabbhe puttam labhissāmi, balikammaṃ karissāmī”ti. Tassā sā patthanā samijjhi. Sā visākhapuṇṇamadivase pātova balikammaṃ karissāmīti rattiyā paccūsasamaye eva pāyasaṃ paṭiyādesi. Tasmim pāyase paccamāne mahantamahantā pupphulā utṭhahitvā dakkhiṇāvattā hutvā sañcaranti. Ekaphusitampi bahi na gacchatī. Mahābrahmā chattaṃ dhāresi. Cattāro lokapālā khaggahatthā ārakkhaṃ gaṇhiṃsu. Sakko alātāni samānento aggim jālesi. Devatā catūsu dīpesu ojaṃ saṃharitvā (2.008) tattha pakkhipiṃsu. Bodhisatto bhikkhācārakālaṃ āgamayamāno pātova gantvā rukkhamūle nisīdi. Rukkhamūle sodhanatthāya gatā dhātī āgantvā sujātāya ārocesi- “devatā rukkhamūle nisinnā”ti. Sujātā, sabbaṃ pasādhanam pasādhetvā satahassagghanike suvaṇṇathāle pāyasaṃ vaḍḍhetvā aparāya suvaṇṇapātiyā pidahitvā ukkhipitvā gatā mahāpurisaṃ disvā saheva pātiyā hatthe ṭhapetvā vanditvā “yathā mayhaṃ manoratho nipphanno, evaṃ tumhākampi nipphajjatū”ti vatvā pakkāmi.

Bodhisatto nerañjarāya tīraṃ gantvā suvaṇṇathālaṃ tīre ṭhapetvā nhatvā paccuttaritvā ekūnapaṇṇāsapiṇḍe karonto pāyasaṃ paribhuñjitvā “sacāhaṃ ajja buddho bhavāmi, thālaṃ paṭisotaṃ gacchatū”ti khipi. Thālaṃ paṭisotaṃ gantvā thokaṃ ṭhatvā kālanāgarājassa bhavanaṃ pavisitvā tiṇṇam buddhānaṃ thālāni ukkhipitvā aṭṭhāsi.

Mahāsatto vanasaṇḍe divāvihāraṃ katvā sāyanhasamaye **sottiyena** dinnā aṭṭha tiṇamutṭhiyo gahetvā bodhimaṇḍam āruyha dakkhiṇadisābhāge aṭṭhāsi. So padeso paduminipatte udakabindu viya akampittha. Mahāsatto, “ayaṃ mama guṇam dhāretuṃ na sakkoti”ti pacchimadisābhāgam āgamāsi, sopi tatheva akampittha. Uttaradisābhāgam āgamāsi, sopi tatheva akampittha. Puratthimadisā-

bhāgaṃ agamāsi, tattha pallaṅkappamāṇaṃ ṭhānaṃ sunikhāta-indakhilo viya niccalamahosi. Mahāsatto “idaṃ ṭhānaṃ sabbabuddhānaṃ kilesabhañjanaviddhaṃsanaṭṭhānaṃ”ti tāni tiṇāni agge gahetvā cālesi. Tāni cittaḷārena tūlikaggena paricchinnāni viya ahesuṃ. Bodhisatto, “bodhiṃ appatvā imaṃ pallaṅkaṃ na bhindissāmi”ti caturaṅgavīriyaṃ adhiṭṭhahitvā pallaṅkaṃ ābhujitvā nisīdi.

Taṅkhaṇaṅṅeva māro bāhusahassaṃ māpetvā diyaḍḍhayaḷjanasatikaṃ girimekhalaṃ nāma hatthiṃ āruya navayaḷjanaṃ mārabalaṃ gahetvā addhakkhikena olokayaṃāno pabbato viya ajjhottharanto upasaṅkama. Mahāsatto, “mayhaṃ dasa pāramiyo pūrentassa aṅṅo samaṇo vā brāhmaṇo (2.0089) vā devo vā māro vā brahmā vā sakkhi natthi, vessantarattabhāve pana mayhaṃ sattasu vāresu mahāpathavī sakkhi ahoṣi; idānipi me ayameva acetanā kaṭṭhakaliṅgarūpamā mahāpathavī sakkhi”ti hatthaṃ pasāreti. Mahāpathavī tāvadeva ayadaḍḍena pahataṃ kaṃsathālaṃ viya ravasataṃ ravasahassaṃ muṅcamānā viravitvā parivattamānā mārabalaṃ cakkavāḷamukhavaṭṭiyaṃ muṅcanamakāsi. Mahāsatto sūriye dharmāneyeva mārabalaṃ vidhamitvā paṭhamayāme pubbenivāsaṅṅaṃ, majjhimaṃ yāme dibbacakkhuṃ visodhetvā pacchimayāme paṭicasamuppāde ṅṅaṃ oṭāretvā vaṭṭavivaṭṭaṃ sammāsivā aruḷodaye buddho hutvā, “mayā anekakappaḷḷi-satasahassaṃ addhānaṃ imassa pallaṅkassa atthāya vāyāmo kato”ti sattāhaṃ ekapallaṅkena nisīdi. Athekaccānaṃ devatānaṃ, “kiṃ nu kho aṅṅepi buddhatta-karā dhammā atthi”ti kaṅkhā udapādi.

Atha bhagavā aṭṭhame divase samāpattito vuṭṭhāya devatānaṃ kaṅkhaṃ ṅṅatvā kaṅkhāvidhamanattaṃ ākāse uppatitvā yamaḷapāṭihāriyaṃ dassetvā tāsaṃ kaṅkhaṃ vidhamitvā pallaṅkato īsakaṃ pācīnanissite uttaradisābhāge ṭhatvā cattāri asaṅkhyeyyāni kappasatasahassaṅca pūritānaṃ pāramīnaṃ phalādhigamaṭṭhānaṃ pallaṅkaṅceva bodhirukkhaṅca animisehi akkhīhi olokayaṃāno sattāhaṃ vītināmesi, taṃ ṭhānaṃ **animisacetiyaṃ** nāma jātaṃ.

Atha pallaṅkassa ca ṭhitaṭṭhānassa ca antarā puratthimapacchimoto āyate ratanacaṅkame caṅkamanto sattāhaṃ vītināmesi, taṃ ṭhānaṃ **ratanacaṅkamacetiyaṃ** nāma jātaṃ. Tato pacchimidisābhāge devatā ratanagharaṃ māpayiṃsu, tattha pallaṅkena nisīditvā **abhidhammapiṭakaṃ** visesato cettha anantanayasamantapaṭṭhānaṃ vicinanto sattāhaṃ vītināmesi, taṃ ṭhānaṃ **ratanagharacetiyaṃ** nāma jātaṃ. Evaṃ bodhisamīpeya cattāri sattāhāni vītināmetvā paṅcame sattāhe bodhirukkhamūlā yena ajapālanigrodho tenupasaṅkama, tatrāpi dhammaṃ vicinanto yeva vimuttisukhaṅca paṭisaṃvedento nisīdi, dhammaṃ vicinanto cettha evaṃ abhidhamme nayamaggaṃ sammāsi- paṭhamaṃ dhammasaṅgaṅipakaraṅaṃ nāma, tato vibhaṅgapakaraṅaṃ, dhātukathāpakaraṅaṃ, puggalapaṅṅattipakaraṅaṃ, kathāvatthu nāma pakaraṅaṃ, yamaḷaṃ nāma pakaraṅaṃ, tato mahāpakaraṅaṃ paṭṭhānaṃ nāmāti.

Tatthassa (2.0090) saṅhasukhumapaṭṭhānamhi citte otiṅṅe pīti uppajji; pītiyā uppanāya lohitaṃ pasīdi, lohite pasanne chavi pasīdi. Chaviyā pasannāya puratthimakāyato kūṭāgārādippamāṅā rasmiyo uṭṭhahitvā ākāse pakkhandachaddanta-nāgakulaṃ viya pācīnadisāya anantāni cakkavāḷāni pakkhandā, pacchimakāyato

uṭṭhahitvā pacchimadisāya, dakkhiṇaṃsakūṭato uṭṭhahitvā dakkhiṇadisāya, vāmaṃsakūṭato uṭṭhahitvā uttaradisāya anantāni cakkavāḷāni pakkhandā, pādālehi pavāḷaṅkuravaṇṇā rasmiyo nikkhamitvā mahāpathaviṃ vinivijjhivā udakaṃ dvidhā bhinditvā vātakkhandhaṃ padāletvā ajaṭākāsaṃ pakkhandā, sīsato samparivattiyamānaṃ maṇidāmaṃ viya nīlavaṇṇā rasmivaṭṭi uṭṭhahitvā cha devaloke vinivijjhivā nava brahmaloke vehapphale pañca suddhāvāse ca vinivijjhivā cattāro āruppe atikkamma ajaṭākāsaṃ pakkhandā. Tasmīṃ divase aparimāṇesu cakkavāḷesu aparimāṇā sattā sabbe suvaṇṇavaṇṇāva ahesuṃ. Taṃ divasañca pana bhagavato sarīrā nikkhantā yāvajjādivasāpi tā rasmiyo anantā lokadhātuyo gacchantiyeva.

Evam bhagavā ajapālanigrodhe sattāhaṃ vītināmetvā tato aparaṃ sattāhaṃ mucalinde nisīdi, nisinnamattasseva cassa sakalaṃ cakkavāḷagabbhaṃ pūrento mahā-akālamegho udapādi. Evarūpo kira mahāmegho dvīsuyeva kālesu vassati cakkavattimhi vā uppanne buddhe vā. Idha buddhakāle udapādi. Tasmīṃ pana uppanne mucalindo nāgarājā cintesi- “ayaṃ meggo satthari mayhaṃ bhavanaṃ pavīṭṭhamatteva uppanno, vāsāgāramassa laddhuṃ vaṭṭati”ti. So sattaratana-mayaṃ pāsādaṃ nimminituṃ sakkontopi evaṃ kate mayhaṃ mahapphalaṃ na bhavissati, dasabalassa kāyaveyyāvaccamaṃ karissāmīti mahantaṃ attabhāvaṃ katvā satthāraṃ sattakkhattuṃ bhogehi parikkhipitvā upari phaṇaṃ dhāresi. Parikkhepassa anto okāso heṭṭhā lohapaśādappamaṇo ahosi. Icchiticchitena iriyāpathena satthā viharissatīti nāgarājassa ajjhāsayo ahosi. Tasmā evaṃ mahantaṃ okāsaṃ parikkhipi. Majjhe ratanapallaṅko paññatto hoti, upari suvaṇṇatārakaviccittamaṃ samosaritagandhadāmakusumadāmacelavitānaṃ ahosi. Catūsu koṇesu gandhatelena dipā jalitā, catūsu disāsu vivaritvā candanakaraṇḍakā (2.0091) ṭhapitā. Evam bhagavā taṃ sattāhaṃ tattha vītināmetvā tato aparaṃ sattāhaṃ rājāyatane nisīdi.

Aṭṭhame sattāhe sakkena devānamindena ābhataṃ dantakaṭṭhañca osadhaharītakañca khāditvā mukhaṃ dhovitvā catūhi lokapālehi upanīte paccagghe selamaye patte **tapussabhallikānaṃ** piṇḍapātaṃ paribhuñjitvā puna paccāgantvā ajapālanigrodhe nisinnassa sabbabuddhānaṃ āciṇṇo ayaṃ vitakko udapādi.

Tattha **paṇḍitoti** paṇḍiccena samannāgato. **Viyatto** Ti veyyattiyena samannāgato. **Medhāvīti** ṭhānuppattiyā paññāya samannāgato. **Apparajakkhajātikoti** samāpattiyā vikkhambhitattā nikkilesajātiko visuddhasatto. **Ājānissatīti** sallakkhessati paṭivijjhissati. **Ñāṇaṅca pana meti** mayhampi sabbaññutaññāṇaṃ uppajji. Bhagavā kira devatāya kathiteneva niṭṭhaṃ agantvā sayampi sabbaññutaññāṇena olokento ito sattamadivasamatthake kālaṃ katvā ākiñcaññāyatane nibbattoti addasa. Taṃ sandhāyāha- “ñāṇaṅca pana me dassanaṃ udapādi”ti. **Mahājāniyoti** sattadivasa-bbhantare pattabbamaggaphalato parihīnattā mahatī jāni assāti **mahājāniyo**. Akkhaṇe nibbattattā gantvā desiyamānaṃ dhammampissa sotuṃ sotappasādo natthi, idha dhammadesanaṭṭhānaṃ āgamanapādāpi natthi, evaṃ mahājāniyo jātoti dasseti. **Abhidosa-kālaṅkatoti** aḍḍharatte kālaṅkato. **Ñāṇaṅca pana meti** mayhampi sabbaññutaññāṇaṃ udapādi. Idhāpi kira bhagavā devatāya vacanena

sanniṭṭhānaṃ akatvā sabbaññutaññāṇena olokeno “hiyyo aḍḍharatte kālaṅkatvā udako rāmaputto nevasaññānāsaññāyatane nibbatto”ti addasa. Tasmā evamāha. Sesam purimanayasadisameva. **Bahukārāti** bahūpakārā. **Padhānapahitattam upa-  
ṭṭhahimsūti** padhānatthāya pesitattabhāvaṃ vasanaṭṭhāne pariveṇasammajja-  
nena pattacīvaraṃ gahetvā anubandhanena mukhodakadantakaṭṭhadānādinā ca  
upaṭṭhahimsu. Ke pana te **pañcavaggiyā** nāma? Yete-

Rāmo (2.0092) dhajo lakkhaṇo jotimanti,  
yañño subhojo suyāmo sudatto;  
ete tadā aṭṭha ahesuṃ brāhmaṇā,  
chaḷaṅgavā mantam viyākarimsūti.

Bodhisattassa jātakāle supinapaṭiggāhakā ceva lakkhaṇapaṭiggāhakā ca aṭṭha  
brāhmaṇā. Tesu tayo dvedhā byākarimsu- “imehi lakkhaṇehi samannāgato  
agāraṃ ajjhāvasamāno rājā hoti cakkavattī, pabbajamāno buddho”ti. Pañca  
brāhmaṇā ekaṃsabyākaraṇā ahesuṃ- “imehi lakkhaṇehi samannāgato agāre na  
tiṭṭhati, buddhova hoti”ti. Tesu purimā tayo yathāmantapadaṃ gatā, ime pana  
pañca mantapadaṃ atikkantā. Te attanā laddham puṇṇapattam ñātakānaṃ vissa-  
jjetvā “ayaṃ mahāpuriso agāraṃ na ajjhāvasissati, ekantena buddho bhavissa-  
tī”ti nibbitakkā bodhisattam uddissa samaṇapabbajam pabbajitā. Tesam puttātipi  
vadanti. Tam aṭṭhakathāya paṭikkhittam.

Ete kira daharakāleyeva bahū mante jāniṃsu, tasmā te brāhmaṇā ācariya-  
ṭṭhāne ṭhapayimsu. Te pacchā amhehi puttadārajaṭam chaḍḍetvā na sakkā bhavi-  
ssati pabbajitunti daharakāleyeva pabbajitvā ramaṇīyāni senāsanāni paribhu-  
ñjantā vicariṃsu. Kālena kālam pana “kiṃ, bho, mahāpuriso mahābhikkha-  
manam nikkhanto”ti pucchanti. Manussā, “kuhiṃ tumhe mahāpurisaṃ passi-  
ssatha, tisu pāsādesu tividhanāṭakamajjhe devo viya sampattim anubhoti”ti  
vadanti. Te sutvā, “na tāva mahāpurisassa ñāṇam paripākam gacchatī”ti appo-  
ssukkā vihariṃsuyeva. Kasmā panettha bhagavā, “bahukārā kho ime pañcava-  
ggiyā”ti āha? Kiṃ upakārakānaṃyeva esa dhammam deseti, anupakārakānaṃ na  
desetīti? No na deseti. Paricayavasena hesa



ālārañceva kālāmaṃ udakañca rāmaputtam olokesi. Etasmiṃ pana buddha-  
kkhette ṭhapetvā aññāsikoṇḍañnam paṭhamam dhammam sacchikātuṃ samattho  
nāma natthi. Kasmā? Tathāvidha-upanissayattā.

Pubbe (2.0093) kira puññakaraṇakāle dve bhātaro ahesuṃ. Te ekatova sassam  
akamsu. Tattha jeṭṭhakassa “ekasmiṃ sasse navavāre aggasassadānam mayā  
dātabban”ti ahosi. So vappakāle bijaggam nāma datvā gabbhakāle kaniṭṭhena  
saddhiṃ mantesi- “gabbhakāle gabbham phāletvā dassāmā”ti. Kaniṭṭho “taruṇa-  
sassam nāsetukāmosi”ti āha. Jeṭṭho kaniṭṭhassa ananuvattanabhāvam ṇatvā  
khetam vibhajivā attano koṭṭhāsato gabbham phāletvā khīram nīharitvā sappiphā-  
ṇitehi yojetvā adāsi, puthukakāle puthukam kāretvā adāsi, lāyane lāyanaggam  
veṇikaraṇe veṇaggam kalāpādīsu kalāpaggam khaḷaggam bhaṇḍaggam koṭṭha-  
gganti evam ekasasse navavāre aggadānam adāsi. Kaniṭṭho panassa uddharitvā  
adāsi, tesu jeṭṭho aññāsikoṇḍañnatthero jāto, kaniṭṭho subhaddaparibbājako. Iti  
ekasmiṃ sasse navannaṃ aggadānānam dinnattā ṭhapetvā theram añño  
paṭhamam dhammam sacchikātuṃ samattho nāma natthi. “Bahukārā kho ime  
pañcavaggiyā”ti idaṃ pana upakārānussaraṇamattakeneva vuttam.

**Isipatane migadāyeti** tasmim kira padese anuppanne buddhe paccekasa-  
mbuddhā gandhamādanapabbate sattāham nirodhasamāpattiyā vītināmetvā  
nirodhā vuṭṭhāya nāgalatādantakaṭṭham khāditvā anotattadahe mukham dhovitvā  
pattacīvaramādāya ākāsenā āgantvā nipatanti. Tattha cīvaram pārūpitvā nagare  
piṇḍāya caritvā katabhattakiccā gamanakālepi tatoyeva uppatitvā gacchanti. Iti  
isayo ettha nipatanti uppatanti cāti taṃ ṭhānam **isipatananti** saṅkham gataṃ.  
Migānam pana abhayatthāya dinnattā **migadāyoti** vuccati. Tena vuttam “isipatane  
migadāye”ti.

**285. Antarā ca gayam antarā ca bodhinti** gayāya ca bodhissa ca vivare tigāvuta-  
ntare ṭhāne. Bodhimaṇḍato hi gayā tīṇi gāvutāni. Bārāṇasī aṭṭhārasa yojanāni.  
Upako bodhimaṇḍassa ca gayāya ca antare bhagavantaṃ addasa. Antarāsa-  
ddena pana yuttattā upayogavacanaṃ kataṃ. Idisesu ca ṭhānesu akkharacintakā  
“antarā gāmañca nadiñca yāti”ti evam ekameva antarāsaddam payujjanti. So duti-  
yapadenapi yojetabbo hoti (2.0094). Ayojiyamāne upayogavacanaṃ na pāpuṇāti.  
Idha pana yojetvā eva vuttoti. **Addhānamaggapaṭipannanti** addhānasaṅkhātam  
maggam paṭipannaṃ, dīghamaggapaṭipannanti attho. Addhānamaggagamanasa-  
mayassa hi vibhaṅge “addhayaṇam gacchissāmīti bhuñjitabban”ti-ādivacanaṃ  
(pāci. 218) addhayaṇampi addhānamaggo hoti. Bodhimaṇḍato pana gayā tigā-  
vutaṃ.

**Sabbābhibhūti** sabbam tebhūmakadhammam abhibhavitvā ṭhito. **Sabbavidūti**  
sabbam catubhūmakadhammam avediṃ aññāsiṃ. **Sabbesu dhammesu anupalit-  
toti** sabbesu tebhūmakadhammesu kilesalepanena anupalitto. **Sabbam jahoti**  
sabbam tebhūmakadhammam jahitvā ṭhito. **Taṇhākkhaye vimuttoti** taṇhākkhaye  
nibbāne ārammaṇato vimutto. **Sayam abhiññāyāti** sabbam catubhūmaka-  
dhammam attanāva jānitvā. **Kamuddiseyyanti** kam añnam “ayam me ācariyo”ti  
uddiseyyam.

**Na me ācariyo atthīti** lokuttaradhamme mayhaṃ ācariyo nāma natthi. **Natthi me paṭipuggaloti** mayhaṃ paṭibhāgapuggalo nāma natthi. **Sammāsambuddhoti** sahetunā nayena cattāri saccāni sayaṃ buddho. **Sitibhūtoti** sabbakilesagginibbāpanena sitibhūto. Kilesānaṃyeva nibbutattā **nibbuto**. **Kāsinam puranti** kāsiraṭṭhe nagaraṃ. **Āhañchaṃ amatadundubhinti** dhammacakkapaṭilābhāya amatabheriṃ paharissāmīti gacchāmi. **Arahasi anantajinoti** anantajinoti bhavituṃ yutto. **Hupeyya pāvusoti**, āvuso, evampi nāma bhaveyya. **Pakkāmīti** vaṅkahārajanapadaṃ nāma agamāsi.

Tatthekaṃ migaluddakagāmaṃ nissāya vāsaṃ kappesi. Jeṭṭhakaluddako taṃ upaṭṭhāsi. Tasmañca janapade caṇḍā makkhikā honti. Atha naṃ ekāya cāṭiyā vasāpesuṃ, migaluddako dūre migavaṃ gacchanto “amhākaṃ arahante mā pamajji”ti **chāvaṃ** nāma dhītaraṃ āṇāpetvā agamāsi saddhiṃ puttabhātukehi. Sā cassa dhītā dassaniyā hoti koṭṭhāsasampannā. Dutiyadivase **upako** gharaṃ āgato taṃ dārikaṃ sabbaṃ upacāraṃ katvā parivisitūṃ (2.0095) upagataṃ disvā rāgena abhibhūto bhuñjitumpi asakkonto bhājanena bhattaṃ ādāya vasanaṭṭhānaṃ gantvā bhattaṃ ekamante nikkhipitvā sace chāvaṃ labhāmi, jīvāmi, no ce, marāmīti nirāhāro sayi. Sattame divase māgaviko āgantvā dhītaraṃ upakassa pavattiṃ pucchi. Sā “ekadivasameva āgantvā puna nāgatapubbo”ti āha. Māgaviko āgatave-seneva naṃ upasaṅkamitvā pucchissāmīti taṃkhaṇaṃyeva gantvā “kiṃ, bhante, apphāsukan”ti pāde parāmasanto pucchi. Upako nitthunanto parivattatiyeva. So “vadatha bhante, yaṃ mayā sakkā kātuṃ, taṃ sabbaṃ karissāmi”ti āha. Upako, “sace chāvaṃ labhāmi, jīvāmi, no ce, idheva maraṇaṃ seyyo”ti āha. Jānāsi pana, bhante, kiñci sippanti. Na jānāmīti. Na, bhante, kiñci sippaṃ ajānantena sakkā gharāvāsaṃ adhiṭṭhātunti.

So āha- “nāhaṃ kiñci sippaṃ jānāmi, apica tumhākaṃ maṃsahāraṃ bhavissāmi, maṃsañca vikkīṇissāmi”ti. Māgaviko, “amhākampi etadeva ruccati”ti uttara-sāṭakaṃ datvā gharaṃ ānetvā dhītaraṃ adāsi. Tesaṃ saṃvāsamanvāya putto vijāyi. **Subhaddotissa** nāmaṃ akaṃsu. Chāvā tassa rodanakāle “maṃsahāra-kassa putta, migaluddakassa putta mā rodī”ti-ādīni vadamānā puttatosanagītena upakaṃ uppaṇḍesi. Bhadde tvaṃ maṃ anāthoti maññasi. Atthi me **anantajino** nāma sahāyo. Tassāhaṃ santike gamissāmīti āha. Chāvā evamayaṃ aṭṭiyatīti ṇatvā punappunaṃ katheti. So ekadivasaṃ anārocetvāva majjhimadesābhimukho pakkāmi.

Bhagavā ca tena samayena sāvattiyaṃ viharati jetavane mahāvihāre. Atha kho bhagavā paṭikacceva bhikkhū āṇāpesi- “yo, bhikkhave, ‘anantajino’ti pucchamāno āgacchati, tassa maṃ dasseyyāthā”ti. Upakopi kho “kuhiṃ anantajino vasa-tī”ti pucchanto anupubbena sāvattiṃ āgantvā vihāramajjhe ṭhatvā kuhiṃ anantajinoti pucchi. Taṃ bhikkhū bhagavato santikaṃ nayiṃsu. So bhagavantaṃ disvā- “sañjānātha maṃ bhagavā”ti āha. Āma, upaka, sañjānāmi, kuhiṃ pana tvaṃ vasi-tthāti. Vaṅkahārajanapade, bhanteti. Upaka, mahallakosi jāto pabbajitūṃ sakkhi-ssasīti. Pabbajissāmi, bhanteti. Bhagavā pabbājetvā tassa kammaṭṭhānaṃ adāsi. So kammaṭṭhāne kammaṃ karonto anāgāmiphale patiṭṭhāya kālaṃ katvā avihesu

(2.0096) nibbatto. Nibbattakkhaṇeyeva arahattaṃ pāpuṇīti. Avihesu nibbattamattā hi satta janā arahattaṃ pāpuṇiṃsu, tesam so aññataro.

Vuttañhetam-

“Avihaṃ upapannāse, vimuttā satta bhikkhavo;

**Rāgadosa**parikkhīṇā, tiṇṇā loke visattikaṃ.

Upako palagaṇḍo ca, pukkusāti ca te tayo;

bhaddiyo khaṇḍadevo ca, bahuraggi ca saṅgiyo;

te hitvā mānusaṃ dehaṃ, dibbayogaṃ upajjhagun”ti. (saṃ. ni. 1.105);

**286. Saṅṭhapesunti** katikaṃ akaṃsu. **Bāhullikoti** cīvarabāhullādīnaṃ atthāya paṭipanno. **Padhānavibbhantoti** padhānato vibbhanto bhaṭṭho parihīno. **Āvatto bāhullāyāti** cīvarādīnaṃ bahulabhāvatthāya āvatto. **Apica kho āsanaṃ ṭhapetabbanti** apica kho panassa uccakule nibbattassa āsanamattaṃ ṭhapetabbanti vadiṃsu. **Nāsakkhiṃsūti** buddhānubhāvena buddhatejasā abhibhūtā attano katikāya ṭhātuṃ nāsakkhiṃsu. **Nāmena ca āvusovādena ca samudācarantīti** gotamāti, āvusoti ca vadanti. Āvuso gotama, mayaṃ uruvelāyaṃ padhānakāle tuyhaṃ pattacīvaraṃ gahetvā vicarimhā, mukhodakaṃ dantakaṭṭhaṃ adamhā, vutthapariveṇaṃ sammajjimhā, pacchā ko te vattappaṭipattimakāsi, kacci amhesu pakkantesu na cintayitthāti evarūpiṃ kathaṃ kathentīti attho. **Iriyāyāti** dukkara-iriyāya. **Paṭipadāyāti** dukkarapaṭipattiyā. **Dukkarakārikāyāti** pasatapasata-muggayūsādi-āharakaraṇādīnā dukkarakaraṇena. **Abhijānātha me noti** abhijānātha nu mama. **Evarūpaṃ pabhāvitametanti** etaṃ evarūpaṃ vākyabhedanti attho. Api nu ahaṃ uruvelāya padhāne tumhākaṃ saṅgaṇhanatthaṃ anukkaṇṭhanatthaṃ rattim vā divā vā āgantvā,- “āvuso, mā vitakkayittha, mayhaṃ obhāso vā nimittaṃ vā paññāyati”ti evarūpaṃ kañci vacanabhedam akāsinti adhippāyo. Te ekapadeneva satim labhitvā uppannagāravā, “handa addhā esa buddho jāto”ti saddahitvā **no hetam, bhanteti** āhaṃsu. **Asakkhiṃ kho ahaṃ, bhikkhave, pañcavaggiye bhikkhū saññāpetunti** ahaṃ (2.0097), bhikkhave, pañcavaggiye bhikkhū buddho ahanti jānāpetum asakkhiṃ. Tadā pana bhagavā uposathadivaseyeva āgacchi. Attano buddhabhāvaṃ jānāpetvā koṇḍaññattheraṃ kāyasakkhiṃ katvā dhammacakka-ppavattanasuttaṃ kathesi. Suttapariyosāne thero aṭṭhārasahi brahmakoṭīhi saddhiṃ sotāpattiphale patiṭṭhāsi. Sūriye dharamāneyeva desanā niṭṭhāsi. Bhagavā tattheva vassaṃ upagacchi.

**Dvepi sudam, bhikkhave, bhikkhū ovaḍāmīti**-ādi pāṭipadadivasato paṭṭhāya piṇḍapātattāyapi gāmaṃ appavisanadīpanatthaṃ vuttaṃ. Tesañhi bhikkhūnaṃ kammaṭṭhānesu uppannamalavisodhanatthaṃ bhagavā antovihāreyeva ahosi. Uppanne uppane kammaṭṭhānamale tepi bhikkhū bhagavato santikaṃ gantvā pucchanti. Bhagavāpi tesam nisinnaṭṭhānaṃ gantvā malaṃ vinodeti. Atha nesaṃ bhagavatā evaṃ nīhaṭabhattena ovadiyamānānaṃ vappatthero pāṭipadadivase sotāpanno ahosi. Bhaddiyatthero dutiyāyaṃ, mahānāmatthero tatiyāyaṃ, assajitthero catutthiyaṃ. Pakkhassa pana pañcamiyaṃ sabbeva te ekato sannipātetvā anattalakkhaṇasuttaṃ kathesi, suttapariyosāne sabbepi arahattaphale patiṭṭha-  
hiṃsu. Tenāha- “atha kho, bhikkhave, pañcavaggiyā bhikkhū mayā evaṃ ovadiya-

mānā ...pe... anuttaram yoggakkhemam nibbānam ajjhagamamsu ...pe... natthi dāni punabbhavo”ti. Ettakam kathāmaggaṃ bhagavā yaṃ pubbe avaca-  
“tumhepi mamañceva pañcavaggiyānañca maggaṃ āruḥhā, ariyapariyesanā tumhākaṃ pariyesanā”ti imaṃ ekameva anusandhiṃ dassento āhari.

**287.** Idāni yasmā na agāriyānaṃyeva pañcakāmaguṇapariyesanā hoti, anagāriyānampi cattāro paccaye appaccavekkhitvā paribhuñjantānaṃ pañcakāmaguṇavasena anariyapariyesanā hoti, tasmā taṃ dassetuṃ **pañcime, bhikkhave, kāmaguṇā**ti-ādimāha. Tattha navarattesu pattacīvarādīsu cakkhuviññeyyā rūpāti-ādayo cattāro kāmaguṇā labbhanti. Raso panettha paribhogaraso hoti. Manuññe piṇḍapāte bhesajje ca pañcapi labbhanti. Senāsanamhi cīvare viya cattāro. Raso pana etthāpi paribhogarasova. **Ye hi keci, bhikkhaveli** kasmā ārabhi? Evaṃ pañca kāmaguṇe dassetvā idāni ye evaṃ vadeyyuṃ, “pabbajitakālato paṭṭhāya anariyapariyesanā nāma kuto, ariyapariyesanāva pabbajitānan”ti, tesam paṭisedhana-tthāya “pabbajitānampi catūsu paccayesu appaccavekkhaṇaparibhogo anariyapariyesanā (2.0098) evā”ti dassetuṃ imaṃ desanaṃ ārabhi. Tattha **gadhītā**ti taṇhāgedhena gadhitā. **Mucchītā**ti taṇhāmucchāya mucchitā. **Ajjhopannā**ti taṇhāya ajjhogāḥhā. **Anādīnavadassāvinoti** ādīnavaṃ apassantā. **Anissaraṇapaññā**ti nissaraṇaṃ vuccati paccavekkhaṇāñāṇaṃ. Te tena virahitā.

Idāni tassatthassa sādhaṃ upamaṃ dassento **seyyathāpi, bhikkhaveli**-ādimāha. Tatrevaṃ opammaṃsandanaṃ veditabbaṃ- āraññakamago viya hi samaṇabrāhmaṇā, luddakena araññe ṭhapitapāso viya cattāro paccayā, tassa luddassa pāsarāsiṃ ajjhottharivā sayanakālo viya tesam cattāro paccaye appaccavekkhitvā paribhogakālo. Luddake āgacchante magassa yena kāmam agama-nakālo viya samaṇabrāhmaṇānaṃ mārassa yathākāmakaraṇiyakālo, māravasam upagatabhāvoti attho. Magassa pana abaddhassa pāsarāsiṃ

adhisayitakālo viya samaṇabrāhmaṇānaṃ catūsu paccayesu paccavekkhaṇapari-  
bhogo, luddake āgacchante magassa yena kāmaṃ gamaṃ viya samaṇabrā-  
hmaṇānaṃ māravasaṃ anupagamanaṃ veditabbaṃ. **Vissatthoti** nibbhayo nirā-  
saṅko. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Pāsarāsisuttavaṇṇanā niṭṭhitā.

Ariyapariyesanātipi etasseva nāmaṃ.

## 7. Cūlahatthipadopamasuttavaṇṇanā

**288. Evaṃ me sutanti** cūlahatthipadopamasuttaṃ. Tattha **sabbasetena vaḷavā-  
bhirathenāti**, “setā sudam assā yuttā honti setālaṅkāra. Seto ratho setālaṅkāro  
setaparivāro, setā rasmiyo, setā patodalaṭṭhi, setam chattaṃ, setam uṇhisaṃ,  
setāni vatthāni, setā upāhanā, setāya sudam vālabijaniyā bījiyatī”ti (saṃ. ni. 5.4)  
evaṃ vuttena sakalasetena catūhi vaḷavāhi yuttarathena.

Ratho (2.0099) ca nāmeso duvidho hoti- yodharatho, alaṅkārarathoti. Tattha  
yodharatho caturassasaṅṭhāno hoti nātimahā, dvinnaṃ tiṇṇaṃ vā janānaṃ gaha-  
ṇasamattho. Alaṅkāraratho mahā hoti, dīghato dīgho, puthulato puthulo. Tattha  
chattaggāhako vālabijaniggāhako tālavaṇṭaggāhakoti evaṃ aṭṭha vā dasa vā  
sukhena ṭhātuṃ vā nisīdituṃ vā nipajjituṃ vā sakkonti, ayampi alaṅkārarathoyeva.  
So sabbo sacakkapañjarakubbaro rajataparikkhitto ahosi. Vaḷavā pakatiyā setava-  
ṇṇāva. Pasādhanampi tādisaṃ rajatamayaṃ ahosi. Rasmiyopi rajatapanāḷi supa-  
rikkhittā. Patodalaṭṭhipi rajataparikkhittā. Brāhmaṇopi setavatthaṃ nivāsetvā  
setaṃyeva uttarāsaṅgamakāsi, setavilepanaṃ vilimpi, setamālaṃ pilandhi,  
dasasu aṅgulīsu aṅgulimuddikā, kaṇṇesu kuṇḍalānīti evamādi-alaṅkāropissa raja-  
tamayova ahosi. Parivārabrāhmaṇāpissa dasasahassamattā tatheva setavattha-  
vilepanamālālaṅkāra ahesuṃ. Tena vuttaṃ “sabbasetena vaḷavābhirathenā”ti.

**Sāvattiyā niyyātīti** so kira channaṃ channaṃ māsānaṃ ekavāraṃ nagaraṃ  
padakkhiṇaṃ karoti. Ito ettakehi divasehi nagaraṃ padakkhiṇaṃ karissatīti pureta-  
rameva ghosānaṃ kariyati; taṃ sutvā ye nagarato na pakkantā, te na pakkamanti.  
Ye pakkantā, tepi, “puñṇavato sirisampattiṃ passissāmā”ti āgacchanti. Yaṃ  
divasaṃ brāhmaṇo nagaraṃ anuvicarati, tadā pātova nagaravīthiyo sammajjitvā  
vālikaṃ okiritvā lājapañcamehi pupphehi abhippakiritvā puṇṇaghaṭe ṭhapetvā  
kadaliyo ca dhaje ca ussāpetvā sakalanagaraṃ dhūpitavāsitaṃ karonti.  
Brāhmaṇo pātova sīsaṃ nhāyitvā purehattaṃ bhujjitvā vuttanayeneva setava-  
tthādihi attānaṃ alaṅkaritvā pāsādā oruyha rathaṃ abhiruhati. Atha naṃ te

brāhmaṇā sabbasetavattavilepanamālālaṅkāra setacchattāni gahetvā parivārenti; tato mahājanassa sannipātanatthaṃ paṭhamameva taruṇadāraṇānaṃ phalāphalāni vikiritvā tadanantaraṃ māsaṅkāraṇi; tadanantaraṃ kahāpaṇe vikiranti; mahājanā sannipatanti. Ukkuṭṭhiyo ceva celukkhepā ca pavattanti. Atha brāhmaṇo maṅgalikasovattikādīsu maṅgalāni ceva suvatthiyo (2.0100) ca karontesu mahāsampattiyā nagaraṃ anuvicarati. Puññavantā manussā ekabhūmakādipāsāde āruya sukapattasadisāni vātapānakavāṭāni vivaritvā oloketi. Brāhmaṇopi attano yasasirīsaṃpattiyā nagaraṃ ajjhottharanto viya dakkhiṇadvārābhimukho hoti. Tena vuttaṃ “sāvattiyā niyyāti”ti.

**Divā divassāti** divasassa divā, majjhanhakāletī attho. **Pilotikaṃ paribbājakanti pilotikā**ti evaṃ itthilīṅgavohāravasena laddhanāmaṃ paribbājakaṃ. So kira paribbājako daharo paṭhamavaye tṭhito suvaṇṇavaṇṇo buddhupaṭṭhāko, pātova tathāgatassa ceva mahātherānaṅca upaṭṭhānaṃ katvā tidaṇḍakuṇḍikādiparikkhāraṃ ādāya jetavanā nikkhamitvā nagarābhimukho pāyāsi. Taṃ esa dūratova āgacchantam addasa. **Etadvocāti** anukkamena santikaṃ āgataṃ sañjānitvā etaṃ, “handa kuto nu bhavaṃ vacchāyano āgacchatī”ti gottam kintento vacanaṃ avoca. **Paṇḍito maññeti** bhavaṃ vacchāyano samaṇaṃ gotamaṃ paṇḍitoti maññati, udāhu notī ayamettha attho.

**Ko cāhaṃ, bhoti**, bho, samaṇassa gotamassa paññāveyyattiyam jānane ahaṃ ko nāma? **Ko ca samaṇassa gotamassa paññāveyyattiyam jānissāmī**ti kuto cāhaṃ samaṇassa gotamassa paññāveyyattiyam jānissāmi, kena kāraṇena jānissāmī? Evaṃ sabbathāpi attano ajānanabhāvaṃ dīpeti. **Sopi nūnassa tādisovāti** yo samaṇassa gotamassa paññāveyyattiyam jāneyya, sopi nūna dasa pāramiyo pūretvā sabbaññutaṃ patto tādiso buddhoyeva bhavye. Sineruṃ vā himavantaṃ vā pathaviṃ vā ākāsaṃ vā pametukāmena tappamaṇova daṇḍo vā rajju vā laddhuṃ vaṭṭati. Samaṇassa gotamassa paññaṃ jānantenapi tassa ñāṇasadisameva sabbaññutaññaṃ laddhuṃ vaṭṭatīti dīpeti. Ādaravasena panettha āmeditaṃ kataṃ. **Ujārāyāti** uttarāya seṭṭhāya. **Ko cāhaṃ, bhoti**, bho, ahaṃ samaṇassa gotamassa pasamsane ko nāma? **Ko ca samaṇaṃ gotamaṃ pasamsissāmī**ti kena kāraṇena pasamsissāmi? **Pasatthapasatthoti** sabbaguṇānaṃ uttaritarehi sabbalokapasatthehi attano guṇeheva pasattho, na tassa aññehi pasamsanakiccaṃ atthi. Yathā hi campakapupphaṃ vā niluppalaṃ vā padumaṃ vā lohitaṇḍanaṃ vā attano vaṇṇagandhasiriyāva (2.0101) pāsādikaṅceva sugandhaṅca, na tassa āgantukehi vaṇṇagandhehi thomanakiccaṃ atthi. Yathā ca maṇiratanaṃ vā candamaṇḍalaṃ vā attano ālokeneva obhāsati, na tassa aññena obhāsanakiccaṃ atthi. Evaṃ samaṇo gotamo sabbalokapasatthehi attano guṇeheva pasattho thomito sabbalokassa seṭṭhataṃ pāpito, na tassa aññena pasamsanakiccaṃ atthi. Pasatthehi vā pasatthotipi pasatthapasattho.

Ke pasatthā nāma? Rājā pasenadi kosalo kāsikosalavāsikehi pasattho, bimbi-sāro aṅgamagadhavāsīhi. Vesālikā licchavī vajjiraṭṭhavāsīhi pasatthā. Pāveyyakā mallā, kosināraṇā mallā, aññepi te te khattiyā tehi tehi jānapadehi pasatthā. Caṅkī-ādayo brāhmaṇā brāhmaṇagaṇehi, anāthapiṇḍikādayo upāsakā anekasa-

tehi upāsakagaṇehi, visākhādayo upāsikā anekasatāhi upāsikāhi, sakuludāyi-ādayo paribbājakā anekehi paribbājakasatehi, uppalavaṇṇātheri-ādikā mahāsāvikā anekehi bhikkhunisatehi, sārīputtattherādayo mahāsāvakā anekasatehi bhikkhūhi, sakkādayo devā anekasahasseehi devehi, mahābrahmādayo brahmāno anekasahasseehi brahmehi pasatthā. Te sabbepi dasabalaṃ thomenti vaṇṇenti, pasamsantīti bhagavā “pasatthapasattho”ti vuccati.

**Atthavasanti** atthānisamsaṃ. Athassa paribbājako attano pasādakāraṇaṃ ācikkhanto **seyyathāpi, bho, kusalo nāgavanikoti-ādimāha**. Tattha **nāgavanikoti** nāgavanavāsiko anuggahitasippo puriso. Parato pana uggahitasippo puriso nāgavanikoti āgato. **Cattāri padānīti** cattāri nāṇapadāni nāṇavalañjāni, nāṇena akkantaṭṭhānānīti attho.

**289. Khattiyapaṇḍiteti-ādīsu paṇḍite**Ti paṇḍiccena samannāgate. **Nipuṇeti** saṅhe sukhumabuddhino, sukhuma-atthantarapaṭivijjhanasamatthe. **Kataparappavāde**Ti viññātaparappavāde ceva parehi saddhiṃ katavādaparicaye ca. **Vāavedhirūpeti** vāavedhidhanuggahasadise. **Te bhindantā maññe carantīti** vāavedhi (2.0102) viya vālaṃ sukhumānīpi paresaṃ diṭṭhigatāni attano paññāgatena bhindantā viya carantīti attho. **Pañhaṃ abhisankharontīti** dupadampi tipadampi catuppadampi pañhaṃ karonti. **Vādaṃ āropessāmāti** dosaṃ āropessāma. **Na ceva samaṇaṃ gotamaṃ pañhaṃ pucchantīti**; kasmā na pucchanti? Bhagavā kira parisamajjhe dhammaṃ desento parisāya ajjhāsayāṃ oloketi, tato passati- “ime khattiyapaṇḍitā guḷhaṃ rahassaṃ pañhaṃ ovaṭṭikasāraṃ katvā āgatā”ti. So tehi aputṭhoyeva evarūpe pañhe pucchāya ettakā dosā, vissajjane ettakā, atthe pade akkhare ettakāti ime pañhe pucchanto evaṃ puccheyya, vissajjento evaṃ vissajjeyyāti, iti ovaṭṭikasāraṃ katvā ānīte pañhe dhammakathāya antare pakkhipitvā viddhaṃseti. Khattiyapaṇḍitā “seyyo vata no, ye mayaṃ ime pañhe na pucchimhā, sace hi mayaṃ puccheyyāma, appatiṭṭheva no katvā samaṇo gotamo khipeyyā”ti attamanā bhavanti.

Apica buddhā nāma dhammaṃ desentā parisāya mettāya pharanti, mettāpharaṇena dasabale mahājanassa cittaṃ pasīdati, buddhā ca nāma rūpaggappattā honti dassanasampannā madhurassarā mudujivhā suphusitadantāvaraṇā amatena hadayaṃ siñcantā viya dhammaṃ kathenti. Tatra nesaṃ mettāpharaṇena pasannacittānaṃ evaṃ hoti- “evarūpaṃ advejjhakathaṃ amoghakathaṃ niyyānikakathaṃ kathentena bhagavatā saddhiṃ na sakkhissāma paccaṇīkaggāhaṃ gaṇhitun”ti attano pasannabhāveneva na pucchanti.

**Aññadatthūti** ekaṃsena. **Sāvakā sampajjantīti** saraṇagamanavasena sāvakā honti. **Tadanuttaranti** taṃ anuttaraṃ. **Brahmacariyapariyosānanti** maggabrahmacariyassa pariyosānabhūtaṃ arahattaphalaṃ, tadatthāya hi te pabbajanti. **Manava, bho, anassāmāti**, bho, sace mayaṃ na upasaṅkameyyāma, iminā thokena anupasaṅkamanamattena apayirupāsanaṃmatteneva naṭṭhā bhaveyyāma. Upasaṅkamanamattakena panamhā na naṭṭhāti attho. Dutiyapadaṃ purimasseva vevacanaṃ. **Assamaṇāva samānāti-ādīsu** pāpānaṃ asamitattā **assamaṇāva**. Abāhitattā ca pana **abrāhmaṇāva**. Kilesārīnaṃ ahatattā **anarahantoyeva** samānāti attho.

**290. Udānaṃ udānesī**ti udāhāraṃ udāhari. Yathā hi yaṃ telaṃ mānaṃ gahetuṃ na sakkoti, vissanditvā gacchati, taṃ avasekoti vuccati, yañca (2.0103) jalaṃ taḷākaṃ gahetuṃ na sakkoti, ajjhottharivā gacchati, taṃ oghoti vuccati. Eva-meva yaṃ pītimayaṃ vacanaṃ hadayaṃ gahetuṃ na sakkoti, adhikaṃ hutvā anto asaṅṭhahitvā bahi nikkhamati, taṃ **udānanti** vuccati. Evarūpaṃ pītimayaṃ vacanaṃ nicchāresīti attho. **Hatthipadopamoti** hatthipadaṃ upamā assa dhamma-ssāti hatthipadopamo. So na ettāvata vitthārena paripūro hotīti dasseti. **Nāgavanikoti** uggahitahatthisippo hatthivanacāriko. Atha kasmā idha kusaloti na vuttoti? Parato “yo hoti kusalo”ti vibhāgadassanato. Yo hi koci pavisati, yo pana kusalo hoti, so neva tāva niṭṭhaṃ gacchati. Tasmā idha kusaloti avatvā parato vutto.

**291. Vāmanikāti** rassā āyāmatopi na dīghā mahākucchihatthiniyo. **Uccā ca nisevitanti** sattaṭṭharatanubbedhe vaṭarukkhādīnaṃ khandhappadese ghaṃsita-ṭṭhānaṃ. **Uccā kāḷārikāti** uccā ca yaṭṭhisadisapādā hutvā, kāḷārikā ca dantānaṃ kaḷāratāya. Tāsaṃ kira eko danto unnato hoti, eko onato. Ubhopi ca viraḷā honti, na āsannā. **Uccā ca dantehi ārañjitānīti** sattaṭṭharatanubbedhe vaṭarukkhādīnaṃ khandhappadese pharasunā pahataṭṭhānaṃ viya dāṭṭhāhi chinnaṭṭhānaṃ. **Uccā kaṇerukā nāmāti** uccā ca yaṭṭhisadisadīghapādā hutvā, kaṇerukā ca dantānaṃ kaṇerutāya, tā kira makuḷadāṭṭhā honti. Tasmā kaṇerukāti vuccanti. **So niṭṭhaṃ gacchatīti** so nāgavaniko yassa vatāhaṃ nāgassa anupadaṃ āgato, ayameva so, na añño. Yañhi ahaṃ paṭhamaṃ padaṃ disvā vāmanikānaṃ padaṃ idaṃ bhavissatīti niṭṭhaṃ na gato, yampi tato orabhāge disvā kāḷārikānaṃ bhavissati, kaṇerukānaṃ bhavissatīti niṭṭhaṃ na gato, sabbaṃ taṃ imasseva mahāhatthino padanti mahāhatthiṃ disvāva niṭṭhaṃ gacchati.

**Evameva khoti** ettha idaṃ opammasaṃsandanaṃ- nāgavanaṃ viya hi ādito paṭṭhāya yāva nīvaraṇappahānā dhammadesanā veditabbā. Kusalo nāgavaniko viya yogāvacaro; mahānāgo viya sammāsambuddho; mahantaṃ hatthipadaṃ viya jhānābhiññā. Nāgavanikassa tattha tattha hatthipadaṃ disvāpi vāmanikānaṃ padaṃ bhavissati, kāḷārikānaṃ kaṇerukānaṃ padaṃ bhavissatīti anīṭṭhaṅgatabhāvo viya yogino, imā jhānābhiññā nāma bāhirakaparibbājakānampi (2.0104) santīti anīṭṭhaṅgatabhāvo. Nāgavanikassa, tattha tattha mayā diṭṭhaṃ padaṃ ima-sseva



mahāhatthino, na aññassāti mahāhatthiṃ disvā niṭṭhaṅgamaṇaṃ viya ariyasāva-kassa arahattaṃ patvāva niṭṭhaṅgamaṇaṃ. Idañca pana opammasaṃsandanaṃ matthake ṭhatvāpi kātuṃ vaṭṭati. Imasmimpi ṭhāne vaṭṭatiyeva. Anukkamāgataṃ pana pālīpadaṃ gahetvā idheva kataṃ. Tattha **idhāti** desāpadese nipāto. Svāyaṃ katthaci lokaṃ upādāya vuccati. Yathāha- “idha tathāgato loka uppajjati” ti (dī. ni. 1. 279). Katthaci sāsanaṃ. Yathāha- “idheva, bhikkhave, samaṇo, idha dutiyo sama-ṇo” ti (a. ni. 4.241). Katthaci okāsaṃ. Yathāha-

“Idheva tiṭṭhamānassa, devabhūtassa me sato;  
punarāyu ca me laddho, evaṃ jānāhi mārisā” ti. (dī. ni. 2.369; dī. ni. aṭṭha. 1.190);

Katthaci padapūraṇamattameva. Yathāha- “idhāhaṃ, bhikkhave, bhuttāvī assaṃ pavārito” ti (ma. ni. 1.30). Idha pana lokaṃ upādāya vuttoti veditabbo. Idaṃ vuttaṃ hoti “brāhmaṇa imasmīṃ loka tathāgato uppajjati arahaṃ ...pe... buddho bhagavā” ti.

Tattha **tathāgatasaddo** mūlapariyāye, arahanti-ādayo visuddhimagge vitthāritā. **Loka uppajjati**ti ettha pana **lokoti** okāsaloko sattaloko saṅkhāralokoti tividho. Idha pana sattaloko adhippeto. Sattaloka uppajjamānopi ca tathāgato na devaloke, na brahmaloke, manussalokeyeva uppajjati. Manussalokepi na aññasmiṃ cakkavāḷe, imasmīṃyeva cakkavāḷe. Tatrāpi na sabbaṭṭhānesu, “puratthimāya disāya **gaja-ṅgalaṃ** nāma nigamo. Tassāparena mahāsālo, tato parā paccantimā janapadā, orato majjhe. Puratthimadakkhiṇāya disāya **sallavatī** nāma nadī, tato parā paccantimā janapadā, orato majjhe. Dakkhiṇāya disāya **setakaṇṇikaṃ** nāma nigamo, tato parā paccantimā janapadā, orato majjhe. Pacchimāya disāya thūṇaṃ nāma brāhmaṇagāmo, tato parā paccantimā janapadā, orato majjhe. Uttarāya (2.0105) disāya **usiraddhajo** nāma pabbato, tato parā paccantimā janapadā, orato majjhe” ti (mahāva. 259) evaṃ paricchinne āyāmato tiyojanasate vitthārato aḍḍhateyyayojanasate parikkhepato navayojanasate majjihimāpadese uppajjati. Na kevalaṅca tathāgatova, paccekabuddhā aggasāvaka asīti mahātherā buddhamātā buddhapitā cakkavattī rājā aññe ca sārappattā brāhmaṇagahapatikā ettheva uppajjanti. Tattha tathāgato sujātāya dinnamadhupāyasabhojanato paṭṭhāya yāva arahattamaggo, tāva uppajjati nāma. Arahattaphale uppanno nāma. Mahābhinikkhamanato vā yāva arahattamaggo. Tusitabhavanato vā yāva arahattamaggo. Dīpaṅkarapādamūlato vā yāva arahattamaggo, tāva uppajjati nāma. Arahattaphale uppanno nāma. Idha sabbapaṭṭhamaṃ uppannabhāvaṃ sandhāya uppajjati vuttaṃ, tathāgato loka uppanno hotīti ayañhettha attho.

**So imaṃ lokanti** so bhagavā imaṃ lokaṃ, idāni vattabbaṃ nidasseti. **Sadeva-kanti** saha devehi sadevakaṃ. Evaṃ saha mārena **samārakaṃ**. Saha brahmunā **sabrahmakaṃ**. Saha samaṇabrāhmaṇehi **sassamaṇabrāhmaṇiṃ**. Pajātattā pajā, taṃ **pajaṃ**. Saha devamanussehi **sadevamanussaṃ**. Tattha sadevakavacanena pañcakāmāvacaradevaggahaṇaṃ veditabbaṃ. Samārakavacanena chaṭṭhakāmāvacaradevaggahaṇaṃ. Sabrahmakavacanena brahmakāyikādibrahmaggahaṇaṃ. Sassamaṇabrāhmaṇivacanena sāsanaṃ paccatthipaccāmittasamaṇabrāhmaṇa-

ggahaṇaṃ samitapāpabāhitapāpasamaṇabrāhmaṇaggahaṇaṅca. Pajāvacanena sattalokaggahaṇaṃ. Sadevamanussavacanena sammutideva-avasesamanussa-ggahaṇaṃ. Evamettha tīhi padehi okāsalokena saddhiṃ sattaloko, dvīhi pajāvasena sattalokova gahitoti veditabbo.

Aparo nayo- sadevakaggahaṇena arūpāvacaradevaloko gahito. Samārakagga- haṇena chakāmāvacaradevaloko. Sabrahmakaggahaṇena rūpī brahmaloko. Sassamaṇabrāhmaṇādiggahaṇena catuparisavasena sammutidevehi vā saha manussaloko avasesasabbasattaloko vā.

Apicettha (2.0106) sadevakavacanena ukkaṭṭhaparicchedato sabbassa lokassa sacchikatabhāvamāha. Tato yesaṃ ahosi- “māro mahānubhāvo chakāmāvacarissaro vasavattī. Kiṃ sopi etena sacchikato”ti? Tesam vimatiṃ vidhamanto **samāra-kanti** āha. Yesam pana ahosi- “brahmā mahānubhāvo, ekaṅguliyā ekasmiṃ cakkavāḷasahasā ālokaṃ pharati, dvīhi ...pe... dasahi aṅgulīhi dasasu cakkavāḷasahasā ālokaṃ pharati, anuttaraṅca jhānasamāpattisukhaṃ paṭisaṃvedeti. Kiṃ sopi sacchikato”ti? Tesam vimatiṃ vidhamanto **sabrahmakanti** āha. Tato ye cintesum- “puthū samaṇabrāhmaṇā sāsanaṃ paccatthikā, kiṃ tepi sacchikata”ti? Tesam vimatiṃ vidhamanto **sassamaṇabrāhmaṇiṃ pajanti** āha. Evaṃ ukkaṭṭhukkaṭṭhānaṃ sacchikatabhāvaṃ pakāsetvā atha sammutideve avasesamanusse ca upādāya ukkaṭṭhaparicchedavasena sesasattalokassa sacchikatabhāvaṃ pakāseto **sadevamanussanti** āha. Ayamettha bhāvānukkamo. Porāṇā panāhu- **sadevakanti** devatāhi saddhiṃ avasesalokaṃ. **Samārakanti** mārena saddhiṃ avasesalokaṃ. **Sabrahmakanti** brahmehi saddhiṃ avasesalokaṃ. Evaṃ sabbepi tibhavūpage satte tīhākārehi tīsu padesu pakkhipetvā puna dvīhi padehi pariyādiyanto “sassamaṇabrāhmaṇiṃ pajam sadevamanussan”ti āha. Evaṃ pañcāhi padehi tena tenākārena tedhātukameva pariyādinanti.

**Sayam abhiññā sacchikatvā pavedetīti sayanti** sāmaṃ aparaneyyo hutvā. **Abhiññā**Ti abhiññāya, adhikena ñāṇena ñatvāti attho. **Sacchikatvā**Ti paccakkham katvā. Etena anumānādipaṭikkhepo kato hoti. **Pavedetīti** bodheti viññāpeti pakāseti. **So dhammaṃ deseti ādikalyāṇaṃ ...pe... pariyosānakalyāṇanti** so bhagavā sattesu kāruññataṃ paṭicca hitvāpi anuttaraṃ vivekasukhaṃ dhammaṃ deseti. Taṅca kho appaṃ vā bahum vā desento ādikalyāṇādippakārameva deseti. Ādimhipi kalyāṇaṃ bhaddakaṃ anavajjameva katvā deseti. Majjhepi... pariyosānepi kalyāṇaṃ bhaddakaṃ anavajjameva katvā desetīti vuttaṃ hoti.

Tattha (2.0107) atthi desanāya ādimajjhapariyosānaṃ, atthi sāsanaṃ. **Desanāya** tāva catuppādikāyapi gāthāya paṭhamapādo ādi nāma, tato dve majjhaṃ nāma, ante eko pariyosānaṃ nāma. Ekānusandhikassa suttassa nidānamādi, idamavocāti pariyosānaṃ, ubhinnaṃ antarā majjhaṃ. Anekānusandhikassa suttassa paṭhamānusandhi ādi, ante anusandhi pariyosānaṃ, majjhe eko vā dve vā bahū vā majjhameva. **Sāsanaṃ** pana sīlasamādhivipassanā ādi nāma. Vuttampi cetam- “ko cādi kusalānaṃ dhammānaṃ, sīlaṅca suvisuddhaṃ, diṭṭhi ca ujukā”ti (saṃ. ni. 5.369). “Atthi, bhikkhave, majjhimā paṭipadā tathāgatena abhisambuddhā”ti evaṃ vutto pana ariyamaggo majjhaṃ nāma, phalaṅceva nibbānaṅca

pariyosānaṃ nāma. “Etadatthamidaṃ, brāhmaṇa, brahmacariyametaṃ sāraṃ, etaṃ pariyosānaṃ”ti (ma. ni. 1.324) hi ettha phalaṃ pariyosānanti vuttaṃ. “Nibbānogaḍhañhi, āvuso visākha, brahmacariyaṃ vussati nibbānaparāyaṇaṃ nibbānapariyosānaṃ”ti (ma. ni. 1.466) ettha nibbānaṃ pariyosānanti vuttaṃ. Idha desanāya ādimajjhapariyosānaṃ adhippetam. Bhagavā hi dhammaṃ desento ādimhi silaṃ dassetvā majjhe maggaṃ pariyosāne nibbānaṃ dasseti. Tena vuttaṃ- “so dhammaṃ deseti ādikalyāṇaṃ majjhekalyāṇaṃ pariyosānakalyāṇaṃ”ti. Tasmā aññopi dhammakathiko dhammaṃ kathento-

“Ādimhi silaṃ dasseyya, majjhe maggaṃ vibhāvaye;

pariyosānamhi nibbānaṃ, esā kathikasaṅḥiti”ti. (dī. ni. aṭṭha. 1.190);

**Sātthaṃ sabyañjananti** yassa hi yāgubhatta-itthipurisādivaṇṇanā nissitā desanā hoti, na so sātthaṃ deseti. Bhagavā pana tathārūpaṃ desanaṃ pahāya catusatipaṭṭhānādinissitaṃ desanaṃ deseti. Tasmā “sātthaṃ deseti”ti vuccati. Yassa pana desanā ekabyañjanādiyuttā vā sabbaniroṭṭhabyañjanā vā sabbavissatṭhasabbaniggahitabyañjanā vā, tassa dāmiḷakirāsavarādimilakkhūnaṃ bhāsā viya byañjanapāripūriyā abhāvato abyañjanā nāma desanā hoti. Bhagavā pana-

“Sithilaṃ (2.0108) dhanitañca dīgharassaṃ, garukaṃ lahukañca niggahitaṃ.

sambandhaṃ vavatthitaṃ vimuttaṃ, dasadhā byañjanabuddhiyā pabhedo”ti. (dī. ni. aṭṭha. 1.190)-

Evam vuttaṃ dasavidhaṃ byañjanaṃ amakkhetvā paripuṇṇabyañjanameva katvā dhammaṃ deseti. Tasmā “sabyañjanaṃ dhammaṃ deseti”ti vuccati.

**Kevalaparipuṇṇanti** ettha **kevalanti** sakalādhivacanaṃ. **Paripuṇṇanti** anūnādhikavacanaṃ. Idaṃ vuttaṃ hoti- “sakalaparipuṇṇameva deseti, ekadesanāpi aparipuṇṇā natthi”ti. **Parisuddhanti** nirupakkilesaṃ. Yo hi idaṃ dhammadesanaṃ nissāya lābhaṃ vā sakkāraṃ vā labhissāmīti deseti, tassa aparisuddhā desanā hoti. Bhagavā pana lokāmisānirapekkho hitapharaṇena mettābhāvanāya mududhādayo ullumpanasabhāvasaṅḥitena cittaṃ deseti. Tasmā “parisuddhaṃ dhammaṃ deseti”ti vuccati. **Brahmacariyaṃ pakāseti**ti ettha **brahmacariyanti** sikkhattayasaṅgahaṃ sakalasāsaṇaṃ. Tasmā brahmacariyaṃ pakāseti so dhammaṃ deseti ādikalyāṇaṃ ...pe... parisuddhaṃ, evam desento ca sikkhattayasaṅgahitaṃ sakalasāsaṇaṃ brahmacariyaṃ pakāseti evamettha attho daṭṭhabbo. **Brahmacariyanti** seṭṭhaṭṭhena brahmabhūtaṃ cariyaṃ. Brahmabhūtānaṃ vā buddhādīnaṃ cariyanti vuttaṃ hoti.

**Taṃ dhammanti** taṃ vuttappakārasampadaṃ dhammaṃ. **Suṇāti gahapati vāti** kasmā paṭhamaṃ gahapatiṃ niddisatīti? Nihatamānattā ussannattā ca. Yebhuyyena hi khattiyakulato pabbajitā jātiṃ nissāya mānaṃ karonti. Brāhmaṇakulā pabbajitā mante nissāya mānaṃ karonti. Hīnajaccakulā pabbajitā attano vijātītāya patiṭṭhātumaṃ na sakkonti. Gahapatidārakā pana kacchehi sedaṃ muñcāntehi piṭṭhiyā loṇaṃ pupphamānāya bhūmiṃ kasitvā nihatamānadappā honti. Te pabbajitvā mānaṃ vā dappaṃ vā akatvā yathābalaṃ buddhavacanaṃ uggahetvā vipassanāya kammaṃ karontā sakkonti arahatte patiṭṭhātumaṃ. Itarehi ca kulehi nikkhamitvā pabbajitā nāma na bahukā, gahapatikāva bahukā, iti nihatamānattā ussa-

nnattā ca paṭhamam gahapatiṃ niddisatīti.

**Aññatarasmiṃ vāti** itaresam vā kulānam aññatarasmiṃ. **Paccājāto** patijāto. **Tathāgate saddham paṭilabhatīti** parisuddham dhammam sutvā (2.0109) dhamma-ssāmihi tathāgate “sammāsambuddho vata bhagavā”ti saddham paṭilabhati. **Iti paṭisañcikkhatīti** evam paccavekkhati. **Sambādho gharāvāsoti** sacepi saṭṭhihatthe ghare yojanasatantarepi vā dve jāyampatikā vasanti, tathāpi nesam sakiñcanasa-palibodhaṭṭhena gharāvāso sambādhoyeva. **Rajopathoti** rāgarajādīnam uṭṭhāna-ṭṭhānanti mahā-aṭṭhakathāyaṃ vuttam. Āgamanapathotipi vaṭṭati. Alagganaṭṭhena abbhokāso viyāti **abbhokāso**. Pabbajito hi kūṭāgāraratanapāsādadevavimānādīsu pihitadvāravātapānesu paṭicchannesu vasantopi neva laggati na sajjati na bajjhati. Tena vuttam- “abbhokāso pabbajjā”ti. Apica sambādho gharāvāso kusala-kiriyāya okāsābhāvato. Rajopatho asaṃvutasañkāraṭṭhānam viya rajānam kilesa-rajānam sannipātaṭṭhānato. Abbhokāso pabbajjā kusalakiriyāya yathāsukham okā-sasabbhāvato.

**Nayidaṃ sukaram ...pe... pabbajeyyanti** ettha ayam sañkhepakathā- yadetaṃ sikkhattayabrahmacariyam ekampi divasaṃ akhaṇḍam katvā carimakacittam pāpetabbatāya ekantaparipuṇṇam. Ekadivasampi ca kilesamalena amalinaṃ katvā carimakacittam pāpetabbatāya ekantaparisisuddham, sañkhalikhitaṃ likhita-saṅkhasadisam dhotasañkhasappaṭibhāgam caritabbam, idaṃ na sukaram agāram ajjhāvasatā agāramajjhe vasantena ekantaparipuṇṇam ...pe... caritum. Yaṃnūnāham kese ca massuñca ohāretvā kāsāyarasapītatāya kāsāyāni brahma-cariyam carantānam anucchavikāni vatthāni acchādetvā paridahitvā agārasmā nikkhamitvā anagāriyam pabbajeyyanti. Ettha ca yasmā agārassa hitam kasivāṇi-jjādikammaṃ **agāriyanti** vuccati, tañca pabbajjāya

natthi. Tasmā pabbajjā anagāriyāti ñātabbā, taṃ **anagāriyaṃ**. Pabbajeyyanti paṭi-pajjeyyaṃ. **Appaṃ vāti** saḥassato heṭṭhā bhogakkhandho appo nāma hoti, saḥassato paṭṭhāya mahā. Ābandhanaṭṭhena ñāti eva parivaṭṭo **ñātiparivaṭṭo**. So vīsatiyā heṭṭhā appo hoti, vīsatiyā paṭṭhāya mahā.

**292. Bhikkhūnaṃ sikkhāsājīvasamāpannoti** yā bhikkhūnaṃ adhisīlasaṅkhātā sikkhā, tañca, yattha cete saha jīvanti ekajīvikā sabhāgavuttino (2.0110) honti, taṃ bhagavatā paññattasikkhāpadasaṅkhātāṃ sājīvañca tattha sikkhanabhāvena samāpannoti bhikkhūnaṃ sikkhāsājīvasamāpanno. **Samāpannoti** sikkhaṃ paripūrento, sājīvañca avitikkamanto hutvā tadubhayaṃ upagatoti attho. **Pāṇātipātaṃ pahāyāti**-ādīsu pāṇātipātādīkathā heṭṭhā vitthāritā eva. **Pahāyāti** imaṃ pāṇātipāta-cetanāsaṅkhātāṃ dussīlyaṃ pajahitvā. **Paṭivirato hotīti** pahīnakālato paṭṭhāya tato dussīlyato orato viratova hoti. **Nihitadaṇḍo nihitasatthoti** parūpaghātathāya daṇḍaṃ vā satthaṃ vā ādāya avattanato nikkhattadaṇḍo ceva nikkhattasattho cāti attho. Ettha ca ṭhapetvā daṇḍaṃ sabbampi avasesaṃ upakaraṇaṃ sattānaṃ vihiṃsanabhāvato satthanti veditabbaṃ. Yaṃ pana bhikkhū kattaradaṇḍaṃ vā dantakaṭṭhavāsīṃ vā pipphalakaṃ vā gahetvā vicaranti, na taṃ parūpaghātathāya. Tasmā nihitadaṇḍo nihitasatthotveva saṅkhaṃ gacchati. **Lajjīti** pāpajigucchanalakkhaṇāya lajjāya samannāgato. **Dayāpannoti** dayāṃ mettacittataṃ āpanno. **Sabbapāṇabhūtāhitānukampīti** sabbe pāṇabhūte hitena anukampako. Tāya dayāpannatāya sabbesaṃ pāṇabhūtānaṃ hitacittakoti attho. **Viharatīti** iriyati pāleti.

Dinnameva ādiyatīti **dinnādāyī**. Cittenapi dinnameva paṭikaṅkhatīti **dinnapāṭikaṅkhi**. Thenetīti theno. Na thenena **athenena**. Athenattāyeva **sucibhūtena**. **Attanāti** attabhāvena, athenaṃ sucibhūtaṃ attabhāvaṃ katvā viharatīti vuttaṃ hoti.

**Abrahmacariyanti** aseṭṭhacariyaṃ. Brahmaṃ seṭṭhaṃ ācāraṃ caratīti **brahmācārī**. **Ārācārīti** abrahmacariyato dūracārī. **Methunāti** rāgapariyuṭṭhānavasena sadi-sattā methunakāti laddhavohārehi paṭisevitabbato methunāti saṅkhaṃ gatā asaddhammā. **Gāmadhammāti** gāmaṃvāsīnaṃ dhammā.

Saccaṃ vadatīti **saccavādī**. Saccena saccaṃ sandahati ghaṭetīti **saccasandho**, na antarantarā musā vadatīti attho. Yo hi puriso kadāci musā vadati, kadāci saccaṃ, tassa musāvādena antaritattā saccaṃ saccena na ghaṭiyati (2.0111). Tasmā na so saccasandho, ayaṃ pana na tādiso, jīvitahetupi musāvādaṃ avatvā saccena saccaṃ sandahatiyevāti **saccasandho**. **Thetoti** thiro, thirakathoti attho. Eko hi puggalo haliddirāgo viya, thusarāsīmihi nikhātakhāṇu viya, assapiṭṭhe ṭhapi-takumbhaṇḍamiva ca na thirakatho hoti. Eko pāsāṇalekhā viya indakhilo viya ca thirakatho hoti; asinā sīse chijjantepi dve kathā na katheti; ayaṃ vuccati theto. **Paccayikoti** pattiyāyitabbako, saddhāyikoti attho. Ekacco hi puggalo na paccayiko hoti, “idaṃ kena vuttaṃ, asukenā”ti vutte “mā tassa vacanaṃ saddahathā”ti vattabbataṃ āpajjati. Eko paccayiko hoti, “idaṃ kena vuttaṃ, asukenā”ti vutte, “yadi tena vuttaṃ, idameva pamāṇaṃ, idāni upaparikkhitabbaṃ natthi, evameva idan”ti vattabbataṃ āpajjati, ayaṃ vuccati paccayiko. **Avisaṃvādako lokassāti** tāya sacca-vāditāya lokaṃ na visaṃvādetīti attho.

**Imesaṃ bhedāyāti** yesaṃ ito sutvāti vuttānaṃ santike suttaṃ, tesaṃ bhedāya. **Bhinnānaṃ vā sandhātāti** dvinnampi mittānaṃ vā samānupajjhāyakādīnaṃ vā kenacideva kāraṇena bhinnānaṃ ekamekaṃ upasaṅkamtivā “tumhākaṃ idise kule jātānaṃ evaṃ bahussutānaṃ idaṃ na yuttan”ti-ādīni vatvā sandhānaṃ kattā. **Anuppadātāti** sandhānānuppadātā, dve jane samagge disvā, “tumhākaṃ evarūpe kule jātānaṃ evarūpehi guṇehi samannāgatānaṃ anucchavikametan”ti-ādīni vatvā daḥhikammaṃ kattāti attho. Samaggo ārāmo assāti **samaggārāmo**. Yattha samaggā natthi, tattha vasitumpi na icchatīti attho. “Samaggarāmo”tipi pāḷi, aya-mevettha attho. **Samaggaratoti** samaggesu rato, te pahāya aññatra gantumpi na icchatīti attho. Samagge disvāpi sutvāpi nandatīti **samagganandī**. **Samaggakaraṇiṃ vācaṃ bhāsītāti** yā vācā satte samaggeyeva karoti, taṃ sāmaggiguṇaparidīpakameva vācaṃ bhāsati, na itaranti.

**Nelāti** elamaṃ vuccati doso, nāssā elanti nelā, niddosāti attho. “Nelaṅgo setapa-cchādo”ti ettha vuttanelaṃ viya. **Kaṇṇasukhāti** (2.0112) byañjanamadhuratāya kaṇṇānaṃ sukhā, sūcivijjanaṃ viya kaṇṇasūlaṃ na janeti. Atthamadhuratāya sakalasarīre kopamaṃ ajanetvā pemaṃ janetīti **pemaṇiyā**. Hadayaṃ gacchati, apaṭi-haññamānā sukhena cittaṃ pavisatīti **hadayaṅgamā**. Guṇaparipuṇṇatāya pure bhavāti **porī**, pure saṃvaddhanārī viya sukumārātipi porī, purassa esātipi porī, nagaravāsīnaṃ kathāti attho. Nagaravāsīno hi yuttakathā honti, pitimattaṃ pitāti, mātīmattaṃ mātāti, bhātīmattaṃ bhātāti vadanti. Evarūpi kathā bahuno janassa kantā hotīti **bahujanakantā**. Kantabhāvene va bahuno janassa manāpā cittavuddhikarāti **bahujanamanāpā**.

Kālena vadatīti **kālavādī**, vattabbayuttakālaṃ sallakkhetvā vadatīti attho. Bhūtaṃ tacchaṃ sabhāvameva vadatīti **bhūtavādī**. Diṭṭhadhammikasamparāyikatthasannissitameva katvā vadatīti **atthavādī**. Navalokuttaradhammasannissitaṃ katvā vadatīti **dhammavādī**. Saṃvaravinayapahānavinayasannissitaṃ katvā vadatīti **vinaya-vādī**. Nidhānaṃ vuccati ṭhapanokāso, nidhānamassā atthīti **nidhānavatī**, hadaye nidhātāba yuttavācaṃ bhāsītāti attho. **Kālenāti** evarūpiṃ bhāsamānopi ca “ahaṃ nidhānavatiṃ vācaṃ bhāsissāmī”ti na akālena bhāsati, yuttakālaṃ pana avekkhitvā bhāsātīti attho. **Sāpadesanti** sa-upamaṃ, sakāraṇanti attho. **Pariyantavanti** paricchedaṃ dassetvā yathāssā paricchedo paññāyati, evaṃ bhāsātīti attho. **Atthasamhitanti** anekehipi nayehi vibhajantena pariyādātuṃ asakkuṇeyyatāya atthasampannaṃ, yaṃ vā so atthavādī atthaṃ vadati, tena atthena saṃhitattā atthasamhitaṃ vācaṃ bhāsati, na aññaṃ nikkhipitvā aññaṃ bhāsātīti vuttaṃ hoti.

**293. Bijaḡāmbhūtagāmasamārambhāti** mūlabijaṃ khandhabijaṃ phaḷubijaṃ aggabijaṃ bijabijanti pañcavidhassa bijaḡāmassa ceva yassa kassaci nilatiṇarukkhādikassa bhūtagāmassa ca samārambhā, chedanabhedanapacānādibhāvena vikopānā paṭiviratoti attho. **Ekabhattikoti** pātarāsabhattaṃ sāyamāsabhattanti dve bhattāni. Tesu pātarāsabhattaṃ antomajjhanhikena paricchinnaṃ, itaraṃ majjhanhikato uddhaṃ anto-aruṇena. Tasmā antomajjhanhike dasakkhattuṃ bhuñjamānopi (2.0113) ekabhattikova hoti, taṃ sandhāya vuttaṃ “ekabhattiko”ti. Rattiyā bhojanaṃ ratti, tato uparatoti **rattūparato**. Atikkante majjhanhike yāva sūriyatthaṃ-

gamanā bhojanaṃ **vikālabhojanaṃ** nāma. Tato viratattā **virato vikālabhojanā**. Sāsanassa ananulomattā visūkaṃ paṭaṇṇibhūtaṃ dassananti **visūkadassanaṃ**. Attanā naccananaccāpanādivasena naccā ca gītā ca vāditā ca, antamaso mayūra-naccanādivasenāpi pavattānaṃ naccādīnaṃ visūkabhūtā dassanā cāti **naccagīta-vāditavisūkadassanā**. Naccādīni hi attanā payojetuṃ vā parehi payojāpetuṃ vā payuttāni passituṃ vā neva bhikkhūnaṃ na bhikkhunīnaṃ vaṭṭanti. **Mālādīsu mālati** yaṃkiñci pupphaṃ. **Gandhanti** yaṃkiñci gandhajātaṃ. **Vilepananti** chavirā-gakaraṇaṃ. Tattha piḷandhanto **dhāreti** nāma. Ūnaṭṭhānaṃ pūrento **maṇḍeti** nāma. Gandhavasena chavirāgavasena ca sādīyanto **vibhūseti** nāma. Ṭhānaṃ vuccati kāraṇaṃ. Tasmā yāya dussīlyacetanāya tāni mālādhāraṇādīni mahājano karoti, tato paṭiviratoti attho.

**Uccāsayaṇaṃ** vuccati pamāṇātikantaṃ. **Mahāsayaṇaṃ** akappiyattharaṇaṃ. Tato paṭiviratoti attho. **Jātarūpanti** suvaṇṇaṃ. **Rajatanti** kahāpaṇo lohamāsako jatumāsaṃ dārumāsakoti ye vohāraṃ gacchanti, tassa ubhayassapi paṭiggahaṇā paṭivirato, neva naṃ uggaṇhāti, na uggaṇhāpeti, na upanikkhittaṃ sādīyatīti attho. **Āmakadhañṇapaṭiggahaṇāti** sālīvīhiyavagodhūmakaṅguvarakakudrūsakasaṅkhā-tassa sattavidhassāpi āmakadhañṇassa paṭiggahaṇā. Na kevalaṅca etesaṃ paṭiggahaṇameva, āmasanampi bhikkhūnaṃ na vaṭṭatiyeva. **Āmakamaṃsapaṭiggahaṇāti** ettha aññatra odissa anuññātā āmakamaṃsamacchānaṃ paṭiggahaṇameva bhikkhūnaṃ na vaṭṭati, no āmasanaṃ.

**Itthikumārikapaṭiggahaṇāti** ettha **itthīti** purisantaragatā, itarā **kumārikā** nāma. Tāsaṃ paṭiggahaṇampi āmasanampi akappiyameva. **Dāsidāspaṭiggahaṇāti** ettha dāsidāsavaseneva tesāṃ paṭiggahaṇaṃ na vaṭṭati, “kappiyakāraṃ dammi, āramikaṃ dammī”ti evaṃ vutte pana vaṭṭati. **Ajelakādīsu** khettavatthupariyosānesu (2.0114) kappiyākappiyanayo vinayavasena upaparikkhitabbo. Tattha **khettaṃ** nāma yasmim̐ pubbaṇṇaṃ ruhati. **Vatthu** nāma yasmim̐ aparāṇṇaṃ ruhati. Yattha vā ubhayampi ruhati, taṃ **khettaṃ**. Tadatthāya akatabhūmibhāgo **vatthu**. Khettavatthusīsenā cettha vāpitaḷākādīnīpi saṅgahitāneva. **Dūteyyaṃ** vuccati dūtakammaṃ, gihīnaṃ paṇṇaṃ vā sāsanaṃ vā gahetvā tattha tattha gamanaṃ. **Pahiṇagamaṇaṃ** vuccati gharā gharaṃ pesitassa khuddakagamaṇaṃ. **Anuyogo** nāma tadubhayakaraṇaṃ, tasmā dūteyyapahiṇagamaṇānaṃ anuyogāti evamettha attho veditabbo.

**Kayavikkayāti** kayā ca vikkayā ca. **Tulākūṭā**dīsu **kūṭanti** vañcanaṃ. Tattha tulā-kūṭaṃ tāva rūpakūṭaṃ aṅgakūṭaṃ gahaṇakūṭaṃ paṭicchannakūṭanti catubbidhaṃ hoti. Tattha **rūpakūṭaṃ** nāma dve tulā sarūpā katvā gaṇhanto mahatīyā gaṇhāti, dadanto khuddikāya deti. **Aṅgakūṭaṃ** Nāma gaṇhanto pacchābhāge hatthena tulaṃ akkamati, dadanto pubbabhāge. **Gahaṇakūṭaṃ** nāma gaṇhanto mūle rajjuṃ gaṇhāti, dadanto agge. **Paṭicchannakūṭaṃ** nāma tulaṃ susiraṃ katvā anto aya-cuṇṇaṃ pakkhipitvā gaṇhanto taṃ pacchābhāge karoti, dadanto aggabhāge. **Kaṃso** vuccati suvaṇṇapāti, tāya vañcanaṃ **kaṃsakūṭaṃ**. Kathaṃ? Ekaṃ suvaṇṇapātīṃ katvā aññā dve tisso lohapātīyo suvaṇṇavaṇṇā karoti, tato janapadaṃ gantvā kiñcīdeva addhakulaṃ pavisitvā, “suvaṇṇabhājanāni kiṇṭhā”ti vatvā

agghe pucchite samagghataram dātukāmā honti. Tato tehi “katham imesam suvaṇṇabhāvo jānitabbo”ti vutte- “vīmaṃsitvā gaṇhathā”ti suvaṇṇapātim pāsāṇe ghaṃsitvā sabbā pātiyo datvā gacchati.

**Mānakūtaṃ** nāma hadayabhedasikhābhedarajjubhedavasena tividhaṃ hoti. Tattha **hadayabhedo** sappitelādiminānakāle labbhati. Tāni hi gaṇhanto heṭṭhā chiddena mānena, “saṇikaṃ āsiñcā”ti vatvā antobhājane bahum paggharāpetvā gaṇhāti; dadanto chiddaṃ pidhāya sīghaṃ pūretvā deti. **Sikhābhedo** tilataṇḍulādiminānakāle labbhati. Tāni hi gaṇhanto saṇikaṃ sikhāṃ ussāpetvā gaṇhāti, dadanto vegena pūretvā sikhāṃ chindanto deti. **Rajjubhedo** khettavatthuminānakāle labbhati. Lañjaṃ alabhantā hi khettaṃ amahantampi mahantaṃ katvā minanti.

**Ukkoṭanā**dīsu (2.0115) **ukkoṭananti** sāmike assāmike kātuṃ lañjaggahaṇaṃ. **Vañcananti** tehi tehi upāyehi paresaṃ vañcanaṃ. Tatridamekaṃ vatthu- eko kira luddako migañca migapotakañca gahetvā āgacchati. Tameko dhutto, “kiṃ, bho, migo agghati, kiṃ migapotako”ti āha. “Migo dve kahāpaṇe migapotako ekan”ti ca vutte kahāpaṇaṃ datvā migapotakaṃ gahetvā thokaṃ gantvā nivatto, “na me, bho, migapotakena attho, migaṃ me dehi”ti āha. Tena hi “dve kahāpaṇe dehi”ti. So āha- “nanu te, bho, mayā paṭhamaṃ eko kahāpaṇo dinno”ti. Āma dinnoti. “Imampi migapotakaṃ gaṇha, evaṃ so ca kahāpaṇo ayañca kahāpaṇagghanako migapotakoti dve kahāpaṇā bhavissantī”ti. So kāraṇaṃ vadatīti sallakkhetvā migapotakaṃ gahetvā migaṃ adāsīti.

**Nikatīti** yogavasena vā māyāvasena vā apāmaṅgaṃ pāmaṅganti, amaṇiṃ maṇinti, asuvaṇṇaṃ suvaṇṇanti katvā paṭirūpakena vañcanaṃ. **Sāciyogoti** kuṭīlayogo, etesaṃyeva ukkoṭanādīnametaṃ nāmaṃ, tasmā ukkoṭanasāciyogo vañcanasāciyogo



nikatisāciyogoti evamettha attho datṭhabbo. Keci aññaṃ dassetvā aññassa pariva-  
ttanaṃ sāciyogoti vadanti. Taṃ pana vañcaneneva saṅgahitaṃ. **Chedanādīsu**  
**chedananti** hatthacchedanādi. **Vadhoti** māraṇaṃ. **Bandho** Ti rajjubandhanādihi  
bandhanaṃ. **Viparāmosoti** himaviparāmoso gumbaviparāmosoti duvidho. Yaṃ  
himapātasamaye himena paṭicchannā hutvā maggapaṭipannaṃ janaṃ musanti,  
ayaṃ **himaviparāmoso**. Yaṃ gumbādīhi paṭicchannā musanti, ayaṃ **gumbaviparā-**  
**moso**. **Ālopo** vuccati gāmanigamādīnaṃ vilopakaraṇaṃ. **Sahasākāro**ti sāhasikaki-  
riyā, gehaṃ pavisitvā manussānaṃ ure satthaṃ ṭhapetvā icchitabhaṇḍaggahaṇaṃ.  
Evametasmā chedana ...pe... sahasākārā paṭivirato hoti.

**294. So santuṭṭho hotīti** svāyaṃ bhikkhu heṭṭhā vuttena catūsu paccayesu  
dvādasavidhena itarītarapaccayasantoseṇa samannāgato hoti. Iminā pana dvāda-  
savidhena itarītarapaccayasantoseṇa samannāgatassa bhikkhuno aṭṭha pari-  
kkhārā vaṭṭanti tīṇi cīvarāni patto dantakaṭṭhacchedanavāsi ekā sūci kāyaba-  
ndhanaṃ parissāvananti. Vuttampi cetaṃ-

“Ticīvarañca (2.0116) patto ca, vāsi sūci ca bandhanaṃ;  
parissāvanena aṭṭhete, yuttayogassa bhikkhuno”ti.

Te sabbe pi kāyaparihārikāpi honti kucchiparihārikāpi. Kathaṃ? Ticīvaraṃ tāva  
nivāsetvā pārūpitvā ca vicaraṇakāle kāyaṃ pariharati poseṭīti **kāyaparihārikaṃ**  
hoti, cīvarakaṇṇena udakaṃ parissāvetvā pivanakāle khāditabbaphalāphalagga-  
haṇakāle ca kucchiṃ pariharati poseṭīti **kucchiparihārikaṃ** hoti. Pattopi tena  
udakaṃ uddharitvā nahānakāle kuṭiparibhaṇḍakaraṇakāle ca kāyaparihāriko hoti,  
āhāraṃ gahetvā bhuñjanakāle kucchiparihāriko hoti. Vāsipi tāya dantakaṭṭhacche-  
danakāle mañcapīṭhānaṃ aṅgapādacīvarakuṭidaṇḍakasajjanakāle ca kāyaparihā-  
rikā hoti, ucchucchedanāṅḷikerādītaccanakāle kucchiparihārikā. Sūcipi cīvarasi-  
bbanakāle kāyaparihārikā hoti, pūvaṃ vā phalaṃ vā vijjhivā khādanakāle kucchi-  
parihārikā. Kāyabandhanaṃ bandhitvā vicaraṇakāle kāyaparihārikaṃ, ucchu-ā-  
dīni bandhitvā gahaṇakāle kucchiparihārikaṃ. Parissāvanaṃ tena udakaṃ pari-  
ssāvetvā nahānakāle, senāsanaparibhaṇḍakaraṇakāle ca kāyaparihārikaṃ, pānī-  
yaparissāvanakāle teneva tilataṇḍulaputhukādīni gahetvā khādanakāle ca kucchi-  
parihārikaṃ. Ayaṃ tāva aṭṭhaparikkhārikassa parikkhāramattā.

Navaparikkhārikassa pana seyyaṃ pavisantassa tatraṭṭhakapaccattharaṇaṃ vā  
kuñcīkā vā vaṭṭati. Dasaparikkhārikassa nisīdanaṃ vā cammakhaṇḍaṃ vā vaṭṭati.  
Ekādasaparikkhārikassa kattarayaṭṭhi vā telanāḷikā vā vaṭṭati. Dvādasaparikkhāri-  
kassa chattaṃ vā upāhanā vā vaṭṭati. Etesu ca aṭṭhaparikkhārikova santuṭṭho,  
itare asantuṭṭhā, mahicchā mahābhārāti na vattabbā. Etepi hi appicchāva santu-  
ṭṭhāva subharāva sallahukavuttinova. Bhagavā pana nayimaṃ suttaṃ tesāṃ  
vasena kathesi, aṭṭhaparikkhārikassa vasena kathesi. So hi khuddakavāsiñca  
sūciñca parissāvane pakkhipitvā pattassa anto ṭhapetvā pattaṃ aṃsakūṭe  
laggetvā ticīvaraṃ kāyapaṭibaddhaṃ katvā yenicchakaṃ sukhaṃ pakkamati. Paṭi-  
nivattetvā gahetabbaṃ nāmassa na hoti, itī (2.0117) imassa bhikkhuno sallahuka-  
vuttitaṃ dassento bhagavā, **santuṭṭho hoti kāyaparihārikena cīvarenā**ti-ādimāha.

Tattha **kāyaparihārikenā** Ti kāyapariharaṇamattakena. **Kucchiparihārikenā**ti

kucchipariharaṇamattakena. **Samādāyeva pakkamatīti** taṃ aṭṭhaparikkhāramattakam sabbam gahetvā kāyapaṭibaddham katvāva gacchati, “mama vihāro pariveṇam upaṭṭhāko” tissa saṅgo vā baddho vā na hoti, so jiyā mutto saro viya, yūthā apakkanto mattahatthī viya icchiticchitam senāsanam vanasaṇḍam rukkhamūlam vanapabbhāram paribhuñjanto ekova tiṭṭhati, ekova nisīdati, sabbiriyāpathesu ekova adutiyo.

“Cātuddiso appaṭigho ca hoti,  
santussamāno itarītarena;  
parissayānam sahitā achambhī,  
eko care khaggavisāṇakappo” ti. (su. ni. 42);

Evam vaṇṇitam khaggavisāṇakappatam āpajjati.

Idāni tamattham upamāya sādiento **seyyathāpīti**-ādimāha. Tattha **pakkhī saku-**  
**ṇoti** pakkhayutto sakuṇo. **Ḍetīti** uppatati. Ayaṃ panettha saṅkhepattho- sakuṇā  
nāma “asukasmim padese rukkho paripakkaphalo” ti ñatvā nānādisāhi āgantvā  
nakhapakkhatuṇḍādīhi tassa phalāni vijjhantā vidhunantā khādanti. “Idam ajjata-  
nāya idam svātanāya bhavissati” ti nesaṃ na hoti. Phale pana khīṇe neva  
rukkhassa ārakkham ṭhapenti, na tattha pattam vā nakham vā tuṇḍam vā ṭhapenti,  
atha kho tasmim rukkhe anapekkho hutvā yo yaṃ disābhāgam icchati, so tena  
sapattabhārova- uppativā gacchati. Evameva ayaṃ bhikkhu nissaṅgo nirapekkho-  
yeva pakkamati. Tena vuttam “samādāyeva pakkamati” ti. **Ariyenāti** niddosena.  
**Ajjhattanti** sake attabhāve. **Anavajjasukhanti** niddosasukham.

**295. So cakkhunā rūpam disvāti** so iminā ariyena sīlakkhandhena samannā-  
gato bhikkhu cakkhuvīññāṇena rūpam passitvāti attho. Sesapadesu yaṃ  
vattabham siyā, taṃ sabbam visuddhimagge vuttam. **Abyāsekasukhanti** kilesehi (2.0  
anavasittasukham, avikiṇṇasukhanti vuttam. Indriyasamvarasukhāñhi diṭṭhādīsu  
diṭṭhamattādivasena pavattatāya avikiṇṇam hoti. **So abhikkante paṭikkanteti** so  
manacchaṭṭhānam indriyānam samvarena samannāgato bhikkhu imesu abhikka-  
ntapaṭikkantādīsu sattasu ṭhānesu satisampajaññavasena sampajānakārī hoti.  
Tattha yaṃ vattabham siyā, taṃ satipaṭṭhāne vuttameva.

**296. So iminā cāti**-ādinā kiṃ dasseti? Araññavāsassa paccayasampattim  
dasseti. Yassa hi ime cattāro paccayā natthi, tassa araññavāso na ijhati, tiracchā-  
nagatehi vā vanacarakehi vā saddhim vattabbatam āpajjati, araññe adhivatthā  
devatā, “kiṃ evarūpassa pāpabhikkhuno araññavāsenā” ti bheravasaddam  
sāventi, hatthehi sīsam paharivā palāyanākāram karonti. “Asuko bhikkhu  
araññam pavisitvā idañcīdañca pāpakammaṃ akāsī” ti ayaso pattharati. Yassa  
panete cattāro paccayā atthi, tassa araññavāso ijhati, so hi attano sīlam paccave-  
kkhanto kiñci kālakam vā tilakam vā apassanto pītim uppādetvā taṃ khayato  
vayato sammasant ariyabhūmim okkamati, araññe adhivatthā devatā attamanā  
vaṇṇam bhāsanti, itissa udake pakkhattatelabindu viya yaso vitthāriko hoti.

Tattha **vivittanti** suññam appasaddam, appanigghosanti attho. Etadeva hi  
sandhāya vibhaṅge, “vivittanti santike cepi senāsanam hoti, tañca anākiṇṇam  
gahaṭṭhehi pabbajitehi, tena taṃ vivittan” ti (vibha. 526) vuttam. Seti ceva āsati ca

etthāti **senāsanam**, mañcapīṭhādīnametaṃ adhivacanaṃ. Tenāha- “senāsananti mañcopi senāsanam, piṭhampi bhisipi bimbohanampi, vihāropi aḍḍhayogopi, pāsā-dopi, hammiyampi, guhāpi, aṭṭopi, mālopi, leṇampi, veḷugumbopi, rukkhāmūlapi, maṇḍapopi senāsanam, yattha vā pana bhikkhū paṭikkamanti, sabbametaṃ senā-sanam”ti. Apica “vihāro aḍḍhayogo pāsādo hammiyaṃ guhā”ti idaṃ vihārasenā-sanam nāma. “Mañco piṭham, bhisī bimbohanam”ti idaṃ mañcapīṭhasenāsanam nāma. “Cimilikā, cammakhaṇḍo, tiṇasanthāro, paṇṇasanthāro”ti idaṃ santhatase-nāsanam nāma. “Yattha (2.0119) vā pana bhikkhū paṭikkamanti”ti idaṃ okāsase-nāsanam nāmāti evaṃ catubbidham senāsanam hoti, taṃ sabbampi senāsana-ggaḥaṇena gahitameva. Imassa pana sakuṇasadisassa cātuddisassa bhikkhuno anucchavikaṃ dassento **araññaṃ rukkhāmūlanti**-ādimāha.

Tattha **araññanti** “nikkhamitvā bahi indakhilā, sabbametaṃ araññaṃ”ti idaṃ bhikkhunīnaṃ vasena āgataṃ araññaṃ. “Āraññaṃ nāma senāsanam pañca-dhanusatikaṃ pacchiman”ti (pārā. 654) idaṃ pana imassa bhikkhuno anurūpaṃ, tassa lakkhaṇaṃ visuddhimagge dhutaṅganiddese vuttaṃ. **Rukkhāmūlanti** yaṃkiñci sandacchāyaṃ vivittaṃ rakkhamūlaṃ. **Pabbatanti** selaṃ. Tattha hi uda-kasoṇḍisu udakakiccaṃ katvā sītāya rukkhacchāyāya nisinnassa nānādisāsu khāyamānāsu sītena vātena vijiyamānassa cittaṃ ekaggaṃ hoti. **Kandaranti** kaṃ vuccati udakaṃ, tena dāritaṃ, udakena bhinnaṃ pabbatappadesaṃ, yaṃ nadītu-mbanti nadīkuñjanti vadanti. Tattha hi rajatapaṭṭasadisā vālikā honti, matthake maṇivīṭānaṃ viya vanagahanaṃ, maṇikkhandhasadisā udakaṃ sandati. Eva-rūpaṃ kandaraṃ oruyha pānīyaṃ pivitvā gattāni sītāni katvā vālikaṃ ussāpetvā paṃsukūlacīvaraṃ paññāpetvā nisinnassa samaṇadhammaṃ karoto cittaṃ ekaggaṃ hoti. **Giriguhanti** dvinnaṃ pabbatānaṃ antarā, ekasmīmyeva vā umaṅga-sadisā mahāvīvaraṃ. Susānalakkhaṇaṃ visuddhimagge vuttaṃ. **Vanapatthanti** atikkamitvā manussānaṃ upacāraṭṭhānaṃ, yattha na kasanti na vapanti. Tene-vāha- “vanapatthanti dūrānametaṃ senāsanānaṃ adhivacanaṃ”ti-ādi (vibha. 531). **Abbhokāsanti** acchannaṃ, ākaṅkhamāno panettha cīvarakuṭiṃ katvā vasati. **Palālapuñjanti** palālarāsiṃ. Mahāpalālapuñjato hi palālaṃ nikkadḍhitvā pabbhāraleṇasa-dise ālaye karonti, gacchagumbādīnampi upari palālaṃ pakkhipitvā heṭṭhā nisinnā samaṇadhammaṃ karonti, taṃ sandhāyetaṃ vuttaṃ.

**Pacchābhattanti** bhattassa pacchato. **Piṇḍapātaṭikkantoti** piṇḍapātapariyesa-nato paṭikkanto. **Pallaṅkanti** samantato ūrubaddhāsanam. **Ābhujitvā**ti bandhitvā. **Ujumaṃ kāyamaṃ paṇidhāyāti** uparimaṃ sarīraṃ ujumaṃ ṭhapetvā aṭṭhārasa (2.0120) piṭṭhikaṇṭake koṭiyā koṭiṃ paṭipādetvā. Evañhi nisinnassa cammamaṃsanahā-rūni na paṇamanti. Athassa yā tesā paṇamanapaccayā khaṇe khaṇe vedanā uppajjeyyumaṃ, tā na uppajjanti. Tāsu anuppajjamānāsu cittaṃ ekaggaṃ hoti, kammaṭṭhānaṃ na paripatati, vuddhiṃ phātiṃ upagacchati. **Parimukhaṃ satimaṃ upa-ṭṭhapetvāti** kammaṭṭhānābhimukhaṃ satimaṃ ṭhapayitvā, mukhasamīpe vā katvāti attho. Teneva vibhaṅge vuttaṃ- “ayamaṃ sati upaṭṭhitā hoti sūpaṭṭhitā nāsikagge vā mukhanimitte vā, tena vuccati parimukhaṃ satimaṃ upaṭṭhapetvā”ti (vibha. 537). Atha vā “**parīti** pariggahaṭṭho, **mukhanti** niyyānattho, **satīti** upaṭṭhānattho, tena

vuccati parimukhaṃ satin”ti (paṭi. ma. 1.164) evaṃ paṭisambhidāyaṃ vuttanayena-  
pettha attho daṭṭhabbo. Tatrāyaṃ saṅkhepo “pariggahitaniyyānasatiṃ katvā”ti.

**Abhijjhaṃ loketi** ettha lujjanapalujjanaṭṭhena pañcupādānakkhandhā loko,  
tasmā pañcasu upādānakkhandhesu rāgaṃ pahāya kāmaccandaṃ vikkhambhe-  
tvāti ayamettha attho. **Vigatābhijjhenāti** vikkhambhanavasena pahīnattā vigatābhi-  
jjhena, na cakkhuvīññāṇasadisenāti attho. **Abhijjhāya cittaṃ parisodhetīti** abhi-  
jjhāto cittaṃ parimoceti. Yathā naṃ sā muñcati ceva, muñcitvā ca na puna  
gaṇhāti, evaṃ karotīti attho. **Byāpādapadosaṃ pahāyā** Ti-ādīsupi eseva nayo.  
Byāpajjati iminā cittaṃ pūtikammāsādayo viya purimapakatiṃ pajahatīti **byāpādo**.  
Vikārāpattiyā padussati, paraṃ vā padūseti vināsetīti **padoso**. Ubhayameṭaṃ  
kodhassevādhivacanaṃ. **Thinam** cittagelaññaṃ. **Middham** cetasikagelaññaṃ.  
Thinañca middhañca **thinamiddham**. **Ālokasaññīti** rattimpi divā diṭṭha-ālokasaññā-  
nanaśamatthatāya vigatanīvaraṇāya parisuddhāya saññāya samannāgato. **Sato**  
**sampajānoti** satiyā ca ñāṇena ca samannāgato. Idaṃ ubhayaṃ ālokasaññāya  
upakārattā vuttaṃ. Uddhaccañca kukkucçañca **uddhaccakukkucçaṃ**. **Tiṇṇaviciki-**  
**cchoti** vicikicçaṃ taritvā atikkamitvā ṭhito. “Kathamidaṃ kathamidan”ti evaṃ  
nappavattatīti **akathaṃkathī**. **Kusalesu dhammesūti** anavajjesu dhammesu. “Ime  
nu kho kusalā, kathamime kusalā”ti evaṃ na vicikicchatī na kaṅkhatīti attho. Aya-  
mettha saṅkhepo, imesu pana nīvaraṇesu (2.0121) vacanattalakkhaṇādibhedato  
yaṃ vattabbaṃ siyā, taṃ sabbaṃ visuddhimagge vuttaṃ.

**297. Paññāya dubbalīkaraṇeti** ime pañca

nīvaraṇā uppajjamānā anuppannāya lokiyalokuttarāya paññāya uppajjituṃ na denti, uppannā api aṭṭha samāpattiyo pañca vā abhiññā ucchinditvā pātentī; tasmā “paññāya dubbalīkaraṇā”ti vuccanti. **Tathāgatapadam itipīti** idampi tathāgatassa ñāṇapadam ñāṇavaḷaṅgaṃ ñāṇena akkantaṭṭhānanti vuccati. **Tathāgatanisevī-tanti** tathāgatassa ñāṇaphāsukāya nighaṃsitaṭṭhānaṃ. **Tathāgatārañjīti** tathā-gatassa ñāṇadāṭṭhāya ārañjitaṭṭhānaṃ.

**299. Yathābhūtaṃ pajānātīti** yathāsabhāvaṃ pajānāti. **Natveva tāva ariyasāvako niṭṭhaṃ gato hotīti** imā jhānābhiññā bāhirakehipi sādharmaṇāti na tāva niṭṭhaṃ gato hoti. Maggakkhaṇepi ariyosita-kiccatāya na tāva niṭṭhaṃ gato hoti. **Apica kho niṭṭhaṃ gacchatīti** apica kho pana maggakkhaṇe mahāhatthiṃ passanto nāgava-niko viya sammāsambuddho bhagavāti iminā ākārena tīsu ratanesu niṭṭhaṃ gacchati. **Niṭṭhaṃ gato hotīti** evaṃ maggakkhaṇe niṭṭhaṃ gacchanto arahattapha-lakkhaṇe ariyositasabbakiccatāya sabbākārena tīsu ratanesu niṭṭhaṃ gato hoti. Sesam uttānatthamevāti.

Papañcasūdanīyā majjhimanīkāyaṭṭhakathāya

Cūḷahatthipadopamasuttavaṇṇanā niṭṭhitā.

## 8. Mahāhatthipadopamasuttavaṇṇanā

**300. Evaṃ me sutanti** mahāhatthipadopamasuttaṃ. Tattha jaṅgalānanti patha-vītalacārīnaṃ. **Pāṇānanti** sapādakapāṇānaṃ. **Padajātānīti** padāni. **Samodhānaṃ gacchantīti** odhānaṃ pakkhepaṃ gacchanti. **Aggamakkhāyatīti** seṭṭhaṃ akkhā-yati. **Yadidaṃ mahantattenāti** mahantabhāvena aggamaṃ akkhāyati, na guṇavase-nāti attho. **Ye keci kusalā dhammāti** ye keci lokiyā (2.0122) vā lokuttarā vā kusalā dhammā. **Saṅgamaṃ gacchantīti** ettha catubbidho saṅgaho- sajjātisaṅgaho, sañjā-tisaṅgaho, kiriyasaṅgaho, gaṇanasaṅgahoti. Tattha “sabbe khattiyā āgacchantu sabbe brāhmaṇā”ti evaṃ samānajātivāsena saṅgaho **sajjātisaṅgaho** nāma. “Sabbe kosalakā sabbe māgadhakā”ti evaṃ sañjātidesavasena saṅgaho **sañjātisa-ṅgaho** nāma. “Sabbe rathikā sabbe dhanuggahā”ti evaṃ kiriyavasena saṅgaho **kiriyasaṅgaho** Nāma. “Cakkhāyatanaṃ katamakkhandhagaṇanaṃ gacchatīti? Cakkhāyatanaṃ rūpakkhandhagaṇanaṃ gacchati. Hañci cakkhāyatanaṃ rūpa-kkhandhagaṇanaṃ gacchati, tena vata re vattabbe cakkhāyatanaṃ rūpakkha-ndhena saṅgahitaṃ”ti (kathā. 471), ayaṃ **gaṇanasaṅgaho** nāma. Imasmimpi ṭṭhāne ayameva adhippeto.

Nanu ca “catunnaṃ ariyasaccānaṃ kati kusalā kati akusalā kati abyākatāti pañhassa vissajjane samudayasaccaṃ akusalaṃ, maggasaccaṃ kusalaṃ, niro-dhasaccaṃ abyākataṃ, dukkhasaccaṃ siyā kusalaṃ, siyā akusalaṃ, siyā abyāka-taṃ”ti (vibha. 216-217) āgatattā catubbūmakampi kusalaṃ diyaḍḍhameva saccam

bhajati. Atha kasmā mahāthero catūsu ariyasaccesu gaṇanam gacchatī āhāti? Saccānam antogadhattā. Yathā hi “sādhikamidaṃ, bhikkhave, diyaḍḍhasikkhāpadasataṃ anvaddhamāsaṃ uddesaṃ āgacchati, yattha attakāmā kulaputtā sikkhanti. Tisso imā, bhikkhave, sikkhā adhisīlasikkhā adhiccittasikkhā adhipaññā-sikkhā”ti (a. ni. 3.88) ettha sādhikamidaṃ diyaḍḍhasikkhāpadasataṃ ekā adhisīlasikkhāva hoti, taṃ sikkhantopi tisso sikkhā sikkhatīti dassito, sikkhānam antogadhattā. Yathā ca ekassa hatthipadassa catūsu koṭṭhāsesu ekasmiṃ koṭṭhāse otiṇṇānipi dvīsu tīsu catūsu koṭṭhāsesu otiṇṇānipi siṅgālasasamigādīnam pādāni hatthipade samodhānam gatāneva honti. Hatthipadato amuccitvā tasseva antogadhattā. Evameva ekasmiṃpi dvīsupi tīsupi catūsipi saccesu gaṇanam gatā dhammā catūsu saccesu gaṇanam gatāva honti; saccānam antogadhattāti diyaḍḍhasaccagaṇanam gatepi kusaladhamme “sabbe te catūsu ariyasaccesu saṅgahaṃ gacchantī”ti āha. “Dukkhe ariyasacce”ti-ādīsu uddesapadesu ceva jātipi dukkhāti-ādīsu niddesapadesu ca yaṃ (2.0123) vattabbaṃ, taṃ visuddhimagge vuttameva. Kevalaṃ panettha desanānukkamova veditabbo.

**301.** Yathā hi cheko vilīvakāro sujātaṃ veḷuṃ labhitvā catudhā chetvā tato tayo koṭṭhāse ṭhapetvā ekaṃ gaṇhitvā pañcadhā bhindeyya, tatopi cattāro ṭhapetvā ekaṃ gaṇhitvā phāleto pañca pesiyo kareyya, tato catasso ṭhapetvā ekaṃ gaṇhitvā kucchibhāgaṃ piṭṭhibhāganti dvidhā phāletvā piṭṭhibhāgaṃ ṭhapetvā kucchibhāgaṃ ādāya tato samuggabījanitālavaṇṭādinānappakāraṃ veḷuvikatim kareyya, so piṭṭhibhāgañca itarā ca catasso pesiyo itare ca cattāro koṭṭhāse itare ca tayo koṭṭhāse kammāya na upanessatīti na vattabbo. Ekappahārena pana upanetuṃ na sakkā, anupubbena upanessati. Evameva ayaṃ mahātheropi vilīvakāro sujātaṃ veḷuṃ labhitvā cattāro koṭṭhāse viya, imaṃ mahantaṃ suttantaṃ ārabhitvā catu-ariyasaccavasena mātikaṃ ṭhapesi. Vilīvakārassa tayo koṭṭhāse ṭhapetvā ekaṃ gahetvā tassa pañcadhā karaṇaṃ viya therassa tīṇi ariyasaccāni ṭhapetvā ekaṃ dukkhasaccaṃ gahetvā bhājentassa khandhavasena pañcadhā karaṇaṃ. Tato yathā so vilīvakāro cattāro koṭṭhāse ṭhapetvā ekaṃ bhāgaṃ gahetvā pañcadhā phālesi, evaṃ thero cattāro arūpakkhandhe ṭhapetvā rūpakkhandhaṃ vibhajanto **cattāri ca mahābhūtāni catunnañca mahābhūtānaṃ upādāya rūpanti** pañcadhā akāsi. Tato yathā so vilīvakāro catasso pesiyo ṭhapetvā ekaṃ gahetvā kucchibhāgaṃ piṭṭhibhāganti dvidhā phālesi, evaṃ thero upādāya rūpañca tisso ca dhātuyo ṭhapetvā ekaṃ pathavīdhātuṃ vibhajanto ajjhattikabāhiravasena dvidhā dassesi. Yathā so vilīvakāro piṭṭhibhāgaṃ ṭhapetvā kucchibhāgaṃ ādāya nānappakāraṃ vilīvavikatim akāsi, evaṃ thero bāhiraṃ pathavīdhātuṃ ṭhapetvā ajjhattikaṃ pathavīdhātuṃ vīsatiyā ākārehi vibhajitvā dassetuṃ **katamā cāvuso, ajjhattikā pathavīdhātūti-ādīmāha.**

Yathā pana vilīvakāro piṭṭhibhāgañca itarā ca cattasso pesiyo itare ca cattāro koṭṭhāse itare ca tayo koṭṭhāse anupubbena (2.0124) kammāya upanessati, na hi sakkā ekappahārena upanetuṃ, evaṃ theropi bāhirañca pathavīdhātuṃ itarā ca tisso dhātuyo upādārūpañca itare ca cattāro arūpino khandhe itarāni ca tīṇi ariyasaccāni anupubbena vibhajitvā dassessati, na hi sakkā ekappahārena dassetuṃ.

Apica rājaputtūpamāyapi ayaṃ kamo vibhāvetabbo-

Eko kira mahārājā, tassa parosahassaṃ puttā. So tesam piḷandhanapari-kkhāraṃ catūsu peḷāsu ṭhapetvā jeṭṭhaputtassa appesi- “idaṃ te, tāta, bhātikānaṃ piḷandhanabhaṇḍaṃ tathārūpe chaṇe sampatte piḷandhanaṃ no dehīti yācāntānaṃ dadeyyāsī”ti. So “sādhu devā”ti sāragabbhe paṭisāmesi, tathārūpe chaṇa-divase rājaputtā rañño santikaṃ gantvā “piḷandhanaṃ no, tāta, detha, nakkhattaṃ kiḷissāmā”ti āhaṃsu. Tātā, jeṭṭhabhātikassa vo hatthe mayā piḷandhanaṃ ṭhapitaṃ, taṃ āharāpetvā piḷandhathāti. Te sādhuṭi paṭissuṇitvā tassa santikaṃ gantvā, “tumhākaṃ kira no hatthe piḷandhanabhaṇḍaṃ, taṃ dethā”ti āhaṃsu. So evaṃ karissāmīti gabbhaṃ vivarivā, catasso peḷāyo nīharitvā tisso ṭhapetvā ekaṃ vivarivā, tato pañca samugge nīharitvā cattāro ṭhapetvā ekaṃ vivarivā, tato pañcasu karaṇḍesu nīharitesu cattāro ṭhapetvā ekaṃ vivarivā pidhānaṃ passe ṭhapetvā tato hatthūpagapādūpagādīni nānappakārāni piḷandhanāni nīharitvā adāsī. So kiñcāpi itarehi catūhi karaṇḍehi itarehi catūhi samuggehi itarāhi tīhi peḷāhi na tāva bhājetvā deti, anupubbena pana dassati, na hi sakkā ekappahārena dātuṃ.

Tattha mahārājā viya bhagavā daṭṭhabbo. Vuttampi cetaṃ- “rājāhamasmi selāti bhagavā, dhammarājā anuttaro”ti (su. ni. 559). Jeṭṭhaputto viya sārīputta-tthero, vuttampi cetaṃ- “yaṃ kho taṃ, bhikkhave, sammā vadamāno vadeyya, ‘bhagavato putto oraso mukhato jāto dhammajo dhammanimitto dhammadāyādo, no āmisadāyādo’ti sārīputtameva taṃ sammā vadamāno vadeyya, bhagavato putto ...pe... no āmisadāyādo”ti (ma. ni. 3.97). Parosahassarājaputtā viya bhikkhusaṅgho daṭṭhabbo. Vuttampi cetaṃ-

“Parosahassaṃ (2.0125) bhikkhūnaṃ, sugataṃ payirupāsati;

desentaṃ virajaṃ dhammaṃ, nibbānaṃ akutobhayan”ti. (saṃ. ni. 1.216);

Rañño tesam puttānaṃ piḷandhanaṃ catūsu peḷāsu pakkhipitvā jeṭṭhaputtassa hatthe ṭhapitakālo viya bhagavato dhammasenāpatissa hatthe catusaccappakāsānāya ṭhapitakālo, tenevāha- “sārīputto, bhikkhave, pahoti cattāri ariyasaccāni vitthārena ācikkhituṃ desetuṃ paññāpetuṃ paṭṭhapetuṃ vivarituṃ vibhajituṃ uttānīkātun”ti (ma. ni. 3.371). Tathārūpe chaṇe tesam rājaputtānaṃ taṃ rājānaṃ upasaṅkamitvā piḷandhanaṃ yācanakālo viya bhikkhusaṅghassa vassūpanāyikasamaye āgantvā dhammadesanāya yācitakālo. Upakaṭṭhāya kira vassūpanāyikāya idaṃ suttaṃ desitaṃ. Rañño, “tātā, jeṭṭhabhātikassa vo hatthe mayā piḷandhanaṃ ṭhapitaṃ taṃ āharāpetvā piḷandhathā”ti vuttakālo viya sambuddhenāpi, “sevetha, bhikkhave, sārīputtamoggallāne, bhajatha, bhikkhave, sārīputtamoggallāne. Paṇḍitā bhikkhū anuggāhakā sabrahmacārīnaṃ”ti evaṃ dhammasenāpatino santike bhikkhūnaṃ pesitakālo.

Rājaputtehi rañño kathaṃ sutvā jeṭṭhabhātikassa santikaṃ gantvā piḷandhanaṃ yācitakālo viya bhikkhūhi satthukathaṃ sutvā dhammasenāpatiṃ upasaṅkamma dhammadesanaṃ āyācitakālo. Jeṭṭhabhātikassa gabbhaṃ vivarivā catasso peḷāyo nīharitvā ṭhapanāṃ viya dhammasenāpatissa imaṃ suttantaṃ ārabhitvā catunnaṃ ariyasaccānaṃ vasena mātīkāya ṭhapanāṃ. Tisso peḷāyo ṭhapetvā ekaṃ vivarivā tato pañcasamugganīharaṇaṃ viya tīni ariyasaccāni ṭhapetvā

dukkhaṃ ariyasaccaṃ vibhajantassa pañcakkhandhadassanaṃ. Cattāro samugge ṭhapetvā ekaṃ vivarivā tato pañcakaraṇḍaniharaṇaṃ viya cattāro arūpakkhandhe ṭhapetvā ekaṃ rūpakkhandhaṃ vibhajantassa catumahābhūta-upādārūpavasena pañcakoṭṭhāsadassanaṃ.

**302.** Cattāro karaṇḍe ṭhapetvā ekaṃ vivarivā pidhānaṃ passe ṭhapetvā hatthūpagapādūpagādipiḷandhanadānaṃ viya tīṇi mahābhūtāni upādārūpañca ṭhapetvā ekaṃ pathavīdhātuṃ vibhajantassa bāhiraṃ tāva pidhānaṃ viya ṭhapetvā ajjhattikāya (2.0126) pathavīdhātuyā nānāsabhāvato vīsatiyā ākārehi dassanatthaṃ “katamā cāvuso ajjhattikā pathavīdhātū”ti-ādivacanaṃ.

Tassa pana rājaputtassa tehi catūhi karaṇḍehi catūhi samuggehi tīhi ca peḷāhi pacchā anupubbena nīharitvā piḷandhanadānaṃ viya therassāpi itaresaṅca tiṇṇaṃ mahābhūtānaṃ upādārūpānañca catunnaṃ arūpakkhandhānañca tiṇṇaṃ ariyasaccānañca pacchā anupubbena bhājetvā dassanaṃ veditabbaṃ. Yaṃ panetaṃ “katamā cāvuso, ajjhattikā pathavīdhātū”ti-ādi vuttaṃ. Tattha **ajjhattaṃ pacca-****ttanti** ubhayampetaṃ niyakādhivacanameva. **Kakkhaḷanti** thaddhaṃ. **Kharigatanti** pharusam. **Upādinanti** na kammamuṭṭhānameva, avisesena pana sarīraṭṭhaka-ssetaṃ gahaṇaṃ. Sarīraṭṭhakaṅhi upādinnaṃ vā hotu, anupādinnaṃ vā, ādinnagahitaparāmaṭṭhavasena sabbaṃ upādinnameva nāma. Seyyathidaṃ- kesā lomā ...pe... udariyaṃ karīsanti idaṃ dhātukammaṭṭhānikassa kulaputtassa ajjhattika-pathavīdhātuvasena tāva kammaṭṭhānaṃ vibhattaṃ. Ettha pana manasikāraṃ ārabhitvā vipassanaṃ vaḍḍhetvā arahattaṃ gahetukāmena yaṃ kātabbaṃ, taṃ sabbaṃ visuddhimagge vitthāritameva. Matthaluṅgaṃ pana na idha pāḷi-āruḷhaṃ. Tampi āharitvā, visuddhimagge vuttanayeneva vaṇṇasaṅṭhānādivasena vavatthapetvā, “ayampi acetanā abyākatā suññā thaddhā pathavīdhātu evā”ti manasi kātabbaṃ. **Yaṃ vā panaññampī**ti idaṃ itaresu tīsu koṭṭhāsesu anugatāya pathavīdhātuyā gahaṇatthaṃ vuttaṃ. **Yā ceva kho pana ajjhattikā pathavīdhātū**ti yā ca ayaṃ vuttappakārā ajjhattikā pathavīdhātu. **Yā ca bāhirāti** yā ca vibhaṅge, “ayo lohaṃ tipu sīsan”ti-ādinā (vibha. 173) nayena āgatā bāhirā pathavīdhātu.

Ettāvatā therena ajjhattikā pathavīdhātu nānāsabhāvato vīsatiyā ākārehi vitthārena dassitā, bāhirā saṅkhepena. Kasmā? Yasmiṅhi ṭhāne sattānaṃ ālayo nikanti patthanā pariyuṭṭhānaṃ gahaṇaṃ parāmāso balavā hoti, tattha tesam ālayādīnaṃ uddharaṇatthaṃ buddhā vā



buddhasāvakaṃ vā vitthāraḥkathāṃ kathenti. Yattha pana na balavā, tattha kattabba-kiccābhāvato saṅkhepena kathenti. Yathā hi kassako khettaṃ kasamāno yattha mūlasantānakānaṃ balavatāya naṅgalaṃ laggati, tattha goṇe ṭhapetvā paṃsuṃ viyūhitvā mūlasantānakāni chetvā chetvā (2.0127) uddharanto bahuṃ vāyāmaṃ karoti. Yattha tāni natthi, tattha balavaṃ payogaṃ katvā goṇe piṭṭhiyaṃ pahara-māno kasatiyeva, evaṃsampadamidaṃ veditabbaṃ.

**Pathavīdhātūrevesā**ti duvidhāpesā thaddhaṭṭhena kakkhaḷaṭṭhena pharusa-ṭṭhena ekalakkhaṇā pathavīdhātūyeva, āvusoti ajjhattikaṃ bāhirāya saddhiṃ yojetvā dasseti. Yasmā bāhirāya pathavīdhātūyā acetanābhāvo pākaṭo, na ajjhattikāya, tasmā sā bāhirāya saddhiṃ ekasadisā acetanāyevāti gaṇhantassa sukha-pariggaho hoti. Yathā kiṃ? Yathā dantena goṇena saddhiṃ yojito adanto katipāhameva visūkāyati vipphandati, atha na cirasseva damathaṃ upeti. Evaṃ ajjhattikāpi bāhirāya saddhiṃ ekasadisāti gaṇhantassa katipāhameva acetanābhāvo na upaṭṭhāti, atha na cirenevassā acetanābhāvo pākaṭo hoti. **Taṃ netam mamā**ti taṃ ubhayampi na etaṃ mama, na esohamasmi, na eso me attāti evaṃ yathābhūtaṃ sammappaññāya daṭṭhabbaṃ. **Yathābhūta**ti yathāsabhāvaṃ, tañhi aniccādisābhāvaṃ, tasmā aniccaṃ dukkhamanattāti evaṃ daṭṭhabbanti attho.

**Hoti kho so, āvusoti** kasmā ārabhi? Bāhira-āpodhātuvasena bāhirāya pathavīdhātūyā vināsaṃ dassetvā tato visesatarena upādinnāya sarīraṭṭhakapathavīdhātūyā vināsadassanattaṃ. **Pakuppatī**ti āposamvaṭṭavasena vaḍḍhamānā kuppati. **Antarahitā tasmim samaye bāhirā pathavīdhātu hotī**ti tasmim samaye koṭisatasahassacakkavāḷe khārodakena viliyamānā udakānugatā hutvā sabbā pabbatādivasena saṅṭhitā pathavīdhātu antarahitā hoti. Viliyitvā udakameva hoti. **Tāva mahallikāyā**ti tāva mahantāya.

Duve satasahassāni, cattāri nahutāni ca;  
ettakaṃ bahalattena, saṅkhātāyaṃ vasundharāti.-

Evaṃ bahalatteneva mahantāya, vitthārato pana koṭisatasahassacakkavāḷappa-māṇāya. **Aniccatā**ti hutvā abhāvatā. **Khayadhammatā**ti khayaṃ gamanasabhāvatā (2.0128). **Vayadhammatā**ti vayaṃ gamanasabhāvatā. **Vipariṇāmadhammatā**ti pakativijahanasabhāvatā, iti sabbehipi imehi padehi aniccalakkhaṇameva vuttaṃ. Yaṃ pana aniccaṃ, taṃ dukkhaṃ. Yaṃ dukkhaṃ, taṃ anattāti tīpi lakkhaṇāni āgatāneva honti. **Mattaṭṭhakassā**ti parittaṭṭhitikassa, tattha dvīhākārehi imassa kāyassa parittaṭṭhititā veditabbā ṭhitiparittatāya ca sarasaparittatāya ca. Ayañhi atīte cittaḥkhaṇe jīvittha, na jīvati, na jīvissati. Anāgate cittaḥkhaṇe jīvissati, na jīvati, na jīvittha. Paccuppanne cittaḥkhaṇe jīvati, na jīvittha, na jīvissatīti vuccati.

“Jīvitaṃ attabhāvo ca, sukhadukkhā ca kevalā;  
ekacittasamāyuttā, lahu so vattate khaṇo”ti.-

Idaṃ etasseva parittaṭṭhitidassanattaṃ vuttaṃ. Evaṃ **ṭhitiparittatāya** parittaṭṭhititā veditabbā.

Assāsapassāsūpanibaddhādibhāvena panassa **sarasaparittatā** veditabbā. Sattānañhi assāsūpanibaddhaṃ jīvitaṃ, passāsūpanibaddhaṃ jīvitaṃ, assāsapa-

ssāsūpanibaddhaṃ jīvitam, mahābhūtūpanibaddhaṃ jīvitam, kabalīkārāhārūpanibaddhaṃ jīvitam, viññāṇūpanibaddhaṃ jīvanti visuddhimagge vitthāritam.

**Taṇhupādinnassāti** taṇhāya ādinnagahitaparāmaṭṭhassa **ahanti vā mamanti vā asmīti vā. Atha khvāssa notevettha hotīti** atha kho assa bhikkhuno evaṃ tīṇi lakkhaṇāni āropetvā passantassa ettha ajjhattikāya pathaviḍhātuyā ahanti vāti-ādi tividho taṇhāmānadiṭṭhiggāho noteva hoti, na hotiyevāti attho. Yathā ca āpodhātuvasena, evaṃ tejodhātuvāyodhātuvasenapi bāhirāya pathaviḍhātuyā antaradhānaṃ hoti. Idha pana ekaṃyeva āgataṃ. Itarānipi atthato veditabbāni.

**Tañce, āvusoti** idha tassa dhātukammaṭṭhānikassa bhikkhuno sotadvāre pariggahaṃ paṭṭhapento balaṃ dasseti. **Akkosantīti** dasahi akkosavatthūhi akkosanti. **Paribhāsantīti** tayā idañcidañca kataṃ, evañca evañca taṃ karissāmāti vācāya paribhāsanti. **Rosentīti** ghaṭṭenti. **Vihesentīti** dukkhāpenti, sabbaṃ vācāya ghaṭṭa-nameva vuttaṃ. **So evanti** so dhātukammaṭṭhāniko (2.0129) evaṃ sampajānāti. **Uppannā kho me ayanti** sampativattamānuppannabhāvena ca samudācārūpannabhāvena ca uppannā. **Sotasamphassajāti** upanissayavasena sotasamphassato jātā sotadvārajanavedanā, **phasso aniccoti** sotasamphasso hutvā abhāvattāna aniccoti passati. Vedanādayopi sotasamphassasampayuttāva veditabbā. **Dhātārammaṇamevāti** dhātusaṅkhātameva ārammaṇaṃ. **Pakkhandatīti** otarati. **Pasīdatīti** tasmīṃ ārammaṇe pasīdati, bhummavacanameva vā etaṃ. Byañjanasandhivasena “dhātārammaṇamevā”ti vuttaṃ, dhātārammaṇeyevāti ayamettha attho. **Adhimuccatīti** dhātuvasena evanti adhimokkhaṃ labhati, na rajjati, na dussati. Ayañhi sotadvāramhi ārammaṇe āpāthagate mūlapariññā-āgantukatāvākālikavasena pariggahaṃ karoti, tassa vitthārakathā satipaṭṭhāne satisampajāññapabbe vuttā. Sā pana tattha cakkhudvāravasena vuttā, idha sotadvāravasena veditabbā.

Evaṃ katapariggahassa hi dhātukammaṭṭhānikassa balavavipassakassa sacepi cakkhudvārādīsu ārammaṇe āpāthagate ayoniso āvajjanaṃ uppajjati, voṭṭhabbanaṃ patvā ekaṃ dve vāre āsevanaṃ labhitvā cittaṃ bhavaṅgameva otarati, na rāgādivasena uppajjati, ayaṃ koṭippatto tikkhavipassako. Aparassa rāgādivasena ekaṃ vāraṃ javanaṃ javati, javanapariyosāne pana rāgādivasena evaṃ me javanaṃ javitanti āvajjato ārammaṇaṃ pariggahitameva hoti, puna vāraṃ tathā na javati. Aparassa ekavāraṃ evaṃ āvajjato puna dutiyavāraṃ rāgādivasena javanaṃ javatiyeva, dutiyavārāvasāne pana evaṃ me javanaṃ javitanti āvajjato ārammaṇaṃ pariggahitameva hoti, tatiyavāre tathā na uppajjati. Ettha pana paṭṭhamo atitikkho, tatiyo atimando, dutiyassa pana vasena imasmīṃ sutte, laṭṭukopame, indriyabhāvane ca ayamattho veditabbo.

Evaṃ sotadvāre pariggahitavasena dhātukammaṭṭhānikassa balaṃ dassetvā idāni kāyadvāre dīpento **tañce, āvusoti**-ādīmāha. Anīṭṭhārammaṇaṃhi patvā dvīsu vāresu kilamati sotadvāre ca kāyadvāre ca. Tasmā yathā nāma khattassāmī puriso kudālaṃ gahetvā khettaṃ (2.0130) anusañcaranto yattha vā tattha vā mattikapiṇḍaṃ adatvā dubbalaṭṭhānesuyeva kudālena bhūmiṃ bhinditvā satīṇa-mattikapiṇḍaṃ deti. Evameva mahāthero anāgate sikkhākāmā padhānakammikā

kulaputtā imesu dvāresu saṃvaram paṭṭhapetvā khippameva jātijarāmarāṇassa antaṃ karissantīti imesuyeva dvīsu dvāresu gāḷhaṃ katvā saṃvaram desento imaṃ desanaṃ ārabhi.

Tattha **samudācarantīti** upakkamanti. **Pāṇisamphassenāti** pāṇippahārena, itaresu eeva nayo. **Tathābhūto**ti tathāsabhāvo. **Yathābhūtas**minti yathāsabhāve. **Kamantīti** pavattanti. **Evam buddhaṃ anussaratoti**-ādīsu itipi so bhagavāti-ādinā nayena anussarantopi buddhaṃ anussarati, vuttaṃ kho panetaṃ bhagavatāti anussarantopi anussaratiyeva. Svākkhāto bhagavatā dhammoti-ādinā nayena anussarantopi dhammaṃ anussarati, kakacūpamovādaṃ anussarantopi anussaratiyeva. Suppaṭipannoti-ādinā nayena anussarantopi saṅghaṃ anussarati, kakacokantanaṃ adhivāsayaṃānassa bhikkhuno guṇaṃ anussaramānopi anussaratiyeva.

**Upekkhā kusalanissitā na saṅghātīti** idha vipassanupekkhā adhippetā. **Upekkhā kusalanissitā saṅghātīti** idha chaḷaṅgupekkhā, sā panesā kiñcāpi khīṇāsavassa iṭṭhāniṭṭhesu ārammaṇesu arajjanādivasena pavattati, ayaṃ pana bhikkhu vīriyabalena bhāvanāsiddhiyā attano vipassanaṃ khīṇāsavassa chaḷaṅgupekkhāṭhāne ṭhapetīti vipassanāva chaḷaṅgupekkhā nāma jātā.

**303.** Āpodhātuniddese **āpogatanti** sabba-āpesu gataṃ allayūsabhāvalakkhaṇaṃ. **Pittaṃ semhanti**-ādīsu pana yaṃ vattabbaṃ, taṃ sabbaṃ saddhiṃ bhāvanānayena visuddhimagge vuttaṃ. **Pakuppatīti** oghavasena vaḍḍhati, samuddato vā udakaṃ uttarati, ayamassa pākatico pakopo, āposamvaṭṭakāle pana koṭisatasahassacakkavāḷaṃ udakapūrameva hoti. **Ogacchantīti** heṭṭhā gacchanti, uddhane āropita-udakaṃ viya khayamaṃ vināsaṃ pāpuṇanti. Sesamaṃ purimanayeneva veditabbaṃ.

**304.** Tejodhātuniddese (2.0131) **tejogatanti** sabbatejesu gataṃ uṇhattalakkhaṇaṃ. Tejo eva vā tejobhāvaṃ gatanti **tejogataṃ**. Purime āpogatepi pacchime vāyogatepi eeva nayo. **Yena cāti** yena tejogatena. Tasmaṃ kuppite ayaṃ kāyo santappati, ekāhikajarādibhāvena usumajāto hoti. **Yena ca jīriyatīti** yena ayaṃ kāyo jīrati, indriyavekallattaṃ balaparikkhayaṃ valipalitādibhāvaṃca pāpuṇāti. **Yena ca pariḍayhatīti** yena kuppitena ayaṃ kāyo dayhati, so ca puggalo dayhāmi dayhāmīti kandanto satadhotasappigosītacandanādilepaṃca tālavaṇṭavātaṃca paccāsīsati. **Yena ca asitapītakhāyitasāyitaṃ sammā pariṇāmaṃ gacchatīti** yena taṃ asitaṃ vā odanādi, pītaṃ vā pānakādi, khāyitaṃ vā piṭṭhakhajjakādi, sāyitaṃ vā ambapakkamadhuphāṇitādi sammā paripākaṃ gacchati, rasādibhāvena vivekaṃ gacchatīti attho. Ayamettha saṅkhepo. Vitthārato pana yaṃ vattabbaṃ siyā, taṃ sabbaṃ saddhiṃ bhāvanānayena visuddhimagge vuttaṃ.

**Haritantanti** haritameva. Allatiṇādiṃ āgamma nibbāyatīti attho. **Panthantanti** mahāmaggameva. **Selantanti** pabbataṃ. **Udakantanti** udakaṃ. **Ramaṇiyaṃ vā bhūmibhāganti** tiṇagumbādirahitaṃ, vivittaṃ abbhokāsaṃ bhūmibhāgaṃ. **Anāhārāti** nirāhārā nirupādānā, ayampi pakatiyāva tejovikāro vutto, tejosamvaṭṭakāle pana koṭisatasahassacakkavāḷaṃ jhāpetvā chārikāmattampi na tiṭṭhati. **Nhāruddulenāti** cammanillekhanena. **Aggiṃ gavesantīti** evarūpaṃ sukhumamaṃ upā-

dānaṃ gahetvā aggim̐ pariyesanti, yaṃ appamattakampi usumaṃ labhitvā pajjalati, sesamidhāpi purimanayeneva veditabbaṃ.

**305.** Vāyodhātuniddese **uddhaṅgamā vātā**ti uggārahikkārādipavattakā uddhaṃ ārohanavātā. **Adhogamā vātā**ti uccārapassāvādiniharaṇakā adho orohanavātā. **Kucchisayā vātā**ti antānaṃ bahivātā. **Koṭṭhāsayā vātā**ti antānaṃ antovātā. **Āngamaṅgānusārī**noti dhamanijālānusārena sakalasarīre āṅgamaṅgāni anusaṭṭhā samīñjanapasāraṇādinibbattakavātā. **Assāsoti** antopavisananāsikavāto (2.0132). **Passāsoti** bahinikkhamananāsikavāto. Ayamettha saṅkhepo. Vitthārato pana yaṃ vattabbaṃ siyā, taṃ sabbaṃ saddhim̐ bhāvanāyena visuddhimagge vuttaṃ.

**Gāmampi vahatī**ti sakalagāmampi cuṇṇavicuṇṇaṃ kurumānā ādāya gacchati, nigamādīsupi eseva nayo. Idha vāyosaṃvaṭṭakāle koṭṭisatasahassacakkavāḷavidhaṃsanavasena vāyodhātuvikāro dassito. **Vidhūpanenā**ti aggibijanakena. **Ossavaneti** chadanagge, tena hi udakaṃ savati, tasmā taṃ “ossavanan”ti vuccati. Sesamidhāpi purimanayeneva yojetabbaṃ.

**306. Seyyathāpi, āvusoti** idha kiṃ dasseti? Heṭṭhā kathitānaṃ mahābhūtānaṃ nissattabhāvaṃ. **Kaṭṭhanti** dabbasambhāraṃ. **Vallinti** ābandhanavallim̐. **Tiṇanti** chadanatiṇaṃ. **Mattikanti** anulepamattikaṃ. **Ākāso parivāritoti** etāni kaṭṭhādīni anto ca bahi ca parivāretvā ākāso ṭhitoti attho. **Agāraṃtveva saṅkhaṃ gacchatīti** agāranti paṇṇattimattaṃ hoti. Kaṭṭhādīsū pana visuṃ visuṃ rāsikatesu kaṭṭharāsivallirāsītveva vuccati. **Evameva khoti** evameva aṭṭhi-ādīni anto ca bahi ca parivāretvā ṭhito ākāso, tāneva aṭṭhi-ādīni paṭicca rūpaṃtveva saṅkhaṃ gacchati, sarīranti vohāraṃ

gacchati. Yathā kaṭṭhādīni paṭicca gehanti saṅkhaṃ gataṃ agāraṃ khattiyagehaṃ brāhmaṇagehanti vuccati, evamidampi khattiyasarīraṃ brāhmaṇasarīranti vuccati, na hettha koci satto vā jīvo vā vijjati.

**Ajjhattikañceva, āvuso, cakkhūti** idaṃ kasmā āradhamaṃ? Heṭṭhā upādārūpaṃ cattāro ca arūpino khandhā tīṇi ca ariyasaccāni na kathitāni, idāni tāni kathetuṃ ayaṃ desanā āradhāti. Tattha **cakkuṃ aparibhinnanti** cakkhupasāde niruddhepi upahatepi pittasemhalohitehi palibuddhepi cakkhu cakkhuviññāṇassa paccayo bhavituṃ na sakkoti, paribhinnameva hoti, cakkhuviññāṇassa pana paccayo bhavituṃ samatthaṃ aparibhinnaṃ nāma. **Bāhirā ca rūpāti** bāhirā catusamuṭṭhānikarūpā. **Tajjo samannāhāro**ti taṃ cakkhuñca rūpe ca paṭicca bhavaṅgaṃ āvaṭṭetvā uppajjanamanasikāro, bhavaṅgāvaṭṭanasamatthaṃ cakkhudvāre (2.0133) kiriya-manodhātucittanti attho. Taṃ rūpānaṃ anāpāthagatattāpi aññāvihitassapi na hoti, **tajjassāti** tadanurūpassa. **Viññāṇabhāgassāti** viññāṇakoṭṭhāsassa.

**Yaṃ tathābhūtassāti**-ādīsu dvāravasena cattāri saccāni dasseti. Tattha **tathābhūtassāti** cakkhuviññāṇena sahabhūtassa, cakkhuviññāṇasamaṅginoti attho. **Rūpanti** cakkhuviññāṇassa na rūpajanakattā cakkhuviññāṇakkhaṇe tisamuṭṭhānarūpaṃ, tadanantaracittakkhaṇe catusamuṭṭhānampi labbhati. **Saṅgahaṃ gacchātīti** gaṇanaṃ gacchati. Vedanādayo cakkhuviññāṇasampayuttāva. Viññāṇampi cakkhuviññāṇameva. Ettha ca saṅkhārāti cetanāva vuttā. **Saṅgahoti** ekato saṅgaho. **Sannipātoti** samāgamo. **Samavāyoti** rāsi. **Yo paṭiccasamuppādaṃ passatīti** yo paccaye passati. **So dhammaṃ passatīti** so paṭiccasamuppāna-dhamme passati, **chando**Ti-ādi sabbaṃ taṇhāvevacanameva, taṇhā hi chandakaraṇavasena **chando**. Ālayakaraṇavasena **ālayo**. Anunayakaraṇavasena **anunayo**. Ajjhogāhitvā gilitvā gahanavasena **ajjhosānanti** vuccati. **Chandarāgavinayo chandarāgappahānanti** nibbānasseva vevacanaṃ, iti tīṇi saccāni pāliyaṃ āgatāneva maggasaccaṃ āharitvā gahetabbaṃ, yā imesu tīsu ṭhānesu diṭṭhi saṅkappo vācā kamanto ājīvo vāyāmo sati samādhi bhāvanāpaṭivedho, ayaṃ maggoti. **Bahukataṃ hotīti** ettāvattāpi bahuṃ bhagavato sāsanaṃ kataṃ hoti, **ajjhattikañceva, āvuso, sotanti**-ādivāresupi eseva nayo.

Manodvāre pana ajjhattiko mano nāma bhavaṅgacittaṃ. Taṃ niruddhampi āvajjanacittassa paccayo bhavituṃ asamatthaṃ mandathāmagatameva pavattamānampi **paribhinnaṃ** nāma hoti. Āvajjanassa pana paccayo bhavituṃ samatthaṃ **aparibhinnaṃ** nāma. **Bāhirā ca dhammāti** dhammāramaṇaṃ. **Neva tāva tajjassāti** idaṃ bhavaṅgasamayeneva kathitaṃ. Dutiyavāro paguṇajjhānapaccavekkhaṇena vā, paguṇakammaṭṭhānamanasikārena vā, paguṇabuddhavacanasajjhāyakaraṇādinā vā, aññāvihitakaṃ sandhāya vutto. Imasmiṃ vāre **rūpanti** catusamuṭṭhānampi labbhati. Manoviññāṇaṃ hi rūpaṃ samuṭṭhāpeti, vedanādayo manoviññāṇasampayuttā, viññāṇaṃ manoviññāṇameva. Saṅkhārā panettha phassacetanāvaseneva (2.0134) gahitā. Sesam vuttanayeneva veditabbaṃ. Iti mahāthero heṭṭhā ekadesameva sammasanto āgantvā imasmiṃ ṭhāne ṭhatvā heṭṭhā parihīna-desanaṃ sabbaṃ taṃtaṃdvāravasena bhājetvā dassento yathānusandhināva suttantaṃ niṭṭhapesīti.

Papañcasūdaniyā majjhimanikāyaṭṭhakathāya

Mahāhatthipadopamasuttavaṇṇanā niṭṭhitā.

## 9. Mahāsāropamasuttavaṇṇanā

**307. Evaṃ me sutanti mahāsāropamasuttaṃ.** Tattha **acirapakkanteti** saṅghaṃ bhinditvā ruhiruppādakammaṃ katvā nacirapakkante saliṅgeneva pāṭiyekke jāte.

**Idha, bhikkhave, ekacco kulaputtoti** kiñcāpi asukakulaputtoti na niyāmito, devadattaṃyeva pana sandhāya idaṃ vuttanti veditabbaṃ. So hi asamhinnāya mahāsammatapaveṇiyā okkākavaṃse jātattā jātikulaputto. **Otiṇṇoti** yassa jāti anto anupaviṭṭhā, so jātiyā otiṇṇo nāma. Jarādīsupi eseva nayo. **Lābhasakkārādīsupi lābhoti** cattāro paccayā. **Sakkāroti** tesamēva sukatabhāvo. **Silokoti** vaṇṇabhaṇaṇaṃ. **Abhinibbattetīti** uppādeti. **Apaññātāti** dvinnaṃ janānaṃ ṭhitaṭṭhāne na paññāyanti, ghāsacchādanamattampi na labhanti. **Appesakkhāti** appaparivārā, purato vā pacchato vā gacchantaṃ na labhanti.

**Sārena sārakaraṇiyanti** rukkhasārena kattabbaṃ akkhacakkayuganaṅgalādikāṃ yaṃkiñci. **Sākhāpalāsaṃ aggahesi brahmacariyassāti** maggaphalasārassa sāsana brahmacariyassa cattāro paccayā sākhāpalāsaṃ nāma, taṃ aggahesi. **Tena ca vosānaṃ āpādīti** teneva ca alamettāvataṃ sāro me pattoti vosānaṃ āpanno.

**310. Nāṇadassanaṃ ārādhetīti** devadatto pañcābhiñño, dibbacakkhu ca pañcannaṃ abhiññānaṃ matthake ṭhitaṃ, taṃ imasmiṃ sutte “nāṇadassanaṃ”ti vuttaṃ (2.0135). **Ajānaṃ apassaṃ viharantīti** kiñci sukhumāṃ rūpaṃ ajānantā antamaso paṃsupisācākampi apassantā viharanti.

**311. Asamayavimokkhaṃ ārādhetīti**, “katamo asamayavimokkho? Cattāro ca ariyamaggā cattāri ca sāmāññaphalāni, nibbānañca, ayaṃ asamayavimokkho”ti (paṭi. ma. 1.213) evaṃ vutte navalokuttaradhamme ārādheti sampādeti paṭilābhati. Lokiyasamāpattiyo hi appitappitakkaṇeyeva paccanīkadhammehi vimuccanti, tasmā, “katamo samayavimokkho? Cattāri ca jhānāni catasso ca arūpāvacarasamāpattiyo, ayaṃ samayavimokkho”ti evaṃ samayavimokkhoti vuttā. Lokuttaradhammā pana kālena kālaṃ vimuccanti, sakiṃ vimuttāni hi maggaphalāni vimuttāneva honti. Nibbānaṃ sabbakilesehi accantaṃ vimuttamevāti ime nava dhammā asamayavimokkhoti vuttā.

**Akuppā cetovimuttīti** arahattaphalavimutti. Ayamatto etassāti **etadatthaṃ**, arahattaphalattamaṃ brahmacariyaṃ. Ayaṃ etassa atthoti vuttaṃ hoti. **Etaṃ sāranti** etaṃ arahattaphalaṃ brahmacariyassa sāraṃ. **Etaṃ pariyosānanti** etaṃ arahattaphalaṃ brahmacariyassa pariyosānaṃ, esā koṭi, na ito paraṃ pattabbaṃ atthīti yathānusandhināva desanaṃ niṭṭhapesīti.

## 10. Cūlasāropamasuttavaṇṇanā

**312. Evaṃ me sutanti** cūlasāropamasuttaṃ. Tattha **piṅgalakoccho**ti so brāhmaṇo piṅgaladhātuko. **Koccho**ti panassa nāmaṃ, tasmā “piṅgalakoccho”ti vuccati. **Saṅghinoti**-ādīsu pabbajitasamūhasaṅkhāto saṅgho etesaṃ atthīti **saṅghino**. Sveva gaṇo etesaṃ atthīti **gaṇino**. Ācārasikkhāpanavasena tassa gaṇassa ācariyāti **gaṇācariyā**. **Ñātāti** paññātā pākaṭā. “Appicchā santuṭṭhā, appicchatāya (2.0136) vatthampi na nivāseti”ti-ādinā nayena samuggato yaso etesaṃ atthīti **yasassino**. **Titthakarāti** laddhikarā. **Sādhusammatāti** ime sādhu sundarā sappurisāti evaṃ sammatā. **Bahujanassā**ti assutavato andhabālaputhujjanassa. Idāni te dassento **seyyathidaṃ pūraṇoti**-ādimāha. Tattha **pūraṇoti** tassa satthupaṭṭhānassa nāmaṃ. **Kassapoti** gottaṃ. So kira aññatarassa kulassa ekūnadāsa-sataṃ pūrayamāno jāto, tenassa “pūraṇo”ti nāmaṃ akaṃsu. Maṅgaladāsattā cassa “dukkaṭan”ti vattā natthi, akataṃ vā na katanti. “So kimahametta vasāmi”ti palāyi. Athassa corā vatthāni acchindīsu. So paṇṇena vā tiṇena vā paṭicchādetumpi ajānanto jātārūpeneva ekaṃ gāmaṃ pāvisi. Manussā taṃ disvā, “ayaṃ samaṇo arahā appiccho, natthi iminā sadiso”ti pūvabhaddāni gahetvā upasaṅkamanti. So “mayhaṃ sāṭakaṃ anivatthabhāvena idaṃ uppannaṃ”ti tato paṭṭhāya sāṭakaṃ labhitvāpi na nivāsesi, tadeva pabbajjaṃ aggahesi. Tassa santike aññepi pañcasatā manussā pabbajīsu, taṃ sandhāyāha “pūraṇo kassapo”ti.

**Makkhalīti** tassa nāmaṃ. Gosālāya jātattā **gosālōti** dutiyaṃ nāmaṃ. Taṃ kira sakaddamāya bhūmiyā telaghaṭaṃ gahetvā gacchantam, “tāta, mā khalī”ti sāmiko āha. So pamādena khalivā pativā sāmikassa bhayena palāyituṃ āraddho. Sāmiko upadhāvitvā sāṭakakaṇṇe aggahesi. Sopi sāṭakaṃ chaḍḍetvā acelako hutvā palāyi, sesaṃ pūraṇasadisameva.

**Ajitoti** tassa nāmaṃ. Kesakambalaṃ dhāretīti **kesakambalo**. Iti nāmadvayaṃ saṃsanditvā “ajito kesakambalo”ti vuccati. Tattha **kesakambalo** nāma manussakesehi katakambalo, tato paṭikiṭṭhataraṃ vatthaṃ nāma natthi. Yathāha- “seyyathāpi, bhikkhave, yāni kānici tantāvutānaṃ vatthānaṃ, kesakambalo tesam paṭikiṭṭho akkhāyati, kesakambalo, bhikkhave, sīte sīto uṇhe uṇho dubbaṇṇo duggandho dukkhasamphasso”ti (a. ni. 3.138).

**Pakudhoti** (2.0137) tassa nāmaṃ. **Kaccāyanoti** gottaṃ. Iti nāmagottaṃ saṃsanditvā, “pakudho kaccāyano”ti vuccati. Sītudakapaṭikkhattako esa, vaccaṃ katvāpi udakakiccaṃ na karoti, uṇhodakaṃ vā kañjiyaṃ vā labhitvā karoti, nadiṃ

vā maggodakaṃ vā atikkamma, “sīlaṃ me bhinnan”ti vālikathūpaṃ katvā sīlaṃ adhiṭṭhāya gacchati, evarūpo nissirikaladdhiko esa.

**Sañjayoti** tassa nāmaṃ. Belaṭṭhassa puttoti **belaṭṭhaputto**. Amhākaṃ gaṇṭhana-kilesa palibujjhanakilesa natthi, kilesagaṇṭharahitā mayanti evaṃ vāditāya laddha-nāmasena **nigaṇṭho**. Nāṭassa puttoti **nāṭaputto**. **Abbhaññaṃsūti** yathā tesāṃ paṭiññā, tatheva jāniṃsu. Idaṃ vuttaṃ hoti- sace nesāṃ sā paṭiññā niyyānikā sabbe abbhaññaṃsu. No ce, na abbhaññaṃsu. Tasmā kiṃ tesāṃ paṭiññā niyyānikā na niyyānikāti, ayametassa pañhassa attho. Atha bhagavā nesāṃ aniyyānika-bhāvakathanena atthābhāvato alanti paṭikkhipitvā upamāya atthaṃ pavedento dhammameva desetum, **dhammaṃ, te brāhmaṇa, desessāmīti** āha.

**320.** Tattha **sacchikiriyāyāti** sacchikaraṇatthaṃ. **Na chandaṃ janetīti** kattukamya-tāchandaṃ na janayati. **Na vāyamatīti** vāyāmaṃ parakkamaṃ na karoti. **Olīnavuttiko ca hotīti** līnajjhāsayo hoti. **Sāthalikoti** sithilaggāhī, sāsanaṃ sithilaṃ katvā gaṇhāti, daḷhaṃ na gaṇhāti.

**323.** **Idha, brāhmaṇa bhikkhu, vivicceva kāmehīti** kathaṃ ime paṭhamajjhānādi-dhammā ñāṇadassanena uttaritarā jātāti? Nirodhapādakattā. Heṭṭhā paṭhamajjhānādidhammā hi vipassanāpādakā, idha nirodhapādakā, tasmā uttaritarā jātāti veditabbā. Iti bhagavā idampi suttaṃ yathānusandhināva niṭṭhapesi. Desanāvasāne brāhmaṇo saraṇesu paṭiṭṭhitoti.

Papañcasūdaniyā majjhimanikāyaṭṭhakathāya

Cūḷasāropamasuttavaṇṇanā niṭṭhitā.

Tatīyavaggavaṇṇanā niṭṭhitā.

#### 4. Mahāyamakavaggo

##### 1. Cūḷagosīṅgasuttavaṇṇanā

**325.** **Evaṃ (2.0138) me sutanti** cūḷagosīṅgasuttaṃ. Tattha **nātike viharatīti nātikā-**



nāma ekaṃ taḷākaṃ nissāya dvinnāṃ cūḷapitimahāpitiputtānaṃ dve gāmā, tesu ekasmiṃ gāme. **Giñjakāvasatheti** iṭṭhakāmaye āvasathe. Ekasmiṃ kira samaye bhagavā mahājanasaṅghaṃ karonto vajjiraṭṭhe cārikaṃ caramāno nātikaṃ anupatto. Nātikavāsino manussā bhagavato mahādānaṃ datvā dhammakathaṃ sutvā pasannahadayā, “satthu vasanaṭṭhānaṃ karissāmā”ti mantetvā iṭṭhakāheva bhittisopānatthambhe vālarūpādīni dassento pāsādaṃ katvā sudhāya limpivā mālākammalatākammādīni niṭṭhāpetvā bhummattharaṇamañcapīṭhādīni paññāpetvā satthu niyyātesuṃ. Aparāparaṃ panettha manussā bhikkhusaṅghassa rattiṭṭhānadivāṭṭhānaṃ apacaṅkamādīni kārayiṃsu. Iti so vihāro mahā ahosi. Taṃ sandhāya vuttaṃ “giñjakāvasathe”ti.

**Gosiṅgasālavanadāyeti** tattha ekassa jeṭṭhakarukkhaṃ khandhato gosiṅgasāṅghānaṃ hutvā viṭapaṃ utṭhahi, taṃ rukkaṃ upādāya sabbampi taṃ vanaṃ **gosiṅgasālavananti** saṅkhaṃ gataṃ. **Dāyoti** avisesena araññassetāṃ nāmaṃ. Tasmā **gosiṅgasālavanadāyeti** gosiṅgasālavana-araññeti attho. **Viharantīti** sāmaggirasaṃ anubhavamānā viharanti. Imesañhi kulaputtānaṃ uparipaṇṇāsake puthujjanakālo kathito, idha khīṇāsavakālo. Tadā hi te laddhassādā laddhapatiṭṭhā adhigatapaṭisaṃbhidā khīṇāsavā hutvā sāmaggirasaṃ anubhavamānā tattha viharīṃsu. Taṃ sandhāyetaṃ vuttaṃ.

**Yena gosiṅgasālavanadāyo tenupasaṅkamīti** dhammasenāpatimahāmogallānattheresu vā asītimahāsāvakesu vā, antamaso dhammabhaṇḍāgārika-ānandattherampi kañci anāmantetvā sayameva pattacīvaraṃ ādāya anīkā nissaṭo hatthī viya, yūthā nissaṭo kāḷasīho viya (2.0139), vātacchinno valāhako viya ekakova upasaṅkami. Kasmā panettha bhagavā sayāṃ agamāsīti? Tayo kulaputtā sāmaggirasaṃ anubhavantā viharanti, tesāṃ paggaṇhanato, pacchimajanataṃ anukampānato dhammagarubhāvato ca. Evaṃ kirassa ahosi- “ahaṃ ime kulaputte paggaṇhitvā ukkaṃsitvā paṭisanthāraṃ katvā dhammaṃ nesaṃ desessāmī”ti. Evaṃ tāva paggaṇhanato agamāsī. Aparampissa ahosi- “anāgate kulaputtā sammāsaṃbuddho samaggavāsaṃ vasantānaṃ santikaṃ sayāṃ gantvā paṭisanthāraṃ katvā dhammaṃ kathetvā tayo kulaputte paggaṇhi, ko nāma samaggavāsaṃ na vaseyyāti samaggavāsaṃ vasitabbaṃ maññamānā khippameva dukkhassantaṃ karissanti”ti. Evaṃ pacchimajanataṃ anukampānato agamāsī. Buddhā ca nāma dhammagaruno honti, so ca nesaṃ dhammagarubhāvo rathavinīte āvikatova. Iti imasmā dhammagarubhāvato dhammaṃ paggaṇhissāmīti agamāsī.

**Dāyapālōti** araññapālo. So taṃ araññaṃ yathā icchiticchitappadesena manussā pavisitvā tattha pupphaṃ vā phalaṃ vā niyyāsaṃ vā dabbasambhāraṃ vā na haranti, evaṃ vatiyā parikkhittassa tassa araññassa yojite dvāre nisīditvā taṃ araññaṃ rakkhati, pāleti. Tasmā “dāyapālo”ti vutto. **Attakāmarūpā**ti attano hitaṃ kāmayamānasabhāvā hutvā viharanti. Yo hi imasmiṃ sāsane pabbajitvāpi vejjakammadūtakammāpahiṇagamanādīnaṃ vasena ekavīsati-anesanāhi jīvikaṃ kappeti, ayaṃ na attakāmarūpo nāma. Yo pana imasmiṃ sāsane pabbajitvā ekavīsati-anesanaṃ pahāya catupārisuddhisīle patiṭṭhāya buddhavacanaṃ uggaṇhitvā sappāyadhutaṅgaṃ adhiṭṭhāya aṭṭhatimsāya ārammaṇesu cittaruciyaṃ

kammaṭṭhānaṃ gahetvā gāmantam pahāya araññaṃ pavisitvā samāpattiyo nibbattevā vipassanāya kammaṃ kurumāno viharati, ayaṃ attakāmo nāma. Tepi tayo kulaputtā evarūpā ahesuṃ. Tena vuttam- “attakāmarūpā viharanti” ti.

**Mā tesam aphāsumakāsī**ti tesam mā aphāsukaṃ akāsīti bhagavantaṃ vāresi. Evaṃ kirassa ahosi- “ime kulaputtā samaggā viharanti, ekaccassa ca gataṭṭhāne bhaṇḍanakalahavivādā vattanti, tikhiṇasiṅgo caṇḍagoṇo viya ovijjhanto vicarati, athekamaggena dvinnam gamanam na (2.0140) hoti, kadāci ayampi evaṃ karonto imesaṃ kulaputtānaṃ samaggavāsaṃ bhindeyya. Pāsādiko ca panesa suvaṇṇavaṇṇo surasagiddho maññe, gatakālato paṭṭhāya paṇitadāyakānaṃ attano upaṭṭhākānañca vaṇṇakathanādīhi imesaṃ kulaputtānaṃ appamādvāhāraṃ bhindeyya. Vasanaṭṭhānāni cāpi etesaṃ kulaputtānaṃ nibaddhāni pariccinnāni tisso ca paṇṇasālā tayo caṅkamā tīṇi divāṭṭhānāni tīṇi mañcapīṭhāni. Ayaṃ pana samaṇo mahākāyo vuḍḍhataro maññe bhavissati. So akāle ime kulaputte senāsanā vuṭṭhāpessati. Evaṃ sabbathāpi etesaṃ aphāsu bhavissati” ti. Taṃ anicchanto, “mā tesam aphāsukamakāsī” ti bhagavantaṃ vāresi.

Kim panesa jānanto vāresi, ajānantoti? Ajānanto. Kiñcāpi hi tathāgatassa paṭisa-ndhiggahaṇato paṭṭhāya dasasahassacakkavāḷakampanādīni pāṭihāriyāni pavattiṃsu, araññavāsino pana dubbalamanussā sakammappasutā tāni sallakkhetuṃ na sakkonti. Sammāsambuddho ca nāma yadā anekabhikkhusahassaparivāro byāmappabhāya asīti-anubyañjanehi dvattiṃsamahāpurisalakkhaṇasiriyā ca buddhānubhāvaṃ dassento vicarati, tadā ko esoti apucchitvāva jānitabbo hoti. Tadā pana bhagavā sabbampi taṃ buddhānubhāvaṃ cīvaragabbhena paṭicchādetvā valāhakagabbhena paṭicchanno puṇṇacando viya sayameva pattacīvaramādāya aññatakavesena agamāsi. Iti naṃ ajānantova dāyapālo nivāresi.

**Etadavocāti** thero kira mā samaṇāti dāyapālassa kathaṃ sutvāva cintesi- “mayaṃ tayo janā idha viharāma, aññe pabbajitā nāma natthi, ayañca dāyapālo pabbajitena viya saddhiṃ katheti, ko nu kho bhavissati” ti divāṭṭhānato vuṭṭhāya dvāre ṭhatvā maggaṃ olokento bhagavantaṃ addasa. Bhagavāpi therassa saha dassaneneva sarīrobhāsaṃ muñci, asīti-anubyañjanavirājītā byāmappabhā pasāritasuvaṇṇapaṭo viya virocittha. Thero, “ayaṃ dāyapālo phaṇakataṃ āsivisaṃ gīvāya gahetuṃ hatthaṃ pasārento viya loke aggapuggalena saddhiṃ kathentova na jānāti, aññatarabhikkhunā viya saddhiṃ katheti” ti nivārento etaṃ, “mā, āvuso dāyapālā” ti-ādivacanaṃ avoca.

**Tenupasaṅkamī**ti (2.0141) kasmā bhagavato paccuggamaṃ akatvā upasaṅkami? Evaṃ kirassa ahosi- “mayaṃ tayo janā samaggavāsaṃ vasāma, sacāhaṃ ekakova paccuggamaṃ karissāmi, samaggavāso nāma na bhavissati” ti piya- mitte gahetvāva paccuggamaṃ karissāmi. Yathā ca bhagavā mayhaṃ piyo, evaṃ sahāyānampi me piyoti, tehi saddhiṃ paccuggamaṃ kātukāmo sayaṃ akatvāva upasaṅkami. Keci pana tesam therānaṃ paṇṇasāladvāre caṅkamanakoṭṭiyā bhagavato āgamanamaggo hoti, tasmā thero tesam saññaṃ dadamānova gatoti. **Abhikkamathāti** ito āgacchatha. **Pāde pakkhālesī**ti vikasitapadumasanni- bhehi jālahatthehi maṇivaṇṇaṃ udakaṃ gahetvā suvaṇṇavaṇṇesu piṭṭhipādesu

udakamabhisiñcitvā pādena pādaṃ ghaṃsanto pakkhālesi. Buddhānaṃ kāye rajo-  
jallaṃ nāma na upalimpati, kasmā pakkhālesi? Sarīssa utuggahaṇatthaṃ,  
tesaṅca cittasampahaṃsanatthaṃ. Amhehi abhihaṇena udakena bhagavā pāde  
pakkhālesi, paribhogaṃ akāsīti tesaṃ bhikkhūnaṃ balavasomanassavasena  
cittaṃ piṇitaṃ hoti, tasmā pakkhālesi. **Āyasmantaṃ anuruddhaṃ bhagavā etadavo-  
cāti** so kira tesaṃ vuḍḍhataro.

**326.** Tassa saṅgahe kate sesānaṃ katova hotīti theraññeva etaṃ **kacci vo anuru-  
ddhāti-ādivacanaṃ avoca.** Tattha **kaccīti** pucchanatthe nipāto. **Voti** sāmivacanaṃ.  
Idaṃ vuttaṃ hoti- kacci anuruddhā tumhākaṃ khamaniyaṃ, iriyāpatho vo  
khamati? Kacci yāpaniyaṃ, kacci vo jīvitaṃ yāpeti ghaṭiyati? Kacci piṇḍakena na  
kilamatha, kacci tumhākaṃ sulabhapiṇḍaṃ, sampatte vo disvā manussā uḷuṅka-  
yāguṃ vā kaṭacchubhikkhaṃ vā dātabbaṃ maññantīti bhikkhācāravattaṃ  
pucchati. Kasmā? Paccayena akilamantena hi sakkā samaṇadhammo kātuṃ,  
vattameva vā etaṃ pabbajitānaṃ. Atha tena paṭivacane dinne, “anuruddhā, tumhe  
rājapabbajitā mahāpuññā, manussā tumhākaṃ araññe vasantānaṃ adatvā kassa  
aññassa dātabbaṃ maññissanti, tumhe pana etaṃ bhuñjitvā kiṃ nu kho migapo-  
takā viya aññamaññaṃ saṅghaṭṭentā viharatha, udāhu sāmaggibhāvo vo atthī”ti  
sāmaggiraṣaṃ pucchanto, **kacci pana vo, anuruddhā, samaggāti-ādimāha.**

Tattha **khīrodakībhūtāti** yathā khīraṅca udakaṅca aññamaññaṃ saṃsandati,  
visuṃ na hoti, ekattaṃ viya upeti, kacci evaṃ sāmaggivasena ekattūpagatacittu-  
ppādā (2.0142) viharathāti pucchati. **Piyacakkhūhīti** mettacittaṃ paccupaṭṭhapetvā  
olokanacakkhūni piyacakkhūni nāma. Kacci tathārūpehi cakkhūhi aññamaññaṃ  
sampassantā viharathāti pucchati. **Tagghāti** ekaṃsatthe nipāto. Ekaṃsena mayaṃ,  
bhanteti vuttaṃ hoti. **Yathā kathaṃ panāti** ettha **yathāti** nipātamattaṃ. **Kathanti**  
kāraṇapucchā. Kathaṃ pana tumhe evaṃ viharatha, kena kāraṇena viharatha,  
taṃ me kāraṇaṃ brūthāti vuttaṃ hoti. **Mettaṃ kāyakammaṃ** mettacittavasena  
pavattaṃ kāyakammaṃ. **Āvi ceva raho cāti** sammukhā ceva parammukhā ca. Ita-  
resupi eseva nayo.

Tattha sammukhā kāyavacīkammāni saḥavāse labbhanti, itarāni vipavāse.  
Manokammaṃ sabbattha labbhati. Yañhi saḥavasantesu ekena mañcapīṭhaṃ vā  
dārubaṇḍaṃ vā mattikābhaṇḍaṃ vā bahi dunnikkhattaṃ hoti, taṃ disvā kenidaṃ  
vaḷañjītaṃ avaññaṃ akatvā attanā dunnikkhattaṃ viya gahetvā paṭisāmentassa  
paṭijaggitabbayuttaṃ vā pana ṭhānaṃ paṭijaggantassa sammukhā mettaṃ kāya-  
kammaṃ nāma hoti. Ekasmiṃ pakkante tena dunnikkhattaṃ senāsanapari-  
kkhāraṃ tatheva nikkhipantassa paṭijaggitabbayuttaṭṭhānaṃ vā pana paṭijagga-  
ntassa parammukhā mettaṃ kāyakammaṃ nāma hoti. Saḥavasantassa pana  
tehi saddhiṃ madhuraṃ sammodaniyaṃ kathaṃ paṭisanthārakathaṃ sāraṇiya-  
kathaṃ dhammīkathaṃ sarabhaññaṃ sākacchaṃ pañhapucchanaṃ pañhavissa-  
jjananti evamādikaraṇe sammukhā mettaṃ vacīkammaṃ nāma hoti. Theresu  
pana pakkantesu mayhaṃ piyasahāyo nandiyatthero kimilatthero evaṃ sīlasa-  
mpanno, evaṃ ācārasampannoti-ādiguṇakathanaṃ parammukhā mettaṃ vacī-  
kammaṃ nāma hoti. Mayhaṃ piyamitto nandiyatthero kimilatthero avero hotu,

abyāpajjo sukhi hotūti evaṃ samannāharato pana sammukhāpi parammukhāpi mettaṃ manokammaṃ hotiyeva.

**Nānā hi kho no, bhante, kāyā** Ti kāyañhi piṭṭhaṃ viya mattikā viya ca omadditvā ekato kātum na sakkā. **Ekañca pana maññe cittanti** cittaṃ pana no hitaṭṭhena niraṅgataṭṭhena aviggahaṭṭhena samaggaṭṭhena ekamevāti dasseti. Kathaṃ panetaṃ sakaṃ cittaṃ nikkhipitvā itaresaṃ cittavasena vattiṃsūti? Ekassa patte malaṃ uṭṭhahati, ekassa cīvaraṃ kiliṭṭhaṃ hoti, ekassa paribhaṅḍakammaṃ hoti. Tattha yassa patte malaṃ uṭṭhitaṃ, tena mamāvuso, patte malaṃ uṭṭhitaṃ pacitum vaṭṭatīti vutte itare mayhaṃ cīvaraṃ kiliṭṭhaṃ (2.0143) dhovitaṃ, mayhaṃ paribhaṅḍaṃ kātābanti avatvā araññaṃ pavisitvā dārūni āharitvā chinditvā pattakaṭṭhe paribhaṅḍaṃ katvā tato paraṃ cīvaraṃ vā dhovanti, paribhaṅḍaṃ vā karonti. Mamāvuso, cīvaraṃ kiliṭṭhaṃ dhovitum vaṭṭati, mama paṅḥasālā uklāpā paribhaṅḍaṃ kātum vaṭṭatīti paṭhamataraṃ ārocitepi eseva nayo.

**327. Sādhu sādhu, anuruddhāti** bhagavā heṭṭhā na ca mayaṃ, bhante, piṇḍakena kilamimhāti vutte na sādhu kāmādasī. Kasmā? Ayañhi kabalīkāro āhāro nāma imesaṃ sattānaṃ apāyalokepi devamanussalokepi āciṅṅasamāciṅṅova. Ayaṃ pana lokasannivāso yebhuyyena vivādapakkhanda, apāyaloke devamanussalokepi ime sattā paṭiviruddhā eva, etesaṃ sāmaggikālo dullabho, kadācīdeva hotīti samaggavāsassa dullabhata idha bhagavā sādhu kāmādasī. Idāni tesāṃ appamādalakkhaṇaṃ pucchanta **kacci pana vo, anuruddhāti**-ādīmāha. Tattha **voti** nipātamattaṃ paccattavacanaṃ vā, kacci tumheti attho. **Amhākaṅti** amhesu tīsu janesu. **Piṇḍāya paṭikkamatīti** gāme piṇḍāya caritvā paccāgacchati. **Avakkārapātinti** atirekapiṇḍapātaṃ apanetvā ṭhapanatthāya ekaṃ samuggapātiṃ dhovitvā ṭhapeti.

**Yo pacchāti** te kira therā na ekatova bhikkhācāraṃ pavisanti, phalasaṃpattiratā hete. Pātova sarīrapaṭijagganaṃ katvā vattappaṭipattiṃ pūretvā senāsanaṃ pavisitvā kālaparicchedaṃ katvā phalasaṃpattiṃ appētvā nisīdanti. Tesu yo paṭhamataraṃ nisinna attano kālaparicchedavasena paṭhamataraṃ uṭṭhāti; so piṇḍāya caritvā paṭinivatto bhattakiccaṭṭhānaṃ āgantvā jānāti- “dve bhikkhū pacchā, ahaṃ paṭhamataraṃ āgato”ti. Atha pattaṃ pidahitvā āsanapaññāpanādīni katvā yadi patte paṭivisaṃmattameva hoti, nisīditvā bhuñjati. Yadi atirekaṃ hoti, avakkārapātiyaṃ

pakkhipitvā pātiṃ pidhāya bhuñjati. Katabhattakicco pattam dhovitvā vodakam katvā thavikāya osāpetvā pattacivaram gahetvā attano vasanaṭṭhānam pavisati. Dutiyaopi āgantvāva jānāti- “eko paṭhamam āgato, eko pacchato”ti. So sace patte bhattam pamāṇameva hoti, bhuñjati. Sace mandam, avakkārapātito gahetvā bhuñjati. Sace atirekam (2.0144) hoti, avakkārapātiyam pakkhipitvā pamāṇameva bhuñjitvā purimatthero viya vasanaṭṭhānam pavisati. Tatiyaopi āgantvāva jānāti- “dve paṭhamam āgatā, aham pacchato”ti. Sopi dutiyaatthero viya bhuñjitvā katabhattakicco pattam dhovitvā vodakam katvā thavikāya osāpetvā āsanāni ukkhipitvā paṭisāmeti; pāniyaghaṭe vā paribhojaniyaghaṭe vā avasesam udakam chaḍḍetvā ghaṭe nikujjitvā avakkārapātiyam sace avasesabhattam hoti, tam vuttanayena jahitvā pātiṃ dhovitvā paṭisāmeti; bhattaggaṃ sammajjati. Tato kacavaram chaḍḍetvā sammajjanim ukkhipitvā upacikāhi muttaṭṭhāne ṭhapetvā pattacivaramā-dāya vasanaṭṭhānam pavisati. Idam therānam bahivihāre araṇṇe bhattakiccakaraṇaṭṭhāne bhojanasālāyam vattam. Idam sandhāya, “yo pacchā”ti-ādi vuttam.

**Yo passatīti-**ādi pana nesam antovihāre vattanti veditabbam. Tattha **vaccagha-**ṭanti ācamanakumbhiṃ. **Rittanti** rittakam. **Tucchanti** tasseva vevacanam. **Avisa-**yhanti ukkhipitum asakkuṇeyyam, atibhāriyam. **Hatthavikārenāti** hatthasaññāya. Te kira pāniyaghaṭādīsu yaṃkiñci tucchakam gahetvā pokkharanim gantvā anto ca bahi ca dhovitvā udakam parissāvetvā tīre ṭhapetvā aññam bhikkhum hatthavikārena āmantenti, odissa vā anodissa vā saddam na karonti. Kasmā odissa saddam na karonti? Tam bhikkhum saddo bādheyyāti. Kasmā anodissa saddam na karonti? Anodissa sadde dinne, “aham pure, aham pure”ti dvepi nikkhameyyum, tato dvīhi kattabbakamme tatiyassa kammacchedo bhavēya. Saṃyatapada-saddo pana hutvā aparassa bhikkhuno divāṭṭhānasantikam gantvā tena diṭṭha-bhāvam ṇatvā hatthasaññam karoti, tāya saññāya itaro āgacchati, tato dve janā hatthena hattham saṃsibbantā dvīsu hatthesu ṭhapetvā upaṭṭhāpenti. Tam sandhāyāha- “hatthavikārena dutiyaṃ āmantetvā hatthavilaṅghakena upaṭṭhāpē-mā”ti.

**Pañcāhikam kho panāti** cātuddase pannarase aṭṭhamiyanti idam tāva pakatidhammassavanameva, tam akhaṇḍam katvā pañcame pañcame divase dve therā nātivikāle nhāyitvā anuruddhattherassa vasanaṭṭhānam gacchanti. Tattha tayopi nisīditvā tiṇṇam piṭakānam aññatarasmim aññamaññam pañham pucchanti (2.0145) aññamaññam vissajjenti, tesam evam karontānamyeva aruṇam uggacchati. Tam sandhāyetaṃ vuttam. Ettāvatā therena bhagavatā appamādalakkhaṇam pucchi-tena pamādaṭṭhānesuyeva appamādalakkhaṇam vissajjitaṃ hoti. Aññesañhi bhikkhūnam bhikkhācāram pavisanakālo, nikkhamanakālo, nivāsanaparivattanam, civarapārupanam, antogāme piṇḍāya caraṇam dhammakathanam, anumodanam, gāmato nikkhamitvā bhattakiccakaraṇam, pattadhovanam, patta-osāpanam, pattacivarapaṭisāmananti papañcakaraṇaṭṭhānāni etāni. Tasmā thero amhākam ettakam ṭhānam muñcitvā pamādakālo nāma natthīti dassento pamādaṭṭhānesuyeva appamādalakkhaṇam vissajjesi.

**328.** Athassa bhagavā sādhu-kāram datvā paṭhamajjhānam pucchanto puna

**atthi pana voti-ādimāha.** Tattha **uttari manussadhammāti** manussadhammato uttari. **Alamariyañāṇadassanaviseso** Ti ariyabhāvakaṇṇasamattho ñāṇaviseso. **Kiñhi no siyā, bhanteti** kasmā, bhante, nādhigato bhavissati, adhigatoyevāti. **Yāva devāti** yāva eva.

**329.** Evaṃ paṭhamajjhānādhigame byākate dutiyajjhānādīni pucchanto **etassa pana voti-ādimāha.** Tattha **samatikkamāyāti** samatikkamatthāya. **Paṭippassaddhiyāti** paṭippassaddhatthāya. Sesam sabbattha vuttanayeneva veditabbaṃ. Pacchi-mapañhe pana lokuttarañāṇadassanavasena adhigataṃ nirodhasamāpattiṃ pucchanto **alamariyañāṇadassanavisesoti** āha. Theropi pucchānurūpeneva byākāsi. Tattha yasmā vedayitasukhato avedayitasukhaṃ santataraṃ paṇītataraṃ hoti, tasmā **aññaṃ phāsuvihāraṃ uttaritaraṃ vā paṇītataraṃ vā na samanupassā-māti** āha.

**330. Dhammiyā kathāyā** Ti sāmaggirasānisamaṃsappaṭisamaṃyuttāya dhammiyā kathāya. Sabbepi te catūsu saccesu pariniṭṭhitakiccā, tena tesam paṭivedhatthāya kiñci kathetabbaṃ natthi. Sāmaggirasena pana ayañca ayañca ānisamaṃsoti sāmaggirasānisamaṃsameva nesam bhagavā kathesi. **Bhagavantaṃ anusamaṃyāyitvāti** anugantvā. Te kira bhagavato pattacīvaraṃ gahetvā thokaṃ (2.0146) agamaṃsu, atha bhagavā vihārassa pariveṇapariyantaṃ gatakāle, “āharatha me pattacīvaraṃ, tumhe idheva tiṭṭhathā” ti pakkāmi. **Tato paṭinivattitvāti** tato ṭhitatṭhānato nivattitvā. **Kiṃ nu kho mayaṃ āyasmato** ti bhagavantaṃ nissāya pabbajjādīni adhigantvāpi attano guṇakathāya aṭṭiyamānā adhigamappicchatāya āhaṃsu. **Imāsañca imāsa-ñcāti** paṭhamajjhānādīnaṃ lokiyalokuttarānaṃ. **Cetasā ceto paricca viditoti** ajja me āyasmanto lokiyasamāpattiyā vītināmesuṃ, ajja lokuttarāyāti evaṃ cittena cittaṃ paricchinditvā viditaṃ. **Devatāpi meti**, bhante anuruddha, ajja ayyo nandiyatthero, ajja ayyo kimilatthero imāya ca imāya ca samāpattiyā vītināmesīti evamāroce-sunti attho. **Pañhābhipuṭṭhenāti** tampi mayā sayam viditanti vā devatāhi ārocitanti vā ettakeneva mukhaṃ me sajjanti kathaṃ samuṭṭhāpetvā aputṭheneva me na kathitaṃ. Bhagavatā pana pañhābhipuṭṭhena pañhaṃ abhipucchitena satā byākataṃ, tatra me kiṃ na rocathāti āha.

**331. Dīghoti** “maṇi māṇivaro dīgho, atho serīsako sahā” ti (dī. ni. 3.293) evaṃ āgato aṭṭhavīsatiyā yakkhasenāpatīnaṃ abhantaro eko devarājā. **Parajanoti** tasseva yakkhassa nāmaṃ. **Yena bhagavā tenupasaṅkamīti** so kira vessavaṇena pesito etaṃ ṭhānaṃ gacchanto bhagavantaṃ sayam pattacīvaraṃ gahetvā giñja-kāvasathato gosiṅgasālavanassa antare disvā bhagavā attanā pattacīvaraṃ gahetvā gosiṅgasālavane tiṇṇaṃ kulaputtānaṃ santikaṃ gacchati. Ajja mahatī dhammadesanā bhavissati. Mayāpi tassā desanāya bhāginā bhavitabbanti adissamānena kāyena satthu padānupadiko gantvā avidūre ṭhatvā dhammaṃ sutvā satthari gacchantepi na gato,- “ime therā kiṃ karissanti” ti dassanattaṃ pana tattheva ṭhito. Atha te dve there anuruddhattheraṃ paliveṭhente disvā,- “ime therā bhagavantaṃ nissāya pabbajjādayo sabbaguṇe adhigantvāpi bhagavatova maccharāyanti, na sahanti, ativiya niliyanti paṭicchādenti, na dāni tesam paṭicchādetuṃ dassāmi, pathavito yāva (2.0147) brahmalokā etesaṃ guṇe pakāsessā-

mī”ti cintetvā yena bhagavā tenupasaṅkama.

**Lābhā vata, bhanteti** ye, bhante, vajjiraṭṭhavāsino bhagavantañca ime ca tayo kulaputte passituṃ labhanti, vandituṃ labhanti, deyyadhammaṃ dātuṃ labhanti, dhammaṃ sotuṃ labhanti, tesam lābhā, bhante, vajjīnanti attho. **Saddaṃ sutvāti** so kira attano yakkhānubhāvena mahantaṃ saddaṃ katvā sakalaṃ vajjiraṭṭhaṃ ajjhottharanto taṃ vācaṃ nicchāresi. Tena cassa tesu rukkhapabbatādīsu adhi-vatthā bhummā devatā saddaṃ assosuṃ. Taṃ sandhāya vuttaṃ- “saddaṃ sutvā”-ti. **Anussāvesunti** mahantaṃ saddaṃ sutvā sāvesuṃ. Esa nayo sabbattha. **Yāva brahmalokāti** yāva akaniṭṭhabrahmalokā. **Tañcepi kulanti**, “amhākaṃ kulato nikkhamitvā ime kulaputtā pabbajitā evaṃ sīlavanto guṇavanto ācārasampannā kalyāṇadhammā”ti evaṃ tañcepi kulaṃ ete tayo kulaputte pasannacittaṃ anussareyyāti evaṃ sabbattha attho daṭṭhabbo. Iti bhagavā yathānusandhināva desanaṃ niṭṭhapesīti.

Papañcasūdanīyā majjhimanikāyaṭṭhakathāya

Cūḷagosīṅgasuttavaṇṇanā niṭṭhitā.

## 2. Mahāgosīṅgasuttavaṇṇanā

**332. Evaṃ me sutanti** mahāgosīṅgasuttaṃ. Tattha **gosīṅgasālavanadāyeyi** idaṃ vasanaṭṭhānadassanattaṃ vuttaṃ. Aññesu hi suttesu, “sāvattiyaṃ viharati jeta-vane anāthapiṇḍikassa ārāme”ti evaṃ paṭhamaṃ gocaragāmaṃ dassetvā pacchā vasanaṭṭhānaṃ dasseti. Imasmiṃ pana mahāgosīṅgasutte bhagavato gocaragāmo anibandho, kocideva gocaragāmo bhavissati. Tasmā vasanaṭṭhāna-meva paridīpitaṃ. Araññanidānakaṃ nāmetaṃ suttanti. **Sambahulehīti** bahukeyhi. **Abhiññātehi abhiññātehīti** sabbattha vissutehi pākaṭehi. **Therehi sāvakehi saddhīti** pātimokkhasaṃvarādīhi thirakārakeyeva dhammehi samannāgatattā therehi, savanante jātattā sāvakehi saddhiṃ ekato. Idāni te there (2.0148) sarū-pato dassento, **āyasmatā ca sārīputtenāti**-ādimāha. Tathāyasmā sārīputto attano sīlādīhi guṇehi buddhasāsane abhiññāto. Cakkhumantānaṃ gaganamajjhe ṭhito sūriyo viya cando viya, samuddatīre ṭhitānaṃ sāgaro viya ca pākaṭo paññāto. Na kevalañcassa imasmiṃ sutte āgataguṇavaseneva mahantatā veditabbā, ito aññesaṃ dhammadāyādasuttaṃ anaṅgaṇasuttaṃ sammādiṭṭhisuttaṃ sīhanāda-suttaṃ rathavinītaṃ mahāhatthipadopamaṃ mahāvedallaṃ cātumasuttaṃ dīgha-nakhaṃ anupadasuttaṃ sevītabbāsevitabbasuttaṃ saccavibhaṅgasuttaṃ piṇḍa-pātapārisuddhi sampasādaniyaṃ saṅgītisuttaṃ dasuttarasuttaṃ pavāraṇāsuttaṃ (saṃ. ni. 1.215 ādayo) susimasuttaṃ therapañhasuttaṃ mahāniddeho paṭisa-mbhīdāmaggo therasīhanādasuttaṃ abhinikkhamaṃ etadagganti imesampi suttānaṃ vasena therassa mahantatā veditabbā. Etadaggasmiñhi, “etadaggaṃ,

bhikkhave, mama sāvakānaṃ bhikkhūnaṃ mahāpaññaṃ yadidaṃ sāriputto”ti (a. ni. 1.188-189) vuttaṃ.

**Mahāmoggallāno**pi sīlādiguṇehi ceva imasmiṃ sutte āgataguṇehi ca thero viya abhiññāto pākaṭo mahā. Apicassa anumānasuttaṃ, cūḷataṇhāsaṅkhayasuttaṃ māratajjaniyasuttaṃ pāsādakampanaṃ sakalaṃ iddhipādasamyuttaṃ nandopana-ndadamaṇaṃ yamakapāṭihāriyakāle devalokagamaṇaṃ vimānavatthu petavatthu therassa abhinikkhamaṇaṃ etadagganti imesampi vasena mahantabhāvo veditabbo. Etadaggasmiñhi, “etadaggaṃ, bhikkhave, mama sāvakānaṃ bhikkhūnaṃ iddhimantānaṃ yadidaṃ mahāmoggallāno”ti (a. ni. 1.190) vuttaṃ.

**Mahākassapo**pi sīlādiguṇehi ceva imasmiṃ sutte āgataguṇehi ca thero viya abhiññāto pākaṭo mahā. Apicassa cīvaraparivattanasuttaṃ jīṇṇacīvarasuttaṃ (saṃ. ni. 2.154 ādayo) candopamaṃ sakalaṃ kassapasamyuttaṃ mahā-ariyavaṃsa-suttaṃ therassa abhinikkhamaṇaṃ etadagganti imesampi vasena mahantabhāvo veditabbo. Etadaggasmiñhi, “etadaggaṃ, bhikkhave, mama sāvakānaṃ bhikkhūnaṃ dhutavādānaṃ yadidaṃ mahākassapo”ti (a. ni. 1.191) vuttaṃ.

**Anuruddhatthero**pi (2.0149) sīlādiguṇehi ceva imasmiṃ sutte āgataguṇehi ca thero viya abhiññāto pākaṭo mahā. Apicassa cūḷagosīṅgasuttaṃ naḷakapāna-suttaṃ anuttariyasuttaṃ upakkilesasuttaṃ anuruddhasamyuttaṃ mahāpurisavita-kkasuttaṃ therassa abhinikkhamaṇaṃ etadagganti imesampi vasena mahanta-bhāvo veditabbo. Etadaggasmiñhi, “etadaggaṃ, bhikkhave, mama sāvakānaṃ bhikkhūnaṃ dibbacakkhukānaṃ yadidaṃ anuruddho”ti (a. ni. 1.192) vuttaṃ.

**Āyasmatā ca revatenāti** ettha pana dve revatā khadiravaniyarevato ca kaṅkhārevato ca. Tattha khadiravaniyarevato dhammasenāpatittherassa kaniṭṭhabhātiko, na so idha adhippeto. “Akappiyo guḷo, akappiyā muggā”ti (mahāva. 272) evaṃ kaṅkhābahulo pana thero idha revatoti adhippeto. Sopi sīlādiguṇehi ceva imasmiṃ sutte āgataguṇehi ca thero viya abhiññāto pākaṭo mahā. Apicassa abhinikkhama-nenapi etadaggenapi mahantabhāvo veditabbo. Etadaggasmiñhi, “etadaggaṃ, bhikkhave, mama sāvakānaṃ bhikkhūnaṃ jhāyīnaṃ yadidaṃ kaṅkhārevato”ti (a. ni. 1.204) vuttaṃ.

**Ānandatthero**pi sīlādiguṇehi ceva imasmiṃ sutte āgataguṇehi ca thero viya abhiññāto pākaṭo mahā. Apicassa sekkhasuttaṃ bāhitikasuttaṃ āneñjasappāyaṃ gopakamoggallānaṃ bahudhātukaṃ cūḷasuññaṭaṃ mahāsuññaṭaṃ acchariya-bbhusuttaṃ bhaddekarattaṃ mahānidānaṃ mahāparinibbānaṃ subhasuttaṃ cūḷaniyalokadhātusuttaṃ abhinikkhamaṇaṃ etadagganti imesampi vasena mahanta-bhāvo veditabbo. Etadaggasmiñhi, “etadaggaṃ, bhikkhave, mama sāvakānaṃ bhikkhūnaṃ bahussutānaṃ yadidaṃ ānando”ti (a. ni. 1.219-223) vuttaṃ.



**Aññehi ca abhiññātehi abhiññātehīti** na kevalañca eteheva, aññehi ca mahāgu-  
natāya pākaṭehi abhiññātehi bahūhi therehi sāvakehi saddhiṃ bhagavā gosīṅga-  
sālavanadāye viharatīti attho. Āyasmā hi sārīputto sayamaṃ mahāpañño aññepi  
bahū mahāpaññe bhikkhū gahetvā tadā dasabalaṃ parivāretvā vihāsi. Āyasmā (2.01  
mahāmoggallāno sayamaṃ iddhimā, āyasmā mahākassapo sayamaṃ dhutavādo,  
āyasmā anuruddho sayamaṃ dibbacakkhuko, āyasmā revato sayamaṃ jhānābhirato,  
āyasmā ānando sayamaṃ bahussuto aññepi bahū bahussute bhikkhū gahetvā tadā  
dasabalaṃ parivāretvā vihāsi, evamaṃ tadā ete ca aññe ca abhiññātā mahātherā  
tiṃsasahassamattā bhikkhū dasabalaṃ parivāretvā vihariṃsūti veditabbā.

**Paṭisallānā vuṭṭhitoti** phalasaṃpattivivekato vuṭṭhito. **Yenāyasmā mahākassapo**  
**tenupasaṅkamīti** therō kira paṭisallānā vuṭṭhito pacchimalokadhātuṃ olokento  
vanante kīḷantassa mattakhattiyassa kaṇṇato patamaṇaṃ kuṇḍalaṃ viya, saṃha-  
ritvā samugge pakkhipamaṇaṃ rattakambalaṃ viya, maṇināgadantato pata-  
maṇaṃ satahassagghanikaṃ suvaṇṇapāṭiṃ viya ca atthaṃ gacchamaṇaṃ  
paripuṇṇapaṇṇāsayaṃ sūriyamaṇḍalaṃ addasa. Tadanantaraṃ pācīnaloka-  
dhātuṃ olokento nemiyaṃ gahetvā parivattayamaṇaṃ rajatacakkamaṃ viya, rajata-  
kūṭato nikkhamantaṃ khīradhārāmaṇḍalaṃ viya, sapakkhe papphoṭetvā gaganatale  
pakkhandamaṇaṃ setahaṃsaṃ viya ca meghavaṇṇāya samuddakucchito  
uggantvā pācīnacakkavālapabbatamatthake sasalakkaṇappaṭimaṇḍitaṃ ekūna-  
paṇṇāsayaṃ candamaṇḍalaṃ addasa. Tato sālavanaṃ olokesi. Tasmīhi  
samaye sālārakkhā mūlato paṭṭhāya yāva aggā sabbapāliphullā dukūlapārutā viya,  
muttākālāpavinaddhā viya ca virocīṃsu. Bhūmitalaṃ pupphasantharapūjāya paṭi-  
maṇḍitaṃ viya, tattha tattha nipatantena pupphareṇunā lākhārasena siṅcamānaṃ  
viya ca ahosi. Bhamaramadhukaragaṇā kusumareṇumadamattā upagāyamānā  
viya vanantaresu vicaranti. Tadā ca uposathadivaso hoti. Atha therō, “kāya nu  
kho ajja ratiyā vītināmessāmī”ti cintesi, ariyasāvaka ca nāma piyadhammassa-  
vanā honti. Athassa etadahosi- “ajja mayhaṃ jeṭṭhabhātīkassa dhammasenāpati-  
ttherassa santikaṃ gantvā dhammaratiyā vītināmessāmī”ti. Gacchanta pana eka-  
kova agantvā “mayhaṃ piyasahāyaṃ mahākassapattheraṃ gahetvā gamissāmī”-  
ti nisinnaṭṭhānato vuṭṭhāya cammakhaṇḍaṃ papphoṭetvā yenāyasmā mahāka-  
ssapo tenupasaṅkami.

**Evamāvusoti** (2.0151) **kho āyasmā mahākassapoti** theropi yasmā piyadhamma-  
ssavanova ariyasāvako, tasmā tassa vacanaṃ sutvā gacchāvuso, tvaṃ, mayhaṃ  
sīsaṃ vā rujjati piṭṭhi vāti kiñci lesāpadesaṃ akatvā tuṭṭhahadayova, “evamāvuso”-  
ti-ādimāha. Paṭissutvā ca nisinnaṭṭhānato vuṭṭhāya cammakhaṇḍaṃ papphoṭetvā  
mahāmoggallānaṃ anubandhi. Tasmīṃ samaye dve mahātherā paṭipāṭiyā ṭhitāni  
dve candamaṇḍalāni viya, dve sūriyamaṇḍalāni viya, dve chaddantanāgarājāno  
viya, dve sīhā viya, dve byagghā viya ca virocīṃsu. Anuruddhattheropi tasmīṃ  
samaye divāṭṭhāne nisinnaṃ dve mahāthere sārīputtattherassa santikaṃ gacchante  
disvā pacchimalokadhātuṃ olokento sūriyaṃ vanantaṃ pavisaṃtaṃ viya, pācīnalo-  
kadhātuṃ olokento candaṃ vanantato uggacchantaṃ viya, sālavanaṃ olokento  
sabbapāliphullameva sālavanañca disvā ajja uposathadivaso, ime ca me jeṭṭha-

bhātikā dhammasenāpatissa santikaṃ gacchanti, mahantena dhammassavanena bhavitabbaṃ, ahampi dhammassavanassa bhāgī bhavissāmi nisinnaṭṭhānato vuṭṭhāya cammakhaṇḍaṃ papphoṭetvā mahātherānaṃ padānupadiko hutvā nikkhami. Tena vuttaṃ- “atha kho āyasmā ca mahāmoggallāno āyasmā ca mahā-kassapo āyasmā ca anuruddho yenāyasmā sārīputto tenupasaṅkamiṃsū” ti. **Upasa-ṅkamiṃsūti.** Paṭipāṭiyā ṭhitā tayo candā viya, sūriyā viya, sīhā viya ca virocamānā upasaṅkamiṃsu.

**333.** Evaṃ upasaṅkamante pana te mahāthere āyasmā ānando attano divā-ṭṭhāne nisinnoyeva disvā, “ajja mahantaṃ dhammassavanaṃ bhavissati, mayāpi tassa bhāginā bhavitabbaṃ, na kho pana ekakova gamissāmi, mayhaṃ piyasaḥā-yampi revatattheraṃ gahetvā gamissāmi” ti sabbaṃ mahāmoggallānassa mahāka-ssapassa anuruddhassa upasaṅkamane vuttanayeneva vitthārato veditabbaṃ. Iti te dve janā paṭipāṭiyā ṭhitā dve candā viya, sūriyā viya, sīhā viya ca virocamānā upasaṅkamiṃsu. Tena vuttaṃ- “addasā kho āyasmā sārīputto” ti-ādi. **Disvāna āya-smantaṃ ānandaṃ etadavocāti** dūratova disvā anukkamena kathā-upacāraṃ sampattametaṃ, “etu kho āyasmā” ti-ādivacanaṃ avoca. **Ramaṇiyam, āvusoti** ettha duvidhaṃ rāmaṇeyyakaṃ vanarāmaṇeyyakaṃ puggalarāmaṇeyyakaṃ. Tattha vanaṃ nāma nāgasalaḥasālacampakādīhi (2.0152) sañchannaṃ hoti bahalacchāyaṃ pupphaphalūpagaṃ vividharukkhaṃ udakasampannaṃ gāmato nissaṭaṃ, idaṃ vanarāmaṇeyyakaṃ nāma. Yaṃ sandhāya vuttaṃ-

“Ramaṇiyāni araṅṅāni, yattha na ramatī jano;

vītarāgā ramissanti, na te kāmagavesino” ti. (dha. pa. 99);

Vanaṃ pana sacepi ujaṅgale hoti nirudakaṃ viralacchāyaṃ kaṅṭakasamā-kiṅṇaṃ, buddhādayopettha ariyā viharanti, idaṃ puggalarāmaṇeyyakaṃ nāma. Yaṃ sandhāya vuttaṃ-

“Gāme vā yadi vāraṅṅe, ninne vā yadi vā thale;

yattha arahanto viharanti, taṃ bhūmirāmaṇeyyakan” ti. (dha. pa. 98);

Idha pana taṃ duvidhampi labbhati. Tadā hi gosiṅgasālavanaṃ sabbapāli-phullaṃ hoti kusumagandhasugandhaṃ, sadevake cettha loke aggapuggalo sammāsambuddho tiṃsasahassamattehi abhiṅṅātabhikkhūhi saddhiṃ viharati. Taṃ sandhāya vuttaṃ- “ramaṇiyam, āvuso ānanda, gosiṅgasālavanam” ti.

**Dosināti** dosāpagatā, abbaṃ mahikā dhūmo rajo rāhūti imehi pañcahi upakki-lesehi virahitāti vuttaṃ hoti. **Sabbapāliphullāti** sabbattha pāliphullā, mūlato paṭṭhāya yāva aggā apupphitaṭṭhānaṃ nāma natthi. **Dibbā maṅṅe gandhā sampavanti** dibbā mandārapupphakoviḷārapāricchattakacandanacuṅṅagandhā viya samantā pavāyanti, sakkasuyāsantusitanimmānaratiparanimmitamahābrahmānaṃ otiṅṅaṭṭhānaṃ viya vāyantīti vuttaṃ hoti.

**Kathaṃrūpena, āvuso ānandāti** ānandatthero tesam pañcannaṃ therānaṃ saṅghanavakova. Kasmā thero taṃyeva paṭhamam pucchatīti? Mamāyitattā. Te hi dve therā aṅṅamaṅṅaṃ mamāyiṃsu. Sārīputtatthero, “mayā kattabbaṃ satthu upaṭṭhānaṃ karotī” ti ānandattheraṃ mamāyi. Ānandatthero bhagavato sāvā-kānaṃ aggoti sārīputtattheraṃ mamāyi, kuladārake pabbājetvā sārīputtattherassa

santike upajjhaṃ gaṇhāpesi. Sāriputtattheropi tatheva akāsi. Evaṃ ekamekena attano pattacīvaraṃ (2.0153) datvā pabbājetvā upajjhaṃ gaṇhāpitāni pañca bhikkhusatāni ahesuṃ. Āyasmā ānando paṇṭitāni cīvarādīnīpi labhitvā therasseva deti.

Eko kira brāhmaṇo cintesi- “buddharatanassa ca saṅgharatanassa ca pūjā paññāyati, kathaṃ nu kho dhammaratanaṃ pūjitaṃ nāma hoti”ti? So bhagavantaṃ upasaṅkamitvā etamatthaṃ pucchi. Bhagavā āha- “sacesi, brāhmaṇa, dhammaratanaṃ pūjitukāmo, ekaṃ bahussutaṃ pūjehi”ti bahussutaṃ, bhante, ācikkhathāti bhikkhusaṅghaṃ pucchati. So bhikkhusaṅghaṃ upasaṅkamitvā bahussutaṃ, bhante, ācikkhathāti āha. Ānandatthero brāhmaṇāti. Brāhmaṇo therā saḥassagghanikena cīvarena pūjesi. Thero taṃ gahetvā bhagavato santikaṃ agamāsi. Bhagavā “kuto, ānanda, laddhan”ti āha. Ekena, bhante, brāhmaṇena dinnaṃ, idaṃ panāhaṃ āyasmato sāriputtassa dātukāmoti. Dehi, ānandāti. Cārikaṃ pakkanto, bhanteti. Āgatakāle dehīti. Sikkhāpadaṃ, bhante, paññattanti. Kadā pana sāriputto āgamissatīti? Dasāhamattena, bhanteti. “Anujānāmi, ānanda, dasāhaparamaṃ atirekacīvaraṃ nikkhipitun”ti (pārā. 461; mahāva. 347) sikkhāpadaṃ paññapesi. Sāriputtattheropi tatheva yaṃkiñci manāpaṃ labhati, taṃ ānandattherassa deti. Evaṃ te therā aññamaññaṃ mamāyimsu, iti mamāyitattā paṭhamaṃ pucchi.

Apica anumati-pucchā nāmesā khuddakato paṭṭhāya pucchitabbā hoti. Tasmā thero cintesi- “ahaṃ paṭhamaṃ ānandaṃ pucchissāmi, ānando attano paṭibhānaṃ byākarissati. Tato revataṃ, anuruddhaṃ, mahākassapaṃ, mahāmoggallānaṃ pucchissāmi. Mahāmoggallāno attano paṭibhānaṃ byākarissati. Tato pañcapi therā maṃ pucchissanti, ahampi attano paṭibhānaṃ byākarissāmi”ti. Ettāvatāpi ayaṃ dhammadesanā sikhāppattā vepullappattā na bhavissati, atha mayaṃ sabbepi dasabalaṃ upasaṅkamitvā pucchissāma, satthā sabbaññutaññaṇena byākarissati. Ettāvatā ayaṃ dhammadesanā sikhāppattā vepullappattā bhavissati. Yathā hi janapadamhi uppanno aṭṭo gāmaḥojakaṃ pāpuṇāti, tasmīṃ nicchitūṃ asakkante janapadabhojakaṃ pāpuṇāti, tasmīṃ asakkante mahāvini-cchaya-amaccaṃ, tasmīṃ asakkante (2.0154) senāpatiṃ, tasmīṃ asakkante uparājaṃ, tasmīṃ vinicchitūṃ asakkante rājānaṃ pāpuṇāti, rañña vinicchitakālato paṭṭhāya aṭṭo aparāparaṃ na sañcarati, rājavacaneneva chijjati. Evamevaṃ ahañhi paṭhamaṃ ānandaṃ pucchissāmi ...pe... atha mayaṃ sabbepi dasabalaṃ upasaṅkamitvā pucchissāma, satthā sabbaññutaññaṇena byākarissati. Ettāvatā ayaṃ dhammadesanā sikhāppattā vepullappattā bhavissati. Evaṃ anumati-pucchāṃ pucchanto thero paṭhamaṃ ānandattheraṃ pucchi.

**Bahussuto hotīti** bahu assa sutāṃ hoti, navaṅgaṃ satthusāsanaṃ pāḷi-anusandhipubbāparavasena uggahitaṃ hotīti attho. **Sutadharoti** sutassa ādhārabhūto. Yassa hi ito gahitaṃ ito palāyati, chiddaghaṭṭe udakaṃ viya na tiṭṭhati, parisamajjhe ekaṃ suttaṃ vā jātakaṃ vā kathetaṃ vā vācetaṃ vā na sakkoti, ayaṃ **na sutadharo** nāma. Yassa pana uggahitaṃ buddhavadanaṃ uggahitakālasadisameva hoti, dasapi vīsati vassāni sajjhāyaṃ akarontassa na nassati, ayaṃ **suta-**

**dharo** nāma. **Sutasannicayoti** sutassa sannicayabhūto. Yathā hi sutam hadayamañjūsāya sannicitaṃ silāyaṃ lekhā viya, suvaṇṇaghaṭe pakkhittasiḥavasā viya ca ajjhosāya tiṭṭhati, ayam **sutasannicayo** nāma. **Dhātāti** ṭhitā paguṇā. Ekaccassa hi uggahitaṃ buddhavacanaṃ dhātaṃ paguṇaṃ niccalitaṃ na hoti, asukasuttaṃ vā jātaṃ vā kathehīti vutte sajjhāyitvā saṃsanditvā samanuggāhitvā jānissāmīti vadati. Ekaccassa dhātaṃ paguṇaṃ bhavaṅgasotasadisamaṃ hoti, asukasuttaṃ vā jātaṃ vā kathehīti vutte uddharitvā tameva katheti. Taṃ sandhāya vuttaṃ “dhātā”ti.

**Vacasā paricitāti** suddhasaka-vaggadasaka-paṇṇāsadasakānaṃ vasena vācāya sajjhāyitā. **Manasānupekkhitāti** cittaṃ anupekkhitā, yassa vācāya sajjhāyitaṃ buddhavacanaṃ manasā cintentassa tattha tattha pākaṭaṃ hoti. Mahādīpaṃ jāletvā ṭhitassa rūpagataṃ viya paññāyati. Taṃ sandhāya vuttaṃ- “vacasā paricitā manasānupekkhitā”ti. **Diṭṭhiyā suppaṭividdhāti** atthato ca kāraṇato ca paññāya suppaṭividdhā. **Parimaṇḍalehi** (2.0155) **padabyañjanehīti** ettha padaṃ meva atthassa byañjanato padabyañjanaṃ, taṃ akkharapāripūriṃ katvā dasavi-dhabyañjanabuddhiyo aparihāpetvā vuttaṃ parimaṇḍalaṃ nāma hoti, evarūpehi padabyañjanehīti attho. Apica yo bhikkhu parisati dhammaṃ desento suttaṃ vā jātaṃ vā nikkhapitvā aññaṃ upārambhakaraṃ suttaṃ āharati, tassa upamaṃ katheti, tadatthaṃ ohāreti, evamidaṃ gahetvā ettha khipanto ekapasseneva pariharanto kālaṃ ṇatvā vuṭṭhahati. Nikkhittasuttaṃ pana nikkhattamattameva hoti, tassa kathā aparimaṇḍalā nāma hoti. Yo pana suttaṃ vā jātaṃ vā nikkhapitvā bahi ekapadampi agantvā pāḷiyā anusandhiñca pubbāparañca amakkhento ācariyehi dinnanaye ṭhatvā tulikāya paricchindanto viya, gambhīramātikāya udakaṃ pesento viya, padaṃ koṭṭento sindhavājāniyo viya gacchati, tassa kathā parimaṇḍalā nāma hoti. Evarūpiṃ kathaṃ sandhāya- “parimaṇḍalehi padabyañjanehī”ti vuttaṃ.

**Anuppabandhehīti** ettha yo bhikkhu dhammaṃ kathento suttaṃ vā jātaṃ vā ārabhitvā āradhakālaṃ paṭṭhāya turitaturito araṇiṃ

manthento viya, uṇhakhādaniyaṃ khādanto viya, pāḷiyā anusandhipubbāparesu gahitaṃ gahitameva aggahitaṃ aggahitameva ca katvā purāṇapaṇṇantaressu caramānaṃ godhaṃ uṭṭhapento viya tattha tattha paharanto osāpento ohāya gacchati. Yopi dhammaṃ kathento kālena sīghaṃ kālena dandhaṃ kālena mahāsaddaṃ kālena khuddakasaddaṃ karoti. Yathā petaggi kālena jalati, kālena nibbāyati, evameva idha **petaggidhammakathiko** nāma hoti, parisāya uṭṭhātukāmāya puna ppunaṃ ārabhati. Yopi kathento tattha tattha vitthāyati, nitthunanto kandanto viya katheti, imesaṃ sabbesampi kathā appabandhā nāma hoti. Yo pana suttaṃ ārabhitvā ācariyehi dinnanaye ṭhito acchinnadhāraṃ katvā nadīsotaṃ viya pavatteti, ākāsaṅgato bhassamānaṃ udakaṃ viya nirantaraṃ kathaṃ pavatteti, tassa kathā anuppabandhā hoti. Taṃ sandhāya vuttaṃ (2.0156) “anuppabandhehi”ti. **Anusayasamugghātāyāti** sattannaṃ anusayānaṃ samugghātathāya. **Evarūpenāti** evarūpena bahussutena bhikkhunā tathārūpeneva bhikkhusatena bhikkhusahassena vā saṅghāṭikaṇṇena vā saṅghāṭikaṇṇaṃ, pallaṅkena vā pallaṅkaṃ āhacca nisinnena gosiṅgasālavanaṃ sobheyya. Iminā nayena sabbavāresu attho veditabbo.

**334.** Paṭisallānaṃ assa ārāmoti **paṭisallānārāmo**. Paṭisallāne ratoti **paṭisallānārato**.

**335.** **Sahassaṃ lokānanti** sahassaṃ lokadhātūnaṃ. Ettakañhi therassa dhuvassevanaṃ āvajjanapaṭibaddhaṃ, ākaṅkhamāno pana thero anekānipi cakkavāḷasahassāni voloketiyeva. **Uparipāsādavaragatoti** sattabhūmakassa vā navabhūmakassa vā pāsādavarassa upari gato. **Sahassaṃ nemimaṇḍalānaṃ volokeyyāti** pāsādapariveṇe nābhiyā patitṭhitānaṃ nemivaṭṭiyā nemivaṭṭiṃ āhacca ṭhitānaṃ nemimaṇḍalānaṃ sahassaṃ vātapānaṃ vivarivā olokeyya, tassa nābhiyopi pākaṭā honti, arāpi arantarānipi nemiyopi. **Evameva kho, āvusoti, āvuso,** evaṃ ayampi dibbacakkhuko bhikkhu dibbena cakkhunā atikkantamānusakena sahassaṃ lokānaṃ voloketi. Tassa pāsāde ṭhitapurisassa cakkanābhiyo viya cakkavāḷasahassee sinerusahassaṃ pākaṭaṃ hoti. Arā viya dīpā pākaṭā honti. Arantarāni viya dīpaṭṭhitamanussā pākaṭā honti. Nemiyo viya cakkavāḷapabbatā pākaṭā honti.

**336.** **Āraññikoti** samādiṇṇa-araññadhutaṅgo. Sesapadesupi eseva nayo.

**337.** **No ca saṃsādentīti** na osādenti. Sahetukañhi sakāraṇaṃ katvā pañhaṃ pucchitaṃ vissajjitumpi asakkonto saṃsādeti nāma. Evaṃ na karontīti attho. **Pavattinī hotīti** nadīsotodakaṃ viya pavattati.

**338.** **Yāya** (2.0157) **vihārasamāpattiyāti** yāya lokiyāya vihārasamāpattiyā, yāya lokuttarāya vihārasamāpattiyā.

**339.** **Sādhu sādhu sārīputtāti** ayaṃ sādhu kāro ānandattherassa dinno. Sārīputtattherena pana saddhiṃ bhagavā ālapati. Esa nayo sabbattha. **Yathā taṃ ānando vāti** yathā ānandova sammā byākaraṇamāno byākareyya, evaṃ byākataṃ ānandena attano anucchavikameva, ajjhāsayanurūpameva byākatanti attho. Ānandatthero hi attanāpi bahussuto, ajjhāsayopissa evaṃ hoti- “aho vata sāsane sabrahmacārī bahussutā bhavayyūn”ti. Kasmā? Bahussutassa hi kappiyākappiyaṃ

sāvajjānavajjaṃ, garukalahukamaṃ satekicchātekkicchaṃ pākaṭaṃ hoti. Bahussuto uggahitabuddhavaṇṇaṃ āvajjitvā imasmiṃ ṭhāne sīlaṃ kathitaṃ, imasmiṃ samādhi, imasmiṃ vipassanā, imasmiṃ maggaphalanibbānānīti sīlassa āgataṭṭhāne sīlaṃ pūretvā, samādhissa āgataṭṭhāne samādhiṃ pūretvā vipassanāya āgataṭṭhāne vipassanāgabbhaṃ gaṇhāpetvā maggaṃ bhāvetvā phalaṃ sacchikaroti. Tasmā therassa evaṃ ajjhāsayo hoti- “aho vata sabrahmacārī ekaṃ vā dve vā tayo vā cattāro vā pañca vā nikāye uggahetvā āvajjantā sīlādīnaṃ āgataṭṭhānesu sīlādīni paripūretvā anukkamena maggaphalanibbānāni sacchikareyyun”ti. Sesavāresupi eseva nayo.

**340.** Āyasmā hi revato jhānajjhāsayo jhānābhirato, tasmāssa evaṃ hoti- “aho vata sabrahmacārī ekikā nisīditvā kasiṇaparikkammaṃ katvā aṭṭha samāpattiyo nibbattetvā jhānapadaṭṭhānaṃ vipassanaṃ vaḍḍhetvā lokuttaradhammaṃ sacchikareyyun”ti. Tasmā evaṃ byākāsi.

**341.** Āyasmā anuruddho dibbacakkhuko, tassa evaṃ hoti- “aho vata sabrahmacārī ālokaṃ vaḍḍhetvā dibbena cakkhunā anekesu cakkavālasahassesu cava māne ca upapajjamāne ca satte disvā vaṭṭabhayena cittaṃ samvejetvā vipassanaṃ vaḍḍhetvā lokuttaradhammaṃ sacchikareyyun”ti. Tasmā evaṃ byākāsi.

**342.** Āyasmā mahākassapo dhutavādo, tassa evaṃ hoti- “aho vata sabrahmacārī dhutavādā hutvā dhutaṅgānubhāvena paccayataṇhaṃ milāpetvā aparepi nānappakāre kilese dhunitvā vipassanaṃ vaḍḍhetvā lokuttaradhammaṃ sacchikareyyun”ti. Tasmā evaṃ byākāsi.

**343.** Āyasmā (2.0158) mahāmoggallāno samādhipāramiyā matthakaṃ patto, sukhumamaṃ pana cittantaramaṃ khandhantaramaṃ dhātvantaramaṃ āyatanantaramaṃ jhānokkantikaṃ ārammaṇokkantikaṃ aṅgavavatthānaṃ ārammaṇavavatthānaṃ aṅga saṅkanti ārammaṇasaṅkanti ekatovaḍḍhanaṃ ubhatovaḍḍhananti ābhidhammikadhammakathikasēva pākaṭaṃ. Anābhidhammiko hi dhammaṃ kathento- “ayaṃ sakavādo ayaṃ paravādo”ti na jānāti. Sakavādaṃ dīpessāmīti paravādaṃ dīpeti, paravādaṃ dīpessāmīti sakavādaṃ dīpeti, dhammantaramaṃ viṣaṃvādeti. Ābhidhammiko sakavādaṃ sakavādaniyāmeneva, paravādaṃ paravādaniyāmeneva dīpeti, dhammantaramaṃ na viṣaṃvādeti. Tasmā therassa evaṃ hoti- “aho vata sabrahmacārī ābhidhammikā hutvā sukumesu ṭhānesu ñāṇaṃ otāretvā vipassanaṃ vaḍḍhetvā lokuttaradhammaṃ sacchikareyyun”ti. Tasmā evaṃ byākāsi.

**344.** Āyasmā sārīputto paññāpāramiyā matthakaṃ patto, paññavāyeva ca cittaṃ attano vase vattetuṃ sakkoti, na duppañño. Duppañño hi uppannassa cittassa vase vattetvā ito cito ca vipphanditvāpi katipāheneva gihibhāvaṃ patvā anayabyasanaṃ pāpuṇāti. Tasmā therassa evaṃ hoti- “aho vata sabrahmacārī acittavasikā hutvā cittaṃ attano vase vattetvā sabbānassa visevitavipphanditāni bhañjitvā isakampi bahi nikkhamituṃ adentā vipassanaṃ vaḍḍhetvā lokuttaradhammaṃ sacchikareyyun”ti. Tasmā evaṃ byākāsi.

**345. Sabbesaṃ vo, sārīputta, subhāsitaṃ pariyāyenā**ti sārīputta, yasmā saṅghārāmassa nāma bahussutabhikkhūhipi sobhanakāraṇaṃ atthi, jhānābhiratehipi, dibbacakkhukehipi, dhutavādehipi, ābhidhammikehipi, acittavasikehipi sobhanakā-

raṇaṃ atthi. Tasmā sabbesaṃ (2.0159) vo subhāsitaṃ pariyāyena, tena tena kāraṇena subhāsitameva, no dubbhāsitaṃ. **Apica mamapi suṇāthāti** apica mamapi vacanaṃ suṇātha. **Na tāvāhaṃ imaṃ pallaṅkaṃ bhindissāmi** na tāva ahaṃ imaṃ caturaṅgavīriyaṃ adhiṭṭhāya ābhujitaṃ pallaṅkaṃ bhindissāmi, na mocessāmi attho. Idaṃ kira bhagavā paripākagate ñāṇe rajjasiriṃ pahāya katābhinikkhamano anupubbena bodhimaṇḍaṃ āruya caturaṅgavīriyaṃ adhiṭṭhāya aparājita-pallaṅkaṃ ābhujitvā daḷhasamādāno hutvā nisinno tiṇṇaṃ mārānaṃ matthakaṃ bhinditvā paccūsasamaye dasasahasilokadhātuṃ unnādentō sabbaññuta-ññāṇaṃ paṭivijhi, taṃ attano mahābodhipallaṅkaṃ sandhāya evamāha. Apica pacchimaṃ janataṃ anukampamānopi paṭipattisāraṃ puthujjanakalyāṇakaṃ dassento evamāha. Passati hi bhagavā- “anāgate evaṃ ajjhāsaya kulaputtā iti paṭisañcikkhissanti, ‘bhagavā mahāgosiṅgasuttaṃ kathento idha, sāriputta, bhikkhu pacchābhattaṃ ...pe... evarūpena kho, sāriputta, bhikkhunā gosiṅgasālavanaṃ sobheyyāti āha, mayaṃ bhagavato ajjhāsayaṃ gaṇhissāmā’ti pacchābhattaṃ piṇḍapāta-paṭikkantā caturaṅgavīriyaṃ adhiṭṭhāya daḷhasamādānā hutvā ‘arahattaṃ appatvā imaṃ pallaṅkaṃ na bhindissāmā’ti samaṇadhammaṃ kātabbaṃ maññissanti, te evaṃ paṭipannā katipāheneva jātijarāmarāṇassa antaṃ karissanti”ti, imaṃ pacchimaṃ janataṃ anukampamāno paṭipattisāraṃ puthujjanakalyāṇakaṃ dassento evamāha. **Evarūpena kho, sāriputta, bhikkhunā gosiṅgasālavanaṃ sobheyyāti**, sāriputta, evarūpena bhikkhunā nippariyāyeneva gosiṅgasālavanaṃ sobheyyāti yathānusandhināva desanaṃ niṭṭhapesīti.

Papañcasūdaniyā majjhimanikāyaṭṭhakathāya

Mahāgosiṅgasuttavaṇṇanā niṭṭhitā.

### 3. Mahāgopālakasuttavaṇṇanā

**346. Evaṃ me sutanti** mahāgopālakasuttaṃ. Tattha tisso kathā ekanālikā, caturassā, nisinnavattikāti. Tattha pāḷiṃ vatvā ekekapadassa atthakathanaṃ **ekanaālikā** nāma. Apaṇḍitaṃ gopālakaṃ dassetvā, apaṇḍitaṃ (2.0160) bhikkhuṃ dassetvā, paṇḍitaṃ gopālakaṃ dassetvā, paṇḍitaṃ bhikkhuṃ dassetvāti catukkaṃ bandhitvā kathanaṃ **caturassā** nāma. Apaṇḍitaṃ gopālakaṃ dassetvā pariyosānagamaṇaṃ, apaṇḍitaṃ bhikkhuṃ dassetvā pariyosānagamaṇaṃ, paṇḍitaṃ gopālakaṃ dassetvā pariyosānagamaṇaṃ, paṇḍitaṃ bhikkhuṃ dassetvā pariyosānagamaṇanti ayaṃ **nisinnavattikā** nāma. Ayaṃ idha sabbācariyānaṃ āciṇṇā.

**Ekādasahi, bhikkhave, aṅgehī**ti ekādasahi agunaṅkoṭṭhāsehi. **Gogaṇanti** gomaṇḍalaṃ. **Pariharitunti** pariggahetvā vicarituṃ. **Phātiṃ kātunti** vaḍḍhiṃ āpādetuṃ. **Idhāti** imasmim loke. **Na rūpaññū hotīti** gaṇanato vā vaṇṇato vā rūpaṃ na jānāti. **Gaṇanato** na jānāti nāma attano gunnaṃ sataṃ vā sahasaṃ vāti saṅkhyāṃ na

jānāti. So gāvīsu haṭāsu vā palātāsu vā gogaṇaṃ gaṇetvā, ajja ettikā na dissantīti dve tīṇi gāmantarāni vā aṭaviṃ vā vicaranto na pariyesati, aññesaṃ gāvīsu attano gogaṇaṃ pavīṭṭhāsupi gogaṇaṃ gaṇetvā, “imā ettikā gāvo na amhākaṃ”ti yaṭṭhiyā pothetvā na nīharati, tassa naṭṭhā gāvīyo naṭṭhāva honti. Paragāvīyo gaṇetvā vicarantaṃ gosāmikā disvā, “ayaṃ ettakaṃ kālaṃ amhākaṃ dhenuṃ gaṇhātī”ti tajjetvā attano gāvīyo gaṇetvā gacchanti. Tassa gogaṇopi parihāyati, pañcagorasaparibhogatopi paribāhiro hoti. **Vaṇṇato** na jānāti nāma- “ettikā gāvo setā, ettikā rattā, ettikā kāḷā, ettikā kabarā ettikā nīlā”ti na jānāti, so gāvīsu haṭāsu vā ...pe... pañcagorasaparibhogatopi paribāhiro hoti.

**Na lakkhaṇakusalo hotīti** gāvīnaṃ sarīre kataṃ dhanusattisūlādibhedam lakkhaṇaṃ na jānāti, so gāvīsu haṭāsu vā palātāsu vā ajja asukalakkhaṇā ca asukalakkhaṇā ca gāvo na dissanti ...pe... pañcagorasaparibhogatopi paribāhiro hoti.

**Na āsāṭikaṃ hāretāti** gunnaṃ khāṇukaṇṭakādīhi pahaṭaṭṭhānesu vaṇo hoti. Tattha nīlamakkhikā aṇḍakāni pāṭenti, tesam āsāṭikāti nāma. Tāni daṇḍena apaṇetvā bhesajjaṃ dātabbaṃ hoti. Bālo (2.0161) gopālako tathā na karoti, tena vuttaṃ- “na āsāṭikaṃ hāretā hotīti”. Tassa gunnaṃ vaṇā vaḍḍhanti, gambhīrā honti, pāṇakā kucchiṃ pavisanti, gāvo gelaññābhibhūtā neva yāvadatthaṃ tiṇāni khādituṃ, na pāṇiyam pātuṃ sakkonti. Tattha gunnaṃ khīraṃ chijjati, goṇānaṃ javo hāyati, ubhayesaṃ jīvitantarāyo hoti. Evamassa gogaṇopi parihāyati, pañcagorasatopi paribāhiro hoti.

**Na vaṇaṃ paṭicchādetā hotīti** gunnaṃ vuttanayeneva sañjāto vaṇo bhesajjaṃ datvā vākena vā cīrakena vā bandhitvā paṭicchādetabbo hoti. Bālo gopālako tathā na karoti, athassa gunnaṃ vaṇehi yūsā paggharanti, tā aññamaññaṃ nighaṃsenti, tena aññesampi vaṇā jāyanti. Evaṃ gāvo gelaññābhibhūtā neva yāvadatthaṃ tiṇāni khādituṃ ...pe... paribāhiro hoti.

**Na dhūmaṃ kattā hotīti** antovasse ḍaṃsamakasādīnaṃ ussannaṃkālā gogaṇe vajaṃ pavīṭṭhe tattha tattha dhūmo kātabbo hoti, apaṇḍito gopālako taṃ na karoti. Gogaṇo sabbarattim ḍaṃsādīhi upadduto niddaṃ alabhitvā punadivase araññe tattha tattha rukkhamaṃlādīsu nipajjitvā niddāyati, neva yāvadatthaṃ tiṇāni khādituṃ ...pe... pañcagorasaparibhogatopi paribāhiro hoti.



**Na tittham jānāti**ti tittham samanti vā visamanti vā sagāhanti vā niggāhanti vā na jānāti, so atitthena gāviyo otāreti. Tāsam visamatitthe pāsāṇādīni akkama-  
ntīnaṃ pādā bhijjanti, sagāhaṃ gambhīraṃ tittham otiṇṇā kumbhīlādayo gāhā  
gaṇhanti. Ajja ettikā gāvo natṭhā, ajja ettikāti vattabbataṃ āpajjati. Evamassa goga-  
ṇopi parihāyati, pañcagorasatopi paribāhiro hoti.

**Na pītaṃ jānāti**ti pītampi apītampi na jānāti. Gopālakena hi “imāya gāviyā pītaṃ,  
imāya na pītaṃ, imāya pānīyatitthe okāso laddho, imāya na laddho”ti evaṃ pītā-  
pītaṃ jānitabbaṃ hoti. Ayaṃ pana divasabhāgaṃ araṅṅhe gogaṇaṃ rakkhitvā  
pānīyaṃ pāyessāmīti nadiṃ vā (2.0162) taḷākaṃ vā gahetvā gacchati. Tattha  
mahā-usabhā ca anu-usabhā ca balavagāviyo ca dubbalāni ceva mahallakāni ca  
gorūpāni siṅgehi vā phāsukāhi vā paharivā attano okāsaṃ katvā ūruppamāṇaṃ  
udakaṃ pavisitvā yathākāmaṃ pivanti. Avasesā okāsaṃ alabhamānā tīre ṭhatvā  
kalalamissakaṃ udakaṃ pivanti, apītā eva vā honti. Atha ne gopālako piṭṭhiyaṃ  
paharivā puna araṅṅaṃ paveseti, tattha apītagāviyo pipāsāya sukkhamānā yāva-  
datthaṃ tiṇāni khāditaṃ na sakkonti, tattha gunnaṃ khīraṃ chijjati, goṇānaṃ javo  
hāyati ...pe... paribāhiro hoti.

**Na vīthiṃ jānāti**ti “ayaṃ maggo samo khemo, ayaṃ visamo sāsāṅko sappaṭibha-  
yo”ti na jānāti. So samaṃ khemaṃ maggaṃ vajjetvā gogaṇaṃ itaraṃ maggaṃ  
paṭipādeti, tattha gāvo sīhabyagghādīnaṃ gandhena coraparissayena vā abhi-  
bhūtā bhantamigasappaṭibhāgā gīvaṃ ukkhipitvā tiṭṭhanti, neva yāvadatthaṃ  
tiṇāni khādanti, na pānīyaṃ pivanti, tattha gunnaṃ khīraṃ chijjati ...pe... paribā-  
hiro hoti.

**Na gocarakusalo hotīti** gopālakena hi gocarakusalena bhavitabbaṃ, pañcāhika-  
vāro vā sattāhikavāro vā jānitabbo, ekadisāya gogaṇaṃ cāretvā punadivase tattha  
na cāretabbo. Mahatā hi gogaṇena ciṇṇaṭṭhānaṃ bheritalaṃ viya suddhaṃ hoti  
nittiṇaṃ, udakampi āluḷiyati. Tasmā pañcame vā sattame vā divase puna tattha  
cāretuṃ vaṭṭati, ettakena hi tiṇampi paṭiviruhati, udakampi pasīdati. Ayaṃ pana  
imaṃ pañcāhikavāraṃ vā sattāhikavāraṃ vā na jānāti, divase divase rakkhitaṭṭhā-  
neyeva rakkhati. Athassa gogaṇo haritatiṇaṃ na labhati, sukkhātiṇaṃ khādanto  
kalalamissakaṃ udakaṃ pivati, tattha gunnaṃ khīraṃ chijjati ...pe... paribāhiro  
hoti.

**Anavasesadohī ca hotīti** paṇḍitagopālakena yāva vacchakassa maṃsalohitaṃ  
saṅṭhāti, tāva ekaṃ dve thane ṭhapetvā sāvasesadohinā bhavitabbaṃ. Ayaṃ  
vacchakassa kiñci anavasesetvā duhati, khīrapako vaccho khīrapipāsāya  
sukkhati, saṅṭhātuṃ asakkonto kampamāno (2.0163) mātu purato patitvā kālaṅka-  
roti. Mātā puttakaṃ disvā, “mayhaṃ puttako attano mātukhīraṃ pātumpi na labha-  
tī”ti puttasokena na yāvadatthaṃ tiṇāni khāditaṃ, na pānīyaṃ pātuṃ sakkoti,  
thanesu khīraṃ chijjati. Evamassa gogaṇopi parihāyati, pañcagorasatopi paribā-  
hiro hoti.

Gunnaṃ pituṭṭhānaṃ karontīti **gopitaro**. Gāvo pariṇayanti yathāruciṃ gahetvā  
gacchantīti **gopariṇāyakā**. **Na atirekapūjāyāti** paṇḍito hi gopālako evarūpe usabhe  
atirekapūjāya pūjeti, paṇītaṃ gobhattaṃ deti, gandhapañcaṅgulikehi maṇḍeti,

mālaṃ pilandheti, siṅge suvaṇṇarajatakosake ca dhāreti, rattiṃ dīpaṃ jāletvā celavitānassa heṭṭhā sayāpeti. Ayaṃ pana tato ekasakkārampi na karoti, usabhā atirekapūjaṃ alabhamānā gogaṇaṃ na rakkhanti, parissayaṃ na vārenti. Evamassa gogaṇo parihāyati, pañcagorasato paribāhiro hoti.

**347. Idhāti** imasmiṃ sāsane. **Na rūpaññū hotīti**, “cattāri mahābhūtāni catunnañca mahābhūtānaṃ upādāyarūpan”ti evaṃ vuttarūpaṃ dvīhākārehi na jānāti gaṇanato vā samuṭṭhānato vā. **Gaṇanato** na jānāti nāma, “cakkhāyatanaṃ, sota-ghāna-jivhā-kāyāyatanaṃ, rūpa-sadda-gandha-rasa-phoṭṭhabbāyatanaṃ, itthindriyaṃ, purisindriyaṃ, jīvitindriyaṃ, kāyaviññatti, vacīviññatti, ākāsadhātu, āpo-dhātu, rūpassa lahutā, mudutā, kammaññatā, upacayo, santati, jaratā, rūpassa aniccatā, kabalīkāro āhāro”ti evaṃ paḷiyaṃ āgatā pañcavīsati rūpakoṭṭhāsāti na jānāti. Seyyathāpi so gopālako gaṇanato gunnaṃ rūpaṃ na jānāti, tathūpamo ayaṃ bhikkhu. So gaṇanato rūpaṃ ajānanto rūpaṃ pariggahetvā arūpaṃ vavatthapetvā rūpārūpaṃ pariggahetvā paccayaṃ sallakkhetvā lakkhaṇaṃ āropetvā kammaṭṭhānaṃ matthakaṃ pāpetuṃ na sakkoti. So yathā tassa gopālakassa gogaṇo na vaḍḍhati, evaṃ imasmiṃ sāsane sīlasamādhivipassanāmaggaḥalānibbānehi na vaḍḍhati, yathā ca so gopālako pañcahi gorasehi paribāhiro hoti, evaṃ asekkhena sīlakkhandhena, asekkhena samādhī, paññā, vimutti, vimuttiñāṇadassanakkhandhenāti pañcahi dhammakkhandhehi paribāhiro hoti.

**Samuṭṭhānato** (2.0164) na jānāti nāma, “ettakaṃ rūpaṃ ekasamuṭṭhānaṃ, ettakaṃ dvisamuṭṭhānaṃ, ettakaṃ tisamuṭṭhānaṃ, ettakaṃ catusamuṭṭhānaṃ, ettakaṃ na kutocisamuṭṭhāti”ti na jānāti. Seyyathāpi so gopālako vaṇṇato gunnaṃ rūpaṃ na jānāti, tathūpamo ayaṃ bhikkhu. So samuṭṭhānato rūpaṃ ajānanto rūpaṃ pariggahetvā arūpaṃ vavatthapetvā ...pe... paribāhiro hoti.

**Na lakkhaṇakusalo hotīti** kammalakkhaṇo bālo, kammalakkhaṇo paṇḍitoti evaṃ vuttaṃ kusalākusalaṃ kammaṃ paṇḍitabālalakkhaṇanti na jānāti. So evaṃ ajānanto bāle vajjetvā paṇḍite na sevati, bāle vajjetvā paṇḍite asevento kappiyākappiyaṃ kusalākusalaṃ sāvajjānavajjaṃ garukalahukaṃ satekiccha-atekicchaṃ kāraṇākāraṇaṃ na jānāti; taṃ ajānanto kammaṭṭhānaṃ gahetvā vaḍḍhetuṃ na sakkoti. So yathā tassa gopālakassa gogaṇo na vaḍḍhati, evaṃ imasmiṃ sāsane yathāvuttehi sīlādīhi na vaḍḍhati, gopālako viya ca pañcahi gorasehi pañcahi dhammakkhandhehi paribāhiro hoti.

**Na āsāṭikaṃ hāretā hotīti** uppannaṃ kāmavitakkanti evaṃ vutte kāmavitakkādike na vinodeti, so imaṃ akusalavitakkaṃ āsāṭikaṃ ahāretvā vitakkavasiko hutvā vicaranto kammaṭṭhānaṃ gahetvā vaḍḍhetuṃ na sakkoti, so yathā tassa gopālakassa ...pe... paribāhiro hoti.

**Na vaṇaṃ paṭicchādetā hotīti** cakkhunā rūpaṃ disvā nimittaggāhī hotīti-ādinā nayena sabbāramaṇesu nimittaṃ gaṇhanto yathā so gopālako vaṇaṃ na paṭicchādeti, evaṃ saṃvaraṃ na sampādeti. So vivaṭadvāro vicaranto kammaṭṭhānaṃ gahetvā vaḍḍhetuṃ na sakkoti ...pe... paribāhiro hoti.

**Na dhūmaṃ kattā hotīti** so gopālako dhūmaṃ viya dhammadesanādhūmaṃ na karoti, dhammakathaṃ vā sarabhaññaṃ vā upanisinnakathaṃ vā anumodanaṃ

vā na karoti. Tato naṃ manussā bahussuto guṇavāti na jānanti, te guṇāguṇaṃ ajānantā catūhi paccayehi saṅgahaṃ na karonti. So paccayehi (2.0165) kilamamāno buddhavacanaṃ sajjhāyaṃ kātuṃ vattapaṭipattiṃ pūretuṃ kammaṭṭhānaṃ gahetvā vaḍḍhetuṃ na sakkoti ...pe... paribāhiro hoti.

**Na titthaṃ jānātīti** titthabhūte bahussutabhikkhū na upasaṅkamati, upasaṅkamanto, “idaṃ, bhante, byañjanaṃ kathaṃ ropetabbaṃ, imassa bhāsitassa ko attho, imasmiṃ ṭhāne pāḷi kiṃ vadeti, imasmiṃ ṭhāne attho kiṃ dīpeti”ti evaṃ na paripucchati na paripaṇhāti, na jānāpetīti attho. Tassa te evaṃ aparipucchato avi-vaṭaṅgeva na vivaranti, bhājetvā na dassenti, anuttānikataṅga na uttānikaronti, apākaṭaṃ na pākaṭaṃ karonti. **Anekavihitesu ca kaṅkhāṭhānīyesu dhammesūti** anekavidhāsu kaṅkhāsu ekaṃ kaṅkhampi na paṭivinodenti. Kaṅkhā eva hi kaṅkhāṭhānīyā dhammā nāma. Tattha ekaṃ kaṅkhampi na nīharantīti attho. So evaṃ bahussutatitthaṃ anupasaṅkamitvā sakaṅkho kammaṭṭhānaṃ gahetvā vaḍḍhetuṃ na sakkoti. Yathā ca so gopālako titthaṃ na jānāti, evaṃ ayampi bhikkhu dhammatitthaṃ na jānāti, ajānanto avisaye paṇhaṃ pucchati, abhidhammikaṃ upasaṅkamitvā kappiyākappiyaṃ pucchati, vinayadharaṃ upasaṅkamitvā rūpārūpapari-cchedaṃ pucchati. Te avisaye puṭṭhā kathetuṃ na sakkonti, so attanā sakaṅkho kammaṭṭhānaṃ gahetvā vaḍḍhetuṃ na sakkoti ...pe... paribāhiro hoti.

**Na pītaṃ jānātīti** yathā so gopālako pītāpītaṃ na jānāti, evaṃ dhammūpasa-ṅghitaṃ pāmojjaṃ na jānāti na labhati, savanamayaṃ puñṇakiriyavatthuṃ nissāya ānisaṃsaṃ na vindati, dhammassavanaggaṃ gantvā sakkaccaṃ na suṇāti, nisinno niddāyati, kathaṃ katheti, aññavihitako hoti, so sakkaccaṃ dhammaṃ asu-ṅanto kammaṭṭhānaṃ gahetvā vaḍḍhetuṃ na sakkoti ...pe... paribāhiro hoti.

**Na vīthiṃ jānātīti** so gopālako maggāmaggaṃ viya,- “ayaṃ lokiyo ayaṃ lokutta-ro”ti ariyaṃ aṭṭhaṅgikaṃ maggaṃ yathābhūtaṃ na pajānāti. Ajānanto lokiya-magge abhinivisitvā lokuttaraṃ nibbattetuṃ na sakkoti ...pe... paribāhiro hoti.

**Na gocarakusalo hotīti** so gopālako pañcāhikavāre sattāhikavāre viya cattāro satipaṭṭhāne, “ime lokiyā ime lokuttarā”ti yathābhūtaṃ na pajānāti. Ajānanto sukumaṭṭhānesu attano (2.0166) ñāṇaṃ carāpetvā lokiyasatipaṭṭhāne abhinivisitvā lokuttaraṃ nibbattetuṃ na sakkoti ...pe... paribāhiro hoti.

**Anavasesadohī ca hotīti** paṭiggahaṇe mattaṃ ajānanto anavasesaṃ duhati. Niddesavāre panassa **abhihaṭṭhuṃ pavārentīti** abhiharitvā pavārenti. Ettha dve abhihārā vācābhihāro ca paccayābhihāro ca. **Vācābhihāro** nāma manussā bhikkhussa santikaṃ gantvā, “vadeyyātha, bhante, yenattho”ti pavārenti. **Paccayābhihāro** nāma vatthādīni vā telaphāṇitādīni vā gahetvā bhikkhussa santikaṃ gantvā, “gaṇhatha, bhante, yāvatakena attho”ti vadanti. **Tatra bhikkhu mattaṃ na jānātīti** bhikkhu tesu paccayesu pamāṇaṃ na jānāti,- “dāyakassa vaso veditabbo, deyyadhammassa vaso veditabbo, attano thāmo veditabbo”ti rathavinīte vuttana-yena pamāṇayuttaṃ aggahetvā yaṃ āharanti, taṃ sabbaṃ gaṇhātīti attho. Manussā vipaṭṭisārino na puna abhiharitvā pavārenti. So paccayehi kilamanto kammaṭṭhānaṃ gahetvā vaḍḍhetuṃ na sakkoti ...pe... paribāhiro hoti.

**Te na atirekapūjāya pūjetā hotīti** so gopālako mahā-usabhe viya te there

bhikkhū imāya āvi ceva raho ca mettāya kāyakammādikāya atirekapūjāya na pūjeti. Tato therā,- “ime amhesu garucittikāraṃ na karonti” ti navake bhikkhū dvīhi saṅgahehi na saṅgaṇhanti, na āmisasaṅgahena cīvarena vā pattena vā pattapariyāpanna vā vasanaṭṭhānena vā. Kilamante milāyantepi nappaṭijagganti. Pāḷiṃ vā aṭṭhakathaṃ vā dhammakathābandhaṃ vā guyhaganthaṃ vā na sikkhāpentī. Navakā therānaṃ santikā sabbaso ime dve saṅgahe alabhamānā imasmīṃ sāsane paṭiṭṭhātum na sakkonti. Yathā tassa gopālakassa gogaṇo na vaḍḍhati, evaṃ silādīni na vaḍḍhanti. Yathā ca so gopālako pañcahi gorasehi paribāhiro hoti, evaṃ pañcahi dhammakhandhehi paribāhirā honti. Sukkapakkho kaṇhapakkhe vuttavipallāsavasena yojetvā veditabboti.

Papañcasūdaniyā majjhimanikāyaṭṭhakathāya

Mahāgopālakasuttavaṇṇanā niṭṭhitā.

#### 4. Cūḷagopālakasuttavaṇṇanā

**350. Evaṃ** (2.0167) **me sutanti** cūḷagopālakasuttaṃ. Tattha **ukkacelāyanti** evaṃ-nāmake nagare. Tasmīṃ kira māpiyamāne rattiṃ gaṅgāsotato maccho thalaṃ patto. Manussā celāni telapātiyaṃ temevā ukkā katvā macchaṃ gaṇhiṃsu. Nagare niṭṭhite tassa nāmaṃ karonte amhehi nagaraṭṭhānassa gahitadivase celukkāhi maccho gahitoti **ukkacelā-tvevassa** nāmaṃ akaṃsu. **Bhikkhū āmantesīti** yasmīṃ ṭhāne nisinnassa sabbā gaṅgā

pākaṭā hutvā paññāyati, tādise vālikussade gaṅgātithe sāyanhasamaye mahābhikkhusaṅghaparivuto nisīditvā mahāgaṅgaṃ paripuṇṇaṃ sandamānaṃ olokento, - “atthi nu kho imaṃ gaṅgaṃ nissāya koci pubbe vaḍḍhiparihāniṃ patto” ti āvajjitvā, pubbe ekaṃ bālagopālakaṃ nissāya anekasatasahassā gogaṇā imissā gaṅgāya āvaṭṭe patitvā samuddameva pavitṭhā, aparaṃ pana paṇḍitagopālakaṃ nissāya anekasatasahassagogaṇassa sotthi jātā vaḍḍhi jātā ārogyaṃ jātanti addasa. Disvā imaṃ kāraṇaṃ nissāya bhikkhūnaṃ dhammaṃ desessāmīti cintevā bhikkhū āmantesi.

**Māgadhakoti** magadharatṭhavāsī. **Duppaññajātikoti** nippaññasabhāvo dandho mahājaḷo. **Asamavekkhitvā**ti asallakkhetvā anupadhāretvā. **Patāresī**ti tāretuṃ ārabhi. **Uttaraṃ tīraṃ suvidehānanti** gaṅgāya orime tīre magadharatṭhaṃ, pārime tīre videharatṭhaṃ, gāvo magadharatṭhato videharatṭhaṃ netvā rakkhissāmīti uttaraṃ tīraṃ patāresi. Taṃ sandhāya vuttaṃ- “uttaraṃ tīraṃ suvidehānaṃ” ti. **Āmaṇḍalikaṃ karitvā**ti maṇḍalikaṃ katvā. **Anayabyasanaṃ āpajjimsū**ti avaḍḍhiṃ vināsaṃ pāpuṇiṃsu, mahāsamuddameva pavisiṃsu. Tena hi gopālakena gāvo otārentena gaṅgāya orimatīre samatitthañca visamatitthañca oloketabbaṃ assa, majjhe gaṅgāya gunnaṃ vissamatṭhānatthaṃ dve tīṇi vālikatthalāni sallakkhetabbāni assu. Tathā pārimatīre tīṇi cattāri titthāni, imasmā titthā bhaṭṭhā imaṃ titthaṃ gaṇhissanti, imasmā bhaṭṭhā imanti. Ayaṃ pana bālagopālako orimatīre gunnaṃ otaraṇatitthaṃ samaṃ vā visamaṃ vā anoloketvāva majjhe (2.0168) gaṅgāya gunnaṃ vissamatṭhānatthaṃ dve tīṇi vālikatthalānipi asallakkhetvāva paratīre cattāri pañca uttaraṇatitthāni asamavekkhitvāva atittheneva gāvo otāresi. Athassa mahā-usabho javanasampannatāya ceva thāmasampannatāya ca tiriyaṃ gaṅgāya sotaṃ chetvā pārīmaṃ tīraṃ patvā chinnataṭaṅceva kaṇṭakagumbagahañca disvā, “dubbiniviṭṭhametan” ti ñatvā dhuragga-patitṭhānokāsampi alabhitvā paṭinivatti. Gāvo mahā-usabho nivatto mayampi nivattissāmāti nivattā. Mahato gogaṇassa nivattatṭhāne udakaṃ chijjitvā majjhe gaṅgāya āvaṭṭaṃ utṭhapesi. Gogaṇo āvaṭṭaṃ pavisitvā samuddameva patto. Ekopi goṇo arogo nāma nāhosi. Tenāha- “tattheva anayabyasanaṃ āpajjimsū” ti.

**Akusalā imassa lokassā**ti idha loke khandhadhātāyatanesu akusalā achekā, paralokepi eseva nayo. **Māradheyyaṃ** vuccati tebhūmakadhammā. **Amāradheyyaṃ** nava lokuttaradhammā. **Maccudheyyampi** tebhūmakadhammāva. **Amaccudheyyaṃ** nava lokuttaradhammā. Tattha **akusalā** achekā. Vacanatthato pana mārasa dheyyaṃ **māradheyyaṃ**. **Dheyyanti** ṭhānaṃ vatthu nivāso gocarō. **Maccudheyyepi** eseva nayo. **Tesanti** tesāṃ evarūpānaṃ samaṇabrāhmaṇānaṃ, iminā cha satthāro dassitāti veditabbā.

**351.** Evaṃ kaṇhapakkhaṃ niṭṭhapetvā sukkapakkhaṃ dassento **bhūtapubbaṃ**, **bhikkhavi**ti-ādimāha. Tattha **balavagāvoti** dantagoṇe ceva dhenuyo ca. **Dammagāvoti** dametabbagoṇe ceva avijātagāvo ca. **Vacchatareti** vacchabhāvaṃ taritvā ṭhite balavavacche. **Vacchake**ti dhenupake taruṇavacchake. **Kisābalaketi** appamaṃsalohite mandathāme. **Tāvadeva jātakoti** taṃdivase jātako. **Mātugoravakena vuyhamānoti** mātā purato purato huṃhanti goravaṃ katvā saññaṃ dadamānā

urena udakaṃ chindamānā gacchati, vacchako tāya goravasaññāya dhenuyā vā urena chinnodakena gacchamāno “mātugoravakena vuyhamāno”ti vuccati.

**352. Mārassa** (2.0169) **sotaṃ chetvā**ti arahattamaggena mārassa taṇhāsotaṃ chetvā. **Pāraṃ gatā**ti mahā-usabhā nadīpāraṃ viya saṃsārapāraṃ nibbānaṃ gatā. **Pāraṃ agamaṃsū**ti mahā-usabhānaṃ pāraṅgatakkhaṇe gaṅgāya sotassa tayo koṭṭhāse atikkamma ṭhitā mahā-usabhe pāraṃ patte disvā tesāṃ gata maggaṃ paṭipajjitvā pāraṃ agamaṃsu. **Pāraṃ gamissantī**ti catumaggavajjhānaṃ kilesānaṃ tayo koṭṭhāse khepetvā ṭhitā idāni arahattamaggena avasesaṃ taṇhāsotaṃ chetvā balavagāvo viya nadīpāraṃ saṃsārapāraṃ nibbānaṃ gamissantīti. Iminā nayena sabbavāresu attho veditabbo. **Dhammānusārino, saddhānusārinoti** ime dve paṭhamamaggasamaṅgino.

**Jānatā**ti sabbadhamme jānantena buddhena. **Suppakāsitoti** sukathito. **Vivaṭanti** vivaritaṃ. **Amatadvāranti** ariyamaggo. **Nibbānapattiyā**ti tadatthāya vivaṭaṃ. **Vinaḷikatanti** vigatamānanaṃ kataṃ. **Khemaṃ patthethā**ti kattukamyatāchandaena arahattaṃ patthetha, kattukāmā nibbattetukāmā hothāti attho. “Patta’tthā”-tipi pāṭho. Evarūpaṃ satthāraṃ labhitvā tumhe pattāyeva nāmāti attho. Sesāṃ sabbattha uttānameva. Bhagavā pana yathānusandhināva desanaṃ niṭṭhapesīti.

Papañcasūdaniyā majjhimanikāyaṭṭhakathāya

Cūḷagopālakasuttavaṇṇanā niṭṭhitā.

## 5. Cūḷasaccakasuttavaṇṇanā

**353. Evaṃ me sutanti** cūḷasaccakasuttaṃ. Tattha **mahāvane kūṭāgārasālāyanti** mahāvanaṃ nāma sayamjātaṃ aropimaṃ saparicchedaṃ mahantaṃ vanaṃ. Kapilavatthusāmantā pana mahāvanaṃ himavantaena saha ekābaddhaṃ aparicchedaṃ hutvā mahāsamuddaṃ āhacca ṭhitaṃ. Idaṃ tādisaṃ na hoti. Saparicchedaṃ mahantaṃ vananti **mahāvanaṃ. Kūṭāgārasālā** pana mahāvanaṃ nissāya kate ārāme kūṭāgāraṃ antokatvā haṃsavaṭṭakacchannena katā sabbākārasampannā buddhassa bhagavato gandhakuṭi veditabbā.

**Saccako** (2.0170) **nigaṇṭhaputtoti** pubbe kira eko nigaṇṭho ca nigaṇṭhī ca pañca pañca vādasatāni uggahetvā, vādaṃ āropessāmāti jambudīpe vicarantā vesāliyaṃ samāgatā. Licchavirājāno disvā,- “tvaṃ ko, tvaṃ kā”ti pucchimṃsu. Nigaṇṭho-“ahaṃ vādaṃ āropessāmīti jambudīpe vicarāmī”ti āha. Nigaṇṭhīpi tathā āha. Licchavino, “idheva aññamaññaṃ vādaṃ āropethā”ti āhaṃsu. Nigaṇṭhī attanā uggahitāni pañcavādasatāni pucchi, nigaṇṭho kathesi. Nigaṇṭhena pucchitepi nigaṇṭhī kathesiyeva. Ekassapi na jayo, na parājayo, ubho samasamāva ahesuṃ. Licchavino,- “tumhe ubhopi samasamā āhiṇḍitvā kiṃ karissatha, idheva vasathā”-ti gehaṃ datvā baliṃ paṭṭhapesuṃ. Tesāṃ saṃvāsamanvāya catasso dhitaro jātā,-

ekā saccā nāma, ekā lolā nāma, ekā paṭācārā nāma, ekā ācāravatī nāma. Tāpi paṇḍitāva ahesuṃ, mātāpitūhi uggahitāni pañca pañca vādasatāni uggahesuṃ. Tā vayapattā mātāpitāro avocuṃ- “amhākaṃ ammā kule dārikā nāma hiraññasu-vaṇṇādīni datvā kulagharaṃ pesitapubbā nāma natthi. Yo pana agāriko tāsāṃ vādaṃ maddituṃ sakkoti, tassa pādaparicārikā honti. Yo pabbajito tāsāṃ maddituṃ sakkoti, tassa santike pabbajanti. Tumhe kiṃ karissathā”ti? Mayampi evameva karissāmāti. Catassopi paribbājikavesaṃ gahetvā, “ayaṃ jambudīpo nāma jambuyā paññāyati”ti jambusākhāṃ gahetvā cārikaṃ pakkamiṃsu. Yaṃ gāmaṃ pāpuṇanti, tassa dvāre paṃsupuñje vā vālikapuñje vā jambudhajaṃ ṭhapetvā,- “yo vādaṃ āropetuṃ sakkoti, so imaṃ maddatū”ti vatvā gāmaṃ pavisanti. Evaṃ gāmena gāmaṃ vicarantiyo sāvattiṃ pāpuṇitvā tatheva gāmadvāre jambudhajaṃ ṭhapetvā sampattamanussānaṃ ārocetvā antonagaraṃ pavitṭhā.

Tena samayena bhagavā sāvattiṃ nissāya jetavane viharati. Athāyasmā sārīputto gilāne pucchanto ajaggitaṭṭhānaṃ jagganto attano kiccamahantatāya aññehi bhikkhūhi divātaraṃ gāmaṃ piṇḍāya pavisanto gāmadvāre jambudhajaṃ disvā,- “kimidan”ti dārake pucchi. Te tamatthaṃ ārocesuṃ. Tena hi maddathāti. Na sakkoma, bhante, bhāyāmāti. “Kumārā (2.0171) mā bhāyatha, ‘kena amhākaṃ jambudhajo maddāpito’ti vutte, buddhasāvakena sārīputtattherena maddāpito, vādaṃ āropetukāmā jetavane therassa santikaṃ gacchathāti vadeyyāthā”ti āha. Te therassa vacanaṃ sutvā jambudhajaṃ madditvā chaḍḍesuṃ. Thero piṇḍāya caritvā vihāraṃ gato. Paribbājikāpi gāmato nikkhamitvā, “amhākaṃ dhajo kena maddāpito”ti pucchiṃsu. Dārakā tamatthaṃ ārocesuṃ. Paribbājikā puna gāmaṃ pavisitvā ekekaṃ vīthiṃ gahetvā,- “buddhasāvako kira sārīputto nāma amhehi saddhiṃ vādaṃ karissati, sotukāmā nikkhamathā”ti ārocesuṃ. Mahājano nikkhami, tena saddhiṃ paribbājikā jetavanaṃ agamiṃsu.

Thero- “amhākaṃ vasanaṭṭhāne mātugāmassa āgamaṃ nāma aphāsu-”ti vihāramajjhe nisīdi. Paribbājikāyo gantvā therāṃ pucchiṃsu- “tumhehi amhākaṃ dhajo maddāpito”ti? Āma, mayā maddāpitoti. Mayaṃ tumhehi saddhiṃ vādaṃ karissāmāti. Sādhu karotha, kassa pucchā kassa vissajjanaṃ hotūti? Pucchā nāma amhākaṃ pattā, tumhe pana mātugāmā nāma paṭhamāṃ pucchathāti āha. Tā catassopi catūsu disāsu ṭhatvā mātāpitūnaṃ santike uggahitaṃ vādasahassaṃ pucchiṃsu. Thero khaggena kumudanaḷaṃ chindanto viya pucchitaṃ pucchitaṃ nijjaṭaṃ niggaṇṭhiṃ katvā kathesi, kathetvā puna pucchathāti āha. Etta-kameva, bhante, mayaṃ jānāmāti. Thero āha- “tumhehi vādasahassaṃ pucchitaṃ mayā kathitaṃ, ahaṃ pana ekaṃ yeva pañhaṃ pucchissāmi, taṃ tumhe kathethā”-ti. Tā therassa visayaṃ disvā, “pucchatha, bhante, byākarissāmā”ti vattuṃ nāsakkhiṃsu. “Vada, bhante, jānamānā byākarissāmā”ti puna āhaṃsu.

Thero ayaṃ pana kulaputte pabbājetvā paṭhamāṃ sikkhāpetabbapañhoti vatvā,- “ekaṃ nāma kin”ti pucchi. Tā neva antaṃ, na koṭiṃ addasaṃsu. Thero kathethāti āha. Na passāma, bhanteti. Tumhehi vādasahassaṃ pucchitaṃ mayā kathitaṃ, mayhaṃ tumhe ekaṃ pañhampi kathetuṃ na sakkotha, evaṃ sante kassa jayo kassa parājayoti? Tumhākaṃ, bhante, jayo, amhākaṃ parājayoti. Idāni kiṃ kari-

ssathāti? Tā mātāpitūhi vuttavacanāṃ ārocetvā, “tumhākaṃ santike pabbajissā-mā”ti āhaṃsu. Tumhe mātugāmā nāma amhākaṃ santike pabbajitūṃ na vaṭṭati, amhākaṃ pana sāsanaṃ gahetvā (2.0172) bhikkhuni-upassayaṃ gantvā pabbajathāti. Tā sādhiṭhi therassa sāsanaṃ gahetvā bhikkhunisaṅghassa santikaṃ gantvā pabbajiṃsu. Pabbajitā ca pana appamattā ātāpiniyo hutvā nacirasseva arahattaṃ pāpuṇiṃsu.

Ayaṃ saccako tāsāṃ catunnampi kaniṭṭhabhātiko. Tāhi catūhipi uttaritarapañño, mātāpitūnampi santikā vādasahassaṃ, tato bahutarañca bāhiraṃsamayaṃ ugga-hetvā katthaci agantvā rājadārake sippaṃ sikkhāpento tattheva vesāliyaṃ vasati, paññāya atipūritattā kucchi me bhijjeyyāti bhīto ayapaṭṭena kucchiṃ parikkhipitvā carati, imaṃ sandhāya vuttaṃ “saccako nigaṇṭhaputto”ti.

**Bhassappavādakoti** bhassaṃ vuccati kathāmaggo, taṃ pavadati kathetīti bhassappavādako. **Paṇḍitavādoti** ahaṃ paṇḍitoti evaṃ vādo. **Sādhusammato bahu-janassāti** yaṃ yaṃ nakkhattacārena ādisati, taṃ taṃ yebhuyyena tattheva hoti, tasmā ayaṃ sādhuḷaddhiko bhaddakoti evaṃ sammato mahājanassa. **Vādena vādaṃ samāraddhoti** kathāmaggena dosaṃ āropito. **Āyasmā assajīti** sārīputtattherassa ācariyo assajitthero. **Jaṅghāvihāraṃ anucaṅkamamānoti** tato tato licchavirā-jagehato taṃ taṃ gehaṃ gamanatthāya anucaṅkamamāno. **Yenāyasmā assaji tenupasaṅkamīti** kasmā upasaṅkami? Samayajānanatthaṃ.

Evaṃ kirassa ahosi- “ahaṃ ‘samaṇassa gotamassa vādaṃ āropessāmī’ti āhiṇḍāmi, ‘samayaṃ panassa na jānāmī’ti na āropesiṃ. Parassa hi samayaṃ ñatvā āropito vādo svāropito nāma hoti. Ayaṃ pana samaṇassa gotamassa sāvako paññāyati assajitthero; so attano satthu samaye kovido, etāhaṃ pucchitvā kathaṃ patiṭṭhāpetvā samaṇassa gotamassa vādaṃ āropessāmī”ti. Tasmā upasaṅkami. **Vinetīti** kathaṃ vineti, kathaṃ sikkhāpetīti pucchati. Thero pana yasmā dukkhanti vutte upārambhassa okāso hoti, maggaphalānīpi pariyāyena dukkhanti āgatāni, ayañca dukkhanti vutte therāṃ puccheyya- “bho assaji, kimatthaṃ tumhe pabbajitā”ti. Tato “maggaphalatthāyā”ti vutte,- “nayidaṃ, bho assaji, tumhākaṃ sāsanaṃ nāma, mahā-āghātanaṃ nāmetaṃ, nirayussado nāmesa, natthi tumhākaṃ sukhāsā, utṭhāyutṭhāya dukkhameva jirāpentā āhiṇḍathā”ti dosaṃ āropeyya, tasmā (2.0173) paravādissa pariyāyakathaṃ kātuṃ na vaṭṭati. Yathā esa appa-tiṭṭho hoti, evamassa nippariyāyakathaṃ kathessāmīti cintetvā, “rūpaṃ, bhikkhave, aniccaṃ”ti imaṃ aniccānattavaseneva kathaṃ katheti. **Dussutanti** sotuṃ ayuttaṃ.



**354. Santhāgāreti** rājakulānaṃ atthānusāsanasanthāgārasālāyaṃ. **Yena te licchavī tenupasaṅkamīti** evaṃ kirassa ahosi- “ahaṃ pubbe samayaṃ ajānana-bhāvena samaṇassa gotamassa vādaṃ na āropesiṃ, idāni panassa mahāsāva-kena kathitaṃ samayaṃ jānāmi, ime ca mama antevāsikā pañcasatā licchavī sannipatitā. Etehi saddhiṃ gantvā samaṇassa gotamassa vādaṃ āropessāmī”ti tasmā upasaṅkami. **Ñātaññatarenāti** ñātesu abhiññātesu pañcavaggiyattheresu aññatarena. **Patitṭhitanti** yathā tena patitṭhitaṃ. Sace evaṃ patitṭhissati, atha pana aññadeva vakkhati, tatra mayā kiṃ sakkā kātunti idāneva piṭṭhiṃ parivattento āha. **Ākaḍḍheyyā** Ti attano abhimukhaṃ kaḍḍheyya. **Parikaḍḍheyyāti** purato paṭipaṇā-meyya. **Samparikaḍḍheyyāti** kālena ākaḍḍheyya, kālena parikaḍḍheyya. **Soṇḍikā-kilañjanti** surāghare piṭṭhakilañjaṃ. **Soṇḍikādhutto**ti surādhutto. **Vālaṃ kaṇṇe gahe-tvāti** surāparissāvanatthavikaṃ dhovitukāmo kasaṭanidhunatanatthaṃ ubhosu kaṇṇesu gahetvā. **Odhuneyyā** Ti adhomukhaṃ katvā dhuneyya. **Niddhuneyyāti** uddhamukhaṃ katvā dhuneyya. **Nipphoṭeyyāti** punappunaṃ papphoṭeyya. **Sāṇa-dhovikaṃ nāmāti** ettha manussā sāṇasāṭakakaraṇatthaṃ sāṇavāke gahetvā muṭṭhiṃ muṭṭhiṃ bandhitvā uduke pakkhipanti. Te tatiyadivase suṭṭhu kilinnā honti. Atha manussā ambulayāgusurādīni ādāya tattha gantvā sāṇamuṭṭhiṃ gahetvā, dakkhiṇato vāmato sammukhā cāti tisu phalakesu sakiṃ dakkhiṇapha-lake, sakiṃ vāmaphalake, sakiṃ sammukhaphalake paharantā ambulayāgusurā-dīni bhuñjantā pivantā khādantā dhovanti. Mahantā kilā hoti. Rañño nāgo taṃ kilāṃ disvā gambhīraṃ udakaṃ anupavisitvā soṇḍāya udakaṃ gahetvā sakiṃ kumbhe sakiṃ piṭṭhiyaṃ sakiṃ ubhosu passesu sakiṃ antarasatthiyaṃ pakkhi-panto kilītha. Tadupādāya taṃ kilītajātaṃ sāṇadhovikaṃ nāma vuccati (2.0174), taṃ sandhāya vuttaṃ- “sāṇadhovikaṃ nāma kilītajātaṃ kilīti”ti. **Kiṃ so bhava-māno saccako nigaṇṭhaputto, yo bhagavato vādaṃ āropessatīti** yo saccako niga-ṇṭhaputto bhagavato vādaṃ āropessati, so kiṃ bhavamāno kiṃ yakkho bhava-māno udāhu indo, udāhu brahmā bhavamāno bhagavato vādaṃ āropessati? Na hi sakkā pakatimanussena bhagavato vādaṃ āropetunti ayamettha adhippāyo.

**355. Tena kho pana samayenāti** yasmiṃ samaye saccako ārāmaṃ pāvīsi, tasmim. Kismim pana samaye pāvīsīti? Mahāmajjhānikasamaye. Kasmā pana tasmim samaye caṅkamantīti? Paṇītabhojanapaccayassa thinamidhassa vinodan-atthaṃ. Divāpadhānikā vā te. Tādisānañhi pacchābhattaṃ caṅkamitvā nhatvā sarīraṃ utuṃ gaṇhāpetvā nisajja samaṇadhammaṃ karontānaṃ cittaṃ ekaggaṃ hoti. **Yena te bhikkhūti** so kira kuhiṃ samaṇo gotamoti parivenato parivenaṃ gantvā pucchitvā pavisissāmīti vilokento araññe hatthī viya caṅkame caṅkama-māne paṃsukūlikabhikkhū disvā tesaṃ santikaṃ agamāsi. Taṃ sandhāya, “yena te bhikkhū”ti-ādi vuttaṃ. **Kahaṃ nu kho, bho** Ti katarasmim āvāse vā maṇḍape vāti attho. **Esa, aggivessana, bhagavāti** tadā kira bhagavā paccūsakāle mahāka-ruṇā samāpattim samāpajjitvā dasasahassacakkavāle sabbaññutaññāṇajālaṃ pattharivā bodhaneyyasattaṃ olokento addasa- “sve saccako nigaṇṭhaputto mahatim licchavipariṣaṃ gahetvā mama vādaṃ āropetukāmo āgamissati”ti. Tasmā pātova sarīrapaṭijagganaṃ katvā bhikkhusaṅghaparivāro vesāliyaṃ

piṇḍāya caritvā piṇḍapātapaṭikkanto mahāparisāya nisīdituṃ sukhaṭṭhāne nisīdi-  
ssāmīti gandhakuṭiṃ apavisitvā mahāvane aññatarasmiṃ rukkhamaṇe divāvī-  
hāraṃ nisīdi. Te bhikkhū bhagavato vattaṃ dassetvā āgatā, saccakena puṭṭhā  
dūre nisinnaṃ bhagavantaṃ dassentā, “esa aggivessana bhagavā”ti āhaṃsu.

**Mahatiyā licchaviparisāya saddhinti** heṭṭhā pañcamattehi licchavisatehi parivu-  
toti vuttaṃ. Te etassa antevāsikāyeva, antovesāliyaṃ pana saccako pañcama-  
ttāni licchavirājasatāni gahetvā, “vādatthiko bhagavantaṃ upasaṅkamanto”ti  
sutvā dvinnaṃ paṇḍitānaṃ kathāsallāpaṃ sossāmāti (2.0175) yebhuyyena  
manussā nikkhantā, evaṃ sā parisā mahatī aparicchinnagaṇanā ahosi. Taṃ  
sandhāyetaṃ vuttaṃ. **Añjalim paṇāmetvāti** ete ubhatopakkhikā, te evaṃ cintesuṃ-  
“sace no micchādiṭṭhikā codessanti, ‘kasmā tumhe samaṇaṃ gotamaṃ vanditthā’-  
ti, tesam, ‘kiṃ añjalimattakaraṇenapi vanditaṃ hoti’ti vakkhāma. Sace no sammā-  
diṭṭhikā codessanti, ‘kasmā bhagavantaṃ na vanditthā’ti, ‘kiṃ sīsena bhūmiṃ  
paharanteneva vanditaṃ hoti, nanu añjalikammampi vandanā evā’ti vakkhāmā”ti.  
**Nāma gottanti**, bho gotama, ahaṃ asukassa putto datto nāma mitto nāma idha  
āgatoti vadantā nāmaṃ sāventi nāma. Bho gotama, ahaṃ vāsītṭho nāma kaccāno  
nāma idha āgatoti vadantā gottaṃ sāventi nāma. Ete kira daliddā jiṇṇakulaputtā  
parisamajjhe nāmagottavasena pākaṭā bhavissāmāti evaṃ akaṃsu. Ye pana  
tuṇhībhūtā nisīdiṃsu, te kerāṭikā ceva andhabālā ca. Tattha kerāṭikā, “ekaṃ dve  
kathāsallāpe karonto vissāsiko hoti, atha vissāse sati ekaṃ dve bhikkhā adātuṃ  
na yuttan”ti tato attānaṃ mocentā tuṇhī nisīdanti. Andhabālā aññāṇatāyeva ava-  
kkhittamattikāpiṇḍo viya yattha katthaci tuṇhībhūtā nisīdanti.

**356. Kiñcideva desanti** kañci okāsaṃ kiñci kāraṇaṃ, athassa bhagavā pañhapu-  
cchane ussāhaṃ janento āha- **puccha, aggivessana, yadākaṅkhasīti**. Tassattho-  
“puccha yadi ākaṅkhasi, na me pañhavissajjane bhāro atthi”. Atha vā “puccha yaṃ  
ākaṅkhasi, sabbaṃ te vissajjessāmī”ti sabbaññupavāraṇaṃ pavāresi asādhā-  
raṇaṃ paccekabuddha-aggasāvamaḥāsāvakehi. Te hi yadākaṅkhasīti na vadanti,  
sutvā vedissāmāti vadanti. Buddhā pana “pucchāvuso, yadākaṅkhasi”ti (saṃ. ni.  
1.237) vā, “puccha, mahārāja, yadākaṅkhasi”ti (dī. ni. 1.162) vā,

“Puccha vāsava maṃ pañhaṃ, yaṃ kiñci manasicchasi;

tassa tasseva pañhassa, ahaṃ antaṃ karomi te” iti. (dī. ni. 2.356) vā,

“Tena hi tvaṃ, bhikkhu, sake āsane nisīditvā puccha yadākaṅkhasi”ti (ma. ni. 3.  
85) vā,

“Bāvarissa (2.0176) ca tuyhaṃ vā, sabbesaṃ sabbasaṃsayam;

katāvakāsā pucchavho, yaṃ kiñci manasicchathā”ti. (su. ni. 1036) vā,

“Puccha maṃ sabhiya pañhaṃ, yaṃ kiñci manasicchasi;

tassa tasseva pañhassa, ahaṃ antaṃ karomi te” iti. (su. ni. 517) vā-

Tesaṃ tesaṃ yakkhanarindadevasamaṇabrāhmaṇaparibbājakānaṃ sabbaññupa-  
vāraṇaṃ pavārenti. Anacchariyañcetaṃ, yaṃ bhagavā buddhabhūmiṃ patvā etaṃ  
pavāraṇaṃ pavāreyya. Yo bodhisattabhūmiyaṃ padesañāṇepi ṭhito

“Koṇḍañña pañhāni viyākarohi,

yācanti taṃ isayo sādhurūpā;

koṇḍañña eso manujesu dhammo,  
yaṃ vuddhamāgacchati esa bhāro”ti. (jā. 2.17.60)-

Evam sakkādīnaṃ atthāya isihi yācito

“Katāvakāsā pucchantu bhonto,  
yaṃ kiñci pañhaṃ manasābhipatthitaṃ;  
ahañhi taṃ taṃ vo viyākarissaṃ,  
ñatvā sayaṃ lokamimaṃ parañcā”ti. (jā. 2.17.61);

Evam sarabhaṅgakāle, sambhavajātaka ca sakalajambudīpaṃ tikkhattum vica-  
ritvā pañhānaṃ antakaraṃ adisvā suciratena brāhmaṇena pañhaṃ puṭṭho okāse  
kārite, jātiyā sattavasso rathikāyaṃ paṃsum kīlanto pallaṅkaṃ ābhujitvā antaravī-  
thiyaṃ nisinnova-

“Taggha te ahamakkhissaṃ, yathāpi kusalo tathā;  
rājā ca kho taṃ jānāti, yadi kāhati vā na vā”ti. (jā. 1.16.172)-

Sabbaññupavāraṇaṃ pavāresi.

Evam bhagavatā sabbaññupavāraṇāya pavāritāya attamano pañhaṃ  
pucchanto, “kathaṃ pana, bho gotamā”ti-ādimāha.

Athassa (2.0177) bhagavā, “passatha, bho, aññaṃ sāvakena kathitaṃ, aññaṃ  
satthā katheti, nanu mayā paṭikacceva vuttaṃ, ‘sace tathā patiṭṭhissati, yathāssa  
sāvakena patiṭṭhitaṃ, evāhaṃ vādaṃ āropessāmi’ti. Ayaṃ pana aññaṃ eva  
katheti, tattha kiṃ mayā sakkā kātun”ti evaṃ nigaṇṭhassa vacanokāso mā hotūti  
heṭṭhā assajittherena kathitanīyāmeneva kathento, **evaṃ kho ahaṃ, aggivessanā-**  
**ti-ādimāha. Upamā maṃ, bho gotama, paṭibhātīti,** bho gotama, mayhaṃ ekā  
upamā upaṭṭhāti, āharāmi taṃ upamanti vadati. **Paṭibhātu taṃ, aggivessanāti** upa-  
ṭṭhātu te, aggivessana, āhara taṃ upamaṃ visatthoti bhagavā avoca. **Balakaraṇi-**  
**yāti** bāhubalena kattabbā kasivāṇijjādikā kammantā. **Rūpattāyaṃ purisapugga-**  
**lo** Ti rūpaṃ attā assāti **rūpattā**, rūpaṃ attāti gahetvā ṭhitapuggalaṃ dīpeti. **Rūpe**  
**patiṭṭhāyāti** tasmīṃ attāti gahitarūpe patiṭṭhahitvā. **Puññaṃ vā apuññaṃ vā pasava-**  
**tīti** kusalaṃ vā akusalaṃ vā paṭilabhati. **Vedanattādīsūpi** eseva nayo. Iminā kiṃ  
dīpeti? Ime pañcakkhandhā imesaṃ sattānaṃ pathavī viya patiṭṭhā, te imesu  
pañcasu khandhesu patiṭṭhāya kusalākusalakammaṃ nāma āyūhanti. Tumhe eva-  
rūpaṃ vijjamaṇameva attānaṃ paṭisedhento pañcakkhandhā anattāti dīpethāti ati-  
viya sakāraṇaṃ katvā upamaṃ āhari. Iminā ca nigaṇṭhena āhaṭa-opammaṃ niya-  
tameva, sabbaññubuddhato añño tassa kathaṃ chinditvā vāde dosaṃ dātuṃ  
samattho nāma natthi. Duvidhā hi puggalā buddhaveneyyā ca sāvakaveneyyā ca.  
Sāvakaveneyye sāvakāpi vinenti buddhāpi. Buddhaveneyye pana sāvakā vinetuṃ  
na sakkonti, buddhāva vinenti. Ayampi nigaṇṭho buddhaveneyyo, tasmā etassa  
vādaṃ chinditvā añño dosaṃ dātuṃ samattho nāma natthi. Tenassa bhagavā  
sayameva vāde dosadassanattaṃ **nanu tvaṃ, aggivessanāti-ādimāha.**

Atha nigaṇṭho cintesi- “ativiya samaṇo gotamo mama vādaṃ patiṭṭhapeti, sace  
upari koci doso bhavissati, mamaṃ ekakaṃ yeveva niggaṇhissati. Handāhaṃ imaṃ  
vādaṃ mahājanassāpi matthake pakkhipāmi”ti, tasmā evamāha- **ahampi, bho**  
**gotama, evaṃ vadāmi rūpaṃ me attā ...pe... viññāṇaṃ me attāti, ayañca mahatī**

**janatā**ti. Bhagavā pana nigaṇṭhato sataguṇenapi (2.0178) saḥassaguṇenapi sata-saḥassaguṇenapi vādīvarataro, tasmā cintesi- “ayaṃ nigaṇṭho attānaṃ mocetvā mahājanassa matthake vādaṃ pakkipati, nāssa attānaṃ mocetuṃ dassāmi, mahājanato nivattetvā ekakaṃyeva naṃ niggaṇhissāmi”ti. Atha naṃ **kiñhi te, aggivessanā**ti-ādimāha. Tassattho- nāyaṃ janatā mama vādaṃ āropetuṃ āgatā, tvaṃyeva sakalaṃ vesāliṃ saṃvaṭṭitvā mama vādaṃ āropetuṃ āgato, tasmā tvaṃ sakameva vādaṃ niveṭhehi, mā mahājanassa matthake pakkipasīti. So paṭijānanto **ahañhi, bho gotamā**ti-ādimāha.

**357.** Iti bhagavā nigaṇṭhassa vādaṃ paṭiṭṭhapetvā, **tena hi, aggivessanā**ti pucchāṃ ārabhi. Tattha **tena**

hīti kāraṇatthe nipāto. Yasmā tvaṃ pañcakkhandhe attato paṭijānāsi, tasmāti attho. **Sakasmim vijiteti** attano raṭṭhe. **Ghātetāyaṃ vā ghātetunti** ghātārahaṃ ghātetabba-yuttakaṃ ghātetuṃ. **Jāpetāyaṃ vā jāpetunti** dhanajānirahaṃ jāpetabbayuttaṃ jāpetuṃ jīṇṇadhanaṃ kātuṃ. **Pabbājetāyaṃ vā pabbājetunti** sakaraṭṭhato pabbājanārahaṃ pabbājetuṃ, nīharituṃ. **Vattituñca arahatīti** vattati ceva vattituñca arahati. Vattituṃ yuttoti dīpeti. Iti nigaṇṭho attano vādabhedanattaṃ āhaṭakāraṇameva attano māraṇatthāya āvudhaṃ tikhiṇaṃ karonto viya visesetvā dīpeti, yathā taṃ bālo. **Evaṃ me rūpaṃ hotūti** mama rūpaṃ evaṃvidhaṃ hotu, pāsādikaṃ abhirūpaṃ alaṅkatappaṭiyattaṃ suvaṇṇatoraṇaṃ viya susajjitacittapaṭo viya ca manāpadassananti. **Evaṃ me rūpaṃ mā ahoṣīti** mama rūpaṃ evaṃvidhaṃ mā hotu, dubbaṇṇaṃ dussaṇṭhitaṃ valitapalitaṃ tilakasamākiṇṇanti.

**Tuṇhī ahoṣīti** nigaṇṭho imasmim ṭhāne viraddhabhāvaṃ ṇatvā, “samaṇo gotamo mama vādaṃ bhindanattāya kāraṇaṃ āhari, ahaṃ bālatāya tameva visesetvā dīpesim, idāni naṭṭhomhi, sace vattatīti vakkhāmi, ime rājāno uṭṭhahitvā, ‘aggive-ssana, tvaṃ mama rūpe vaso vattatīti vadasi, yadi te rūpe vaso vattati, kasmā tvaṃ yathā ime licchavirājāno (2.0179) tāvatimsadevasadisehi attabhāvehi virocanti abhirūpā pāsādikā, evaṃ na virocasi’ti. Sace na vattatīti vakkhāmi, samaṇo gotamo uṭṭhahitvā, ‘aggivessana, tvaṃ pubbe vattati me rūpasmim vasoti vatvā idāni paṭikkhipasi’ti vādaṃ āropessati. Iti vattatīti vuttepi eko doso, na vattatīti vuttepi eko doso”ti tuṇhī ahoṣi. Dutiyampi bhagavā pucchi, dutiyampi tuṇhī ahoṣi. Yasmā pana yāvatatiyaṃ bhagavatā pucchite abyākarontassa sattadhā muddhā phalati, buddhā ca nāma sattānaṃyeva atthāya kappasatasahassādhikāni cattāri asaṅkhyeyyāni pāramīnaṃ pūritattā sattesu balava-anuddayā honti. Tasmā yāvatatiyaṃ apucchitvā atha kho bhagavā saccakaṃ nigaṇṭhaputtaṃ etadavoca- etaṃ “byākarohī dānī”ti-ādivacanaṃ avoca.

Tattha **sahadhammiki** sahetukaṃ sakāraṇaṃ. Vajiraṃ paṇimhi assāti **vajira-pāṇi**. **Yakkho** Ti na yo vā so vā yakkho, sakko devarājāti veditabbo. **Ādittanti** aggivāṇṇaṃ. **Sampajjalitanti** suṭṭhu pajjalitaṃ. **Sajotibhūtanti** samantato jotibhūtaṃ, ekaggijālabhūtanti attho. **Ṭhito hotīti** mahantaṃ sīsaṃ, kandalamakulasadisā dāṭhā, bhayānakāni akkhiṇāsādīnīti evaṃ virūparūpaṃ māpetvā ṭhito. Kasmā panesa āgatoti? Diṭṭhivissajjāpanattaṃ. Apica, “ahañceva kho pana dhammaṃ deseyyaṃ, pare ca me na ājāneyyun”ti evaṃ dhammadesanāya apposukka-bhāvaṃ āpanne bhagavati sakko mahābrahmunā saddhim āgantvā, “bhagavā dhammaṃ desetha, tumhākaṃ āṇāya avattamāne mayaṃ vattāpessāma, tumhākaṃ dhammacakkaṃ hotu, amhākaṃ āṇācakkān”ti paṭiññamakāsi. Tasmā “ajja saccakaṃ tāsetvā pañhaṃ vissajjāpessāmi”ti āgato.

**Bhagavā ceva passati, saccako ca nigaṇṭhaputtoti** yadi hi taṃ aññepi passeyyūṃ. Taṃ kāraṇaṃ agaru assa, “samaṇo gotamo saccakaṃ attano vāde anotarantaṃ ṇatvā yakkhaṃ āvāhetvā dassesi, tato saccako bhayena kathesi”ti vadeyyūṃ. Tasmā bhagavā ceva passati saccako ca. Tassa taṃ disvāva sakala-sarīrato sedā muccimsu, antokucchi viparivattamānā mahāraṃvaṃ ravi. So “aññepi nu kho passanti”ti olokeno (2.0180) kassaci lomahaṃsamattampi na

addasa. Tato- “idaṃ bhayaṃ mameva uppannaṃ. Sacāhaṃ yakkhoti yakkhāmi, ‘kiṃ tuyhameva akkhīni atthi, tvameva yakkhaṃ passasi, paṭhamaṃ yakkhaṃ adisvā samaṇena gotamena vādasāṅghāṭe khittova yakkhaṃ passasi’ ti vadeyyun” - ti cintetvā- “na dāni me idha aññaṃ paṭisaraṇaṃ atthi, aññatra samaṇā gotamā” ti maññaṃāno, atha kho saccako nigaṇṭhaputto ...pe... bhagavantaṃ etadavoca. **Tāṇaṃ gavesīti** tāṇanti gavesamāno. **Leṇaṃ gavesīti** leṇanti gavesamāno. **Saraṇaṃ gavesīti** saraṇanti gavesamāno. Ettha ca tāyati rakkhatīti **tāṇaṃ**. Nilīyanti etthāti **leṇaṃ**. Saratīti **saraṇaṃ**, bhayaṃ hiṃsati viddhaṃsetīti attho.

**358. Manasi karitvā** Ti manamhi katvā paccavekkhitvā upadhāretvā. **Evaṃ me vedanā hotūti** kusalāva hotu, sukhāva hotu. **Evaṃ me saññā hotūti** kusalāva hotu, sukhāva hotu, somanassasampayuttāva hotūti. **Sañkhāraviññānesupi** eseva nayo. **Mā ahoṣīti** ettha pana vuttavipariyāyena attho veditabbo. **Kallaṃ nūti** yuttaṃ nu. **Samanupassituntī** “etaṃ mama esohamasmi eso me attā” ti evaṃ taṇhāmānadiṭṭhivasena passituṃ. **No idaṃ, bho gotamāti** na yuttametaṃ, bho gotama. Iti bhagavā yathā nāma cheko ahituṇḍiko sappadaṭṭhavisamaṃ teneva sappena puna ḍaṃsāpetvā ubbāheyya, evaṃ tassamaṃyeva parisati saccakaṃ nigaṇṭhaputtaṃ teneva mukhena pañcakkhandhā aniccā dukkhā anattāti vadāpesi. **Dukkhaṃ allīnoti** imaṃ pañcakkhandhadukkhaṃ taṇhādiṭṭhīhi allīno. **Upagato ajjhositotipi** taṇhādiṭṭhivaseneva veditabbo. **Dukkhaṃ etaṃ mamāti**-ādīsu pañcakkhandhadukkhaṃ taṇhāmānadiṭṭhivasena samanupassatīti attho. **Parijāneyyāti** aniccaṃ dukkhaṃ anattāti tīraṇapariññāya parito jāneyya. **Parikkhepetvāti** khayaṃ vayaṃ anuppādaṃ upanetvā.

**359. Navanti taruṇaṃ. Akukkukajātanti** pupphaggahaṇakāle anto aṅguṭṭhappamāṇo eko ghanadaṇḍako nibbattati, tena virahitanti attho. **Rittoti** suñño antosāra-virahito. Rittattāva **tuccho. Aparaddhoti** parājito. **Bhāsitā kho pana teti** idaṃ bhagavā tassa mukharabhāvaṃ (2.0181) pakāsetvā niggaṇhanto āha. So kira pubbe pūraṇādayo cha satthāro upasaṅkamitvā pañhaṃ pucchati. Te vissajjetuṃ na sakkonti. Atha nesaṃ parisamajjhe mahantaṃ vippakāraṃ āropetvā utṭhāya jayaṃ pavedento gacchati. So sammāsambuddhampi tatheva viheṭhessāmiti saññāya upasaṅkamitvā-

“Ambho ko nāma yaṃ rukkho, sinnapatto sakaṇṭako; yattha ekappahārena, uttamaṅgaṃ vibhijjitaṃ” ti.

Ayaṃ khadiraṃ āhacca asāra-rukkhaparicito mudutuṇḍasakuṇo viya sabbaññutaññāṇasāraṃ āhacca ñāṇatuṇḍabhedamaṃ patto sabbaññutaññāṇassa thaddhabhāvaṃ aññāsi. Tadassa parisamajjhe pakāsetto **bhāsitā kho pana teti**-ādimāha. **Natthi etarahīti** upādinna-kasarīre sedo nāma natthīti na vattabbaṃ, etarahi pana natthīti vadati. **Suvaṇṇavaṇṇaṃ kāyaṃ vivarīti** na sabbaṃ kāyaṃ vivari. Buddhā nāma gaṇṭhikaṃ paṭimuñcitvā paṭicchannasarīrā parisati dhammaṃ desenti. Atha bhagavā galavāṭakasammukhaṭṭhāne cīvaraṃ gahetvā caturaṅgula-mattaṃ otāresi. Otāritamatte pana tasmim̐ suvaṇṇavaṇṇā rasmiyo puñjapuñjā hutvā suvaṇṇaghaṭato rattasuvaṇṇarasadhārā viya, rattavaṇṇa-valāhakato vijjulātā viya ca nikkhamitvā suvaṇṇamurajasadisamaṃ mahākhandhaṃ uttamasiraṃ pada-

kkhiṇaṃ kurumānā ākāse pakkhandiṃsu. Kasmā pana bhagavā evamakāsīti? Mahājanassa kaṅkhāvinodanattaṃ. Mahājano hi samaṇo gotamo mayhaṃ sedo natthīti vadati, saccakassa tāva nigaṇṭhaputtassa yantāruḷhassa viya sedā paggharanti. Samaṇo pana gotamo ghanadupaṭṭacivaraṃ pārupitvā nisinno, anto sedassa atthitā vā natthitā vā kathaṃ sakkā ñātunti kaṅkhaṃ kareyya, tassa kaṅkhāvinodanattaṃ evamakāsi. **Maṅkubhūto**ti nittejabhūto. **Pattakkhandhoti** patitakkhandho. **Appaṭibhānoti** uttari appassanto. **Nisīdīti** pādaṅguṭṭhakena bhūmiṃ kasamāno nisīdi.

**360. Dummukhoti** na virūpamukho, abhirūpo hi so pāsādiko. Nāmaṃ panassa etaṃ. **Abhabbo taṃ pokkharāṇiṃ puna otaritunti** sabbesaṃ aḷānaṃ (2.0182) bhaggattā pacchinnagamano otarituṃ abhabbo, tattheva kākakulalādīnaṃ bhattaṃ hotīti dasseti. **Visūkāyikānīti** diṭṭhivisūkāni. **Visevitānīti** diṭṭhisañcaritāni. **Vipphanditānīti** diṭṭhivipphanditāni. **Yadidaṃ vādādhippāyoti** ettha **yadidanti** nipātamattaṃ; vādādhippāyo hutvā vādaṃ āropessāmīti ajjhāsayena upasaṅkamuṃ abhabbo; dhammassavanāya pana upasaṅkameyyāti dasseti. **Dummukhaṃ licchaviputtaṃ etadavocāti** kasmā avoca? Dummukhassa kirassa upamāharaṇakāle sesa licchavikumārāpi cintesuṃ- “iminā nigaṇṭhena amhākaṃ sippuggahaṇaṭṭhāne ciraṃ avamāno kato, ayaṃ dāni amittassa piṭṭhiṃ passituṃ kālo. Mayampi ekekaṃ upamaṃ āharitvā pāṇippahārena patitaṃ muggarena pothento viya tathā naṃ karissāma, yathā na puna parisamajjhe sīsaṃ ukkhipituṃ sakkhissati”ti, te opammāni karitvā dummukhassa kathāpariyosānaṃ āgamayamānā nisīdiṃsu. Saccako tesā adhippāyaṃ ñatvā, ime sabbeva gīvaṃ ukkhipitvā oṭṭhehi calamānehi ṭhitā; sace paccekā upamā harituṃ labhissanti, puna mayā parisamajjhe sīsaṃ ukkhipituṃ na sakkā bhavissati, handāhaṃ dummukhaṃ apasādetvā yathā aññassa okāso na hoti, evaṃ kathāvāraṃ pacchinditvā samaṇaṃ gotamaṃ paṇhaṃ pucchissāmīti tasmā etadavoca. Tattha **āgamehīti** tiṭṭha, mā puna bhaṇāhīti attho.

**361. Tiṭṭhatesā, bho gotamāti,** bho gotama, esā amhākañceva aññesañca puthu-samaṇabrāhmaṇānaṃ vācā tiṭṭhatu. **Vilāpaṃ vilapitaṃ maññeti** etañhi vacanaṃ vilapitaṃ viya hoti, vipपालapitamattaṃ hotīti attho. Atha vā **tiṭṭhatesāti** ettha kathāti āharitvā vattabbā. **Vācāvilāpaṃ vilapitaṃ maññeti** ettha panidaṃ vācānicchāraṇaṃ vilapitamattaṃ maññe hotīti attho.

Idāni paṇhaṃ pucchanto **kittāvatāti**-ādimāha. Tattha **vesārajapatto**ti ñāṇapatto. **Aparappaccayoti** aparappattiyo. Athassa bhagavā paṇhaṃ vissajjento **idha, aggivessanāti**-ādimāha, taṃ uttānatthameva. Yasmā panettha passatīti vuttattā sekkhabhūmi dassitā. Tasmā uttari asekkhabhūmiṃ pucchanto dutiyaṃ paṇhaṃ pucchi, tampissa bhagavā byākāsi. Tattha (2.0183) **dassanānuttariyenāti**-ādīsu **dassanānuttariyanti** lokiyalokuttarā paññā. **Paṭipadānuttariyanti** lokiyalokuttarā paṭipadā. **Vimuttānuttariyanti** lokiyalokuttarā vimutti. Suddhalokuttarameva vā gahetvā **dassanānuttariyanti** arahattamaggasammādiṭṭhi. **Paṭipadānuttariyanti** sesāni maggaṅgāni. **Vimuttānuttariyanti** aggaphalavimutti. Khīṇāsavassa vā nibbānadassanaṃ **dassanānuttariyaṃ** nāma. Maggaṅgāni **paṭipadānuttariyaṃ**. Agga-

phalaṃ **vimuttānuttariyanti** veditabbaṃ. **Buddho so bhagavā** Ti so bhagavā sayampi cattāri saccāni buddho. **Bodhāyāti** paresampi catusaccabodhāya dhammaṃ deseti. **Dantoti-ādīsu dantoti** nibbisevano. **Damathāyāti** nibbisevanatthāya. **Santoti** sabbakilesavūpasamena santo. **Samathāyāti** kilesavūpasamāya. **Tiṇṇoti** caturoghatiṇṇo. **Taraṇāyāti** caturoghataraṇāya. **Parinibbutoti** kilesaparini-bbānena parinibbuto. **Parinibbānāyāti** kilesaparinibbānatthāya.

**362. Dhaṃsīti** guṇadhaṃsakā. **Pagabbāti** vācāpāgabbīyena samannāgatā. **Āsādetabbanti** ghaṭṭetabbaṃ. **Āsajjāti** ghaṭṭetvā. **Natveva bhavantam gotamanti** bhavantam gotamaṃ āsajja kassaci attano vādaṃ anupahataṃ sakalaṃ ādāya pakkamituṃ thāmo natthīti dasseti. Na hi bhagavā hatthi-ādayo viya kassaci jīvitan-tarāyaṃ karoti. Ayaṃ pana nigaṇṭho imā tisso upamā na bhagavato ukkaṃsanatthaṃ āhari, attukkaṃsanatthameva āhari. Yathā hi rājā kañci paccatthikaṃ ghātetvā evaṃ nāma sūro evaṃ thāmasampanno puriso bhavissatīti paccatthikaṃ thomentopi attānameva thometi. Evameva sopi **siyā hi, bho gotama, hatthiṃ pabhinnanti-ādīhi** bhagavantam ukkaṃsentopi mayameva sūrā mayaṃ paṇḍitā mayaṃ bahussutāyeva evaṃ pabhinnahatthiṃ viya, jalita-aggikkhandhaṃ viya, phaṇakata-āsīvisaṃ viya ca vādatthikā sammāsambuddhaṃ upasaṅkamimhāti attānaṃyeva ukkaṃseti. Evaṃ attānaṃ ukkaṃsetvā bhagavantam nimantaya-māno **adhivāsetu meti-ādimāha**. Tattha **adhivāsetūti** sampaṭicchatu. **Svātanāyāti** yaṃ me tumhesu kāraṃ karoto sve bhavissati puññañca pītipāmojjañca, tadatthāya. **Adhivāsesi bhagavā tuṇhībhāvenāti** bhagavā (2.0184) kāyaṅgaṃ vā vācaṅgaṃ vā acopetvā abbhantareyeva khantiṃ dhārento tuṇhībhāvena adhivāsesi. Saccakassa anuggahakaraṇatthaṃ manasāva sampaṭicchīti vuttaṃ hoti.

**363. Yamassa patirūpaṃ maññeyyāthāti** te kira licchavī tassa pañcathālipākasa-tāni niccabhattaṃ āharanti.



Tadeva sandhāya esa sve tumhe yaṃ assa samaṇassa gotamassa patirūpaṃ kappiyanti maññeyyātha, taṃ āhareyyātha; samaṇassa hi gotamassa tumhe paricārakā kappiyākappiyaṃ yuttāyuttaṃ jānāthāti vadati. **Bhattābhihāraṃ abhihariṃ-sūti** abhiharitabbaṃ bhattaṃ abhihariṃsu. **Paṇītenā** Ti uttamena. **Sahatthāti** sahatthena. **Santappetvāti** suṭṭhu tappetvā, paripuṇṇaṃ suhitaṃ yāvadatthaṃ katvā. **Sampavāretvāti** suṭṭhu pavāretvā, alaṃ alanti hatthasaññāya paṭikkhipāpetvā. **Bhuttāvinti** bhuttavantaṃ. **Onītapattapāṇinti** pattato onītapāṇiṃ, apanītahatthanti vuttaṃ hoti. “Onītapattapāṇi” tipi pāṭho, tassattho, onittaṃ nānābhūtaṃ pattaṃ pāṇito assāti onītapattapāṇi. Taṃ onītapattapāṇiṃ, hatthe ca pattañca dhovivā ekamante pattaṃ nikkhipivā nisinnanti attho. **Ekamantaṃ nisīdīti** bhagavantaṃ evaṃbhūtaṃ ñatvā ekasmiṃ okāse nisīdīti attho. **Puññañcāti** yaṃ imasmiṃ dāne puññaṃ, āyatiṃ vipākakkhandhāti attho. **Puññaamahīti** vipākakkhandhānaṃyeva parivāro. **Taṃ dāyakānaṃ sukhāya hotūti** taṃ imesaṃ licchavīnaṃ sukhatthāya hotu. Idaṃ kira so ahaṃ pabbajito nāma, pabbajitena ca na yuttaṃ attano dānaṃ niyyātetunti tesāṃ niyyātentō evamāha. Atha bhagavā yasmā licchavīhi sacca-kassa dinnaṃ, na bhagavato. Saccakena pana bhagavato dinnaṃ, tasmā tamatthaṃ dipento **yaṃ kho, aggivessanāti**-ādimāha. Iti bhagavā nigaṇṭhassa matena vināyeva attano dinnaṃ dakkhiṇaṃ nigaṇṭhassa niyyātesī, sā cassa anā-gate vāsanā bhavissatīti.

Papañcasūdaniyā majjhimanikāyaṭṭhakathāya

Cūlasaccakasuttavaṇṇanā niṭṭhitā.

## 6. Mahāsaccakasuttavaṇṇanā

**364. Evaṃ** (2.0185) **me sutanti** mahāsaccakasuttaṃ. Tattha **ekaṃ samayanti** ca **tena kho pana samayenāti** ca **pubbaṇhasamayanti** ca tīhi padehi ekova samayo vutto. Bhikkhūnañhi vattapaṭipattiṃ katvā mukhaṃ dhovivā pattacīvaramādāya cetiyaṃ vanditvā kataraṃ gāmaṃ pavisissāmāti vitakkamaḷake ṭhitakālo nāma hoti. Bhagavā evarūpe samaye rattadupaṭṭaṃ nivāsetvā kāyabandhanaṃ bandhitvā paṃsukūlacīvaraṃ ekaṃsaṃ pārupitvā gandhakuṭito nikkhamma bhikkhusaṅghaparivuto gandhakuṭipamukhe aṭṭhāsi. Taṃ sandhāya,- “ekaṃ samayanti ca tena kho pana samayenāti ca pubbaṇhasamayan” ti ca vuttaṃ. **Pavisitukāmoti** piṇḍāya pavisissāmīti evaṃ katasanniṭṭhāno. **Tenupasaṅkamīti** kasmā upasaṅkamīti? Vādāropanajjhāsayena. Evaṃ kirassa ahosi- “pubbepāhaṃ apaṇḍitatāya sakalaṃ vesālipariṣaṃ gahetvā samaṇassa gotamassa santikaṃ gantvā parisamajjhe maṅku jāto. Idāni tathā akatvā ekakova gantvā vādaṃ ārope-ssāmi. Yadi samaṇaṃ gotamaṃ parājetuṃ sakkhissāmi, attano laddhiṃ dipetvā jayaṃ karissāmi. Yadi samaṇassa gotamassa jayo bhavissati, andhakāre naccaṃ

viya na koci jānissatī”ti niddāpañhaṃ nāma gahetvā iminā vādajjhāsayena upasa-  
ṅkami.

**Anukampaṃ upādāyāti** saccakassa nigaṇṭhaputtassa anukampaṃ paṭicca. Therassa kirassa evaṃ ahosi- “bhagavati muhuttaṃ nisinne buddhadassanaṃ dhammassavanañca labhissati. Tadassa dīgharattaṃ hitāya sukhāya saṃvattissa-  
tī”ti. Tasmā bhagavantaṃ yācitvā paṃsukūlacivaraṃ catugguṇaṃ paññapetvā **nisī-  
datu bhagavāti** āha. “Kāraṇaṃ ānando vadatī”ti sallakkhetvā nisīdi bhagavā  
paññatte āsane. **Bhagavantaṃ etadavocāti** yaṃ pana pañhaṃ ovaṭṭikasāraṃ  
katvā ādāya āgato taṃ ṭhapetvā passena tāva pariharanto etaṃ **santi, bho gotamā-  
ti-ādivacanaṃ avoca.**

**365. Phusanti hi te, bho gotamāti** te samaṇabrāhmaṇā sarīre uppannaṃ sarī-  
rikaṃ dukkhaṃ vedanaṃ phusanti labhanti, anubhavanti attho. **Ūrukkhambhoti**  
khambhakata-ūrubhāvo, ūruthaddhatāti attho. Vimhayatthavasena panettha **bhavi-  
ssatīti** anāgatavacanaṃ kataṃ. **Kāyanvayaṃ hotīti** kāyānugataṃ (2.0186) hoti  
kāyassa vasavatti. **Kāyabhāvanāti** pana vipassanā vuccati, tāya cittavikkhepaṃ  
pāpuṇanto nāma natthi, iti nigaṇṭho asantaṃ abhūtaṃ yaṃ natthi, tadevāha. **Citta-  
bhāvanāti**pi samatho vuccati, samādhuyuttassa ca puggalassa ūrukkhambhādayo  
nāma natthi, iti nigaṇṭho idaṃ abhūtameva āha. Aṭṭhakathāyaṃ pana vuttaṃ-  
“yatheva ‘bhūtapubbanti vatvā ūrukkhambhopi nāma bhavissatīti-ādīni vadato  
anāgatarūpaṃ na sameti, tathā atthopi na sameti, asantaṃ abhūtaṃ yaṃ natthi,  
taṃ kathetī”ti.

**No kāyabhāvananti** pañcātapatappanādiṃ attakilamathānuyogaṃ sandhāyāha.  
Ayañhi tesam kāyabhāvanā nāma. Kiṃ pana so disvā evamāha? So kira divādi-  
vassa vihāraṃ āgacchati, tasmim kho pana samaye bhikkhū pattacivaraṃ paṭisā-  
metvā attano attano rattiṭṭhānadivāṭṭhānesu paṭisallānaṃ upagacchanti. So te  
paṭisallīne disvā cittabhāvanāmatthaṃ ete anuyuñjanti, kāyabhāvanā panetesam  
natthīti maññamāno evamāha.

**366.** Atha naṃ bhagavā anuyuñjanto **kinti pana te, aggivessana, kāyabhāvanā  
sutāti** āha. So taṃ vitthārento **seyyathidaṃ, nando vacchoti-ādimāha.** Tattha  
**nandoti** tassa nāmaṃ. **Vacchoti** gottaṃ. **Kisoti** nāmaṃ. **Samkiccoti** gottaṃ. **Makkha-  
ligosālo** heṭṭhā āgatova. **Eteti** ete tayo janā, te kira kiliṭṭhatapānaṃ matthakapattā  
ahesuṃ. **Uḷārāni uḷārānīti** paṇitāni paṇitāni. **Gāhenti nāmāti** balaṃ gaṇhāpentī  
nāma. **Brūhentīti** vaḍḍhenti. **Medentīti** jātamedam karonti. **Purimaṃ pahāyāti**  
purimaṃ dukkarakāraṃ pahāya. **Pacchā upacinantīti** pacchā uḷārakhādaniyādīhi  
santappenti, vaḍḍhenti. **Ācayāpacayo hotīti** vaḍḍhi ca avaḍḍhi ca hoti, iti imassa  
kāyassa kālena vaḍḍhi, kālena parihānīti vaḍḍhiparihānimattameva paññāyati,  
kāyabhāvanā pana na paññāyatīti dīpetvā cittabhāvanaṃ pucchanto, “kinti pana  
te, aggivessana, cittabhāvanā sutā”ti āha. **Na sampāyāsīti** sampādetvā kathetuṃ  
nāsakkhi, yathā taṃ bālaputhujano.

**367. Kuto** (2.0187) **pana tvanti** yo tvaṃ evaṃ oḷārikaṃ dubbalaṃ kāyabhā-  
vanaṃ na jānāsī? So tvaṃ kuto saṇhaṃ sukhumaṃ cittabhāvanaṃ jānissasīti.  
Imasmim pana ṭhāne codanālayatthero, “abuddhavacanaṃ nāmetaṃ padan”ti

bījanim ṭhapetvā pakkamitum ārabhi. Atha naṃ mahāsivatthero āha- “dissati, bhikkhave, imassa cātumahābhūtikassa kāyassa ācayopi apacayopi ādānampi nikkhepanampi”ti (saṃ. ni. 2.62). Taṃ sutvā sallakkhesi- “oḷārikaṃ kāyaṃ pari-ggaṇhantassa uppannavipassanā oḷārikāti vattum vaṭṭati”ti.

**368. Sukhasārāgī**Ti sukhasārāgena samannāgato. **Sukhāya vedanāya nirodhā uppajjati dukkhā vedanā**ti na anantarāva uppajjati, sukhadukkhānañhi anantarapa-cçayatā paṭṭhāne (paṭṭhā. 1.2.45-46) paṭisiddhā. Yasmā pana sukhe aniruddhe dukkhaṃ nuppajjati, tasmā idha evaṃ vuttaṃ. **Pariyādāya tiṭṭhati**ti khepetvā gaṇhitvā tiṭṭhati. **Ubhatopakkhanti** sukhaṃ ekaṃ pakkhaṃ dukkhaṃ ekaṃ pakkhanti evaṃ ubhatopakkhaṃ hutvā.

**369. Uppannāpi sukhā vedanā cittaṃ na pariyādāya tiṭṭhati, bhāvitattā kāyassa. Uppannāpi dukkhā vedanā cittaṃ na pariyādāya tiṭṭhati, bhāvitattā cittaṃ**ti ettha kāyabhāvanā vipassanā, cittabhāvanā samādhi. Vipassanā ca sukhasa paccanīkā, dukkhasa āsannā. Samādhi dukkhasa paccanīko, sukhasa āsanno. Kathaṃ? Vipassanaṃ paṭṭhapetvā nisinnassa hi addhāne gacchante gacchante tattha tattha aggi-uṭṭhānaṃ viya hoti, kacchehi sedā muccanti, matthakato usumavatti-uṭṭhānaṃ viya hoti cittaṃ haññati vihaññati vipphandati. Evaṃ tāva vipassanā sukhasa paccanīkā, dukkhasa āsannā. Uppanne pana kāyike vā cetasike vā dukkhe taṃ dukkhaṃ vikkhambhetvā samāpattiṃ samāpannassa samāpattikkhaṇe dukkhaṃ dūrāpagataṃ hoti, anappakaṃ sukhaṃ okkamati. Evaṃ samādhi dukkhasa paccanīko, sukhasa āsanno. Yathā vipassanā sukhasa paccanīkā, dukkhasa āsannā, na tathā samādhi. Yathā samādhi dukkhasa paccanīko, sukhasa āsanno, na ca tathā vipassanāti. Tena vuttaṃ- “uppannāpi sukhā vedanā cittaṃ na pariyādāya (2.0188) tiṭṭhati, bhāvitattā kāyassa. Uppannāpi dukkhā vedanā cittaṃ na pariyādāya tiṭṭhati, bhāvitattā cittaṃ”ti.

**370. Āsajja upaniyāti** guṇe ghaṭṭetvā ceva upanetvā ca. **Taṃ vata me**Ti taṃ vata mama cittaṃ.

**371. Kiñhi no siyā, aggivessanā**ti, aggivessana, kiṃ na bhavissati, bhavissateva, mā evaṃ saññī hohi, uppajjiyeva me sukhāpi dukkhāpi vedanā, uppannāya panassā ahaṃ cittaṃ pariyādāya ṭhātuṃ na demi. Idānissa tamatthaṃ pakāsetum upari pasādāvahaṃ dhammadesanaṃ desetukāmo mūlato paṭṭhāya mahābhini-kkhamanaṃ ārabhi. Tattha **idha me, aggivessana, pubbeva sambodhā ...pe... tattheva nisīdim, alamidaṃ padhānāyā**ti idaṃ sabbaṃ heṭṭhā pāsarāsisutte vuttanayeneva veditabbaṃ. Ayaṃ pana viseso, tattha bodhipallaṅke nisajjā, idha dukkarakārikā.

**374. Allakaṭṭhanti** allamaṃ udumbarakaṭṭhaṃ. **Sasnehanti** sakhīraṃ. **Kāmehīti** vatthukāmehi. **Avūpakaṭṭhāti** anapagatā. **Kāmacchandoti**-ādīsu kilesakāmovā chandakaraṇavasena **chando**. Sinehakaraṇavasena **sneho**. Mucchākaraṇavasena **mucchā**. Pipāsākaraṇavasena **pipāsā**. Anudahanavasena **pariḷāhoti** vedi-tabbo. **Opakkamikāti** upakkamanibbattā. **Ñāṇāya dassanāya anuttarāya sambodhāyā**ti sabbaṃ lokuttaramaggavevacanameva.

Idaṃ panettha opammasaṃsandanaṃ- allamaṃ sakhīraṃ udumbarakaṭṭhaṃ viya

hi kilesakāmena vatthukāmato anissaṭapuggalā. Udahe pakkhittabhāvo viya kilesakāmena tintatā; manthanenāpi aggino anabhinibbattanaṃ viya kilesakāmena vatthukāmato anissaṭānaṃ opakkamikāhi vedanāhi lokuttaramaggassa anadhigamo. Amanthanenāpi aggino anabhinibbattanaṃ viya tesam puggalānaṃ vināpi opakkamikāhi vedanāhi lokuttaramaggassa anadhigamo. Dutiya-upamāpi imināva nayena veditabbā. Ayaṃ pana viseso, purimā saputtabhariyapabbajjāya upamā; pacchimā brāhmaṇadhammikapabbajjāya.

**376.** Tatiya-upamāya (2.0189) **koḷāpanti** chinnaśinehaṃ nirāpaṃ. **Thale nikkhittanti** pabbatathale vā bhūmithale vā nikkhittaṃ. Etthāpi idaṃ opammaśaṃsandaṃ- sukkaḷāpakāṭṭhaṃ viya hi kilesakāmena vatthukāmato nissaṭapuggalā, ārakā udakā thale nikkhittabhāvo viya kilesakāmena atintatā. Manthane- nāpi aggino abhinibbattanaṃ viya kilesakāmena vatthukāmato nissaṭānaṃ abbhokāsikanesaṃjīkādivasena opakkamikāhipi vedanāhi lokuttaramaggassa adhigamo. Aññassa rukkhassa sukkaśākhāya saddhiṃ ghaṃsanamatteneva aggino abhinibbattanaṃ viya vināpi opakkamikāhi vedanāhi sukkaśāyeva paṭipadāya lokuttaramaggassa adhigamoti. Ayaṃ upamā bhagavatā attano atthāya āhaṭā.

**377.** Idāni attano dukkarakārikaṃ dassento, **tassa mayhanti**-ādimāha. Kiṃ pana bhagavā dukkaraṃ akatvā buddho bhavituṃ na samatthoti? Katvāpi akatvāpi samatthova. Atha kasmā akāsīti? Sadevakassa lokassa attano parakkamaṃ dassessāmi. So ca maṃ vīriyanimmathanaguṇo hāsessatīti. Pāsāde nisinnoyeva hi paveṇi-āgataṃ rajjaṃ labhitvāpi khattiyo na tathāpamudito hoti, yathā bala- kāyaṃ gahetvā saṅgāme dve tayo sampahāre datvā amittamathanaṃ katvā patta- rajjo. Evaṃ patta- rajjassa hi rajjasiriṃ anubhavantaṃsa parisam oloketvā attano parakkamaṃ anussaritvā, “asukaṭṭhāne asukakammaṃ katvā asukañca asu- kañca amittaṃ evaṃ vijjhivā evaṃ paharivā imaṃ rajjasiriṃ pattosmi” ti cintayato balavasomanassaṃ uppajjati. Evamevaṃ bhagavāpi sadevakassa lokassa para- kkaṃ dassessāmi, so hi maṃ parakkamo ativiya hāsessati, somanassaṃ uppā- dessatīti dukkaramakāsi.

Apica pacchimaṃ janataṃ anukampamānopi akāsiyeva, pacchimā hi

janatā sammāsambuddho kappasatasahassādhikāni cattāri asaṅkhyeyyāni pāramiyo pūretvāpi padhānaṃ padahitvāva sabbaññutaññāṇaṃ patto, kimaṅgaṃ pana mayanti padhānavīriyaṃ kattabbaṃ maññissati; evaṃ sante khippameva jātijarāmarāṇassa antaṃ karissatīti pacchimaṃ janataṃ anukampamāno akāsiyeva.

**Dantebhidantamādhāyāti** heṭṭhādante uparidantaṃ ṭhapetvā. **Cetasā cittanti** kusalacittena akusalacittaṃ. **Abhiniggaṇheyanti** niggaṇheyyaṃ. **Abhinippīleyanti** (2.0190) nippīleyyaṃ. **Abhisantāpeyyanti** tāpetvā vīriyanimmathanaṃ kareyyaṃ. **Sāraddhoti** sadaratho. **Padhānābhitunnassāti** padhānena abhitunnassa, viddhassa satoti attho.

**378. Appāṇakanti** nirassāsakaṃ. **Kammāragaggariyāti** kammārassa gaggaraṇāḷiyā. **Sīsavedanā hontīti** kutoci nikkhamituṃ alabhamānehi vātehi samuṭṭhāpitā balavatiyo sīsavedanā honti. **Sīsaveṭhaṃ dadeyyāti** sīsaveṭhanaṃ dadeyya. **Devatāti** bodhisattassa caṅkamanakoṭiyaṃ paṇṇasālapariveṇasāmantaṃ ca adhivatthā devatā.

Tadā kira bodhisattassa adhimatte kāyadāhe uppanne mucchā udapādi. So caṅkameva nisinno hutvā papati. Taṃ disvā devatā evamāhaṃsu- “vihārotveva so arahato”ti, “arahanto nāma evarūpā honti matakasadisā”ti laddhiyā vadanti. Tattha yā devatā “kālaṅkato”ti āhaṃsu, tā gantvā suddhodanamahārājassa ārocesuṃ- “tumhākaṃ putto kālaṅkato”ti. Mama putto buddho hutvā kālaṅkato, no ahutvāti? Buddho bhavituṃ nāsakkhi, padhānabhūmiyaṃyeva patitvā kālaṅkatoti. Nāhaṃ saddahāmi, mama puttassa bodhiṃ apatvā kālaṅkiriyaṃ nāma natthīti.

Aparabhāge sammāsambuddhassa dhammacakkaṃ pavattetvā anupubbena rājagahaṃ gantvā kapilavatthuṃ anuppattassa suddhodanamahārājā pattaṃ gahetvā pāsādaṃ āropetvā yāgukhajjakaṃ datvā antarābhattasamaye etamatthaṃ ārocesi- tumhākaṃ bhagavā padhānakaraṇakāle devatā āgantvā, “putto te, mahārāja, kālaṅkato”ti āhaṃsūti. Kiṃ saddahasi mahārājāti? Na bhagavā saddahinti. Idāni, mahārāja, supinappaṭiggahaṇato paṭṭhāya acchariyāni passanto kiṃ saddahissasi? Ahampi buddho jāto, tvampi buddhapitā jāto, pubbe pana mayhaṃ aparipakke ñāṇe bodhicariyaṃ carantassa dhammapālakumārakālepi sippaṃ uggahetuṃ gatassa, “tumhākaṃ putto dhammapālakumāro kālaṅkato, idamassa aṭṭhī”ti eḷakaṭṭhiṃ āharitvā dassesuṃ, tadāpi tumhe, “mama puttassa antarāmarāṇaṃ nāma natthi, nāhaṃ saddahāmi”ti avocuttha, mahārājāti imissā aṭṭhupattiyā bhagavā mahādhammapālaḷātakaṃ kathesi.

**379. Mā** (2.0191) **kho tvam mārisāti** sampiyāyamānā āhaṃsu. Devatānaṃ kirāyaṃ piyamanāpavohāro, yadidaṃ mārisāti. **Ajajjiti** abhojanaṃ. **Halanti vadāmīti** alanti vadāmi, alaṃ iminā evaṃ mā karittha, yāpessāmahanti evaṃ paṭisedhemīti attho.

**380-1. Maṅguracchavīti** maṅguramacchacchavi. **Etāva paramanti** tāsampi vedanānametaṃyeva paramaṃ, uttamaṃ pamāṇaṃ. **Pitu sakkassa kammante ...pe... paṭhamaṃ jhānaṃ upasampajja viharitāti** rañño kira vappamaṅgaladivaso nāma hoti, tadā anekappakāraṃ khādanīyaṃ bhojanīyaṃ paṭiyādentī. Nagaravī-

thiyo sodhāpetvā puṇṇaghaṭe ṭhapāpetvā dhajapaṭākādayo ussāpetvā sakalanagaram devavimānaṃ viya alaṅkaronti. Sabbe dāsakammakarādayo ahatavattahnivatthā gandhamālādipaṭimaṇḍitā rājakule sannipatanti. Rañño kammante naṅgalasatasahassaṃ yojīyati. Tasmim̐ pana divase ekena ūnaṃ aṭṭhasataṃ yojenti. Sabbanaṅgalāni saddhim̐ balibaddarasmiyottehi jāṇussoṇissa ratho viya rajataparikkhittāni honti. Rañño ālambananaṅgalaṃ rattasuvaṇṇaparikkhitaṃ hoti. Balibaddānaṃ siṅgānipi rasmipatodāpi suvaṇṇaparikkhittā honti. Rājā mahāparivārena nikkhamanto puttaṃ gahetvā agamāsi.

Kammantaṭṭhāne eko jamburukkho bahalapattapalāso sandacchāyo ahosi. Tassa heṭṭhā kumārassa sayanaṃ paññapetvā upari suvaṇṇatārakakhacitaṃ vitānaṃ bandhāpetvā sāṇipākārena parikkhipāpetvā ārakkhaṃ ṭhapetvā rājā sabbālaṅkāraṃ alaṅkaritvā amaccagaṇaparivuto naṅgalakaraṇaṭṭhānaṃ agamāsi. Tattha rājā suvaṇṇanaṅgalaṃ gaṇhāti. Amaccā ekenūna-aṭṭhasatarajatanāṅgalāni gahetvā ito cito ca kasanti. Rājā pana orato pāraṃ gacchati, pārato vā oraṃ gacchati. Etasmim̐ ṭhāne mahāsampatti hoti, bodhisattaṃ parivāretvā nisinnā dhātiyo rañño sampattiṃ passissāmāti antosāṇito bahi nikkhantā. Bodhisatto ito cito ca olokento kañci adisvā vegena uṭṭhāya pallaṅkaṃ ābhujitvā ānāpāne pariggahetvā paṭhamajjhānaṃ nibbatesi. Dhātiyo khajjabhojjantare vicarāmānā thokaṃ cirāyimsu, sesarukkhaṃ (2.0192) chāyā nivattā, tassa pana rukkhaṃ parimaṇḍalā hutvā aṭṭhāsi. Dhātiyo ayyaputto ekakoti vegena sāṇim̐ ukkhipitvā anto pavisamānā bodhisattaṃ sayane pallaṅkena nisinnaṃ tañca pāṭihāriyaṃ disvā gantvā rañño ārocayimsu- “kumāro deva, evaṃ nisinno aññesaṃ rukkhaṃ chāyā nivattā, jamburukkhaṃ parimaṇḍalā ṭhitā”ti. Rājā vegena gantvā pāṭihāriyaṃ disvā, “idaṃ te, tāta, dutiyaṃ vandanaṃ”ti puttaṃ vandi. Idametaṃ sandhāya vuttaṃ- “pitu sakkassa kammante ...pe... paṭhamajjhānaṃ upasampajja viharitā”ti. **Siyā nu kho eso maggo bodhāyāti** bhavēyya nu kho etaṃ ānāpānassatipaṭhamajjhānaṃ bujjanatthāya maggoti. **Satānusāriviññāṇanti** nayidaṃ bodhāya maggo bhavissati, ānāpānassatipaṭhamajjhānaṃ pana bhavissatīti evaṃ ekaṃ dve vāre uppannasatiyā anantaraṃ uppannaviññāṇaṃ satānusāriviññāṇaṃ nāma. **Yaṃ taṃ sukhanti** yaṃ taṃ ānāpānassatipaṭhamajjhānasukhaṃ.

**382. Paccupaṭṭhitā hontīti** paṇṇasālapariveṇasammajjanādivattakaraṇena upaṭṭhitā honti. **Bāhullikoti** paccayabāhulliko. **Āvatto bāhullāyāti** rasagiddho hutvā paṇṭitapaṇḍapātādīnaṃ atthāya āvatto. **Nibbijja pakkamimsūti** ukkaṇṭhitvā dhammaniyāmeneva pakkantā bodhisattassa sambodhim̐ pattakāle kāyavivekassa okāsa-dānattham̐ dhammatāya gatā. Gacchantā ca aññaṭṭhānaṃ agantvā bārāṇasimeva agamaṃsu. Bodhisatto tesu gatesu addhamāsaṃ kāyavivekaṃ labhitvā bodhi- maṇḍe aparājitapallaṅke nisīditvā sabbaññutaññāṇaṃ paṭivijjhi.

**383. Vivicceva kāmeḥīti-**ādi bhayabherave vuttanayeneva veditabbaṃ.

**387. Abhijānāmi kho panāhanti** ayaṃ pāṭiyekko anusandhi. Nigaṇṭho kira cintesi- “ahaṃ samaṇaṃ gotamaṃ ekaṃ pañhaṃ pucchim̐. Samaṇo gotamo ‘aparāpi maṃ, aggivessana, aparāpi maṃ, aggivessanā’ti pariyosānaṃ adassento kathetiyeva. Kupito nu kho”ti? Atha bhagavā, aggivessana, tathāgate anekasa-

tāya parisāya dhammaṃ desente kupito (2.0193) samaṇo gotamoti ekopi vattā natthi, paresaṃ bodhanatthāya paṭivijjhanatthāya eva tathāgato dhammaṃ deseti dasseti imaṃ dhammadesanaṃ ārabhi. Tattha **ārabbhāti** sandhāya. **Yāvadevāti** payojanavidhi paricchadanīyamaṃ. Idaṃ vuttaṃ hoti- paresaṃ viññāpanameva tathāgatassa dhammadesanāya payojanaṃ, tasmā na ekasseva deseti, yattakā viññātāro atthi, sabbesaṃ deseti. **Tasmimyeva purimasminti** iminā kiṃ dasseti? Saccako kira cintesi- “samaṇo gotamo abhirūpo pāsādiko suphusitaṃ dantāvaraṇaṃ, jivhā mudukā, madhuraṃ vākkaraṇaṃ, parisāṃ rañjento maññe vicarati, anto panassa cittekaggatā natthī”ti. Atha bhagavā, aggivessana, na tathāgato parisāṃ rañjento vicarati, cakkavāḷapariyantāyapi parisāya tathāgato dhammaṃ deseti, asallīno anupalitto ettakaṃ ekavihārī, suññataphalasaṃpattim anuyuttoti dassetuṃ evamāha.

**Ajjhattamevāti** gocarajjhattameva. **Sannisādemīti** sannisīdāpemi, tathāgato hi yasmim̐ khaṇe parisā sādhuḷkāraṃ deti, tasmim̐ khaṇe pubbābhogena paricchinditvā phalasaṃpattim̐ samāpajjati, sādhuḷkārasaddassa nigghose avicchinnēyeva samāpattito vuṭṭhāya ṭhitatṭhānato paṭṭhāya dhammaṃ deseti, buddhānañhi bhavaṅgaparivāso lahuḷko hoti assāsavāre passāsavāre samāpattim̐ samāpajjanti. **Yena sudam̐ niccakappanti** yena suññena phalasaṃpattim̐ viharāmi, tasmim̐ samādhinim̐te cittaṃ saṅghapemi samādahāmīti dasseti.

**Okappaniyametanti** saddahaniyametaṃ. Evaṃ bhagavato ekaggacittataṃ sampaṭicchitvā idāni attano ovaṭṭikasāraṃ katvā ānītapañhaṃ pucchanto **abhijānāti kho pana bhavaṃ gotamo divā supitāti** āha. Yathā hi sunakho nāma asam bhinnakhīrapakkapāyasaṃ sappinā yojetvā udarapūraṃ bhojitopi gūthaṃ disvā akhādītva gantuṃ na sakkā, akhādamāno ghāyitvāpi gacchati, aghāyitvāva gatassa kirassa sīsaṃ rujjati; evamevaṃ imassapi satthā asam bhinnakhīrapakkapāyasaṃ abhinikkhāmanato paṭṭhāya yāva āsavakkhayā pasādanīyaṃ dhammadesanaṃ deseti. Etassa pana evarūpaṃ dhammadesanaṃ (2.0194) sutvā satthari pasādamattampi na uppannaṃ, tasmā ovaṭṭikasāraṃ katvā ānītapañhaṃ apucchitvā gantuṃ asakkonto evamāha. Tattha yasmā thinamiddhaṃ sabbakhīṇāsavānaṃ arahattamaggeneva pahīyati, kāyadaratho pana upādinnakepi hoti anupādinnakepi. Tathā hi kamaluppālādīni ekasmim̐ kāle vikasanti, ekasmim̐ makulāni honti, sāyaṃ kesañci rukkhānampi pattāni patilīyanti, pāto vipphārikāni honti. Evaṃ upādinnaḷassa kāyassa darathoyeva darathavasena bhavaṅgasotañca idha niddāti adhippetam̐, taṃ khīṇāsavānampi hoti. Taṃ sandhāya, “abhijānāmahaṃ”ti-ādimāha. **Sammohavīhārasmim̐ vadantīti** sammohavīhāroti vadanti.

**389. Āsajja āsajjāti** ghaṭṭetvā ghaṭṭetvā. **Upanītehīti** upanetvā kathitehi. **Vacanaḷpathehīti** vacanehi. **Abhinanditvā anumoditvā** Ti alanti cittena sampaṭicchanto abhinanditvā vācāyapi pasamsanto anumoditvā. Bhagavatā imassa nigaṇṭhassa dve suttāni kathitāni. Purimasuttaṃ eko bhāṇavāro, idaṃ diyaḷḷho, iti aḷḷhatiye bhāṇavāre sutvāpi ayaṃ nigaṇṭho neva abhisamayaṃ patto, na pabbajito, na saraṇesu patitṭhito. Kasmā etassa bhagavā dhammaṃ desesīti? Anāgate vāsana-

tthāya. Passati hi bhagavā, “imassa idāni upanissayo natthi, mayhaṃ pana parinibbānato samadhikānaṃ dvinnaṃ vassasatānaṃ accayena tambapaṇṇidīpe sāsanaṃ patiṭṭhahissati. Tatrāyaṃ kulaghare nibbattitvā sampatte kāle pabbajitvā tīṇi piṭakāni uggahetvā vipassanaṃ vaḍḍhetvā saha paṭisambhidāhi arahattaṃ patvā kāḷabuddharakkhito nāma mahākhīṇāsavo bhavissati”ti. Idaṃ disvā anāgate vāsanatthāya dhammaṃ desesi.

Sopi tattheva tambapaṇṇidīpamhi sāsane patiṭṭhite devalokato cavitvā dakkhiṇa-girivihārassa bhikkhācāragāme ekasmiṃ amaccakule nibbatto pabbajjāsamatthayobbane pabbajitvā tepiṭakaṃ buddhavacanaṃ uggahetvā gaṇaṃ pariharanto mahābhikkhusaṅghaparivuto upajjhāyaṃ passituṃ agamāsi. Athassa upajjhāyo saddhivihārikaṃ codessāmiti tepiṭakaṃ buddhavacanaṃ uggahetvā āgatena tena saddhiṃ mukhaṃ datvā kathāmattampi na akāsi. So paccūsasamaye vuṭṭhāya therassa santikaṃ gantvā,- “tumhe, bhante, mayi ganthakammaṃ katvā tumhākaṃ santikaṃ āgate mukhaṃ datvā kathāmattampi na (2.0195) karittha, ko mayhaṃ doso”ti pucchi. Thero āha- “tvaṃ, āvuso, buddharakkhita ettakeneva ‘pabbajjāiccaṃ me matthakaṃ pattan’ti saññaṃ karosī”ti. Kiṃ karomi, bhanteti? Gaṇaṃ vinodetvā tvaṃ papañcaṃ chinditvā cetiyapabbatavihāraṃ gantvā samanaḍhammaṃ karohīti. So upajjhāyassa ovāde ṭhatvā saha paṭisambhidāhi arahattaṃ patvā puññavā rājapūjito hutvā mahābhikkhusaṅghaparivāro cetiyapabbatavihāre vasi.

Tasmiñhi kāle tissamahārājā uposathakammaṃ karonto cetiyapabbate rājaleṇe vasati. So therassa upaṭṭhākabhikkhuno saññaṃ adāsi- “yadā mayhaṃ ayyo pañhaṃ vissajjeti, dhammaṃ vā katheti, tadā me saññaṃ dadeyyāthā”ti. Theropi ekasmiṃ dhammassavanadivase bhikkhusaṅghaparivāro kaṇṭakacetiyaṅgaṇaṃ āruyha cetiyaṃ vanditvā kāḷatimbarurukkhamūle aṭṭhāsi. Atha naṃ eko piṇḍapātīkatthero kāḷakārāmasuttante pañhaṃ pucchi. Thero nanu, āvuso, ajja dhammassavanadivasoti āha. Āma, bhante, dhammassavanadivasoti. Tena hi piṭhakaṃ ānetha, idheva nisinnā dhammassavanaṃ karissāmāti. Athassa rukkhamaṃ āsanaṃ paññapetvā adamsu. Thero pubbagāthā vatvā kāḷakārāmasuttaṃ ārabhi. Sopissa upaṭṭhākadaharo rañño



saññaṃ dāpesi. Rājā pubbagāthāsu anīṭṭhitāsuyeva pāpuṇi. Patvā ca aññātakave-seneva parisante ṭhatvā tiyāmarattiṃ ṭhitakova dhammaṃ sutvā therassa, idama-voca bhagavāti vacanakāle sādhu-kāraṃ adāsi. Thero ñatvā, kadā āgatosi, mahā-rājāti pucchi. Pubbagāthā osāraṇakāleyeva, bhanteti. Dukkaraṃ te mahārāja, katanti. Nayidaṃ, bhante, dukkaraṃ, yadi pana me ayyassa dhammakathaṃ āra-ddhakālato paṭṭhāya ekapadepi aññavihitabhāvo ahosi, tambapaṇṇidīpassa pato-dayaṭṭhinitudanamattepi ṭhāne sāmibhāvo nāma me mā hotūti sapathamakāsi.

Tasmim̐ pana sutte buddhaguṇā paridīpitā, tasmā rājā pucchi- “ettakāva, bhante, buddhaguṇā, udāhu aññepi atthi”ti. Mayā kathitato, mahārāja, akathita-meva bahu appamaṇanti. Upamaṃ, bhante, karothāti. Yathā, mahārāja (2.0196), karīsasahassamatte sālīkkhette ekasālīsīso avasesasālīyeva bahū, evaṃ mayā kathitaguṇā appā, avasesā bahūti. Aparampi, bhante, upamaṃ karothāti. Yathā, mahārāja, mahāgaṅgāya oghapuṇṇāya sūcipāsaṃ sammukhaṃ kareyya, sūcipā-sena gata-udakaṃ appaṃ, sesaṃ bahu, evameva mayā kathitaguṇā appā, ava-sesā bahūti. Aparampi, bhante, upamaṃ karothāti. Idha, mahārāja, cātakasakuṇā nāma ākāse kīlantā vicaranti. Khuddakā sā sakuṇajāti, kiṃ nu kho tassa saku-ṇassa ākāse pakkhapa-sāraṇaṭṭhānaṃ bahu, avaseso ākāso appoti? Kiṃ, bhante, vadatha, appo tassa pakkhapa-sāraṇokāso, avasesova bahūti. Evameva, mahā-rāja, appakā mayā buddhaguṇā kathitā, avasesā bahū anantā appameyyāti. Suka-thitaṃ, bhante, anantā buddhaguṇā ananteneva ākāsenā upamitā. Pasannā mayaṃ ayyassa, anucchavikaṃ pana kātuṃ na sakkoma. Ayaṃ me duggatapa-ṇṇākāro imasmim̐ tambapaṇṇidīpe imaṃ tiyojanasatikaṃ rajjaṃ ayyassa demāti. Tumhehi, mahārāja, attano pasannākāro kato, mayaṃ pana amhākaṃ dinnaṃ rajjaṃ tumhākaṃyeva dema, dhammena samena rajjaṃ kārehi mahārājāti.

Papañcasūdaniyā majjhimanikāyaṭṭhakathāya

Mahāsaccakasuttavaṇṇanā niṭṭhitā.

## 7. Cūḷataṇhāsaṅkhayasuttavaṇṇanā

**390. Evaṃ me sutanti cūḷataṇhāsaṅkhayasuttaṃ. Tattha pubbārāme migāramā-tupāsādeti** pubbārāmasaṅkhāte vihāre migāramātuyā pāsāde. Tatrāyaṃ anupu-bbīkathā-atīte sata-sahassakappamatthake ekā upāsikā padumuttaraṃ bhaga-vantaṃ nimantetvā buddhappamukhassa bhikkhusaṅghassa sata-sahassaṃ dānaṃ datvā bhagavato pādamūle nipajjitvā, “anāgate tumhādisassa buddhassa aggupatṭhāyikā homi”ti patthanamakāsi. Sā kappasata-sahassaṃ devesu ceva manussesu ca saṃsaritvā amhākaṃ bhagavato (2.0197) kāle bhaddiyanagare meṇḍakaseṭṭhiputtassa dhanañjaya-sa seṭṭhino gahe sumanadeviyā kucchimhi paṭisandhiṃ gaṇhi. Jātakāle cassā **visākhā**ti nāmaṃ akaṃsu. Sā yadā bhagavā

bhaddiyanagaram agamāsi, tadā pañcahi dārikāsatehi saddhiṃ bhagavato paccu-  
ggamanam katvā paṭhamadassanamhiyeva sotāpannā ahosi. Aparabhāge sāvā-  
tthiyam migārasetṭhiputtassa puṇṇavaḍḍhanakumārassa geham gatā, tattha nam  
migārasetṭhi mātiṭṭhāne ṭhapesi, tasmā **migāramātā**ti vuccati.

Patikulam gacchantiyā cassā pitā **mahālatāpiḷandhanam** nāma kārāpesi.  
Tasmim piḷandhane catasso vajiranāḷiyo upayogam agamaṃsu, muttānam ekā-  
dasa nāḷiyo, pavāḷānam dvāvīsati nāḷiyo, maṇīnam tettiṃsa nāḷiyo, iti etehi ca  
aññehi ca sattavaṇṇehi ratanehi niṭṭhānam agamāsi. Tam sise paṭimukkam yāva  
pādapiṭṭhiyā bhassati, pañcannam hatthīnam balam dhārayamānāva nam itthi  
dhāretum sakkoti. Sā aparabhāge dasabalassa aggupaṭṭhāyikā hutvā tam pasā-  
dhanam vissajjetvā navahi koṭīhi bhagavato vihāram kārayamānā karīsamatte  
bhūmibhāge pāsādam kāresi. Tassa uparibhūmiyam pañca gabbhasatāni honti,  
heṭṭhābhūmiyam pañcāti gabbhasahassappaṭimaṇḍito ahosi. Sā “suddhapāsā-  
dova na sobhatī”ti tam parivāretvā pañca dvikūṭagehasatāni, pañca cūḷapāsāda-  
tāni, pañca dīghasālasatāni ca kārāpesi. Vihāramaho catūhi māsehi niṭṭhānam  
agamāsi.

Mātugāmattabhāve ṭhitāya visākhāya viya aññissā buddhasāsane dhanapari-  
ccāgo nāma natthi, purisattabhāve ṭhitassa ca anāthapiṇḍikassa viya aññassa  
buddhasāsane dhanapariccāgo nāma natthi. So hi catupaññāsakoṭiyo vissajjetvā  
sāvattiyā dakkhiṇabhāge anurādhapurassa mahāvihārasadise ṭhāne jetavanama-  
hāvihāram nāma kāresi. Visākhā, sāvattiyā pācīnabhāge uttamadevīvihārasa-  
dise ṭhāne **pubbārāmaṃ** nāma kāresi. Bhagavā imesaṃ dvinnaṃ kulānam anuka-  
mpāya sāvattim nissāya viharanto imesu dvīsu vihāresu nibaddhavāsam vasi.  
Ekaṃ antovassaṃ jetavane vasati, ekaṃ pubbārāme, etasmim pana samaye  
bhagavā pubbārāme viharati. Tena vuttam- “pubbārāme migāramātupāsāde”ti.

**Kittāvatā** (2.0198) **nu kho, bhanteti** kittakena nu kho, bhante. **Samkhittena taṇhā-  
saṅkhayavimutto hotīti** taṇhāsaṅkhaye nibbāne tam ārammaṇam katvā vimuttaci-  
ttatāya taṇhāsaṅkhayavimutto nāma samkhittena kittāvatā hoti? Yāya paṭipattiyā  
taṇhāsaṅkhayavimutto hoti, tam me khīṇāsavassa bhikkhuno pubbabhāgappaṭi-  
padaṃ samkhittena desethāti pucchati. **Accantaniṭṭhoti** khayavayasaṅkhātam  
antaṃ atītāti accantā. Accantā niṭṭhā assāti **accantaniṭṭho**, Ekantaniṭṭho satatani-  
ṭṭhoti attho. Accantaṃ yogakkhemīti **accantayogakkhemī**, niccayogakkhemīti attho.  
Accantaṃ brahmacārīti **accantabrahmacārī**, niccabrahmacārīti attho. Accantaṃ  
pariyosānamassāti purimanayeneva **accantapariyosāno**. **Seṭṭho devamanussā-  
nanti** devānañca manussānañca seṭṭho uttamo. Evarūpo bhikkhu kittāvatā hoti,  
khippametassa saṅkhepeneva paṭipattim kathethāti bhagavantaṃ yācati. Kasmā  
panesa evaṃ vegāyatīti? Kīlam anubhavitukāmatāya.

Ayam kira uyyānakīlam āṇāpetvā catūhi mahārājūhi catūsu disūsu ārakkham  
gāhāpetvā dvīsu devalokesu devasaṅghena parivuto aḍḍhatiyāhi nāṭakakoṭīhi  
saddhiṃ erāvaṇam āruya uyyānadvāre ṭhito imaṃ pañham sallakkhesi- “kitta-  
kena nu kho taṇhāsaṅkhayavimuttassa khīṇāsavassa saṅkhepato āgamaniyapu-  
bbabhāgappaṭipadā hoti”ti. Athassa etadahosi- “ayam pañho ativiya sassiriko,

sacāhaṃ imaṃ pañhaṃ anuggaṇhitvāva uyyānaṃ pavisissāmi, chadvārikehi ārammaṇehi nimmathito na puna imaṃ pañhaṃ sallakkhessāmi, tiṭṭhatu tāva uyyānakīlā, satthu santikaṃ gantvā imaṃ pañhaṃ pucchitvā uggahitapañho uyyāne kīlissāmi”ti hatthikkhandhe antarahito bhagavato santike pāturahosi. Tepi cattāro mahārājāno ārakkhaṃ gahetvā ṭhitatṭhāneyeva ṭhitā, paricārikadevasaṅghāpi nāṭakānipi erāvaṇopi nāgarājā tattheva uyyānadvāre aṭṭhāsi, evamesa kīlaṃ anubhavitukāmatāya vegāyanto evamāha.

**Sabbe dhammā nālaṃ abhinivesāyāti** ettha sabbe dhammā nāma pañcakkhandhā dvādasāyatanāni aṭṭhārasa dhātuyo. Te sabbepi taṇhādiṭṭhivasena abhinivesāya (2.0199) nālaṃ na pariyattā na samatthā na yuttā, kasmā? Gahitākārena atitṭhanato. Te hi niccāti gahitāpi aniccāva sampajjanti, sukhāti gahitāpi dukkhāva sampajjanti, attāti gahitāpi anattāva sampajjanti, tasmā nālaṃ abhinivesāya. **Abhijānāti**ti aniccaṃ dukkhaṃ anattāti ñātapariññāya abhijānāti. **Parijānāti**ti tatheva tīraṇapariññāya parijānāti. **Yaṃkiñci vedananti** antamaso pañcaviññāṇasampayuttampi yaṃkiñci appamattakampi vedanaṃ anubhavati. Iminā bhagavā sakkassa devānamindassa vedanāvasena nibbattetvā arūpapariggahaṃ dasseti. Sace pana vedanākammaṭṭhānaṃ heṭṭhā na kathitaṃ bhavēyya, imasmiṃ ṭhāne kathettabbaṃ siyā. Heṭṭhā pana kathitaṃ, tasmā satipaṭṭhāne vuttanayeneva veditabbaṃ. **Aniccānupassīti** ettha aniccaṃ veditabbaṃ, aniccānupassanā veditabbā, aniccānupassī veditabbo. Tattha **aniccanti** pañcakkhandhā, te hi uppādavayaṭṭhena aniccā. **Aniccānupassanāti** pañcakkhandhānaṃ khayato vayato dassanaññāṇaṃ. **Aniccānupassīti** tena ñāṇena samannāgato puggalo. Tasmā “aniccānupassī viharati”ti aniccato anupassanto viharatīti ayamettha attho.

**Virāgānupassīti** ettha dve virāgā khayavirāgo ca accantavirāgo ca. Tattha saṅkhārānaṃ khayavayato anupassanāpi, accantavirāgaṃ nibbānaṃ virāgato dassanamaggaññāṇampi **virāgānupassanā**. Tadubhayasamaṅgīpuggalo virāgānupassī nāma, taṃ sandhāya vuttaṃ “virāgānupassī”ti, virāgato anupassantoti attho. **Nirodhānupassimhipi** eseva nayo, nirodhopi hi khayanirodho ca accantanirodho cāti duvidhoyeva. **Paṭinissaggānupassīti** ettha **paṭinissaggo** vuccati vossaggo, so ca pariccāgavossaggo pakkhandanavossaggoti duvidho hoti. Tattha **pariccāgavossaggoti** vipassanā, sā hi tadaṅgavasena kilese ca khandhe ca vossajjati. **Pakkhandanavossaggoti** maggo, so hi nibbānaṃ ārammaṇaṃ ārammaṇato pakkhandati. Dvīhipi vā kāraṇehi vossaggoyeva, samucchedavasena khandhānaṃ kilesānañca vossajjanato, nibbānañca pakkhandanato. Tasmā kilese ca khandhe ca pariccajātīti pariccāgavossaggo, nirodhe nibbānadhātuyā cittaṃ pakkhandatīti pakkhandanavossaggoti ubhayampetaṃ magge sameti. Tadubhayasamaṅgīpuggalo imāya paṭinissaggānupassanāya samannāgatattā paṭinissaggānupassī nāma hoti. Taṃ sandhāya vuttaṃ “paṭinissaggānupassī”ti. **Na kiñci loke upādiyati** Ti (2.0200) kiñci ekampi saṅkhāragataṃ taṇhāvasena na upādiyati na gaṇhāti na parāmasati. **Anupādiyaṃ na paritassatīti** aggaṇhanto taṇhāparitassanāya na paritassati. **Paccattaññeva parinibbāyatīti** sayameva kilesaparinibbānena parinibbāyati. **Khīṇā jātīti**-ādinā panassa paccavekkhaṇāva dassitā. Iti bhagavā sakkassa devānamindassa

saṃkhittena khiṇāsavassa pubbabhāgappaṭipadaṃ pucchito sallahukaṃ katvā saṃkhitteneva khippaṃ kathesi.

**391. Avidūre nisinno hotīti** anantare kūṭāgāre nisinno hoti. **Abhisameccāti** ñāṇena abhisamāgantvā, jānitvāti attho. Idaṃ vuttaṃ hoti- kiṃ nu kho esa jānitvā anumodi, udāhu ajānitvā vāti. Kasmā panassa evamahosīti? Thero kira na bhagavato pañhavissajjanasaddaṃ assosi, sakkassa pana devarañño, “evametaṃ bhagavā evametaṃ sugatā”ti anumodanasaddaṃ assosi. Sakko kira devarājā mahatā saddena anumodi. Atha kasmā na bhagavato saddaṃ assosīti? Yathāparisaviññāpakattā. Buddhānañhi dhammaṃ kathentānaṃ ekābaddhāya cakkavāḷa-pariyantāyapi parisāya saddo suyyati, pariyantaṃ pana muñcitvā aṅgulimattampi bahiddhā na niccharati. Kasmā? Evarūpā madhurakathā mā niratthakā agamāsīti. Tadā bhagavā migāramātupāsāde sattaratanamaye kūṭāgāre sirigabbhamhi nisinno hoti, tassa dakkhiṇapasse sārīputtattherassa vasanakūṭāgāraṃ, vāmapasse mahāmoggallānassa, antare chiddavivarokāso natthi, tasmā thero na bhagavato saddaṃ assosi, sakkasseva assosīti.

**Pañcahi tūriyasatehīti** pañcaṅgikānaṃ tūriyānaṃ pañcahi satehi. Pañcaṅgikaṃ tūriyaṃ nāma ātataṃ vitataṃ ātatavitataṃ susiraṃ ghananti imehi pañcahi aṅgehi samannāgataṃ. Tattha **ātataṃ** nāma cammapariyonaddhesu bheri-ādīsu ekatalatūriyaṃ. **Vitataṃ** nāma ubhayatalaṃ. **Ātatavitataṃ** nāma tantibaddhapaṇavādi. **Susiraṃ** vaṃsādi. **Ghanaṃ** Sammādi. **Samappitoti** upagato. **Samaṅgībhūto** Ti tasseva vevacanaṃ. **Paricāretīti** taṃ sampattiṃ anubhavanto tato tato indriyāni cāreti. Idaṃ vuttaṃ hoti- parivāretvā vajjamānehi pañcahi tūriyasatehi samannāgato hutvā dibbasampattiṃ (2.0201) anubhavatī. **Paṭipañāmetvāti** apanetvā, nissaddāni kārapetvāti attho. Yatheva hi idāni saddhā rājāno garubhāvaniyaṃ bhikkhuṃ disvā- “asuko nāma ayyo āgacchati, mā, tātā, gāyatha, mā vādetha, mā naccathā”ti nāṭakāni paṭivinenti, sakkopi therāṃ disvā evamakāsi. **Cirassaṃ kho, mārisa moggallāna, imaṃ pariyāyamakāsīti** evarūpaṃ loke pakatiyā piyasamudāhāravacanaṃ hoti, lokiyā hi cirassaṃ āgatampi anāgatapubbampi manāpajātiyaṃ āgataṃ disvā,- “kuto bhavaṃ āgato, cirassaṃ bhavaṃ āgato, kathaṃ te idhāgamanaṃ maggo ñāto maggamūḷhosi”ti-ādīni vadanti. Ayaṃ pana āgatapubbattāyeva evamāha. Thero hi kālena kālaṃ devacārikaṃ gacchatīyeva. Tattha **pariyāyamakāsīti** vāramakāsi.

**Yadidaṃ idhāgamanāyāti** yo ayaṃ idhāgamanāya vāro, taṃ, bhante, cirassamakā-sīti vuttaṃ hoti. **Idamāsanam paññattanti** yojanikaṃ maṇipallaṅkaṃ paññapā-petvā evamāha.

**392. Bahukiccā bahukaraṇiyāti** ettha yesaṃ bahūni kiccāni, te bahukiccā. **Bahukaraṇiyāti** tasseva vevacanaṃ. **Appeva sakena karaṇiyenāti** sakaraṇiyameva appaṃ mandaṃ, na bahu, devānaṃ karaṇiyaṃ pana bahu, pathavito paṭṭhāya hi kapparukkhamātugāmādīnaṃ atthāya aṭṭā sakkassa santike chijjanti, tasmā niyamento āha- **apica devānaṃyeva tāvatimsānaṃ karaṇiyenāti**. Devānañhi dhītā ca puttā ca aṅke nibbattanti, pādaparicārikā itthiyo sayane nibbattanti, tāsāṃ maṇḍa-napasādhanakārikā devadhītā sayanaṃ parivāretvā nibbattanti, veyyāvaccakarā antovimāne nibbattanti, etesaṃ atthāya aṭṭakaraṇaṃ natthi. Ye pana sīmantare nibbattanti, te “mama santakā tava santakā”ti nicchetuṃ asakkontā aṭṭaṃ karonti, sakkāṃ devarājānaṃ pucchanti, so yassa vimānaṃ āsannataraṃ, tassa santakoti vadati. Sace dvepe samaṭṭhāne honti, yassa vimānaṃ olokeno ṭhito, tassa santakoti vadati. Sace ekampi na oloketi, taṃ ubhinnaṃ kalahupacchedanattaṃ attano santakaṃ karoti. Taṃ sandhāya, “devānaṃyeva tāvatimsānaṃ karaṇiyenā”ti āha. Apicassa evarūpaṃ kiḷākiccampi karaṇiyameva.

**Yaṃ (2.0202) no khippameva antaradhāyatīti** yaṃ amhākaṃ sīghameva andhā-kāre rūpagataṃ viya na dissati. Iminā- “ahaṃ, bhante, taṃ pañhavissajjanaṃ na sallakkhemī”ti dīpeti. Thero- “kasmā nu kho ayaṃ yakkho asallakkaṇabhāvaṃ dīpeti, passena pariharatī”ti āvajjanto- “devā nāma mahāmūḷhā honti. Chadvāri-kehi ārammaṇehi nimmathiyamānā attano bhuttābhuttabhāvampi pītāpītābhāvampi na jānanti, idha katamettha pamussanti”ti aññāsi. Keci panāhu- “thero etassa garu bhāvaniyo, tasmā ‘idāneva loke aggapuggalassa santike pañhaṃ uggahetvā āgato, idāneva nāṭakānaṃ antaraṃ pavitṭhoti evaṃ maṃ thero tajjeyyā’-ti bhayena evamāhā”ti. Etaṃ pana kohaññaṃ nāma hoti, na ariyasāvakaṃ evarūpaṃ kohaññaṃ nāma hoti, tasmā mūḷhabhāveneva na sallakkhesīti veditabbaṃ. Upari kasmā sallakkhesīti? Thero tassa somanassasaṃvegaṃ janayitvā tamaṃ nīhari, tasmā sallakkhesīti.

Idāni sakko pubbe attano evaṃ bhūtakāraṇaṃ therassa ārocetuṃ **bhūtapubb-nti-ādimāha**. Tattha **samupabyūḷhoti** sannipatito rāsibhūto. **Asurā parājiniṃsūti** asurā parājayaṃ pāpuṇiṃsu. Kadā panete parājītātī? Sakkassa nibbattakāle. Sakko kira anantare attabhāve magadharaṭṭhe macalagāme **magho** nāma māṇavo ahosi, paṇḍito byatto, bodhisattacariyā viyassa cariyā ahosi. So tettiṃsa purise gahetvā kalyāṇamakāsi. Ekadivasaṃ attanova paññāya upaparikkhitvā gāmamajjhe mahājanassa sannipatitaṭṭhāne kacavaraṃ ubhayato apabbahitvā taṃ ṭhānaṃ atiramaṇiyamakāsi, puna tattheva maṇḍapaṃ kāresi, puna gacchante kāle sālaṃ kāresi. Gāmato ca nikkhamitvā gāvutampi aḍḍhayaṃjanampi tigāvu-tampi yojanampi vicaritvā tehi sahāyehi saddhiṃ visamaṃ samaṃ akāsi. Te sabbepi ekacchandā tattha tattha setuyuttaṭṭhānesu setuṃ, maṇḍapasālāpokkha-raṇimālāgaccharopanādīnaṃ yuttaṭṭhānesu maṇḍapādīni karontā bahuṃ puñña-makaṃsu. Magho satta vatapadāni pūretvā kāyassa bhedaṃ saddhiṃ sahāyehi

tāvatiṃsabhavane nibbatti.

Tasmiṃ (2.0203) kāle asuragaṇā tāvatiṃsadevaloke paṭivasanti. Sabbe te devānaṃ samānāyukā samānavaṇṇā ca honti, te sakkaṃ sapaṛisaṃ disvā adhunā nibbattā navakadevaputtā āgatāti mahāpānaṃ sajjayiṃsu. Sakko devaputtānaṃ saññaṃ adāsi- “amhehi kusalaṃ karontehi na parehi saddhiṃ sādharmaṃ kataṃ, tumhe gaṇḍapānaṃ mā pivittha pītamattameva karothā”ti. Te tathā akaṃsu. Bāla-asurā gaṇḍapānaṃ pivitvā mattā niddaṃ okkamiṃsu. Sakko devānaṃ saññaṃ datvā te pādesu gāhāpetvā sinerupāde khipāpesi, sinerussa heṭṭhimatale **asurabhavanaṃ** nāma atthi, tāvatiṃsadevalokappamaṇameva. Tattha asurā vasanti. Tesampi **cittapāṭali** nāma rukkho atthi. Te tassa pupphana-kāle jānanti- “nāyaṃ tāvatiṃsā, sakkena vañcitā mayan”ti. Te gaṇhatha nanti vatvā sineruṃ pariharamānā deve vuṭṭhe vammikapādato vammikamakkhikā viya abhiruhiṃsu. Tattha kālena devā jinanti, kālena asurā. Yadā devānaṃ jayo hoti, asure yāva samuddapiṭṭhā anubandhanti. Yadā asurānaṃ jayo hoti, deve yāva vedikapādā anubandhanti. Tasmiṃ pana saṅgāme devānaṃ jayo ahosi, devā asure yāva samuddapiṭṭhā anubandhiṃsu. Sakko asure palāpetvā pañcasu ṭhānesu ārakkhaṃ ṭhapesi. Evaṃ ārakkhaṃ datvā vedikapāde vajirahatthā indapaṭimāyo ṭhapesi. Asurā kālena kālaṃ uṭṭhahitvā tā paṭimāyo disvā, “sakko appamatto tiṭṭhati”ti tatova nivattanti. **Tato paṭinivattivā**ti vijitaṭṭhānato nivattivā. **Paricārikāyoti** mālāgandhādikammakārikāyo.

**393. Vessavaṇo ca mahārājā**ti so kira sakkassa vallabho, balavavissāsiko, tasmā sakkena saddhiṃ agamāsi. **Purakkhatvā**ti purato katvā. **Pavisimsūti** pavisitvā pana upaḍḍhapihitāni dvārāni katvā olokayamānā aṭṭhaṃsu. **Idampi, mārisa moggallāna, passa vejayantassa pāsādassa rāmaṇeyyakanti**, mārisa moggallāna, idampi vejayantassa pāsādassa rāmaṇeyyakaṃ passa, suvaṇṇatthambhe passa, rajatatthambhe maṇitthambhe pavāḷatthambhe lohitaṅgathambhe masāragallatthambhe muttatthambhe sattaratanatthambhe, tesameva suvaṇṇādimaye ghaṭake vāḷarūpakāni ca passāti (2.0204) evaṃ thambhapantiyo ādiṃ katvā rāmaṇeyyakaṃ dassento evamāha. **Yathā taṃ pubbekatapuññassā**ti yathā pubbe katapuññassa upabhogaṭṭhānena sobhitabbaṃ, evamevaṃ sobhatīti attho. **Atibāḷhaṃ kho ayaṃ yakkho pamatto viharatīti** attano pāsāde nāṭakaparivārena sampattiyā vasena ativiya matto.

**Iddhābhisankhāraṃ abhisankhāsīti** iddhimakāsi. Āpokasiṇaṃ samāpajjitvā pāsādapatiṭṭhitokāsaṃ udakaṃ hotūti iddhiṃ adhiṭṭhāya pāsādakaṇṇike pādaṅguṭṭhakena pahari. So pāsādo yathā nāma udakapiṭṭhe ṭhapitapattaṃ mukhavatṭiyaṃ aṅgulyā pahaṭaṃ aparāparaṃ kampaṭi calati na santiṭṭhati. Evamevaṃ saṃkampi sampakampi sampavedhi, thambhapiṭṭhasaṅghāṭakaṇṇikagopānasi-ādīni karakarāti saddaṃ muñcantāni patituṃ viya āradhāni. Tena vuttaṃ- “saṅkampi sampakampi sampavedhesī”ti. **Acchariyabbhutacittajātā**ti aho acchariyaṃ, aho abbhutanti evaṃ sañjāta-acchariya-abbhutā ceva sañjātatuṭṭhino ca ahesuṃ uppannabalavasomanassā. **Samvigganti** ubbiggaṃ. **Lomahaṭṭhajātanti** jātalomahaṃsaṃ, kañcanabhittiyaṃ ṭhapitamaṇināgadantehi viya uddhaggehi

lomehi ākiṅṅasarīranti attho. Lomahaṃso ca nāmesa somanassenapi hoti domanassenapi, idha pana somanassena jāto. Thero hi sakkassa somanassavegena saṃvejetuṃ taṃ pāṭihāriyamakāsi. Tasmā somanassavegena saṃviggalo mahatṭhaṃ viditvāti attho.

**394. Idhāhaṃ, mārisā** Ti idānissa yasmā therena somanassasaṃvegaṃ janayitvā tamaṃ vinoditaṃ, tasmā sallakkhetvā evamāha. **Eso nu te, mārisa, so bhagavā satthāti**, mārisa, tvaṃ kuhiṃ gatosīti vutte mayhaṃ satthu santikanti vadesi, imasmiṃ devaloke ekapādakena viya tiṭṭhasi, yaṃ tvaṃ evaṃ vadesi, eso nu te, mārisa, so bhagavā satthāti pucchimsu. **Sabrahmacārī me esoti** ettha kiñcāpi thero anagāriyo abhinīhārasampanno aggasāvako, sakko agāriyo, maggabrahmacariyavasena panete sabrahmacārino honti, tasmā evamāha. **Aho (2.0205) nūna te so bhagavā satthāti** sabrahmacārī tāva te evaṃmahiddhiko, so pana te bhagavā satthā aho nūna mahiddhikoti satthu iddhipāṭihāriyadassane jātābhilāpā hutvā evamāhaṃsu.

**395. Nātaññatarassā** Ti paññātaññatarassa, sakko hi paññātānaṃ aññataro. Sesā sabbattha pākaṭameva, desanaṃ pana bhagavā yathānusandhināva niṭṭhapesīti.

Papañcasūdaniyā majjhimanikāyaṭṭhakathāya

Cūḷataṇhāsaṅkhayasuttavaṇṇanā niṭṭhitā.

## 8. Mahātaṇhāsaṅkhayasuttavaṇṇanā

**396. Evaṃ me sutanti** mahātaṇhāsaṅkhayasuttaṃ. Tattha **diṭṭhigatanti** alagaddūpamasutte laddhimattaṃ diṭṭhigatanti vuttaṃ, idha sassatadiṭṭhi. So ca bhikkhu bahussuto, ayaṃ appassuto, jātakabhāṇako bhagavantaṃ jātakaṃ kathetvā, “ahaṃ, bhikkhave, tena samayena vessantaro ahosiṃ, mahosadho, vidhurapaṇḍito, senakapaṇḍito, mahājanako rājā ahosiṃ” ti samodhānentaṃ suṇāti. Athassa etadahosi- “ime rūpavedanāsaññāsaṅkhārā tattha tattheva nirujjhanti, viññāṇaṃ pana idhalokato paralokaṃ, paralokato imaṃ lokaṃ sandhāvati saṃsarati” ti sassatadassanaṃ uppannaṃ. Tenāha- “tadevidaṃ viññāṇaṃ sandhāvati saṃsarati anaññan” ti.

Sammāsambuddhena pana, “viññāṇaṃ paccayasambhavaṃ, sati paccaye uppajjati, vinā paccayaṃ natthi viññāṇassa sambhavo” ti vuttaṃ. Tasmā ayaṃ bhikkhu buddhena akathitaṃ katheti, jinacakke pahāraṃ deti, vesārajaññaṃ paṭibāhati, sotukāmaṃ janaṃ visaṃvādeti, ariyapathe tiriyaṃ nipatitvā mahājanassa ahitāya dukkhāya paṭipanno. Yathā nāma rañño rajje mahācoro uppajjamāno mahājanassa ahitāya dukkhāya uppajjati, evaṃ jinasāsane coro (2.0206) hutvā mahājanassa ahitāya dukkhāya uppannoti veditabbo. **Sambahulā bhikkhūti**

janapadavāsino piṇḍapātikabhikkhū. **Tenupasaṅkamimsūti** ayaṃ parisam labhitvā sāsanampi antaradhāpeyya, yāva pakkhaṃ na labhati, tāvadeva naṃ diṭṭhigatā vivecemāti sutasutaṭṭhānatoyeva aṭṭhatvā anisīditvā upasaṅkamimsu.

**398. Katamaṃ taṃ sāti viññāṇanti** sāti yaṃ tvaṃ viññāṇaṃ sandhāya vadesi, katamaṃ taṃ viññāṇanti? **Yvāyaṃ, bhante, vado vedeyyo tatra tatra kalyāṇapāpākānaṃ kammānaṃ vipākaṃ paṭisaṃvedetīti**, bhante, yo ayaṃ vadati vedayati, yo cāyaṃ tahiṃ tahiṃ kusalākusalakammānaṃ vipākaṃ paccanubhoti. Idaṃ, bhante, viññāṇaṃ, yamaṃ sandhāya vademīti. **Kassa nu kho nāmāti** kassa khattiyassa vā brāhmaṇassa vā vessasuddagahaṭṭhapabbajitadevamanussānaṃ vā aññatarassa.

**399. Atha kho bhagavā bhikkhū āmantesīti** kasmā āmantesi? Sātissa kira evaṃ ahosi- “sathā maṃ ‘moghapuriso’ti vadati, na ca moghapurisoṭi vuttamatteneva maggaphalānaṃ upanissayo na hoti. Upasenampi hi vaṅgantaputtaṃ, ‘atilaḥuṃ kho tvaṃ moghapurisa bāhullāya āvatto’ti (mahāva. 75) bhagavā moghapurisavādena ovadi. Thero aparabhāge ghaṭento vāyamanto cha abhiññā sacchākāsi. Ahampi tathārūpaṃ vīriyaṃ paggaṇhitvā maggaphalāni nibbattessāmi”ti. Athassa bhagavā chinnapaccayo ayaṃ sāsane aviruḥhadhammoti dassento bhikkhū āmantesi. **Usmīkatoti**-ādi heṭṭhā vuttādhippāyameva. **Atha kho bhagavāti** ayampi pāṭiyekko anusandhi. Sātissa kira etadahosi- “bhagavā mayhaṃ maggaphalānaṃ upanissayo natthīti vadati, kiṃ sakkā upanissaye asati kātuṃ? Na hi tathāgatā sa-upanissayasseva dhammaṃ desenti, yassa kassaci desentiyeva. Ahaṃ buddhassa santikā sugatovādaṃ labhitvā saggasampattūpagaṃ kusalaṃ karissāmi”ti. Athassa bhagavā, “nāhaṃ, moghapurisa, tuyhaṃ ovādaṃ vā anusāsanīṃ vā demī”ti sugatovādaṃ paṭippassambhento imaṃ desanaṃ ārabhi. Tassattho heṭṭhā vuttanayeneva veditabbo. Idāni parisāya (2.0207) laddhiṃ sodhento, “idhāhaṃ bhikkhū paṭipucchissāmi”ti-ādimāha. Taṃ sabbampi heṭṭhā vuttanayeneva veditabbaṃ.

**400.** Idāni viññāṇassa sappaccayabhāvaṃ dassetuṃ **yaṃ yadeva, bhikkhave**-ti-ādimāha. Tattha **manañca paṭicca dhamme cāti** sahāvajjanena bhavaṅgamañca tebhūmakadhamme ca paṭicca. **Kaṭṭhañca paṭiccāti**-ādi opammanidassanattaṃ vuttaṃ. Tena kiṃ dīpeti? Dvārasaṅkantiyā abhāvaṃ. Yathā hi kaṭṭhaṃ paṭicca jalamāno aggi upādānapaccaye satiyeva jalati, tasmīṃ asati paccayavekallena tattheva vūpasammati, na sakalikādīni saṅkamitvā sakalikaggīti-ādisaṅkhaṃ gacchati, evameva cakkhuñca paṭicca rūpe ca uppannaṃ viññāṇaṃ tasmīṃ dvāre cakkhurūpa-ālokamanasikārasaṅkhāte paccayamhi satiyeva uppaṃjati, tasmīṃ asati paccayavekallena tattheva nirujjhati, na sotādīni saṅkamitvā sotaviññāṇanti-ādisaṅkhaṃ gacchati. Esa nayo sabbavāresu. Iti bhagavā nāhaṃ viññāṇappavatte dvārasaṅkantimattampi vadāmi, ayaṃ pana sāti moghapuriso bhavasaṅkantim



vadatīti sātīṃ niggaheṣi.

**401.** Evaṃ viññāṇassa sappaccayabhāvaṃ dassetvā idāni pana pañcannampi khandhānaṃ sappaccayabhāvaṃ dassento, **bhūtamidanti-ādimāha.** Tattha **bhūtamidanti** idaṃ khandhapañcakaṃ jātaṃ bhūtaṃ nibbattaṃ, tumhepi taṃ bhūtamidanti, bhikkhave, passathāti. **Tadāhārasambhavanti** taṃ panetaṃ khandhapañcakaṃ āhārasambhavaṃ paccayasambhavaṃ, sati paccaye uppajjati evaṃ passathāti pucchati. **Tadāhāranirodhāti** tassa paccayassa nirodhā. **Bhūtamidaṃ nossūti** bhūtaṃ nu kho idaṃ, na nu kho bhūtanti. **Tadāhārasambhavaṃ nossūti** taṃ bhūtaṃ khandhapañcakaṃ paccayasambhavaṃ nu kho, na nu khoti. **Tadāhāranirodhāti** tassa paccayassa nirodhā. **Nirodhadhammaṃ nossūti** taṃ dhammaṃ nirodhadhammaṃ nu kho, na nu khoti. **Sammappaññāya passatoti** idaṃ khandhapañcakaṃ jātaṃ bhūtaṃ nibbattanti yāthāvasarasalakkhaṇato vipassanāpaññāya sammā passantassa. **Paññāya sudiṭṭhanti** vuttanayeneva vipassanāpaññāya suṭṭhu diṭṭhaṃ. Evaṃ ye ye taṃ pucchāṃ sallakkhesuṃ, tesaṃ tesaṃ paṭiññaṃ gaṇhanto pañcannaṃ khandhānaṃ sappaccayabhāvaṃ dasseti.

Idāni yāya paññāya tehi taṃ sappaccayaṃ sanirodhaṃ khandhapañcakaṃ sudiṭṭhaṃ, tattha nittaṇhabhāvaṃ pucchanto **imaṃ ce tumheti-ādimāha.** Tattha **diṭṭhinti** vipassanāsammādiṭṭhiṃ (2.0208). Sabhāvadassanena **parisuddhaṃ.** Paccayadassanena **pariyodātaṃ.** **Alliyethāti** taṇhādiṭṭhīhi alliyitvā vihareyyātha. **Kelāyethāti** taṇhādiṭṭhīhi kīlamānā vihareyyātha. **Dhanāyethāti** dhanāṃ viya icchantā gedhaṃ āpajjeyyātha. **Mamāyethāti** taṇhādiṭṭhīhi mamattaṃ uppādeyyātha. **Nittharaṇatthāya no gahaṇatthāyāti** yo so mayā caturoghanittharaṇatthāya kullūpamo dhammo desito, no nikantivasena gahaṇatthāya. Api nu taṃ tumhe ājāneyyāthāti. Vipariyāyena sukkapakkho veditabbo.

**402.** Idāni tesaṃ khandhānaṃ paccayaṃ dassento, **cattārome, bhikkhave, āhārā-** Ti-ādimāha, tampi vuttatthameva. Yathā pana eko imaṃ jānāsīti vutto, “na kevalaṃ imaṃ, mātarampissa jānāmi, mātu mātarampī”ti evaṃ paveṇivasena jānanto suṭṭhu jānāti nāma. Evamevaṃ bhagavā na kevalaṃ khandhamattameva jānāti, khandhānaṃ paccayampi tesampi paccayānaṃ paccayanti evaṃ sabbapaccaya-paramparaṃ jānāti. So taṃ, buddhabalaṃ dīpento idāni paccayaparamparaṃ dassetuṃ, **ime ca, bhikkhave, cattāro āhārāti-ādimāha.** Taṃ vuttatthameva. **Iti kho, bhikkhave, avijjāpaccayā saṅkhārā ...pe... dukkhakkhandhassa samudayo hotīti** ettha pana paṭiccasamuppādakathā vitthāretabbā bhavēyya, sā **visuddhimagge** vitthāritāva.

**404.** **Imasmiṃ sati idaṃ hotīti** imasmiṃ avijjādike paccaye sati idaṃ saṅkhārā-dikaṃ phalaṃ hoti. **Imassuppādā idaṃ uppajjati** Ti imassa avijjādikassa paccayassa uppādā idaṃ saṅkhārā-dikaṃ phalaṃ uppajjati, tenevāha- “yadidaṃ avijjāpaccayā saṅkhārā ...pe... samudayo hotī”ti. Evaṃ vaṭṭaṃ dassetvā idāni vivaṭṭaṃ dassento, **avijjāya tveva asesavirāganirodhāti-ādimāha.** Tattha **avijjāya tvevāti** avijjāya eva tu. **Asesavirāganirodhāti** virāgasāṅkhātena maggena asesanirodhā anuppādanirodhā. **Saṅkhāranirodhoti** saṅkhārānaṃ anuppādanirodho hoti, evaṃ niruddhānaṃ pana saṅkhārānaṃ nirodhā viññāṇanirodho hoti, viññāṇādīnaṃ

nirodhā nāmarūpādīni niruddhāniyeva hontīti dassetuṃ **saṅkhāranirodhā viññāṇa-**  
**nirodhoti-**ādiṃ vatvā **evametassa kevalassa dukkhakkhandhassa nirodho** (2.0209)  
**hotīti** vuttaṃ. Tattha **kevalassāti** sakalassa, suddhassa vā, sattavirahitassāti attho.  
**Dukkhakkhandhassāti** dukkharāsissa. **Nirodho hotīti** anuppādo hoti.

**406. Imasmiṃ asatī**Ti-ādi vuttapaṭipakkhanayena veditabbaṃ.

**407.** Evaṃ vaṭṭavivaṭṭaṃ kathetvā idāni imaṃ dvādasaṅgapaccayavaṭṭaṃ saha  
vipassanāya maggena jānantassa yā paṭidhāvanā pahiyati, tassā abhāvaṃ  
pucchanto **api nu tumhe, bhikkhaveli-**ādimāha. Tattha **evaṃ jānantāti** evaṃ saha-  
vipassanāya maggena jānantā. **Evaṃ passantāti** tasseva vevacanaṃ. **Pubba-**  
**ntanti** purimakoṭṭhāsaṃ, atītakhandhadhātu-āyatanānīti attho. **Paṭidhāveyyāthāti**  
taṇhādīṭṭhivasena paṭidhāveyyātha. Sesam sabbāsavasutte vitthāritameva.

Idāni nesam tattha niccalabhāvaṃ pucchanto, **api nu tumhe, bhikkhave, evaṃ**  
**jānantā evaṃ passantā evaṃ vadeyyātha, satthā no garūti-**ādimāha. Tattha  
**garūti** bhāriko akāmā anuvattitabbo. **Samaṇoti** buddhasamaṇo. **Aññaṃ satthāraṃ**  
**uddiseyyāthāti** ayaṃ satthā amhākaṃ kiccaṃ sādhetuṃ na sakkotīti api nu evaṃ-  
saññino hutvā aññaṃ bāhirakaṃ satthāraṃ uddiseyyātha. **Puthusamaṇabrāhmaṇā-**  
**nanti** evaṃsaññino hutvā puthūnaṃ titthiyasamaṇānaṃ ceva brāhmaṇānaṃca.  
**Vatakotūhalamaṅgalānīti** vatasamādānāni ca diṭṭhikutūhalāni ca diṭṭhasutamuta-  
maṅgalāni ca. **Tāni sārato paccāgaccheyyāthāti** etāni sāranti evaṃsaññino hutvā  
paṭi-āgaccheyyātha. Evaṃ nissatṭhāni ca puna gaṇheyyāthāti attho. **Sāmaṃ**  
**ñātanti** sayam ñāṇena ñātaṃ. **Sāmaṃ diṭṭhanti** sayam paññācakkhunā diṭṭhaṃ.  
**Sāmaṃ viditanti** sayam vibhāvitam pākaṭam kataṃ. **Upanītā kho me tumheti** mayā,  
bhikkhave, tumhe iminā sandiṭṭhikādisabhāvena dhammena nibbānaṃ upanītā,  
pāpitāti attho. **Sandiṭṭhikoti-**ādīnamattho **visuddhimagge** vitthārito. **Idametam**  
**paṭicca vuttanti** etaṃ vacanamidaṃ tumhehi sāmaṃ ñātādibhāvaṃ paṭicca vuttaṃ.

**408. Tiṇṇaṃ kho pana, bhikkhaveli** kasmā ārabhi? Nanu heṭṭhā vaṭṭavivaṭṭava-  
sena desanā matthakaṃ pāpitāti? Āma pāpitā. Ayaṃ pana pāṭi-ekko anusandhi (2.0)  
“ayañhi lokasannivāso paṭisandhisammūḷho, tassa sammohaṭṭhānaṃ viddhaṃ-  
setvā pākaṭam karissāmi”ti imaṃ desanaṃ ārabhi. Apica vaṭṭamūlaṃ avijjā, viva-  
ṭṭamūlaṃ buddhuppādo, iti vaṭṭamūlaṃ avijjaṃ vivaṭṭamūlaṃca buddhuppādaṃ  
dassetvāpi, “puna ekavāraṃ vaṭṭavivaṭṭavasena desanaṃ matthakaṃ pāpessāmi”-  
ti imaṃ desanaṃ ārabhi. Tattha **sannipātāti** samodhānena piṇḍabhāvena. **Gabbha-**  
**ssāti** gabbhe nibbattanakasattassa. **Avakkanti hotīti** nibbatti hoti. Katthaci hi  
**gabbhoti** mātukucchi vutto. Yathāha-

“Yamekarattim paṭhamam, gabbhe vasati māṇavo;

abbhuṭṭhitova so yāti, sa gacchaṃ na nivattati”ti. (jā. 1.15.363);

Katthaci gabbhe nibbattanasatto. Yathāha- “yathā kho, panānanda, aññā itthikā  
nava vā dasa vā māse gabbhaṃ kucchinā pariharitvā vijāyantī”ti (ma. ni. 3.205).  
Idha satto adhippeto, taṃ sandhāya vuttaṃ “gabbhassa avakkanti hoti”ti.

**Idhāti** imasmiṃ sattaloke. **Mātā ca utunī hotīti** idaṃ utusamayaṃ sandhāya  
vuttaṃ. Mātugāmassa kira yasmim okāse dārako nibbattati, tattha mahatī lohitapī-  
lakā saṅṭhahitvā bhijjitvā paggharati, vatthu suddhaṃ hoti, suddhe vatthumhi mātā-

pitūsu ekavāraṃ sannipatitesu yāva satta divasāni khattameva hoti. Tasmim samaye hatthaggaḥaveniggāhādīnā aṅgaparāmasanenapi dārako nibbattatiyeva. **Gandhabbo**ti tatrūpagasatto. **Paccupaṭṭhito hoti**ti na mātāpitūnaṃ sannipātaṃ olokayamāno samīpe ṭhito paccupaṭṭhito nāma hoti. Kammayantayantito pana eko satto tasmim okāse nibbattanako hoti ayamettha adhippāyo. **Saṃsayenāti** “arogo nu kho bhavissāmi ahaṃ vā, putto vā me”ti evaṃ mahantena jīvitasamṣayena. **Lohitañhetam, bhikkhveti** tadā kira mātulohitam taṃ ṭhānaṃ sampattam puttasinehena paṇḍaram hoti. Tasmā evamāha. **Vaṅkakanti** gāmadārakānaṃ kīlanakam khuddakanaṅgalam. **Ghaṭikā** vuccati dīghadaṇḍena rassadaṇḍakam pahaṇakīlā. **Mokkhacikanti** samparivattakakīlā, ākāse vā daṇḍakam gahetvā bhūmiyam vā sīsam ṭhapetvā heṭṭhupariyabhāvena parivattanakīlananti vuttam hoti. **Ciṅgulakam** vuccati tālapaṇṇādīhi kataṃ vātappahārena paribbhamanacakkam (2.0211). **Pattāḷhakam** vuccati paṇṇanālikā, tāya vālikādīni minantā kīlanti. **Rathakanti** khuddakaratham. **Dhanukampi** khuddakadhanumeva.

**409. Sārajatīti** rāgam uppādeti. **Byāpajjatīti** byāpādam uppādeti. **Anupaṭṭhitakāya-satīti** kāye sati kāyasati, taṃ anupaṭṭhapetvāti attho. **Parittacetaso**ti akusalacitto. **Yatthassa te pāpakāti** yassaṃ phalasamāpattiyam ete nirujjhanti, taṃ na jānāti nādhigacchatīti attho. **Anurodhavirodhanti** rāgañceva dosañca. **Abhinandatīti** taṇhāvasena abhinandati, taṇhāvaseneva aho sukhamti-ādīni vadanto abhivadati. **Ajjhosāya tiṭṭhatīti** taṇhā-ajjhosānagahaṇena gilitvā pariniṭṭhapetvā gaṇhāti. Sukham vā adukkhamasukham vā abhinandatu, dukkham katham abhinandatīti? “Aham dukkhito mama dukkhan”ti gaṇhanto abhinandati nāma. **Uppajjati nandīti** taṇhā uppajjati. **Tadupādānanti** sāva taṇhā gahaṇaṭṭhena upādānam nāma. Tassa upādānapaccayā bhavo ...pe... samudayo hotīti, idaṅhi bhagavatā puna ekavāraṃ dvisandhi tisaṅkhepaṃ paccayākāraṇaṭṭam dassitam.

**410-4.** Idāni vivaṭṭam dassetum **idha, bhikkhave, tathāgato loke uppajjatīti**-ādimāha. Tattha **appamāṇacetaso**ti appamāṇam lokuttaram ceto assāti appamāṇacetaso, maggacittasamaṅgīti attho. **Imam kho me tumhe, bhikkhave, saṃkhittena taṇhāsaṅkhayavimuttim dhārethāti**, bhikkhave, imam saṃkhittena desitam mayham, taṇhāsaṅkhayavimuttidesanam tumhe niccakālam dhāreyyātha mā pamajjeyyātha. Desanā hi ettha vimuttipaṭilābhahetuto **vimuttīti** vuttā. **Mahātaṇhājā-lataṇhāsaṅghāṭapaṭimukkanti** taṇhāva saṃsibbitaṭṭhena mahātaṇhājālam, saṅghaṭṭaṭṭhena saṅghāṭanti vuccati; iti imasmim mahātaṇhājāle taṇhāsaṅghāṭe ca imam sātīm bhikkhum kevaṭṭaputtam paṭimukkam dhāretha. Anupaviṭṭho antogadhoti nam dhārethāti attho. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Mahātaṇhāsaṅkhayasuttavaṇṇanā niṭṭhitā.

## 9. Mahā-assapurasuttavaṇṇanā

**415. Evaṃ** (2.0212) **me sutanti** mahā-assapurasuttaṃ. Tattha **aṅgesūti** aṅgā nāma jānapadino rājakumārā, tesam nivāso ekopi janapado ruḥhisaddena “aṅgā”ti vuccati, tasmim aṅgesu janapade. **Assapuraṃ nāma aṅgānaṃ nigamoti assapuranti** nagaranāmena laddhavohāro aṅgānaṃ janapadassa eko nigamo, taṃ gocaragāmaṃ katvā viharatīti attho. **Bhagavā etadavocāti** etaṃ “samaṇā samaṇāti vo, bhikkhave, jano sañjānāti”ti-ādivacanamavoca.

Kasmā pana evaṃ avocāti. Tasmim kira nigame manussā saddhā pasannā buddhamāmakā dhammāmakā saṅghamāmakā, tadahupabbajitasāmaṇe-rampi vassasatikattherasadisam katvā pasamsanti; pubbaṇhasamayam bhikkhusaṅgham piṇḍāya pavisantaṃ disvā bijanaṅgalādīni gahetvā khettaṃ gacchantāpi, pharasu-ādīni gahetvā araṇṇam pavisantāpi tāni upakaraṇāni nikkhipitvā bhikkhusaṅghassa nisīdanaṭṭhānaṃ āsanasālaṃ vā maṇḍapaṃ vā rukkhamaṭṭhaṃ vā sammajjitvā āsanāni paññāpetvā arajapānīyam paccupaṭṭhāpetvā bhikkhusaṅgham nisīdāpetvā yāgukhajjakādīni datvā katabhattakiccaṃ bhikkhusaṅgham uyyojetvā tato tāni upakaraṇāni ādāya khettaṃ vā araṇṇam vā gantvā attano kammāni karonti, kammantaṭṭhānēpi nesam aṇṇā kathā nāma natthi. Cattāro maggaṭṭhā cattāro phalaṭṭhāti aṭṭha puggalā ariyasaṅgho nāma; te “evarūpena sīlena, evarūpena ācārena, evarūpāya paṭipattiyā samannāgatā lajjino pesalā uḷāraguṇā”ti bhikkhusaṅghasseva vaṇṇam kathenti. Kammantaṭṭhānato āgantvā bhuttasāyamāsā gharadvāre

nisinnāpi, sayanigharaṃ pavisitvā nisinnāpi bhikkhusaṅghasseva vaṇṇaṃ kathenti. Bhagavā tesāṃ manussānaṃ nipaccakāraṃ disvā bhikkhusaṅghaṃ piṇḍapātāpacāyane niyojetvā etadavoca.

**Ye dhammā samaṇakaraṇā ca brāhmaṇakaraṇā cāti** ye dhammā samādāya paripūritā samitapāpasamaṇaṅca bāhitapāpabrāhmaṇaṅca karontīti attho. “Tīṇi-māni, bhikkhave, samaṇassa samaṇiyāni samaṇakaraṇiyāni (2.0213). Katamāni tīṇi? Adhisīlasikkhāsamādānaṃ, adhicitasikkhāsamādānaṃ, adhipaññāsikkhāsamādānaṃ”ti (a. ni. 3.82) ettha pana samaṇena kattabbadhammā vuttā. Tepi ca samaṇakaraṇā hontiyeva. Idha pana hirottappādivasena desanā vitthāritā. **Evaṃ no ayaṃ amhākanti** ettha **noti** nipātamattaṃ. Evaṃ ayaṃ amhākanti attho. **Mahapphalā mahānisamsāti** ubhayampi atthato ekameva. **Avañjhāti** amoghā. **Saphalāti** ayaṃ tasseva attho. Yassā hi phalaṃ natthi, sā vañjhā nāma hoti. **Sa-udrayā** Ti savaḍḍhi, idaṃ saphalatāya vevacanaṃ. **Evañhi vo, bhikkhave, sikkhitabbanti**, bhikkhave, evaṃ tumhehi sikkhitabbaṃ. Iti bhagavā iminā ettakena ṭhānena hirottappādīnaṃ dhammānaṃ vaṇṇaṃ kathesi. Kasmā? Vacanapathapaccchindanattaṃ. Sace hi koci acirapabbajito bālabhikkhu evaṃ vadeyya-“bhagavā hirottappādidhamme samādāya vattathāti vadati, ko nu kho tesāṃ samādāya vattane ānisaṃso”ti? Tassa vacanapathapaccchindanattaṃ. Ayaṅca ānisaṃso, ime hi dhammā samādāya paripūritā samitapāpasamaṇaṃ nāma bāhitapāpabrāhmaṇaṃ nāma karonti, catupaccayalābhaṃ uppādentī, paccayadāyakaṇaṃ mahapphalataṃ sampādentī, pabbajjaṃ avañjhaṃ saphalaṃ sa-udrayaṃ karontīti vaṇṇaṃ abhāsi. Ayamettha saṅkhepo. Vitthārato pana vaṇṇakathā satipaṭṭhāne (dī. ni. aṭṭha. 2.373; ma. ni. aṭṭha. 2.373) vuttanayeneva veditabbā.

**416. Hirottappenāti** “yaṃ hiriyati hiriyitabbena, ottappati ottappitabbena”ti (dha. sa. 1331) evaṃ vitthāritāya hiriyā ceva ottappena ca. Apicettha ajjhattasamuṭṭhānā **hirī**, bahiddhāsamuṭṭhānaṃ **ottappaṃ**. Attādhipeyyā hirī, lokādhipeyyaṃ ottappaṃ. Lajjāsabhāvasaṅghitā hirī, bhayasabhāvasaṅghitaṃ ottappaṃ, vitthārakathā panettha sabbākārena visuddhimagge vuttā. Apica ime dve dhammā lokaṃ pālanato **lokapāladhammā** nāmāti kathitā. Yathāha- “dveme, bhikkhave, sukkā dhammā lokaṃ pārentī. Katame dve? Hirī ca ottappaṅca. Ime kho, bhikkhave, dve sukkā dhammā lokaṃ pārentī. Ime ca kho, bhikkhave, dve sukkā dhammā lokaṃ na pāleyyuṃ, nayidha paññāyetha, ‘mātā’ti vā, ‘mātucchā’ti vā, ‘mātulanī’ti vā, ‘ācariyabhariyā’ti vā, ‘garūnaṃ dārā’ti vā, sambhedaṃ (2.0214) loko agamissa, yathā ajeḷakā kukkuṭasūkarā soṇasiṅgālā”ti (a. ni. 2.9). Imeyeva jātake “devadhammā”ti kathitā. Yathāha-

“Hiri-ottappasampannā, sukkadhammasamāhitā;

santo sappurisā loke, devadhammāti vuccare”ti. (jā. 1.1.6);

Mahācundattherassa pana kilesasallekhanapaṭipadāti katvā dassitā. Yathāha- “pare ahirikā bhavissanti, mayamettha hirimanā bhavissāmāti sallekho karaṇīyo. Pare anottāpī bhavissanti, mayamettha ottāpī bhavissāmāti sallekho karaṇīyo”ti (ma. ni. 1.83). Imeva mahākassapattherassa ovādūpasampadāti katvā dassitā. Vuttañhetā- “tasmā tiha te, kassapa, evaṃ sikkhitabbaṃ, tibbaṃ me hirottappaṃ

paccupaṭṭhitam bhavissati thesesu navesu majjhimesūti. Evañhi te, kassapa, sikkhitabban”ti (saṃ. ni. 2.154). Idha panete **samaṇadhammā nāmāti** dassitā.

Yasmā pana ettāvata sāmaññattho matthakam patto nāma hoti, tasmā aparepi samaṇakaraṇadhamme dassetum **siyā kho pana, bhikkhave, tumhākanti-ādimāha**. Tattha **sāmaññattho** saṃyuttake tāva, “katamañca, bhikkhave, sāmaññaṃ? Aya-meva ariyo aṭṭhaṅgiko maggo. Seyyathidaṃ, sammādiṭṭhi ...pe... sammāsa-mādhī, idaṃ vuccati, bhikkhave, sāmaññaṃ. Katamo ca, bhikkhave, sāmaññattho? Yo, bhikkhave, rāgakkhayo dosakkhayo mohakkhayo, ayaṃ vuccati, bhikkhave, sāmaññattho”ti (saṃ. ni. 5.36) maggo “sāmaññaṃ”ti, phalanibbānāni “sāmañña-ttho”ti vuttāni. Imasmiṃ pana ṭhāne maggampi phalampi ekato katvā sāma-ññattho kathitoti veditabbo. **Ārocayāmīti** kathemi. **Paṭivedayāmīti** jānāpemi.

**417. Parisuddho no kāyasamācāro**ti ettha kāyasamācāro parisuddho aparisu-ddhoti duvidho. Yo hi bhikkhu pāṇaṃ hanati adinnaṃ ādiyati, kāmesu micchā-carati, tassa kāyasamācāro aparisuddho nāma, ayaṃ pana kamma-pathavase-neva vārito. Yo pana pāṇinā vā leḍḍunā (2.0215) vā daṇḍena vā satthena vā paraṃ potheti viheṭheti, tassa kāyasamācāro aparisuddho nāma, ayampi sikkhā-padabaddheneva paṭikkhitto. Imasmiṃ sutte ubhayampetaṃ akathetvā paramasa-llekho nāma kathito. Yo hi bhikkhu pāṇiyaghaṭe vā pāṇiyaṃ pivantānaṃ, patte vā bhattaṃ bhuñjantānaṃ kākānaṃ nivāraṇavasena hatthaṃ vā daṇḍaṃ vā leḍḍuṃ vā uggirati, tassa kāyasamācāro aparisuddho. Viparīto parisuddho nāma. **Uttā-noti** uggato pākaṭo. **Vivaṭoti** anāvaṭo asañchanno. Ubhayenāpi parisuddhataṃ-yeva dīpeti. **Na ca chiddavāti** sadā ekasadiṣo antarantare chiddarahito. **Samvu-toti** kilesānaṃ dvāra pidahanena pidahito, na vajjapaṭicchādanatthāya.

**418. Vacīsamācārepi** yo bhikkhu musā vadati, pisuṇaṃ katheti, pharusam bhāsati, samphaṃ palapati, tassa vacīsamācāro aparisuddho nāma. Ayaṃ pana kamma-pathavasena vārito. Yo pana gahapatikāti vā dāsāti vā pessāti vā ādīhi khuṃsento vadati, tassa vacīsamācāro aparisuddho nāma. Ayaṃ pana sikkhāpa-dabaddheneva paṭikkhitto. Imasmiṃ sutte ubhayampetaṃ akathetvā paramasa-llekho nāma kathito. Yo hi bhikkhu daharena vā sāmaṇerena vā, “kacci, bhante, amhākaṃ upajjhāyaṃ passathā”ti vutte, sambahulā, āvuso, bhikkhubhikkhuniyo ekasmiṃ padese vicadīṃsu, upajjhāyo te vikkāyikasākabhaṇḍikaṃ ukkhipitvā gato bhavissati”ti-ādinā nayena hasādhippāyopi evarūpaṃ kathaṃ katheti, tassa vacīsamācāro aparisuddho. Viparīto parisuddho nāma.

**419. Manosamācāre** yo bhikkhu abhijjhālu byāpannacitto micchādiṭṭhiko hoti, tassa manosamācāro aparisuddho nāma. Ayaṃ pana kamma-pathavaseneva vārito. Yo pana upanikkhittaṃ jātārūparajataṃ sādiyati, tassa manosamācāro apa-risuddho nāma. Ayampi sikkhāpadabaddheneva paṭikkhitto. Imasmiṃ sutte ubha-yampetaṃ akathetvā paramasallekho nāma kathito. Yo pana bhikkhu kāmavi-takkaṃ vā byāpādavittakkaṃ (2.0216) vā vihiṃsāvitakkaṃ vā vitakketi, tassa manosamācāro aparisuddho. Viparīto parisuddho nāma.

**420. Ājīvasmiṃ** yo bhikkhu ājīvahetu vejjakammaṃ paṇḍagamaṃ gaṇḍaphā-lanaṃ karoti, arumakkhanaṃ deti, telaṃ pacatīti ekavīsati-anesanāvasena jīvikaṃ

kappeti. Yo vā pana viññāpetvā bhuñjati, tassa ājivo aparisuddho nāma. Ayaṃ pana sikkhāpadabaddheneva paṭikkhitto. Imasmiṃ sutte ubhayampetaṃ akathetvā paramasallekho nāma kathito. Yo hi bhikkhu sappinavanītelamadhuphāṇitādīni labhitvā, “sve vā punadivase vā bhavissati”ti sannidhikāraṃ paribhuñjati, yo vā pana nimbaṅkurādīni disvā sāmaṇere vadati- “aṃkure khādathā”ti, sāmaṇerā thero khāditukāmoti kappiyaṃ katvā denti, dahare pana sāmaṇere vā pāṇiyaṃ pivatha, āvusoti vadati, te thero pāṇiyaṃ pivitukāmoti pāṇiyasaṅkhaṃ dhovitvā denti, tampi paribhuñjantassa ājivo aparisuddho nāma hoti. Viparīto parisuddho nāma.

**422. Mattaññūti** pariyesanapaṭiggahaṇaparibhogesu mattaññū, yuttaññū, pamāṇaññū.

**423. Jāgariyamanuyuttāti** rattindivaṃ cha koṭṭhāse katvā ekasmiṃ koṭṭhāse niddāya okāsaṃ datvā pañca koṭṭhāse jāgariyamhi yuttā payuttā. **Sīhaseyyanti** ettha kāmabhogiseyyā, petaseyyā, sīhaseyyā, tathāgataseyyāti catasso seyyā. Tattha “yebhuyyena, bhikkhave, kāmabhogī sattā vāmena passena senti”ti (a. ni. 4.246) ayaṃ **kāmabhogiseyyā**, tesu hi yebhuyyena dakkhiṇapassena sayāno nāma natthi.

“Yebhuyyena, bhikkhave, petā uttānā senti”ti (a. ni. 4.246) ayaṃ **petaseyyā**, petā hi appamaṃsalohitattā aṭṭhisāṅghātajaṭitā ekena passena sayituṃ na sakkonti, uttānāva senti.

“Yebhuyyena (2.0217), bhikkhave, siho migarājā naṅguṭṭhaṃ antarasatthimhi anupakkhipitvā dakkhiṇena passena seti”ti (a. ni. 4.246) ayaṃ **sīhaseyyā**. Tejussadattā hi siho migarājā dve purimapāde ekasmiṃ ṭhāne pacchimapāde ekasmiṃ ṭhapetvā naṅguṭṭhaṃ antarasatthimhi pakkhipitvā purimapādapacchimapādānaṅguṭṭhānaṃ ṭhitokāsaṃ sallakkhetvā dvinnaṃ purimapādānaṃ matthake sīsaṃ ṭhapetvā sayati. Divasampi sayitvā pabujjhamāno na utrāsanto pabujjhati. Sīsaṃ pana ukkhipitvā purimapādānaṃ ṭhitokāsaṃ sallakkheti. Sace kiñci ṭhānaṃ vijahitvā ṭhitaṃ hoti, “nayidaṃ tuyhaṃ jātiyā, na sūrabhāvassa ca anurūpan”ti anattamano hutvā tattheva sayati, na gocarāya pakkamati. Avijahitvā ṭhite pana “tuyhaṃ jātiyā sūrabhāvassa ca anurūpamidānaṃ”ti haṭṭhatuṭṭho uttāyā sīhavijambhitaṃ vijambhitvā kesarabhāraṃ vidhunitvā tikkhattuṃ sīhanādaṃ naditvā gocarāya pakkamati. Catutthajjhānaseyyā pana **tathāgataseyyāti** vuccati. Tāsu idha sīhaseyyā āgatā. Ayañhi tejussada-iriyāpathattā uttamaseyyā nāma. **Pāde pādanti** dakkhiṇapāde vāmapādaṃ. **Accādhāyāti** ati-ādhāya isakaṃ atikkamma ṭhapetvā, gopphakena hi gopphake, jāṇunā vā jāṇumhi saṅghaṭṭiyamāne abhiṇhaṃ vedanā uppajjati, cittaṃ ekaggaṃ na hoti, seyyā aphāsukā hoti. Yathā pana na saṅghaṭṭeti, evaṃ atikkamma ṭhapite vedanā nuppajjati, cittaṃ ekaggaṃ hoti, seyyā phāsukā hoti, tasmā evamāha.

**425. Abhijjhaṃ loketi-ādi** cūḷahatthipade vitthāritaṃ.

**426. Yā panāyaṃ seyyathāpi, bhikkhaveti** upamā vuttā. Tattha **iṇaṃ ādāyāti** vaḍḍhiyā dhaṇaṃ gahetvā. **Byantī kareyyāti** vigatantāni kareyya. Yathā tesam kākāṇikamattopi pariyaṇto nāma nāvasissati, evaṃ kareyya, sabbaso paṭiniyyāte-

yyāti attho. **Tatonidānanti** āṇaṇyanidānaṃ. So hi aṇaṇomhīti āvajjanto balavapāmojjaṃ labhati, balavasomanassamadhigacchati. Tena vuttaṃ- “labhetha pāmojjaṃ, adhigaccheyya somanassan”ti.

Visabhāgavedanuppattiyā kakaceneva catu-iriyāpathaṃ chindanto ābādhatīti ābādho, svāssa atthīti **ābādhiko**. Taṃsamuṭṭhānena dukkhena (2.0218) **dukkhito**. **Adhimattagilānoti** bāḷhagilāno. **Nacchādeyyāti** adhimattabyādhiparetatāya na rucceyya. **Balamattāti** balameva, balañcassa kāye na bhavēyyāti attho. **Tatonidānanti** ārogyanidānaṃ, tassa hi arogomhīti āvajjayato tadubhayaṃ hoti. Tena vuttaṃ- “labhetha pāmojjaṃ, adhigaccheyya somanassan”ti. **Na cassa kiñci bhogānaṃ vayoti** kākaṇikamattampi bhogānaṃ vayo na bhavēyya. **Tatonidānanti** bandhanāmokkhanidānaṃ, sesaṃ vuttanayeneva sabbapadesu yojetabbaṃ. **Anattādhīnoti** na attani adhīno, attano ruciyā kiñci kātuṃ na labhati. **Parādhīnoti** paresu adhīno, parasseva ruciyā pavattati. **Na yena kāmaṃ gamoti** yena disābhāgenassa kāmo hoti. Icchā uppajjati gamanāya, tena gantuṃ na labhati. **Dāsa-byā**Ti dāsabhāvā. **Bhujissoti** attano santako. **Tatonidānanti** bhujissanidānaṃ. **Kantāraddhānamagganti**



kantāraṃ addhānamaggaṃ, nirudakaṃ dīghamagganti attho. **Tatonidānanti** khemantabhūminidānaṃ.

**Ime pañca nivarane appahīneti** ettha bhagavā appahīnaṃ kāmacchandanīvaraṇaṃ iṇasadisaṃ, sesāni rogādisadisāni katvā dasseti. Tatrāyaṃ sadisatā- yo hi paresaṃ iṇaṃ gahetvā vināseti. So tehi iṇaṃ dehīti vuccamānopi pharusaṃ vuccamānopi bajjhamānopi pahariyamānopi kiñci paṭibāhituṃ na sakkoti, sabbaṃ titikkhati, titikkhakāraṇaṅhissa taṃ iṇaṃ hoti. Evamevaṃ yo yamhi kāmacchandaṇa rajjati, taṇhāgaṇeṇa taṃ vatthuṃ gaṇhāti, so tena pharusaṃ vuccamānopi bajjhamānopi pahariyamānopi sabbaṃ titikkhati. Titikkhakāraṇaṅhissa so kāmacchando hoti gharasāmikehi vadhīyamānānaṃ itthīnaṃ viyāti. Evaṃ iṇaṃ viya **kāmacchando** daṭṭhabbo.

Yathā pana pitarogāturo madhusakkarādīsupi dinnesu pitarogāturatāya tesam rasam na vindati, tittakam tittakanti uggiratiyeva. Evamevaṃ byāpannacitto hitakāmehi ācariyupajjhāyehi appamattakampi ovadīyamāno ovādaṃ na gaṇhāti, “ati viya me tumhe upaddavethā”ti-ādīni vatvā vibbhamati. Pittarogāturatāya so puriso madhusakkarādirasaṃ viya, kodhāturatāya (2.0219) jhānasukhādibhedam sāsanaṃ na vindatīti. Evaṃ rogo viya **byāpādo** daṭṭhabbo.

Yathā pana nakkhattadivase bandhanāgāre baddho puriso nakkhattassa neva ādiṃ, na majjhaṃ, na pariyosānaṃ passati. So dutiyadivase mutto, “aho hiyyo nakkhattaṃ manāpaṃ, aho naccaṃ, aho gītaṃ”ti-ādīni sutvāpi paṭivacanaṃ na deti. Kiṃ kāraṇā? Nakkhattassa ananubhūtattā. Evamevaṃ thinamiddhābhibhūto bhikkhu vicittanayepi dhammassavane pavattamāne neva tassa ādiṃ, na majjhaṃ, na pariyosānaṃ jānāti. So utṭhite dhammassavane, “aho dhammassavanaṃ, aho kāraṇaṃ, aho upamā”ti dhammassavanassa vaṇṇaṃ bhaṇamānānaṃ sutvāpi paṭivacanaṃ na deti. Kiṃ kāraṇā? Thinamiddhavasena dhammakathāya ananubhūtattāti. Evaṃ bandhanāgāraṃ viya **thinamiddhaṃ** daṭṭhabbaṃ.

Yathā pana nakkhattaṃ kiṇantopi dāso, “idaṃ nāma accāyikaṃ karaṇīyaṃ atthi, sīghaṃ, tattha gaccha, no ce gacchasi, hatthapādaṃ vā te chindāmi kaṇṇanāsaṃ vā”ti vutto sīghaṃ gacchatiyeva, nakkhattassa ādimajjhapariyosānaṃ anubhavituṃ na labhati. Kasmā? Parādhīnatāya. Evamevaṃ vinaye appakataññunā vivekatthāya araṇṇaṃ pavitṭhenāpi kismiñcīdeva antamaso kappiyamaṃsepi akappiyamaṃsasaññāya uppannāya vivekaṃ pahāya sīlavisodhanatthaṃ vinayadharaṇaṃ santike gantabbaṃ hoti. Vivekasukhaṃ anubhavituṃ na labhati. Kasmā? Uddhaccakukkuccābhibhūtātāyāti, evaṃ dāsabyaṃ viya **uddhaccakukkuccaṃ** daṭṭhabbaṃ.

Yathā pana kantāraddhānamaggapaṭipanno puriso corehi manussānaṃ viluttokāsaṃ pahatokāsañca disvā daṇḍakasaddenapi sakuṇasaddenapi corā āgatāti ussaṅkitaparisaṅkito hoti, gacchatipi, tiṭṭhatipi, nivattatipi, gataṭṭhānato āgataṭṭhānameva bahutaraṃ hoti. So kicchena kasirena khemantabhūmiṃ pāpuṇāti vā, na vā pāpuṇāti. Evamevaṃ yassa aṭṭhasu ṭhānesu vicikicchā uppannā hoti. So “buddho nu kho, na nu kho buddho”ti-ādīnā nayena vicikicchanto adhimuccitvā saddhāya gaṇhituṃ na sakkoti. Asakkonto maggaṃ vā phalaṃ vā na pāpuṇātīti

yathā (2.0220) kantāraddhānamagge “corā atthi natthi”ti punappunaṃ āsappana-  
parisappanaṃ apariyogāhanaṃ chambhitatta cittassa uppādentō khemantapa-  
tṭiyā antarāyaṃ karoti, evaṃ **vicikicchā**pi “buddho nu kho na buddho”ti-ādinā  
nayena punappunaṃ āsappanaparisappanaṃ apariyogāhanaṃ chambhitattaṃ  
cittassa uppādayamānā ariyabhūmippattiyā antarāyaṃ karotīti kantāraddhāna-  
maggo viya daṭṭhabbā.

Idāni **seyyathāpi, bhikkhave, āṇaṇyanti** ettha bhagavā pahīnakāmacchandanīva-  
raṇaṃ āṇaṇyasadisamaṃ, sesāni ārogyādisadisāni katvā dasseti. Tatrāyaṃ sadisatā-  
yathā hi puriso iṇaṃ ādāya kammante payojetvā samiddhakammanto, “idaṃ iṇaṃ  
nāma palibodhamūlan”ti cintetvā savaḍḍhikaṃ iṇaṃ niyyātetvā paṇṇaṃ phālā-  
peyya. Athassa tato paṭṭhāya neva koci dūtaṃ peseti, na paṇṇaṃ, so iṇasāmike  
disvāpi sace icchati, āsanā uṭṭhahati, no ce, na uṭṭhahati. Kasmā? Tehi saddhiṃ  
nillepatāya alaggatāya. Evameva bhikkhu, “ayaṃ kāmacchando nāma palibodha-  
mūlan”ti satipaṭṭhāne vuttanayeneva cha dhamme bhāvetvā kāmacchandanīva-  
raṇaṃ pajahati. Tassevaṃ pahīnakāmacchandassa yathā iṇamuttassa purisassa  
iṇasāmike disvā neva bhayaṃ na chambhitattaṃ hoti. Evameva paravatthumhi  
neva saṅgo na bandho hoti. Dibbānipi rūpāni passato kilesō na samudācarati.  
Tasmā bhagavā āṇaṇyamiva kāmacchandappahānamāha.

Yathā pana so pittarogāturo puriso bhesajjakiriyāya taṃ rogaṃ vūpasametvā  
tato paṭṭhāya madhusakkarādīnaṃ rasaṃ vindati. Evamevaṃ bhikkhu, “ayaṃ  
byāpādo nāma anattakārako”ti cha dhamme bhāvetvā byāpādanīvaraṇaṃ paja-  
hati. So evaṃ pahīnabyāpādo yathā pittarogavimutto puriso madhusakkarādīni  
madhurāni sampiyāyamāno paṭisevati. Evamevaṃ ācārapaṇṇatti-ādīni sikkhāpiya-  
māno sirasā sampatiçchitvā sampiyāyamāno sikkhati. Tasmā bhagavā ārogya-  
miva byāpādappahānamāha.

Yathā (2.0221) so nakkhattadivase bandhanāgāraṃ pavesito puriso aparasmīṃ  
nakkhattadivase, “pubbepi ahaṃ pamādadosena baddho taṃ nakkhattaṃ nānu-  
bhavāmi, idāni appamatto bhavissāmi”ti yathāssa paccatthikā okāsaṃ na  
labhanti. Evaṃ appamatto hutvā nakkhattaṃ anubhavitvā- “aho nakkhattaṃ aho  
nakkhattan”ti udānaṃ udānesi. Evameva bhikkhu, “idaṃ thinamiddhaṃ nāma  
mahā-anattakaran”ti cha dhamme bhāvetvā thinamiddhanīvaraṇaṃ pajahati. So  
evaṃ pahīnathinamiddho yathā bandhanā mutto puriso sattāhampi nakkhattassa  
ādimajjhapariyosānaṃ anubhavati. Evamevaṃ bhikkhu dhammanakkhattassa  
ādimajjhapariyosānaṃ anubhavanto saha paṭisambhidāhi arahattaṃ pāpuṇāti.  
Tasmā bhagavā bandhanā mokkhamiva thinamiddhappahānamāha.

Yathā pana dāso kañcīdeva mittaṃ upanissāya sāmikānaṃ dhanaṃ datvā  
attānaṃ bhujissaṃ katvā tato paṭṭhāya yaṃ icchati, taṃ kareyya. Evameva  
bhikkhu, “idaṃ uddhaccakukkuccaṃ nāma mahā-anattakaran”ti cha dhamme  
bhāvetvā uddhaccakukkuccaṃ pajahati. So evaṃ pahīnuddhaccakukkucco yathā  
bhujisso puriso yaṃ icchati, taṃ karoti. Na taṃ koci balakkārena tato nivatteti. Eva-  
mevaṃ bhikkhu yathāsukhaṃ nekkhammapaṭipadaṃ paṭipajjati, na naṃ uddha-  
ccakukkuccaṃ balakkārena tato nivatteti. Tasmā bhagavā bhujissaṃ viya uddha-

ccakukkuccappahānamāha.

Yathā balavā puriso hatthasāraṃ gahetvā sajjāvudho saparivāro kantāraṃ paṭi-pajjeyya. Taṃ corā dūratova disvā palāyeyyūṃ. So sotthinā taṃ kantāraṃ nittharivā khemantaṃ patto haṭṭhatuṭṭho assa. Evamevaṃ bhikkhu, “ayaṃ vicikicchā nāma anattakārikā”ti cha dhamme bhāvetvā vicikicchaṃ pajahati. So evaṃ pahīnavicikiccho yathā balavā sajjāvudho saparivāro puriso nibbhayo core tiṇaṃ viya agaṇetvā sotthinā nikkhamitvā khemantabhūmiṃ pāpuṇāti. Evamevaṃ duccharita-kantāraṃ nittharivā paramakhemantabhūmiṃ amataṃ nibbānaṃ pāpuṇāti. Tasmā bhagavā khemantabhūmiṃ viya vicikicchāpahānamāha.

**427. Imameva kāyanti** imaṃ karajakāyaṃ. **Abhisandeti**ti temeti sneheti, sabbattha pavattapītisukhaṃ karoti. **Parisandeti**ti samantato sandeti. **Paripūreti**ti vāyunā bhastaṃ viya pūreti. **Parippharatī**ti samantato phusati (2.0222). **Sabbāvato kāyassāti** assa bhikkhuno sabbakoṭṭhāsavato kāyassa. Kiñci upādinnakasantati-pavattiṭṭhāne chavimaṃsalohitānugataṃ aṇumattampi ṭhānaṃ paṭhamajjhānasukhena aphuṭṭhaṃ nāma na hoti. **Dakkhoti** cheko paṭibalo nhāniyacūṇṇāni kātuñceva yojetuñca sannetuñca. **Kaṃsathāleti** yena kenaci lohena katabhājane. Mattikabhājanaṃ pana thiraṃ na hoti, sannentassa bhijjati, tasmā taṃ na dasseti. **Paripphosakaṃ paripphosakanti** siñcitvā siñcitvā. **Sanneyyāti** vāmahatthena kaṃsathālaṃ gahetvā dakkhiṇena hatthena pamāṇayuttaṃ udakaṃ siñcitvā siñcitvā parimaddanto piṇḍaṃ kareyya. **Snehānugatāti** udakasinehena anugatā. **Snehaparetā**ti udakasinehena parigatā. **Santarabāhirāti** saddhiṃ antopadesena ceva bahipadesena ca, sabbatthakameva udakasinehena phuṭṭāti attho. **Na ca pagghariṇī**ti na bindu bindu udakaṃ paggharati, sakkā hoti hatthenapi dvīhipi tīhipi aṅgulīhi gahetuṃ ovaṭṭikampi kātunti attho.

**428.** Dutiyaṃjjhānasukha-upamāyaṃ **ubbhito**udakoti ubbhinna-udako, na heṭṭhā ubbhijjivā uggacchana-udako, antoyeva pana ubbhijjana-udakoti attho. **Āyamu-khanti** āgamanamaggo. **Devoti** megho. **Kālenakālanti** kāle kāle, anvaddhamāsaṃ vā anudasāhaṃ vāti attho. **Dhāranti** vuṭṭhiṃ. **Nānuppaveccheyyāti** na paveseyya, na vasseyyāti attho. **Sītā vāridhārā ubbhijjivāti** sītaṃ vāri taṃ udakarahadaṃ pūrayamānaṃ ubbhijjivā. Heṭṭhā uggacchana-udakañhi uggantvā uggantvā bhijjantaṃ udakaṃ khobheti. Catūhi disāhi pavisana-udakaṃ purāṇapaṇṇatiṇakaṭṭhandaṇḍakādīhi udakaṃ khobheti. Vuṭṭhi-udakaṃ dhārānipātapupphulakehi udakaṃ khobheti. Sannisinnameva pana hutvā iddhinimmitamiva uppajjamānaṃ udakaṃ imaṃ padesaṃ pharati, imaṃ padesaṃ na pharatīti natthi. Tena aphuṭṭokāso nāma na hotīti. Tattha rahado viya karajakāyo, udakaṃ viya dutiyaṃjjhānasukhaṃ. Sesāṃ purimanayeneva veditabbaṃ.

**429.** Tatiyaṃjjhānasukha-upamāyaṃ (2.0223) uppalāni ettha santīti **uppalinī**. Sesapadadvayesupi eseva nayo. Ettha ca setarattanīlesu yaṃkiñci uppalaṃ uppalameva, ūnakasatapattaṃ puṇḍarīkaṃ, satapattaṃ padumaṃ. Pattaniyamaṃ vā vināpi setaṃ padumaṃ, rattaṃ puṇḍarīkanti ayamettha vinicchayo. **Udakānuggatānī**ti udakato na uggatāni. **Antonimuggaposinī**ti udakatalassa anto nimuggāniyeva hutvā posīni, vaḍḍhīnīti attho. Sesāṃ purimanayeneva veditabbaṃ.

**430.** Catutthajjhānasukha-upamāyaṃ **parisuddhena cetasā pariyodātenā**ti ettha nirupakkilesaṭṭhena parisuddhaṃ. Pabhassaraṭṭhena pariyodātaṃ veditabbaṃ. **Odātena vatthenā**ti idaṃ utupharaṇatthaṃ vuttaṃ. Kiliṭṭhavatthena hi utupharaṇaṃ na hoti, taṅkhaṇadhotaparisuddhena utupharaṇaṃ balavaṃ hoti. Imissā hi upamāya vatthaṃ viya karajakāyo. Utupharaṇaṃ viya catutthajjhānasukhaṃ. Tasmā yathā sunhātassa purisassa parisuddhaṃ vatthaṃ sasīsaṃ pārupitvā nisinnassa sarīrato utu sabbameva vatthaṃ pharati, na koci vatthassa aphuṭokāso hoti. Evaṃ catutthajjhānasukhena bhikkhuno karajakāyassa na koci okāso aphuṭo hotīti evamettha attho daṭṭhabbo. Catutthajjhānacittameva vā vatthaṃ viya, taṃsamuṭṭhānarūpaṃ utupharaṇaṃ viya. Yathā hi katthaci odātavatthe kāyaṃ apphussante pi taṃsamuṭṭhānena utunā sabbatthakameva kāyo phuṭṭho hoti. Evaṃ catutthajjhānasamuṭṭhitena sukhumarūpena sabbatthakameva bhikkhuno karajakāyo phuṭṭo hotīti evamettha attho daṭṭhabbo.

**431.** Pubbenivāsañāṇa-upamāyaṃ **taṃdivasaṃ katakiriyā pākaṭā** hotīti taṃdivasaṃ gatagāmattayameva gahitaṃ. Tattha gāmattayaṃ gatapuriso viya pubbenivāsañāṇalābhī daṭṭhabbo. Tayo gāmā viya tayo bhavā daṭṭhabbā. Tassa purisassa tīsu gāmesu taṃdivasaṃ katakiriyāya āvibhāvo viya pubbenivāsāya cittaṃ abhinīharitvā nisinnassa bhikkhuno tīsu bhavesu katakiriyāya āvibhāvo daṭṭhabbo.

**432.** Dibbacakkhu-upamāyaṃ (2.0224) **dve agārā**ti dve gharā. **Sadvārā**ti sammukhadvārā. **Anucaṅkamanteti** aparāparaṃ sañcarante. **Anuvicarante**ti ito cito ca vicarante, ito pana gehā nikkhamitvā etaṃ gehaṃ, etasmā vā nikkhamitvā imaṃ gehaṃ pavisanavasena pi daṭṭhabbā. Tattha dve agārā sadvārā viya cutipaṭṭisandhiyo, cakkhumā puriso viya dibbacakkhuñāṇalābhī, cakkhumato purisassa dvinnaṃ gehānaṃ antare ṭhatvā passato dve agāre pavisanakanikkhamanaka purisānaṃ pākaṭakālo viya dibbacakkhulābhino ālokaṃ vaḍḍhetvā olokontassa cavanaka-upapajjanakasattānaṃ pākaṭakālo. Kiṃ pana te ñāṇassa pākaṭā, puggalassāti? Ñāṇassa. Tassa pākaṭattā pana puggalassa pākaṭāyevāti.

**433.** Āsavakkhayañāṇa-upamāyaṃ **pabbatasāṅkhepeti**

pabbatamatthake. **Anāviloti** nikkaddamo. Sippiyo ca sambukā ca **sippisambukaṃ**. Sakkharā ca kathalā ca **sakkharakathalaṃ**. Macchānaṃ gumbā ghaṭāti **macchagumbaṃ**. **Tiṭṭhantampi carantampīti** ettha sakkharakathalaṃ tiṭṭhatiyeva, itarāni carantipi tiṭṭhantipi. Yathā pana antarantarā ṭhitāsupi nisinnāsupi vijjamānāsupi, “etā gāvo carantī”ti carantiyo upādāya itarāpi carantīti vuccanti. Evaṃ tiṭṭhanta-meva sakkharakathalaṃ upādāya itarampi dvayaṃ tiṭṭhantanti vuttaṃ. Itarañca dvayaṃ carantaṃ upādāya sakkharakathalampi carantanti vuttaṃ. Tattha cakkhumato purisassa tīre ṭhatvā passato sippisambukādīnaṃ vibhūtakālo viya āsavānaṃ khayāya cittaṃ niharitvā nisinnassa bhikkhuno catunnaṃ saccānaṃ vibhūtakālo daṭṭhabbo.

**434.** Idāni sattahākārehi salīngato saguṇato khīṇāsavassa nāmaṃ gaṇhanto, **ayaṃ vuccati, bhikkhave, bhikkhu samaṇo itipīti-ādimāha**. Tattha **evaṃ kho, bhikkhave, bhikkhu samaṇo hotīti-ādīsu**, bhikkhave, evaṃ bhikkhu samitapāpattā **samaṇo** hoti. Bāhitapāpattā **brāhmaṇo** hoti. Nhātakilesattā **nhātako** hoti, dhotakilesattāti attho. Catumaggañāṇasaṅkhātehi vedehi akusaladhammānaṃ gatattā **vedagū** hoti, viditattāti attho. Teneva **viditāssa hontīti-ādimāha**. Kilesānaṃ sutattā **sottiyo** hoti, nissutattā (2.0225) apahatattāti attho. Kilesānaṃ ārakattā **ariyo** hoti, hatattāti attho. Tehi ārakattā **arahaṃ** hoti, dūrībhūtattāti attho. Sesāṃ sabattha pākaṭamevāti.

Papañcasūdaniyā majjhimanikāyaṭṭhakathāya

Mahā-assapurāsuttavaṇṇanā niṭṭhitā.

## 10. Cūḷa-assapurāsuttavaṇṇanā

**435.** **Evaṃ me sutanti** cūḷa-assapurāsuttaṃ. Tassa desanākāraṇaṃ purimasa-disameva. **Samaṇasāmīcippaṭipadāti** samaṇānaṃ anucchavikā samaṇānaṃ anulomappaṭipadā.

**436.** **Samaṇamalānanti-ādīsu** ete dhammā uppajjamānā samaṇe maline karonti malaggahite, tasmā “samaṇamalā”ti vuccanti. Etehi samaṇā dussanti, padussanti, tasmā **samaṇadosāti** vuccanti. Ete uppajjitvā samaṇe kasaṭe niroje karonti milāpenti, tasmā **samaṇakasaṭāti** vuccanti. **Āpāyikānaṃ ṭhānānanti** apāye nibbattāpakānaṃ kāraṇānaṃ. **Duggativedaniyānanti** duggatiyaṃ vipākavedanāya paccayānaṃ. **Matajaṃ nāmāti** manussā tikhiṇaṃ ayaṃ ayena sughaṃsitvā taṃ ayacuṇṇaṃ maṃsena saddhiṃ madditvā koṅcasakuṇe khādāpenti. Te uccāraṃ kātuṃ asakkontā maranti. No ce maranti, paharitvā mārenti. Atha tesāṃ kucchiṃ phāletvā naṃ udakena dhovitvā cuṇṇaṃ gahetvā maṃsena saddhiṃ madditvā puna khādāpentīti evaṃ satta vāre khādāpetvā gahitena ayacuṇṇena āvudhaṃ karonti. Susikkhitā ca naṃ ayakārā bahuhatthakammamūlaṃ labhitvā karonti.

Taṃ matasakuṇato jātattā “matajan”ti vuccati, atitikhiṇaṃ hoti. **Pītanisitanti** udaka-pītañceva silāya ca sunighaṃsitam. **Saṅghāṭiyāti** kosiyā. **Sampārutanti** pariyo-naddham. **Sampalivethitanti** samantato veṭhitam.

**437. Rajojallikassā**Ti (2.0226) rajojalladhārino. **Udakorohakassāti** divasassa tikkhattuṃ udakaṃ orohantassa. **Rukkhamūlikassāti** rukkkhamūlavāsino. **Abbhokāsikassāti** abbhokāsavāsino. **Ubbhaṭṭhakassāti** uddham ṭhitakassa. **Pariyāyabhakkassāti** māsavārena vā aḍḍhamāsavārena vā bhujantassa. Sabbametaṃ bāhira-samayeneva kathitam. Imasmiñhi sāsane cīvaradharo bhikkhu saṅghāṭikoti na vuccati. Rajojalladhāraṇādivatāni imasmiṃ sāsane natthiyeva. Buddhavacanassa buddhavacanameva nāmaṃ, na mantāti. Rukkhamūliko, abbhokāsikoti ettakaṃ yeva pana labbhati. Tampi bāhira-samayeneva kathitam. **Jātameva nanti** taṃdivase jātamattaṃ yeva naṃ. **Saṅghāṭikaṃ kareyyunti** saṅghāṭikaṃ vatthaṃ nivāsetvā ca pārupitvā ca saṅghāṭikaṃ kareyyuṃ. Esa nayo sabbattha.

**438. Visuddhamattānaṃ samanupassatīti** attānaṃ visujjhantaṃ passati. Visuddhoti pana na tāva vattabbo. **Pāmojjaṃ jāyatīti** tuṭṭhākāro jāyati. **Pamuditassa pīṭīti** tuṭṭhassa sakalasarīraṃ khobhayamānā pīṭī jāyati. **Pīṭimanassa kāyoti** pīṭisampayuttassa puggalassa nāmakāyo. **Passambhatīti** vigatadaratho hoti. **Sukhaṃ vedetīti** kāyikampi cetasikampi sukhaṃ vediyati. **Cittaṃ samādhiyatīti** iminā nekkhammasukhena sukhitassa cittaṃ samādhiyati, appanāpattaṃ viya hoti. **So mettāsahagatena cetasāti** heṭṭhā kilesavasena āradhā desanā pabbate vuṭṭhavuṭṭhi viya nadiṃ yathānusandhinā brahmavihārabhāvanaṃ otiṇṇā. Tattha yaṃ vattabbaṃ siyā, taṃ sabbaṃ visuddhimagge vuttameva. **Seyyathāpi, bhikkhave, pokkharāṇīti** mahāsīhanādasutte maggo pokkharāṇiyā upamito, idha sāsanaṃ upamitanti veditabbaṃ. **Āsavānaṃ khayā samaṇo hotīti** sabbakilesānaṃ samitattā paramatthasamaṇo hotīti. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Cūḷa-assapurasuttavaṇṇanā niṭṭhitā.

Catutthavaggavaṇṇanā niṭṭhitā.

## 5. Cūḷayamakavaggo

### 1. Sāleyyakasuttavaṇṇanā

**439. Evaṃ** (2.0227) **me sutanti** sāleyyakasuttaṃ. Tattha **kosalesūti** kosalā nāma jānapadino rājakumārā. Tesam nivāso ekopi janapado ruḷhīsaddena kosa-

lāti vuccati, tasmim̄ kosalesu janapade. Porāṇā panāhu- yasmā pubbe mahāpa-  
nādaṃ rājakumāraṃ nānānāṭakāni disvā sitamattampi akarontaṃ sutvā rājā āha-  
“yo mama puttaṃ hasāpeti, sabbālaṅkārena naṃ alaṅkaromī”ti. Tato naṅgalānīpi  
chaḍḍetvā mahājanakāye sannipatite manussā sātirekāni sattavassāni nānākīli-  
kāyo dassetvā naṃ hasāpetuṃ nāsakkhiṃsu. Tato sakko devanaṭaṃ pesesi. So  
dibbanāṭakaṃ dassetvā hasāpesi. Atha te manussā attano attano vasanokāsābhi-  
mukhā pakkamiṃsu. Te paṭipathe mittasuhajjādayo disvā paṭisanthāraṃ karontā,  
“kacci, bho, kusalaṃ, kacci, bho, kusalan”ti āhaṃsu. Tasmā taṃ “kusalaṃ kusala-  
n”ti vacanaṃ upādāya so padeso kosalāti vuccatīti.

**Cārikaṃ caramānoti** aturita-cārikaṃ caramāno. **Mahatā bhikkhusaṅghena**  
**saddhinti** sataṃ vā sahasaṃ vā satahasaṃ vāti evaṃ aparicchinnena  
mahatā bhikkhusaṅghena saddhiṃ. **Brāhmaṇagāmōti** brāhmaṇānaṃ samosaraṇa-  
gāmopi brāhmaṇagāmōti vuccati brāhmaṇānaṃ bhogagāmopi. Idha samosaraṇa-  
gāmo adhippeto. **Tadavasarīti** taṃ avasari, sampattoti attho. Vihāro panettha ani-  
yāmito; tasmā tassa avidūre buddhānaṃ anucchaviko eko vanasaṇḍo bhavissati,  
satthā taṃ vanasaṇḍaṃ gatoti veditabbo. **Assosunti** suṇiṃsu upalabhiṃsu. Sota-  
dvārasampattavacananigghosānusārena jāniṃsu. **Khoti** avadhāraṇatthe padapū-  
raṇamate vā nipāto. Tattha avadhāraṇatthena assosum̄yeva (2.0228), na nesaṃ  
koci savanantarāyo ahoṣīti ayamatto veditabbo. Padapūraṇena byañjanasiliṭṭha-  
tāmattameva.

Idāni yamatthaṃ assosum̄, taṃ pakāsetuṃ **samaṇo khalu, bho, gotamoti**-ādi  
vuttaṃ. Tattha samitapāpattā **samaṇoti** veditabbo. **Khalūti** anussavanatthe nipāto.  
**Bhoti** tesam̄ aññamaññaṃ ālapanamattaṃ. **Gotamoti** bhagavato gottavasena  
paridīpanaṃ. Tasmā **samaṇo khalu, bho, gotamoti** ettha samaṇo kira, bho, gota-  
magottoti evamattho daṭṭhabbo. **Sakyaputtoti** idaṃ pana bhagavato uccākulapari-  
dīpanaṃ. **Sakyakulā pabbajitoti** saddhāpabbajitabhāvadīpanaṃ. Kenaci pāriju-  
ññaṃ anabhibhūto aparikkhīṇaṃyeva taṃ kulaṃ pahāya saddhāpabbajitoti  
vuttaṃ hoti. Tato paraṃ vuttatthameva. **Taṃ kho panāti** itthambhūtākhyānatthe  
upayogavacanaṃ, tassa kho pana bhoto gotamassāti attho. **Kalyāṇoti** kalyāṇa-  
ṇasamannāgato, seṭṭhoti vuttaṃ hoti. **Kittisaddoti** kittiyeva, thutighoso vā. **Abbhū-**  
**ggatoti** sadevakaṃ lokaṃ ajjhottharivā uggato. Kinti? “Itipi so bhagavā ...pe...  
buddho bhagavā”ti.

Tatrāyaṃ padasambandho- so bhagavā itipi arahaṃ, itipi sammāsambuddho  
...pe... itipi bhagavāti. Iminā ca iminā ca kāraṇenāti vuttaṃ hoti. Tattha ārakattā,  
arīnaṃ arānañca hatattā, paccayādīnaṃ arahattā, pāpakaraṇe rahābhāvāti imehi  
tāva kāraṇehi so bhagavā arahanti veditabboti-ādinā nayena mātikaṃ nikkhipitvā  
sabbāneva etāni padāni visuddhimagge buddhānussatiniddese vitthāritānīti tato  
tesam̄ vitthāro gahetabbo.

**Sādhu kho panāti** sundaraṃ kho pana; atthāvahaṃ sukhāvahanti vuttaṃ hoti.  
**Tathārūpānaṃ arahatanti** yathārūpo so bhavaṃ gotamo, evarūpānaṃ anekehipi  
kappakoṭisatasahasseehi dullabhadassanānaṃ byāmappabhāparikkhittehi asīti-a-  
nubyañjanaratanapaṭimaṇḍitehi dvattiṃsmahāpurisalakkhaṇavarehi samākīṇa-

manoramasarīrānaṃ atappakadassanānaṃ atimadhuradhammanigghosānaṃ, yathābhūtaguṇādhigamena loke arahantoti laddhasaddānaṃ arahataṃ. **Dassanaṃ hotīti** pasādasommāni akkhīni ummīletvā dassanamattampi sādhu hoti. Sace pana aṭṭhaṅgasamannāgatena brahmassaarena dhammaṃ (2.0229) desentassa ekaṃ padampi sotuṃ labhissāma, sādhutaraṃyeva bhavissatīti evaṃ ajjhāsayaṃ katvā.

**Yena bhagavā tenupasaṅkamimsūti** sabbakiccāni pahāya tuṭṭhamānasā āgamaṃsu. **Etadavocunti** duvidhā hi pucchā agārikapucchā anagārikapucchā ca. Tattha “kiṃ, bhante, kusalaṃ, kiṃ akusalan”ti iminā nayena agārikapucchā āgatā. “Ime kho, bhante, pañcupādānakkhandhā”ti iminā nayena anagārikapucchā. Ime pana attano anurūpaṃ agārikapucchāṃ pucchantā etaṃ, “ko nu kho, bho gotama, hetu ko paccayo”ti-ādivacanaṃ avocuṃ. Tesaṃ bhagavā yathā na sakkonti salla-kkhetuṃ, evaṃ saṃkhitteneva tāva pañhaṃ vissajjento, **adhammacariyāvisamacariyāhetu kho gahapatayoti**-ādimāha. Kasmā pana bhagavā yathā na sallakkhenti, evaṃ vissajjesīti? Paṇḍitamānikā hi te; āditova mātikaṃ aṭṭhapetvā yathā salla-kkheti, evaṃ atthe vitthārite, desanaṃ uttānikāti maññantā avajānanti, mayampi kathentā evameva katheyyāmāti vattāro bhavanti. Tena nesaṃ bhagavā yathā na sakkonti salla-kkhetuṃ, evaṃ saṃkhitteneva tāva pañhaṃ vissajjesi. Tato salla-kkhetuṃ asakkontehi vitthāradesanaṃ yācito vitthārena desetūṃ, **tena hi gahapatayoti**-ādimāha. Tattha **tena hīti** kāraṇatthe nipāto. Yasmā maṃ tumhe yācatha, tasmāti attho.

**440. Tividhanti** tihi koṭṭhāsehi. **Kāyenāti** kāyadvārena. **Adhammacariyāvisamacariyāti** adhammacariyasaṅkhātā visamacariyā. Ayaṃ panettha padattho, adhammassa cariyā adhammacariyā, adhammakaraṇanti attho. Visamā cariyā, visamassa vā kammassa cariyāti visamacariyā. Adhammacariyā ca sā visamacariyā cāti adhammacariyāvisamacariyā. Etenupāyena sabbesu kaṇhasukkapadesu attho veditabbo. **Luddoti** kakkhaḷo. **Dāruṇoti** sāhasiko. **Lohitapāṇīti** paraṃ jīvitā voropentassa pāṇī lohitena lippanti. Sacepi na lippanti, tathāvidho lohitapāṇītveva vuccati. **Hatappahate nivīṭṭhoti** hate ca parassa pahāradāne (2.0230), pahate ca paramāraṇe nivīṭṭho. **Adayāpannoti** nikkaruṇataṃ āpanno.

**Yaṃ taṃ parassāti** yaṃ taṃ parassa santakaṃ. **Paravittūpakaraṇanti** tasseva parassa vittūpakaraṇaṃ tuṭṭhijanaṃ parikkhārabhaṇḍakaṃ. **Gāmagataṃ vāti** antogāme vā ṭhapitaṃ. **Araññagataṃ vāti** araṇṇe rukkhaggapabbatamatthakādīsu vā ṭhapitaṃ. **Adinnanti** tehi parehi kāyena vā vācāya vā adinnaṃ. **Theyyasaṅkhātanti** ettha **thenoti** coro. Thenassa bhāvo



theyyaṃ, avaharaṇacittassetam adhivacanam. Saṅkhā saṅkhātanti atthato ekam, koṭṭhāsassetam adhivacanam, “saññānidānā hi papañcasaṅkhā”ti-ādīsu viya. Theyyañca taṃ saṅkhātañcāti theyyasaṅkhātam, theyyacittasaṅkhāto eko cittakoṭṭhāsoti attho. Karaṇatthe cetam paccattavacanam, tasmā theyyasaṅkhātenāti atthato daṭṭhabbam.

**Māturakkhitā**ti-ādīsu yaṃ pitari naṭṭhe vā mate vā ghāsacchādanādīhi paṭijaggamānā, vayapattam kulaghare dassāmīti mātā rakkhati, ayaṃ māturakkhitā nāma. Etenupāyena **piturakkhitā**dayopi veditabbā. Sabhāgakulāni pana kucchigatesupi gabbhesu katikam karonti- “sace mayham putto hoti, tuyham dhītā, aññattha gantum na labhissati, mayham puttasseva hotū”ti. Evaṃ gabbhepi pariggahitā **sassāmikā** nāma. “Yo itthannāmam itthim gacchati, tassa ettako daṇḍo”ti evaṃ gāmam vā geham vā vīthim vā uddissa ṭhapitadaṇḍā, pana **saparidaṇḍā** nāma. **Antamaso mālāguṇaparikkhittāpīti** yā sabbantimena paricchena, “esā me bhariyā bhavissati”ti saññāya tassā upari kenaci mālāguṇam khipantena mālāguṇamattenāpi parikkhittā hoti. **Tathārūpāsu cārittam āpajjitā hotīti** evarūpāsu itthisu sammādiṭṭhisutte vuttamicchācāralakkhaṇavasena vītikkamam kattā hoti.

**Sabhāgatoti** sabhāyam ṭhito. **Parisāgatoti** parisāyam ṭhito. **Ñātimajjhagatoti** dāyādānam majjhe ṭhito. **Pūgamajjhagatoti** senīnam majjhe ṭhito. **Rājakulamajjhagatoti** rājakulassa majjhe mahāvinicchaye ṭhito (2.0231). **Abhinītoti** pucchanatthāya nīto. **Sakkhipuṭṭhoti** sakkhim katvā pucchito. **Ehambo purisāti** ālapanametam. **Attahetu vā parahetu vāti** attano vā parassa vā hatthapādādihetu vā dhanahetu vā. **Āmisakiñcikkahetu vā**Ti ettha āmisanti lābho adhippeto. **Kiñcikkhanti** yaṃ vā taṃ vā appamattakam. Antamaso tittiravaṭṭakasappipiṇḍanavanītapīṇḍādimattakassapi lañjassa hetūti attho. **Sampajānamusā bhāsītā hotīti** jānantoyeva musāvādam kattā hoti.

**Imesam bhedāyāti** yesam itoti vuttānam santike sutam hoti, tesam bhedāya. **Amūsam bhedāyāti** yesam amutrāti vuttānam santike sutam hoti, tesam bhedāya. **Iti samaggānam vā bhedakā**Ti evaṃ samaggānam vā dvinnam sahāyakānam bhedam kattā. **Bhinnānam vā anuppadātā**Ti suṭṭhu kataṃ tayā, taṃ pajahantena katipāheneva te mahantam anatham kareyyāti evaṃ bhinnānam puna asaṃsandanāya anuppadātā upatthambhetā kāraṇam dassetāti attho. Vaggo ārāmo abhiratiṭṭhānamassāti **vaggārāmo**. **Vaggaratoti** vaggesu rato. Vagge disvā vā sutvā vā nandatīti **vagganandī**. **Vaggakaraṇim vācanti** yā vācā samaggepi satte vagge karoti bhindati, taṃ kalahakāraṇam vācam bhāsītā hoti.

**Aṇḍakāti** yathā sadose rukkhe aṇḍakāni uṭṭhahanti, evaṃ sadosatāya khamśanāvambhanādivacanehi aṇḍakā jātā. **Kakkasāti** pūtikā. Yathā nāma pūtikarukkho kakkaso hoti paggharitacuṇṇo, evaṃ kakkasā hoti, sotaṃ ghaṃsamānā viya pavīsati. Tena vuttam “kakkasā”ti. **Parakaṭukāti** paresam kaṭukā amanāpā dosajanāni. **Parābhisajjanīti** kuṭilakaṇṭakasākhā viya mamesu vijjhivā paresam abhisajjanī gantukāmānampi gantum adatvā lagganakārī. **Kodhasāmantā**Ti kodhassa āsannā. **Asamādhisamvattanikāti** appanāsamādhissa vā upacārasamādhissa vā asaṃvattanikā. Iti sabbāneva tāni sadosavācāya vevacanāni.

**Akālavādīti** akālena vattā. **Abhūtavādīti** yaṃ natthi, tassa vattā. **Anatthavādīti** akāraṇanissitaṃ vattā. **Adhammavādīti** asabhāvaṃ vattā (2.0232). **Avinayavādīti** asaṃvaravinayapaṭisaṃyuttassa vattā. **Anidhānavati vācanti** hadayamañjūsāyaṃ nidhetuṃ ayuttaṃ vācaṃ bhāsitaṃ hoti. **Akālenāti** vattabbakālassa pubbe vā pacchā vā ayuttakāle vattā hoti. **Anapadesanti** suttāpadesavirahitaṃ. **Apariyantavattinti** aparicchedaṃ, suttaṃ vā jātakaṃ vā nikkhipitvā tassa upalabbaṃ vā upamaṃ vā vatthuṃ vā āharitvā bāhirakathaṃyeva katheti. Nikkhittaṃ nikkhittameva hoti. “Suttaṃ nu kho katheti jātakaṃ nu kho, nassa antaṃ vā koṭiṃ vā passāmā”ti vattabbataṃ āpajjati. Yathā vaṭarukkhasākhānaṃ gatagataṭṭhāne pārohā otaranti, otiṇṇotiṇṇaṭṭhāne sampajjitvā puna vaḍḍhantiyeva. Evaṃ aḍḍha-yojanampi yojanampi gacchantiyeva, gacchante gacchante pana mūlarukkho vinasati, pavenijātakāva tiṭṭhanti. Evamayampi nigrodhadhammakathiko nāma hoti; nikkhittaṃ nikkhittamattameva katvā passeneva pariharanto gacchati. Yo pana bahumpi bhaṇanto etadatthamidaṃ vuttanti āharitvā jānāpetuṃ sakkoti, tassa kathetuṃ vaṭṭati. **Anatthasaṃhitanti** na atthanissitaṃ.

**Abhijjhātā hotīti** abhijjhāya oloketā hoti. **Aho vatāti** patthanatthe nipāto. Abhijjhāya olokitamattakena cettha kamma pathabhedo na hoti. Yadā pana, “aho vatidaṃ mama santakaṃ assa, ahamettha vasaṃ vatteyyan”ti attano pariṇāmeti, tadā kamma pathabhedo hoti, ayamidha adhippeto.

**Byāpannacittoti** vipannacitto pūtibhūtacitto. **Paduṭṭhamanasaṅkappoti** dosena duṭṭhacittasaṅkappo. **Haññantūti** ghātiyantū. **Vajjhantūti** vadhaṃ pāpuṇantu. **Mā vā ahesunti** kiñcipi mā ahesuṃ. Idhāpi kopamattakena kamma pathabhedo na hoti. Haññantūti-ādicintaneneva hoti, tasmā evaṃ vuttaṃ.

**Micchādiṭṭhikoti** akusaladassano. **Viparītaḍḍassanoti** vipallatthadassano. **Natthi dinnanti** dinnassa phalābhāvaṃ sandhāya vadati. **Yiṭṭhaṃ** vuccati mahāyāgo. **Hutanti** paheṇakasakkāro adhippeto, tampi ubhayaṃ phalābhāvameva (2.0233) sandhāya paṭikkhipati. **Sukatadukkaṭānanti** sukatadukkaṭānaṃ, kusalākusalānanti attho. **Phalaṃ vipākoti** yaṃ phalanti vā vipākoti vā vuccati, taṃ natthīti vadati. **Natthi ayaṃ lokoti** paraloke ṭhitassa ayaṃ loko natthi. **Natthi paro lokoti** idha loke ṭhitassapi paraloko natthi, sabbe tattha tattheva ucchijjantīti dasseti. **Natthi mātā natthi pitāti** tesu sammāpaṭipattimicchāpaṭipattīnaṃ phalābhāvavassena vadati. **Natthi sattā opapātikāti** cavitvā upapajjanakasattā nāma natthīti vadati. **Sayaṃ abhiññā sacchikatvā pavedentīti** ye imaṅca lokaṃ paraṅca lokaṃ abhivisiṭṭhāya paññāya sayaṃ paccakkaṃ katvā pavedenti, te natthīti sabbaññu-buddhānaṃ abhāvaṃ dīpeti, ettāvatā dasavatthukā micchādiṭṭhi kathitā hoti.

**441. Pāṇātipātaṃ Pahāyāti-ādayo** satta kamma pathā cūḷahatthipade vitthāritā. Anabhijjhādayo uttānatthāyeva.

**442. Sahabyataṃ upapajjeyyanti** sahabhāvaṃ upagaccheyyaṃ. **Brahmakāyikānaṃ devānanti** paṭhamajjhānabhūmidevānaṃ. **Ābhānaṃ devānanti** ābhā nāma visuṃ natthi, parittābha-appamaṇābha-ābhassarānametaṃ adhivacanaṃ. **Parittābhānanti-ādi** pana ekato aggahetvā tesameva bhedato gahaṇaṃ. **Parittasubhānanti-ādīsupi** eseva nayo. Iti bhagavā āsavakkhayaṃ dassetvā arahattanikūṭena

desanaṃ niṭṭhapesi.

Idha ṭhatvā pana devalokā samānetabbā. Tissannaṃ tāva jhānabhūmiṇaṃ vasena nava brahmalokā, pañca suddhāvāsā catūhi ārūpehi saddhiṃ navāti aṭṭhā-rasa, vehapphalehi saddhiṃ ekūnavīsati, te asaññaṃ pakkhipitvā vīsati brahma-lokā honti, evaṃ chahi kāmāvacarehi saddhiṃ chabbīsati devalokā nāma. Tesāṃ sabbesampi bhagavatā dasakusalakammapathehi nibbatti dassitā.

Tattha chasu tāva kāmāvacaresu tiṇṇaṃ sucaritānaṃ vipākeneva nibbatti hoti. Uparidevalokānaṃ pana ime kammāpathā upanissayavasena kathitā (2.0234). Dasa kusalakammāpathā hi sīlaṃ, sīlavato ca kasiṇaparikkammaṃ ijhatīti. Sīle patiṭṭhāya kasiṇaparikkammaṃ katvā paṭhamajjhānaṃ nibbattetvā paṭhamajjhāna-bhūmiyaṃ nibbattati; dutiyādīni bhāvetvā dutiyajjhānabhūmi-ādīsu nibbattati; rūpāvacarajjhānaṃ pādakaṃ katvā vipassanaṃ vaḍḍhetvā anāgāmiṇiṃ patiṭṭhito pañcasu suddhāvāsesu nibbattati; rūpāvacarajjhānaṃ pādakaṃ katvā arūpāvaca-rasamāpattiṃ nibbattetvā catūsu arūpesu nibbattati; rūpārūpajjhānaṃ pādakaṃ katvā vipassanaṃ vaḍḍhetvā arahattaṃ pāpuṇāti. Asaññabhavo pana bāhira-kānaṃ tāpasaparibbājakānaṃ āciṇṇoti idha na niddiṭṭho. Sesāṃ sabbattha uttāna-tthamevāti.

Papañcasūdaniyā majjhimanikāyaṭṭhakathāya

Sāleyyakasuttavaṇṇanā niṭṭhitā.

## 2. Verañjakasuttavaṇṇanā

444. **Evaṃ me sutanti** verañjakasuttaṃ. Tattha **verañjakā**ti verañjavāsino. **Kenacideva karaṇīyenā**ti kenacideva aniyamitakiccena. Sesāṃ sabbaṃ purimasutte vuttanayeneva veditabbaṃ. Kevalaṅhi idha **adhammacārī visamacārī**ti evaṃ puggalādhiṭṭhānā desanā katā. Purimasutte dhammādhiṭṭhānāti ayaṃ viseso. Sesāṃ tādīsamevāti.

Papañcasūdaniyā majjhimanikāyaṭṭhakathāya

Verañjakasuttavaṇṇanā niṭṭhitā.

## 3. Mahāvedallasuttavaṇṇanā

449. **Evaṃ me sutanti** mahāvedallasuttaṃ. Tattha **āyasmā**ti sagāravasappati-ssavacanametāṃ. **Mahākoṭṭhikoti** tassa therassa nāmaṃ. **Paṭisallānā vuṭṭhitoti**

phalasangamāpattito vuttāhito. **Duppañño duppañño**ti ettha paññāya dutṭham nāma natthi, appañño nippaññoati attho. **Kittāvatā nu kho**ti kāraṇaparicchedapucchā, kittakena nu kho evaṃ vuccatīti (2.0235) attho. Pucchā ca nāmesā aditṭhajotanāpucchā, ditṭhasaṃsandanāpucchā, vimaticchedanāpucchā, anumatiapucchā, kate-tukamyatāpucchāti pañcavidhā hoti. Tāsamidaṃ nānakaraṇaṃ-

Katamā **aditṭhajotanāpucchā**? Pakatiyā lakkhaṇaṃ aññātaṃ hoti aditṭhaṃ atulitaṃ atīritaṃ avibhūtaṃ avibhāvitaṃ, tassa ñāṇāya dassanāya tulanāya tīraṇāya vibhūtāya vibhāvanatthāya pañhaṃ pucchati. Ayaṃ aditṭhajotanāpucchā.

Katamā **ditṭhasaṃsandanāpucchā**? Pakatiyā lakkhaṇaṃ ñātaṃ hoti ditṭhaṃ tulitaṃ tīritaṃ vibhūtaṃ vibhāvitaṃ, aññehi paṇḍitehi saddhiṃ saṃsandanatthāya pañhaṃ pucchati. Ayaṃ ditṭhasaṃsandanāpucchā.

Katamā **vimaticchedanāpucchā**? Pakatiyā saṃsayapakkhandaṃ hoti vimatipakkhandaṃ, dveḷhakajāto, “evaṃ nu kho, na nu kho, kiṃ nu kho, kathaṃ nu kho”ti, so vimaticchedanatthāya pañhaṃ pucchati. Ayaṃ vimaticchedanāpucchā (mahāni. 150; cūḷani. puṇṇakamaṇavapucchāniddeśa 12).

“Taṃ kiṃ maññatha, bhikkhave, rūpaṃ niccaṃ vā aniccaṃ vāti? Aniccaṃ, bhante”ti (mahāva. 21) evarūpā anumatiṃ gahetvā dhammadesanākāle pucchā **anumatipucchā** nāma.

“Cattārome, bhikkhave, satipaṭṭhānā, katame cattāro”ti (saṃ. ni. 5.390) evarūpā bhikkhusaṅghaṃ sayameva pucchitvā sayameva vissajjetukāmassa pucchā **kate-tukamyatāpucchā** nāma. Tāsu idha ditṭhasaṃsandanāpucchā adhippetā.

Thero hi attano divāṭṭhāne nisīditvā sayameva pañhaṃ samuṭṭhapetvā sayam vinicchinanto idaṃ suttaṃ ādito paṭṭhāya matthakaṃ pāpesi. Ekacco hi pañhaṃ samuṭṭhāpetumyeva sakkoti na nicchetum; ekacco nicchetum sakkoti na samuṭṭhāpetum; ekacco ubhayampi na sakkoti; ekacco ubhayampi sakkoti. Tesu thero ubhayampi sakkotiyeva. Kasmā? Mahāpaññatāya. Mahāpaññaṃ nissāya hi imasmim sāsane sārīputtatthero, mahākaccānatthero, puṇṇatthero, kumārakassapaṭṭhero, ānandatthero, ayameva āyasmāti sambahulā therā visesaṭṭhānaṃ adhi-gatā.



pana sakkāti mahāpaññatāya **mahākoṭṭhitatthero** adhigamaparipucchāsavanapubbayogānaṃ vasena anantanayussadaṃ paṭisambhidāpabhedānaṃ patto. Teneva naṃ bhagavā etadagge ṭhapesi- “etadaggaṃ, bhikkhave, mama sāvakaṇaṃ bhikkhūnaṃ paṭisambhidāpattānaṃ yadidaṃ mahākoṭṭhito”ti (a. ni. 1.218).

Iti thero mahāpaññatāya pañhaṃ samuṭṭhāpetumpi nicchetumpi ubhayampi sakkoti. So divāṭṭhāne nisīditvā sayameva sabbapañhe samuṭṭhāpetvā sayānaṃ vinicchinnanto idaṃ suttaṃ ādito paṭṭhāya matthakaṃ pāpetvā, “sobhanā vata ayaṃ dhammadesanā, jeṭṭhabhātikena naṃ dhammasenāpatinā saddhiṃ saṃsāndissāmi, tato ayaṃ dvinnampi amhākaṃ ekamatiyā ekajjhāsayena ca ṭhapitā atigarukā bhavissati pāsāṇacchattasadisā, caturghanittharaṇatthikānaṃ titthe ṭhapitanāvā viya, maggagamanatthikānaṃ saḥassayutta-ājaññaratho viya bahupakārā bhavissati”ti diṭṭhasaṃsandanaṃ pañhaṃ pucchi. Tena vuttaṃ- “tāsu idha diṭṭhasaṃsandanaṃ pucchā adhippetā”ti.

**Nappajānātīti** (2.0238) ettha yasmā nappajānāti, tasmā duppaññoti vuccatīti ayaṃ mattho. Esa nayo sabbattha. **Idaṃ dukkhanti nappajānātīti** idaṃ dukkhaṃ, ettakaṃ dukkhaṃ, ito uddhaṃ natthīti dukkhasaccaṃ yāthāvasarasalakkhaṇato na pajānāti. **Ayaṃ dukkhasamudayo** ito dukkhaṃ samudetīti pavattidukkhapabhāvikā taṇhā samudayasaccanti yāthāvasarasalakkhaṇato na pajānāti. **Ayaṃ dukkhanirodhoti** idaṃ dukkhaṃ ayaṃ dukkhasamudayo ca idaṃ nāma ṭhānaṃ patvā nirujjhatīti ubhinnaṃ appavatti nibbānaṃ nirodhasaccanti yāthāvasarasalakkhaṇato na pajānāti. **Ayaṃ dukkhanirodhagāminī paṭipadāti** ayaṃ paṭipadā dukkhanirodhaṃ gacchatīti maggasaccaṃ yāthāvasarasalakkhaṇato na pajānātīti. Anantaravārepi imināva nayena attho veditabbo. Saṅkhepatō panettha catusaccakammaṭṭhāniko puggalo kathitoti veditabbo.

Ayañhi ācariyasantike cattāri saccāni savanato uggaṇhāti. Ṭhapetvā taṇhaṃ tebhūmakā dhammā dukkhasaccaṃ, taṇhā samudayasaccaṃ, ubhinnaṃ appavatti nibbānaṃ nirodhasaccaṃ, dukkhasaccaṃ pariṇānanto samudayasaccaṃ pajahanto nirodhapāpano maggo maggasaccanti evaṃ uggaṇhetvā abhinivisati. Tattha purimāni dve saccāni vaṭṭaṃ, pacchimāni vivaṭṭaṃ, vaṭṭe abhiniveso hoti, no vivaṭṭe, tasmā ayaṃ abhinivisaṃnāno dukkhasacce abhinivisati.

Dukkhasaccaṃ nāma rūpādayo pañcakkhandhāti vavatthapetvā dhātukammaṭṭhānavasena otarivā, “cattāri mahābhūtāni catunnañca mahābhūtānaṃ upādāya rūpaṃ rūpan”ti vavatthapeti. Tadārammaṇā vedanā saññā saṅkhārā viññāṇaṃ nāmantī evaṃ yamakātālakkhandhaṃ bhindanto viya “dveva ime dhammā nāmarūpan”ti vavatthapeti. Taṃ panetaṃ na ahetukaṃ sahetukaṃ sappaccayaṃ, ko cassa paccayo avijjādayo dhammāti evaṃ paccaye ceva paccayuppannadhamme ca vavatthapetvā “sabbepi dhammā hutvā abhāvaṭṭhena aniccā”ti aniccala-kkhaṇaṃ āropeti, tato udayavayappaṭipīḷanākārena dukkhā, avasavattanākārena anattāti tilakkhaṇaṃ āropetvā vipassanāpaṭipāṭiyā sammāsanto lokuttaramaggaṃ pāpuṇāti.

Maggakkhaṇe (2.0239) cattāri saccāni ekapaṭivedhena paṭivijjhati, ekābhisamayena abhisameti. Dukkhaṃ pariññāpaṭivedhena paṭivijjhati. Samudayaṃ pahāna-

paṭivedhena, nirodhaṃ sacchikiriyāpaṭivedhena, maggaṃ bhāvanāpaṭivedhena paṭivijjhati. Dukkhaṃ pariññābhisamayena abhisameti, samudayaṃ pahānābhisamayena, nirodhaṃ sacchikiriyābhisamayena, maggaṃ bhāvanābhisamayena abhisameti. So tīṇi saccāni kiccato paṭivijjhati, nirodhaṃ ārammaṇato. Tasmiñcassa khaṇe ahaṃ dukkhaṃ parijānāmi, samudayaṃ pajahāmi, nirodhaṃ sacchikaromi, maggaṃ bhāvemīti ābhogasamannāhāramanasikārapaccavekkhaṇā natthi. Etassa pana pariggaṇhantasseva maggo tīsu saccesu pariññādikiccaṃ sādhetova nirodhaṃ ārammaṇato paṭivijjhatīti.

**Tasmā paññavāti vuccatīti** ettha heṭṭhimakoṭiyā sotāpanno, uparimakoṭiyā khīṇāsavo paññavāti niddiṭṭho. Yo pana teṭṭhakaṃ buddhavacanaṃ pāḷito ca atthato ca anusandhito ca pubbāparato ca uggahetvā heṭṭhupariyaṃ karonto vicarati, anicca-dukkhānattavasena pariggahamattampi natthi, ayaṃ paññavā nāma, duppañño nāmāti? Viññāṇacarito nāmesa, paññavāti na vattabbo. Atha yo tilakkhaṇaṃ āropetvā vipassanāpaṭipāṭiyā sammāsanto ajja ajjeva arahattanti carati, ayaṃ paññavā nāma, duppañño nāmāti? Bhajāpiyamāno paññavāpakkaṃ bhajati. Sutte pana paṭivedhova kathito.

**Viññāṇaṃ viññāṇanti** idha kiṃ pucchati? Yena viññāṇena saṅkhāre sammasitvā esa paññavā nāma jāto, tassa āgamanavipassanā viññāṇaṃ kammakārakacittaṃ pucchāmīti pucchati. **Sukhantipi vijānātīti** sukhavedanampi vijānāti. Uparipadadvayepi eseva nayo. Iminā thero “sukhaṃ vedanaṃ vedayamāno sukhaṃ vedanaṃ vedayāmīti pajānāti”ti-ādinā (ma. ni. 1.113; dī. ni. 2.380) nayena āgatavedanāvasena arūpakammaṭṭhānaṃ kathesi. Tassattho satipaṭṭhāne vuttanayeneva veditabbo.

**Saṃsaṭṭhāti** (2.0240) ekuppādādilakkhaṇena saṃyogaṭṭhena saṃsaṭṭhā, udāhu visāsaṭṭhāti pucchati. Ettha ca thero maggapaññaṅca vipassanāviññāṇaṅcāti ime dve lokiyalokuttaradhamme missetvā bhūmantaraṃ bhinditvā samayaṃ ajānanto viya pucchātīti na veditabbo. Maggapaññāya pana maggaviññāṇena, vipassanāpaññāya ca vipassanāviññāṇeneva saddhiṃ saṃsaṭṭhabhāvaṃ pucchātīti veditabbo. Theropissa tamevatthaṃ vissajjento **ime dhammā saṃsaṭṭhā**Ti-ādimāha. Tattha **na ca labbhā imesaṃ dhammānanti** imesaṃ lokiyamaggakkhaṇepi lokuttaramaggakkhaṇepi ekato uppannānaṃ dvinnaṃ dhammānaṃ. **Vinibbhujitvā vinibbhujitvāti** visuṃ visuṃ katvā vinivaṭṭetvā, ārammaṇato vā vatthuto vā uppādato vā nirodhato vā nānākaraṇaṃ dassetuṃ na sakkāti attho. Tesāṃ tesāṃ pana dhammānaṃ visayo nāma atthi. Lokiyadhammaṃ patvā hi cittaṃ jeṭṭhakaṃ hoti pubbaṅgamaṃ, lokuttaraṃ patvā paññā.

Sammāsambuddhopi hi lokiyadhammaṃ pucchanto, “bhikkhu, tvaṃ katamaṃ paññaṃ adhigato, kiṃ paṭhamamaggapaññaṃ, udāhu dutiya tatiya catuttha maggapaññaṃ”ti na evaṃ pucchati. Kiṃ phasso tvaṃ, bhikkhu, kiṃ vedano, kiṃ sañña, kiṃ cetanoti na ca pucchati, cittavasena pana, “kiñcitto tvaṃ, bhikkhū”ti (pārā. 135) pucchati. Kusalākusalaṃ paññaṇentopi “manopubbaṅgamā dhammā, manoseṭṭhā manomayā”ti (dha. pa. 1, 2) ca, “katame dhammā kusalā? Yasmiṃ samaye kāmāvacaraṃ kusalaṃ cittaṃ uppannaṃ hotī”ti (dha. sa. 1) ca evaṃ citta-

vaseneva paññāpeti. Lokuttaraṃ pucchanto pana kiṃ phasso tvaṃ bhikkhu, kiṃ vedano, kiṃ sañño, kiṃ cetanoti na pucchati. Katamā te, bhikkhu, paññā adhigatā, kiṃ paṭhamamaggapaññā, udāhu dutiyatatiyacatutthamaggapaññāti evaṃ paññāvaseneva pucchati.

Indriyaṃyuttepi “pañcimāni, bhikkhave, indriyāni. Katamāni pañca? Saddhindriyaṃ vīriyindriyaṃ satindriyaṃ samādhindriyaṃ paññindriyaṃ. Kattha ca, bhikkhave, saddhindriyaṃ daṭṭhabbaṃ? Catūsu sotāpattiyaṅgesu ettha saddhindriyaṃ daṭṭhabbaṃ. Kattha ca, bhikkhave, vīriyindriyaṃ daṭṭhabbaṃ? Catūsu sammappadhānesu ettha vīriyindriyaṃ daṭṭhabbaṃ. Kattha ca, bhikkhave, satindriyaṃ daṭṭhabbaṃ? Catūsu satipaṭṭhānesu ettha satindriyaṃ daṭṭhabbaṃ. Kattha ca, bhikkhave, samādhindriyaṃ daṭṭhabbaṃ? Catūsu jhānesu ettha samādhindriyaṃ daṭṭhabbaṃ. Kattha ca, bhikkhave, paññindriyaṃ daṭṭhabbaṃ? Catūsu ariyasaccesu ettha paññindriyaṃ (2.0241) daṭṭhabban”ti (saṃ. ni. 5.478). Evaṃ savisayasmimyeva lokiyalokuttarā dhammā kathitā.

Yathā hi cattāro seṭṭhiputtā rājāti rājapañcomesu sahāyesu nakkhattaṃ kiḷissāmāti vīthiṃ otiṇṇesu ekassa seṭṭhiputtassa gehaṃ gatakāle itare cattāro tuṇhī nisīdanti, gehasāmikova, “imesaṃ khādaniyaṃ bhojaniyaṃ detha, gandhamālālaṅkāradīni dethā”ti gehe vicāreti. Dutiyassa tatiyassa catutthassa gehaṃ gatakāle itare cattāro tuṇhī nisīdanti, gehasāmikova, “imesaṃ khādaniyaṃ bhojaniyaṃ detha, gandhamālālaṅkāradīni dethā”ti gehe vicāreti. Atha sabbapacchā rañño gehaṃ gatakāle kiñcāpi rājā sabbattha issarova, imasmiṃ pana kāle attano geheyeva, “imesaṃ khādaniyaṃ bhojaniyaṃ detha, gandhamālālaṅkāradīni dethā”ti vicāreti. Evamevaṃ kho saddhāpañcamakesu indriyesu tesu sahāyesu ekato vīthiṃ otarantesu viya ekārammaṇe uppajjamānesupi yathā paṭhamassa gehe itare cattāro tuṇhī nisīdanti, gehasāmikova vicāreti, evaṃ sotāpattiyaṅgāni patvā adhimokkhalakkhaṇaṃ saddhindriyameva jeṭṭhakaṃ hoti pubbaṅgamaṃ, sesāni tadanvayāni honti. Yathā dutiyassa gehe itare cattāro tuṇhī nisīdanti, gehasāmikova vicāreti, evaṃ sammappadhānāni patvā paggahaṇalakkhaṇaṃ vīriyindriyameva jeṭṭhakaṃ hoti pubbaṅgamaṃ, sesāni tadanvayāni honti. Yathā tatiyassa gehe itare cattāro tuṇhī nisīdanti, gehasāmikova vicāreti, evaṃ satipaṭṭhānāni patvā upaṭṭhānalakkhaṇaṃ satindriyameva jeṭṭhakaṃ hoti pubbaṅgamaṃ, sesāni tadanvayāni honti. Yathā catutthassa gehe itare cattāro tuṇhī nisīdanti, gehasāmikova vicāreti, evaṃ jhānavimokkhe patvā avikkhepalakkhaṇaṃ samādhindriyameva jeṭṭhakaṃ hoti pubbaṅgamaṃ, sesāni tadanvayāni honti. Sabbapacchā rañño gehaṃ



gatakāle pana yathā itare cattāro tuṅhī nisīdanti, rājāva gehe vicāreti, evameva ariyasaccāni patvā pajānanalakkhaṇaṃ paññindriyameva jeṭṭhakaṃ hoti pubbaṅgamaṃ, sesāni tadanvayāni honti.

Iti paṭisambhidāpattānaṃ agge ṭhapito mahākoṭṭhitatthero lokiyadhammaṃ pucchanto cittaṃ jeṭṭhakaṃ cittaṃ pubbaṅgamaṃ katvā pucchi; lokuttara-dhammaṃ pucchanto (2.0242) paññaṃ jeṭṭhakaṃ paññaṃ pubbaṅgamaṃ katvā pucchi. Dhammasenāpatisāriputtattheropi tatheva vissajjesīti.

**Yaṃ hāvuso, pajānātīti** yaṃ catusaccadhammamidaṃ dukkhanti-ādinā nayena maggapaññā pajānāti. **Taṃ vijānātīti** maggaviññāṇampi tatheva taṃ vijānāti. **Yaṃ vijānātīti** yaṃ saṅkhāragataṃ aniccanti-ādinā nayena vipassanāviññāṇaṃ vijānāti. **Taṃ pajānātīti** vipassanāpaññāpi tatheva taṃ pajānāti. **Tasmā ime dhammāti** tena kāraṇena ime dhammā. **Saṃsaṭṭhāti** ekuppāda-ekanirodha-ekavattuka-ekārammaṇatāya saṃsaṭṭhā.

**Paññā bhāvetabbāti** idaṃ maggapaññaṃ sandhāya vuttaṃ. Taṃsāmpayuttaṃ pana viññāṇaṃ tāya saddhiṃ bhāvetabbameva hoti. **Viññāṇaṃ pariññeyyanti** idaṃ vipassanāviññāṇaṃ sandhāya vuttaṃ. Taṃsāmpayuttā pana paññā tena saddhiṃ parijānitabbāva hoti.

**450. Vedanā vedanāti** idaṃ kasmā pucchati? Vedanālakkaṇaṃ pucchissāmīti pucchati. Evaṃ santepi tebhūmikasammasanacāravedanāva adhippetāti sallakkhetabbā. **Sukhampi vedetīti** sukhaṃ ārammaṇaṃ vedeti anubhavati. Parato padadvayepi eseva nayo. “Rūpañca hidaṃ, mahāli, ekantadukkhaṃ abhavissa, dukkhānupatitaṃ dukkhāvakkantaṃ anavakkantaṃ sukkena, nayidaṃ sattā rūpasmimṃ sārājjeyyuṃ. Yasmā ca kho, mahāli, rūpaṃ sukhaṃ sukkhānupatitaṃ sukkhāvakkantaṃ anavakkantaṃ dukkhena, tasmā sattā rūpasmimṃ sārājanti, sārāgā saṃyujjanti, saṃyogā saṃkilissanti. Vedanā ca hidaṃ... saññā... saṅkhārā... viññāṇaṇca hidaṃ, mahāli, ekantadukkhaṃ abhavissa ...pe... saṃkilissanti”-ti (saṃ. ni. 3.70) iminā hi mahālisuttapariyāyena idha ārammaṇaṃ sukhaṃ dukkhaṃ adukkhamasukhanti kathitaṃ. Apica purimaṃ sukhaṃ vedanaṃ ārammaṇaṃ katvā aparā sukhā vedanā vedeti; purimaṃ dukkhaṃ vedanaṃ ārammaṇaṃ katvā aparā dukkhā vedanā vedeti; purimaṃ adukkhamasukhaṃ vedanaṃ ārammaṇaṃ katvā aparā adukkhamasukhā vedanā vedetīti evamettha attho daṭṭhabbo. Vedanāyeva hi vedeti, na añño koci veditā nāma atthīti vuttametam.

**Saññā** (2.0243) **saññāti** idha kiṃ pucchati? Sabbasaññāya lakkhaṇaṃ. Kiṃ sabbatthakasaññāyāti? Sabbasaññāya lakkhaṇantipi sabbatthakasaññāya lakkhaṇantipi ekamevetam, evaṃ santepi tebhūmikasammasanacārasaññāva adhippetāti sallakkhetabbā. **Nilakampi sañjānātīti** nilapupphe vā vatthe vā parikammaṃ katvā upacāraṃ vā appanaṃ vā pāpento sañjānāti. Imasmiñhi atthe parikammasaññāpi upacārasaññāpi appanāsaññāpi vaṭṭati. Nile nilanti uppajjanakasaññāpi vaṭṭatiyeva. **Pitakādīsupi** eseva nayo.

**Yā cāvuso, vedanāti** ettha vedanā, saññā, viññāṇanti imāni tīṇi gahetvā paññā kasmā na gahitāti? Asabbasaṅgāhikattā. Paññāya hi gahitāya paññāya sampayu-

ttāva vedanādayo labbhanti, no vippayuttā. Taṃ pana aggahetvā imesu gahitesu paññāya sampayuttā ca vippayuttā ca antamaso dve pañcaviññāṇadhammāpi labbhanti. Yathā hi tayo purisā suttaṃ suttanti vadeyyuṃ, catuttho ratanāvutasuttanti. Tesu purimā tayo takkagatampi paṭṭivaṭṭakādīgatampi yaṃkiñci bahuṃ suttaṃ labhanti antamaso makkaṭakasuttampi. Ratanāvutasuttaṃ pariyesanto mandaṃ labhati, evaṃsampaadamidaṃ veditabbaṃ. Heṭṭhato vā paññā viññāṇena saddhiṃ sampayogaṃ labhāpitā vissaṭṭhattāva idha na gahitāti vadanti. **Yaṃ hāvuso, vedetīti** yaṃ ārammaṇaṃ vedanā vedeti, saññāpi tadeva sañjānāti. **Yaṃ sañjānāti** Ti yaṃ ārammaṇaṃ saññā sañjānāti, viññāṇampi tadeva vijānātīti attho.

Idāni sañjānāti vijānāti pajānātīti ettha viseso veditabbo. Tattha upasaggamattameva viseso. Jānātīti padaṃ pana aviseso. Tassāpi jānanatthe viseso veditabbo. Saññā hi nilādivasena ārammaṇaṃ sañjānanamattameva, aniccaṃ dukkhaṃ anattāti lakkhaṇapaṭivedhaṃ pāpetuṃ na sakkoti. Viññāṇaṃ nilādivasena ārammaṇaṃ sañjānāti, aniccādīlakkaṇapaṭivedhaṃ pāpeti, ussakkitvā pana maggapātubhāvaṃ pāpetuṃ na sakkoti. Paññā nilādivasena ārammaṇampi sañjānāti, aniccādivasena (2.0244) lakkhaṇapaṭivedhampi pāpeti, ussakkitvā maggapātubhāvaṃ pāpetuṃ sakkoti.

Yathā hi heraññīkaphalake kahāpaṇarāsīmhi kate ajātabuddhi dārako gāmikapuriso mahāheraññīkoti tīsu janesu oloketvā ṭhitesu ajātabuddhi dārako kahāpaṇaṃ cittavicittacaturassamaṇḍalabhāvameva jānāti, idaṃ manussānaṃ upabhogaparibhogaṃ ratanasammatanti na jānāti. Gāmikapuriso cittādībhāvaṃ sañjānāti, manussānaṃ upabhogaparibhogaratanasammatabhāvaṃ. “Ayaṃ kūṭo ayaṃ cheko ayaṃ karato ayaṃ saṅho” ti pana na jānāti. Mahāheraññīko cittādībhāvampi ratanasammatabhāvampi kūṭādībhāvampi jānāti, jānanto ca pana naṃ rūpaṃ disvāpi jānāti, ākoṭitassa saddaṃ sutvāpi, gandhaṃ ghāyitvāpi, rasaṃ sāyitvāpi, hatthena garukalahukabhāvaṃ upadhāretvāpi asukagāme katotipi jānāti, asukanigame asukanagare asukapabbatacchāyāya asukanadītīre katotipi, asukācariyena katotipi jānāti. Evamevaṃ saññā ajātabuddhidārakassa kahāpaṇadaśsaṇaṃ viya nilādivasena ārammaṇamattameva sañjānāti. Viññāṇaṃ gāmikapurissassa kahāpaṇadaśsaṇaṃ viya nilādivasena ārammaṇampi sañjānāti, aniccādivasena lakkhaṇapaṭivedhampi pāpeti. Paññā mahāheraññīkassa kahāpaṇadaśsaṇaṃ viya nilādivasena ārammaṇampi sañjānāti, aniccādivasena lakkhaṇapaṭivedhampi pāpeti, ussakkitvā maggapātubhāvampi pāpeti. So pana nesaṃ viseso duppaṭivijjho.

Tenāha āyasmā nāgaseno- “dukkaraṃ, mahārāja, bhagavatā katanti. Kiṃ, bhante, nāgasena bhagavatā dukkaraṃ katanti? Dukkaraṃ, mahārāja, bhagavatā kataṃ, imesaṃ arūpīnaṃ cittacetāsīkānaṃ dhammānaṃ ekārammaṇe pavattamānānaṃ vavathānaṃ akkhātaṃ, ayaṃ phasso, ayaṃ vedanā, ayaṃ saññā, ayaṃ cetanā, idaṃ cittaṃ” ti (mi. pa. 2.7.16). Yathā hi tilatelaṃ, sāsapatelaṃ, madhukatelaṃ, eraṇḍakatelaṃ, vasātelanti imāni pañca telāni ekacāṭiyaṃ pakkhipitvā divasaṃ yamakamanthehi manthetvā tato idaṃ tilatelaṃ, idaṃ sāsapatelanti ekekassa pāṭiyekkaṃ uddharaṇaṃ nāma dukkaraṃ, idaṃ tato (2.0245) dukkarataraṃ.

Bhagavā pana sabbaññutaññāṇassa suppaṭividdhattā dhammissaro dhammarājā imesaṃ arūpīnaṃ dhammānaṃ ekārammaṇe pavattamānānaṃ vavatthānaṃ akkhāsi. Pañcannaṃ mahānadīnaṃ samuddaṃ pavatthattāne, “idaṃ gaṅgāya udakaṃ, idaṃ yamunāyā”ti evaṃ pāṭiyekkaṃ udaka-uddharaṇenāpi ayamattho veditabbo.

**451. Nissatthenā** Ti nissatena pariccattena vā. Tattha **nissatthenā**ti atthe sati pañcahi indriyehīti nissakkavacanaṃ. **Pariccattena**ti atthe sati karaṇavacanaṃ veditabbaṃ. Idaṃ vuttaṃ hoti- pañcahi indriyehi nissaritvā manodvāre pavattena pañcahi vā indriyehi tassa vatthubhāvaṃ anupagamanatāya pariccattena. **Parisuddhenā**ti nirupakkilesena. **Manoviññāṇenā**ti rūpāvacaracattutthajjhānacittena. **Kim neyyanti** kiṃ jānitabbaṃ. “Yaṃkiñci neyyaṃ nāma atthi dhamman”ti-ādīsu (mahāni. 69) hi jānitabbaṃ neyyanti vuttaṃ. **Ākāsānañcāyatanaṃ neyyanti** kathaṃ rūpāvacaracattutthajjhānacittena arūpāvacarasamāpatti neyyāti? Rūpāvacaracattutthajjhāne ṭhitena arūpāvacarasamāpattiṃ nibbattetuṃ sakkā hoti. Ettha ṭhitassa hi sā ijhati. Tasmā “ākāsānañcāyatanaṃ neyyan”ti-ādīmāha. Atha nevasaññānañcāyatanaṃ kasmā na vuttanti? Pāṭiyekkaṃ abhinivesābhāvato. Tattha hi kalāpato nayato sammāsanaṃ labbhati, dhammasenāpatisadisassāpi hi bhikkhuno pāṭiyekkaṃ abhiniveso na jāyati. Tasmā theropi, “evaṃ kirame dhammā ahutvā sambhonti, hutvā paṭiventī”ti (ma. ni. 3.94) kalāpato nayato sammāsitvā vissajjesīti. Bhagavā pana sabbaññutaññāṇassa hatthagatattā nevasaññānañcāyatana-samāpattiyampi paropaññāsa dhamme pāṭiyekkaṃ aṃguddhāreneva uddharitvā, “yāvata saññāsamāpattiyo, tāvatā aññāpaṭivedho”ti āha.

**Paññācakkhunā pajānāti**ti dassanapariṇāyakaṭṭhena cakkhubhūtāya paññāya pajānāti. Tattha dve paññā samādhipaññā vipassanāpaññā ca. Samādhipaññāya kiccato asammoḥato ca pajānāti. Vipassanāpaññāya lakkhaṇapaṭivedhena ārammaṇato jānanaṃ kathitaṃ. **Kimatthiyāti** ko etissā attho. **Abhiññatthāti**-ādīsu abhiññeyye dhamme abhijānāti (2.0246) **abhiññatthā**. Pariññeyye dhamme pari-jānāti **pariññatthā**. Pahātabbe dhamme pajahatīti **pahānatthā**. Sā panesā lokiyāpi abhiññatthā ca pariññatthā ca vikkhambhanato pahānatthā. Lokuttarāpi abhiññatthā ca pariññatthā ca samucchato pahānatthā. Tattha lokiyā kiccato asammoḥato ca pajānāti, lokuttarā asammoḥato.

**452. Sammādiṭṭhiyā uppādāyāti** vipassanāsamamādiṭṭhiyā ca maggasammādiṭṭhiyā ca. **Parato ca ghoṣoti** sappāyadhammassavanaṃ. **Yoniso ca manasikāro** Ti attano upāyamanasikāro. Tattha sāvakesu api dhammasenāpatino dve paccayā laddhuṃ vaṭṭantiyeva. Thero hi kappasatasahassādhikaṃ ekaṃ asaṅkhyeyyaṃ pāramiyo pūretvāpi attano dhammatāya aṇumattampi kilesaṃ pajahitūṃ nāsakkhi. “Ye dhammā hetuppabhavā”ti (mahāva. 60) assajittherato imaṃ gāthaṃ sutvāvassa paṭivedho jāto. Paccekabuddhānaṃ pana sabbaññubuddhānaṃca paratoghosakammaṃ natthi, yonisomanasikārasmiṃyeva ṭhatvā paccekabodhiṃca sabbaññutaññāṇaṃca nibbattenti.

**Anuggahitāti** laddhūpakārā. **Sammādiṭṭhīti** arahattamaggasammādiṭṭhi. Phala-kkaṇe nibbattā cetovimutti phalaṃ assāti **cetovimutti phalā**. Tadeva cetovimuttisa-

ñkhātaṃ phalaṃ ānisaṃso assāti cetovimuttiphalañisaṃsā. Dutiyapadepi eseva nayo. Ettha ca catutthaphalapaññā paññāvimutti nāma, avasesā dhammā cetovimuttīti veditabbā. **Sīlānuggahitā**ti-ādīsu **sīlanti** catupārisuddhisīlaṃ. **Sutanti** sappāyadhammassavanaṃ. **Sākacchā**ti kammaṭṭhāne khalanapakkkhalanacchedana-kathā. **Samathoti** vipassanāpādikā aṭṭha samāpattiyo. **Vipassanā**ti sattavidhā anupassanā. Catupārisuddhisīlañhi pūrentassa, sappāyadhammassavanaṃ suṇantassa, kammaṭṭhāne khalanapakkkhalanaṃ chindantassa, vipassanāpādikāsu aṭṭhasamāpattīsu kammaṃ karontassa, sattavidhaṃ anupassanaṃ bhāventassa arahattamaggo uppajjitvā phalaṃ deti.

Yathā hi madhuraṃ ambapakkaṃ paribhuñjitukāmo ambapotakassa samantā udakakoṭṭhakaṃ thiraṃ katvā bandhati. Ghaṭaṃ gahetvā kālena kālaṃ udakaṃ āsiñcati. Udakassa anikkhamanattaṃ mariyādaṃ thiraṃ karoti. Yā hoti (2.0247) samīpe valli vā sukkhadaṇḍako vā kipillikapuṭo vā makkaṭakajālaṃ vā, taṃ apāneti. Khaṇittim gahetvā kālena kālaṃ mūlāni parikhaṇati. Evamassa appamattassa imāni pañca kāraṇāni karoto so ambo vaḍḍhitvā phalaṃ deti. Evaṃsappādamidaṃ veditabbaṃ. Rukkhasa samantato koṭṭhakabandhanaṃ viya hi sīlaṃ daṭṭhabbaṃ, kālena kālaṃ udakasiñcanaṃ viya dhammassavanaṃ, mariyādāya thirabhāvakaraṇaṃ viya samatho, samīpe valli-ādīnaṃ haraṇaṃ viya kammaṭṭhāne khalanapakkkhalanacchedanaṃ, kālena kālaṃ khaṇittim gahetvā mūlakhaṇanaṃ viya sattannaṃ anupassanānaṃ bhāvanā. Tehi pañcahi kāraṇehi anuggahitassa ambarukkhasa madhuraphaladānakālo viya imassa bhikkhuno imehi pañcahi dhammehi anuggahitāya sammādiṭṭhiyā arahattaphaladānaṃ veditabbaṃ.

**453. Kati panāvuso, bhavā**ti idha kiṃ pucchati? Mūlameva gato anusandhi, duppañño yehi bhavehi na uṭṭhāti, te pucchissāmīti pucchati. Tattha **kāmabhavoti** kāmabhavūpagaṃ kammaṃ kammābhiniḃbattā upādinnakkhandhāpīti ubhayamekato katvā kāmabhavoti āha. Rūpārūpabhavesupi eseva nayo. **Āyatinti** anāgate. Punabbhavassa abhiniḃbattīti **punabbhavābhiniḃbatti**. Idha vaṭṭaṃ

pucchissāmīti pucchati. **Tatrātatrābhinandanā**ti rūpābhinandanā saddābhinanda-  
nāti evaṃ taḥiṃ taḥiṃ abhinandanā, karaṇavacane cetaṃ paccattaṃ. Tatrātatrā-  
bhinandanāya punabbhavābhinibbatti hotīti attho. Ettāvata hi gamanaṃ hoti, āga-  
manaṃ hoti, gamanāgamanaṃ hoti, vaṭṭaṃ vattatīti vaṭṭaṃ matthakaṃ pāpetvā  
dassesī. Idāni vivaṭṭaṃ pucchanto “kathaṃ panāvuso”ti-ādīmāha. Tassa vissa-  
jjane **avijjāvirāgā**ti avijjāya khayanirodhena. **Vijjuppādā**ti arahattamaggavijjāya  
uppādena. Kiṃ avijjā pubbe niruddhā, atha vijjā pubbe uppānāti? Ubhayametaṃ  
na vattabbaṃ. Padīpujjalanena andhakāravigamo viya vijjuppādena avijjā niru-  
ddhāva hoti. **Taṇhānirodhā**ti taṇhāya khayanirodhena. **Punabbhavābhinibbatti na**  
**hotīti** evaṃ āyatīṃ punabbhavassa abhinibbatti na hoti, gamanaṃ āgamanaṃ  
gamanāgamanaṃ upacchijjati, vaṭṭaṃ na vattatīti vivaṭṭaṃ matthakaṃ pāpetvā  
dassesī.

**454. Katamaṃ panāvusoti** idha kiṃ pucchati? Ubhatobhāgavimutto bhikkhu  
kālena kālaṃ nirodhaṃ samāpajjati. Tassa nirodhapādakaṃ paṭhamajjhānaṃ  
pucchissāmīti pucchati. **Paṭhamaṃ jhānanti** idha kiṃ pucchati? Nirodhaṃ samāpa-  
jjanakena (2.0248) bhikkhunā aṅgavavattānaṃ koṭṭhāsaparicchedo nāma jāni-  
tabbo, idaṃ jhānaṃ pañcaṅgikaṃ caturaṅgikaṃ tivaṅgikaṃ duvaṅgikanti aṅgava-  
vattānaṃ koṭṭhāsaparicchedaṃ pucchissāmīti pucchati. **Vitakkoti-ādīsu** pana  
abhiniropanalakkhaṇo vitakko, anumajjanalakkhaṇo vicāro, pharaṇalakkhaṇā pīti,  
sātalakkhaṇaṃ sukhaṃ, avikkhepalakkhaṇā cittekaggatāti ime pañca dhammā  
vattanti. **Kataṅgavippahīnanti** idha pana kiṃ pucchati? Nirodhaṃ samāpajjana-  
kena bhikkhunā upakārānupakārāni aṅgāni jānitabbāni, tāni pucchissāmīti  
pucchati, vissajjanaṃ panettha pākaṭameva. Iti heṭṭhā nirodhapādakaṃ paṭhama-  
jjhānaṃ gahitaṃ, upari tassa anantarapaccayaṃ nevasaññānāsaññāyatanaṃ samā-  
pattiṃ pucchissati. Antarā pana cha samāpattiyo saṃkhittā, nayaṃ vā dassetvā  
vissaṭṭhāti veditabbā.

**455.** Idāni viññāṇanissaye pañca pasāde pucchanto **pañcimāni, āvusoti-ādi-**  
**māha.** Tattha **gocaravisayanti** gocarabhūtaṃ visayaṃ. **Aññamaññassāti** cakkhu  
sotassa sotaṃ vā cakkhussāti evaṃ ekekassa gocaravisayaṃ na paccanubhoti.  
Sace hi nīlādibhedāṃ rūpārammaṇaṃ samodhānetvā sotindriyassa upaneyya,  
“iṅgha tāva naṃ vavattapehi vibhāvehi, kiṃ nāmetaṃ ārammaṇaṃ”ti. Cakkhuvī-  
ññāṇaṃhi vināpi mukhena attano dhammatāya evaṃ vadeyya- “are andhabāla,  
vassasatampi vassasahassampi paridhāvamaṇo aññatra mayā kuhiṃ etassa jāna-  
nakaṃ labhissasi, āhara naṃ cakkhupasāde upanehi, ahametaṃ ārammaṇaṃ  
jānissāmi, yadi vā nīlaṃ yadi vā pītakaṃ, na hi eso aññassa visayo, mayheveso  
visayo”ti. Sesadvāresupi eseva nayo. Evametāni aññamaññassa gocaraṃ  
visayaṃ na paccanubhonti nāma. **Kiṃ paṭisaraṇanti** etesaṃ kiṃ paṭisaraṇaṃ, kiṃ  
etāni paṭisaraṇatīti pucchati. **Mano paṭisaraṇanti** javanamano paṭisaraṇaṃ. **Mano ca**  
**nesanti** manodvārikajavanamano vā pañcadvārikajavanamano vā etesaṃ goca-  
ra-visayaṃ rajjanādivasena anubhoti. Cakkhuvīññāṇaṃhi rūpadassanamattameva,  
ettha rajjanaṃ vā dussanaṃ vā muyhanaṃ vā natthi. Etasmiṃ pana dvāre  
javanaṃ rajjati vā dussati vā muyhati vā. Sotaviññāṇādīsipi eseva nayo.

Tatrāyaṃ upamā- pañca kira dubbalabhojakā rājānaṃ sevitvā kicchena kasi-  
rena ekasmiṃ pañcakulike gāme parittakaṃ āyaṃ labhiṃsu. Tesam tattha (2.0249)  
macchabhāgo maṃsabhāgo yuttikahāpaṇo vā, bandhakahāpaṇo vā, māpahāraka-  
hāpaṇo vā, aṭṭhakahāpaṇo vā, soḷasakahāpaṇo vā, bāttiṃsakahāpaṇo vā, catusa-  
ṭṭhikahāpaṇo vā, daṇḍoti ettakamattameva pāpuṇāti. Satavatthukaṃ pañcasatava-  
tthukaṃ saḥassavatthukaṃ mahābaliṃ rājāva gaṇhāti. Tattha pañcakulikagāmo  
viya pañca pasādā daṭṭhabbā; pañca dubbalabhojakā viya pañca viññāṇāni; rājā  
viya javanaṃ; dubbalabhojakānaṃ parittakaṃ āyapāpuṇanaṃ viya cakkhuvīññā-  
ṇādīnaṃ rūpadassanādimmattam. Rajjanādīni pana etesu natthi. Rañño mahābali-  
ggahaṇaṃ viya tesu dvāresu javanassa rajjanādīni veditabbāni.

**456. Pañcimāni, āvusoti idha kiṃ pucchati?** Antonirodhasmiṃ pañca pasāde.  
Kiriyaṃ mayapavattasmiñhi vattamāne arūpadhammā pasādānaṃ balavapaccayā  
honti. Yo pana taṃ pavattaṃ nirodhetvā nirodhasamāpattiṃ samāpanno, tassa  
antonirodhe pañca pasādā kiṃ paṭicca tiṭṭhantīti idaṃ pucchissāmīti pucchati. **Āyuṃ  
paṭiccāti** jīvitindriyaṃ paṭicca tiṭṭhanti. **Usmaṃ paṭiccāti** jīvitindriyaṃ kammajatejaṃ  
paṭicca tiṭṭhanti. Yasmā pana kammajatejopi jīvitindriyena vinā na tiṭṭhanti, tasmā  
“usmā āyuṃ paṭicca tiṭṭhanti”ti āha. **Jhāyatoti** jalato. **Acciṃ paṭiccāti** jālasikhaṃ  
paṭicca. **Ābhā paññāyatīti** āloko nāma paññāyati. **Ābhaṃ paṭicca accīti** taṃ ālokaṃ  
paṭicca jālasikhā paññāyati.

**Evameva kho, āvuso, āyu usmaṃ paṭicca tiṭṭhatīti** ettha jālasikhā viya kammaja-  
tejo. Āloko viya jīvitindriyaṃ. Jālasikhā hi uppajjamānā ālokaṃ gahetvāva uppa-  
jjati. Sā tena attanā janita-ālokeneva sayampi aṇu thūlā dīghā rassāti pākaṭā hoti.  
Tattha jālapavattiyā janita-ālokena tassāyeva jālapavattiyā pākaṭabhāvo viya  
usmaṃ paṭicca nibbattena kammajamahābhūtasambhavena jīvitindriyena  
usmāya anupālanam. Jīvitindriyañhi dasapi vassāni ...pe... vassasatampi kamma-  
jatejapavattam pāleti. Iti mahābhūtāni upādārūpanam nissayapaccayādivasena  
paccayāni hontīti āyu usmaṃ paṭicca tiṭṭhanti. Jīvitindriyaṃ (2.0250) mahābhūtāni  
pāletīti usmā āyuṃ paṭicca tiṭṭhatīti veditabbā.

**457. Āyusañkhārā** Ti āyumeva. **Vedaniyā dhammāti** vedanā dhammāva.  
**Vuṭṭhānaṃ paññāyatīti** samāpattito vuṭṭhānaṃ paññāyati. Yo hi bhikkhu arūpapa-  
vatte ukkaṇṭhitvā saññaṅca vedanaṅca nirodhetvā nirodhaṃ samāpanno, tassa  
yathāparicchinna-kālavasena rūpajīvitindriyapaccayā arūpadhammā uppajjanti.  
Evaṃ pana rūpārūpapavattam pavattati. Yathā kiṃ? Yathā eko puriso jālapavatte  
ukkhaṇṭhito udakena paharivā jālam appavattam katvā chārikāya aṅgāre pidhāya  
tuṅhī nisīdati. Yadā panassa puna jālāya attho hoti, chārikaṃ apanetvā aṅgāre  
parivattetvā upādānaṃ datvā mukhavātam vā tālavaṇṭavātam vā dadāti. Atha jāla-  
pavattam puna pavattati. Evameva jālapavattam viya arūpadhammā. Purisassa  
jālapavatte ukkaṇṭhitvā udakappahārena jālam appavattam katvā chārikāya  
aṅgāre pidhāya tuṅhībhūtassa nisajjā viya bhikkhuno arūpapavatte ukkaṇṭhitvā  
saññaṅca vedanaṅca nirodhetvā nirodhasamāpajjanaṃ. Chārikāya pihita-aṅgārā  
viya rūpajīvitindriyaṃ. Purisassa puna jālāya atthe sati chārikāpanayanādīni viya  
bhikkhuno yathāparicchinna-kālapagamaṃ. Aggijālāya pavatti viya puna arūpa-

dhammesu uppannesu rūpārūpapavatti veditabbā.

**Āyu usmā ca viññāṇanti** rūpajīvitindriyaṃ, kammajatejodhātu, cittanti ime tayo dhammā yadā imaṃ rūpakāyaṃ jahanti, athāyaṃ acetanaṃ kaṭṭhaṃ viya pathaviyaṃ chaḍḍito setīti attho. Vuttañcetaṃ-

“Āyu usmā ca viññāṇaṃ, yadā kāyaṃ jahantimaṃ;

apaviddho tadā seti, parabhattaṃ acetanaṃ” ti. (saṃ. ni. 3.95);

**Kāyasaṅkhārā**ti assāsapassāsā. **Vacīsaṅkhārā**ti vitakkavicārā. **Cittasaṅkhārā**ti saññāvedanā. **Āyū**ti rūpajīvitindriyaṃ. **Paribhinnānī**ti upahatāni, vinaṭṭhānīti attho. Tattha keci “nirodhasamāpannassa cittasaṅkhārāva niruddhā”ti vacanato cittaṃ aniruddhaṃ hoti, tasmā sacittakā ayaṃ samāpattīti vadanti. Te vattabbā- “vacīsaṅkhārāpissa niruddhā”ti vacanato vācā aniruddhā hoti, tasmā nirodhaṃ samāpannena dhammampi kathentena sajjhāyampi (2.0251) karontena nisīditabbaṃ siyā. “Yo cāyaṃ mato kālaṅkato, tassāpi cittasaṅkhārā niruddhā”ti vacanato cittaṃ aniruddhaṃ bhavēyya, tasmā kālaṅkate mātāpitaro vā arahante vā jhāpayantena anantariyakammaṃ kataṃ bhavēyya. Iti byañjane abhinivesaṃ akatvā ācariyānaṃ naye ṭhatvā attho upaparikkhitabbo. Attho hi paṭisaraṇaṃ, na byañjanaṃ.

**Indriyāni vipprasannānī**ti kiriyamayapavattasmiñhi vattamāne bahiddhā ārammaṇesu pasāde ghaṭṭentesu indriyāni kilamantāni upahatāni makkhitāni viya honti, vātādīhi uṭṭhitena rajena catumahāpathe ṭhapita-ādāso viya. Yathā pana thavikāyaṃ pakkhipitvā mañjūsādīsu ṭhapito ādāso antoyeva virocāti, evaṃ nirodhaṃ samāpannassa bhikkhuno antonirodhe pañca pasādā ativirocanti. Tena vuttaṃ “indriyāni vipprasannānī”ti.

**458. Kati panāvuso, paccayāti** idha kiṃ pucchati? Nirodhassa anantarapaccayaṃ nevasaññānāsaññāyatanaṃ pucchissāmīti pucchati. Vissajjane panassa **sukhassa ca pahānāti** cattāro apagamanapaccayā kathitā. **Animittāyāti** idha kiṃ pucchati? Nirodhato vuṭṭhānakaphalasaṃpattīti pucchissāmīti pucchati. Avasesasaṃpattivuṭṭhānañhi bhavaṅgena hoti, nirodhā vuṭṭhānaṃ pana vipassanāni-ssandāya phalasaṃpattiyāti tameva pucchati. **Sabbanimittānanti** rūpādīnaṃ sabbārammaṇānaṃ. **Animittāya ca dhātuyā manasikāro**ti sabbanimittāpagatāya nibbānadhātuyā manasikāro. Phalasaṃpattisahajātaṃ manasikāraṃ sandhāyāha. Iti heṭṭhā nirodhapādakaṃ paṭhamajjhānaṃ gahitaṃ, nirodhassa anantarapaccayaṃ nevasaññānāsaññāyatanaṃ gahitaṃ, idha nirodhato vuṭṭhānakaphalasaṃpattīti gahitāti.

Imasmīti ṭhāne nirodhakathā kathetabbā hoti. Sā, “dvīhi balehi samannāgatattā tayo ca saṅkhārānaṃ paṭippassaddhiyā soḷasahi ñāṇacariyāhi navahi samādhicariyāhi vasībhāvatāpaññā nirodhasamāpattiyā ñāṇaṃ”ti evaṃ paṭisambhidāmagge (paṭi. ma. 1.83) āgatā. **Visuddhimagge** Panassā sabbākārena vinicchayakathā kathitā.

Idāni (2.0252) valañjanasaṃpattīti pucchanto **kati panāvuso, paccayāti**-ādī māha. Nirodhato hi vuṭṭhānakaphalasaṃpattiyā ṭhiti nāma na hoti, ekaṃ dve citta-vārameva pavattitvā bhavaṅgaṃ otarati. Ayañhi bhikkhu satta divase arūpavattaṃ nirodhetvā nisinno nirodhavuṭṭhānakaphalasaṃpattiyā na ciraṃ tiṭṭhati.

Valañjanasamāpattiyam pana addhānaparicchedova pamāṇam. Tasmā sā ṭhiti nāma hoti. Tenāha- “animittāya cetovimuttiyā ṭhitiyā”ti. Tassā ciratṭhitattham kati paccayāti attho. Vissajjane panassā **pubbe ca abhisankhāro**ti addhānaparicchedo vutto. **Vuṭṭhānāyāti** idha bhavaṅgavuṭṭhānam pucchati. Vissajjanepissā **sabbanimittānañca manasikāro**ti rūpādinimittavasena bhavaṅgasahajātamanasikāro vutto.

**459. Yā cāyam, āvusoti** idha kiṃ pucchati? Idha aññam abhinavam nāma natthi. Heṭṭhā kathitadhammeyeva ekato samodhānetvā pucchāmīti pucchati. Kattha pana te kathitā? “Nīlampi sañjānāti pītakampi, lohītakampi, odātakampi sañjānāti”ti (ma. ni. 1.450) etasmiñhi ṭhāne appamāṇā cetovimutti kathitā. “Natthi kiñcīti ākiñcaññāyatananti neyyan”ti (ma. ni. 1.451) ettha ākiñcaññam. “Paññācakkhunā pajānāti”ti (ma. ni. 1.451) ettha suññatā. “Kati panāvuso, paccayā animittāya cetovimuttiyā ṭhitiyā vuṭṭhānāyā”ti ettha animittā. Evaṃ heṭṭhā kathitāva imasmim ṭhāne ekato samodhānetvā pucchati. Tam pana paṭikkhipitvā etā tasmim tasmim ṭhāne niddiṭṭhāvāti vatvā aññe cattāro dhammā ekanāmakā atthi. Eko dhammo catunāmako atthi, etaṃ pākaṭam katvā kathāpetum idha pucchati aṭṭha-kathāyam sannitṭhānam kataṃ. Tassā vissajjane **ayam vuccatāvuso, appamāṇā cetovimuttīti** ayam pharaṇa-appamāṇatāya appamāṇā nāma. Ayañhi appamāṇe vā satte pharati, ekasmimpi vā satte asesetvā pharati.

**Ayam vuccatāvuso, ākiñcaññāti** ārammaṇakiñcanassa abhāvato ākiñcaññā. **Attena vāti** atta bhāvaposapuggalādīsankhātena attena suññam. **Attaniyena vāti** cīvarādīparikkhārasankhātena attaniyena suññam. **Animittāti** (2.0253) rāganimittā-dīnam abhāveneva animittā, arahattaphalāsamāpattim sandhāyāha. **Nānatthā ceva nānābyañjanā cāti** byañjanampi nesaṃ nānā



atthopi. Tattha byañjanassa nānatā pākaṭāva. Attho pana, appamāṇā cetovimutti bhūmantarato mahaggatā eva hoti rūpāvacarā; ārammaṇato satta paññatti-ārammaṇā. Ākiñcaññā bhūmantarato mahaggatā arūpāvacarā; ārammaṇato na vattabbārammaṇā. Suññatā bhūmantarato kāmāvacarā; ārammaṇato saṅkhārārammaṇā. Vipassanā hi ettha suññatāti adhippetā. Animittā bhūmantarato lokuttarā; ārammaṇato nibbanārammaṇā.

**Rāgo kho, āvuso, pamāṇakaraṇoti**-ādīsu yathā pabbatapāde pūtipaṇṇarasa-udakaṃ nāma hoti kāḷavaṇṇaṃ; oloketānaṃ byāmasatagambhīraṃ viya khāyati. Yaṭṭhiṃ vā rajjuṃ vā gahetvā minantassa piṭṭhipādottharaṇamattampi na hoti. Eva-mevaṃ yāva rāgādayo nuppajjanti, tāva puggalaṃ sañjānituṃ na sakkā honti, sotāpanno viya, sakadāgāmī viya, anāgāmī viya ca khāyati. Yadā panassa rāgādayo uppajjanti, tadā ratto duṭṭho mūḷhoti paññāyati. Iti ete “ettako ayan”ti puggalassa pamāṇaṃ dassento viya uppajjantīti pamāṇakaraṇā nāma vuttā. **Yāvatā kho, āvuso, appamāṇā cetovimuttiyoti** yattakā appamāṇā cetovimuttiyo. Kittakā pana tā? Cattāro brahmavihārā, cattāro maggā, cattāri ca phalānīti dvādasa. Tattha brahmavihārā pharaṇa-appamāṇatāya appamāṇā. Sesā pamāṇakaraṇānaṃ kilesānaṃ abhāvena appamāṇā. Nibbānampi appamāṇameva, cetovimutti pana na hoti, tasmā na gahitaṃ. **Akuppāti** arahattaphalacetovimutti; sā hi tāsamaṃ sabbajeṭṭhikā, tasmā aggamakkhāyatīti vuttā. **Rāgo kho, āvuso, kiñcanoti** rāgo uppajjitvā puggalaṃ kiñcati maddati palibundhati. Tasmā kiñcanoti vutto. Manussā kira goṇehi khalaṃ maddāpento kiñcehi kapila, kiñcehi kāḷakāti vadanti. Evaṃ maddanatto kiñcanatthoti veditabbo. Dosamohesupi eseva nayo. **Ākiñcaññā cetovimuttiyo** nāma nava dhammā ākiñcaññāyatanañca maggaphalāni ca. Tattha ākiñcaññāyatanaṃ (2.0254) kiñcanaṃ ārammaṇaṃ assa natthīti ākiñcaññaṃ. Maggaphalāni kiñcanānaṃ maddanānaṃ palibundhanakilesānaṃ natthitāya ākiñcaññāni. Nibbānampi ākiñcaññaṃ, cetovimutti pana na hoti, tasmā na gahitaṃ.

**Rāgo kho, āvuso, nimittakaraṇoti**-ādīsu yathā nāma dvinnaṃ kulānaṃ sadisā dve vacchakā honti. Yāva tesamaṃ lakkhaṇaṃ na kataṃ hoti, tāva “ayaṃ asukaku-lassa vacchako, ayaṃ asukakulassā”ti na sakkā honti jānituṃ. Yadā pana tesamaṃ sattisūlādīsu aññataraṃ lakkhaṇaṃ kataṃ hoti, tadā sakkā honti jānituṃ. Eva-meva yāva puggalassa rāgo nuppajjati, tāva na sakkā hoti jānituṃ ariyo vā puthujjano vāti. Rāgo panassa uppajjamānova sarāgo nāma ayaṃ puggaloti sañjānana-nimittaṃ karonto viya uppajjati, tasmā “nimittakaraṇo”ti vutto. Dosamohesupi eseva nayo.

**Animittā cetovimutti** nāma terasa dhammā- vipassanā, cattāro āruppā, cattāro maggā, cattāri ca phalānīti. Tattha vipassanā niccanimittaṃ sukhanimittaṃ attanimittaṃ ugghāṭetīti animittā nāma. Cattāro āruppā rūpanimittassa abhāvena animittā nāma. Maggaphalāni nimittakaraṇānaṃ kilesānaṃ abhāvena animittāni. Nibbānampi animittameva, taṃ pana cetovimutti na hoti, tasmā na gahitaṃ. Atha kasmā suññatā cetovimutti na gahitāti? Sā, “suññā rāgenā”ti-ādivacanato sabbattha anupaviṭṭhāva, tasmā visuṃ na gahitā. **Ekatthāti** ārammaṇavasena ekatthā. Appamāṇaṃ ākiñcaññaṃ suññataṃ animittanti hi sabbānetāni nibbāna-

sseva nāmāni. Iti iminā pariyāyena ekatthā. Aññasmiṃ pana ṭhāne appamāṇā honti, aññasmiṃ ākiñcaññā aññasmiṃ suñnatā aññasmiṃ animittāti iminā pariyāyena nānābyañjanā. Iti thero yathānusandhināva desanaṃ niṭṭhapesīti.

Papañcasūdaniyā majjhimanikāyaṭṭhakathāya

Mahāvedallasuttavaṇṇanā niṭṭhitā.

#### 4. Cūḷavedallasuttavaṇṇanā

**460. Evaṃ (2.0255) me sutanti cūḷavedallasuttaṃ. Tattha visākho upāsakoti visākho** Ti evaṃnāmako upāsako. **Yena dhammadinnā** ti yena dhammadinnā nāma bhikkhunī tenupasaṅkami. Ko panāyaṃ visākho? Kā dhammadinnā? Kasmā upasaṅkamīti? Visākho nāma dhammadinnāya gihikāle gharasāmiko. So yadā bhagavā sammāsambodhiṃ abhisambujjhivā pavattavaradhammacakko yasādayo kulaputte vinetvā uruvelaṃ patvā tattha jaṭilasahassaṃ vinetvā purāṇajaṭilehi khīṇāsavabhikkhūhi saddhiṃ rājagahaṃ gantvā buddhadassanattaṃ dvādasanahutāya parisāya saddhiṃ āgatassa bimbisāramahārājassa dhammaṃ desesi. Tadā raññā saddhiṃ āgatesu dvādasanahutesu ekaṃ nahutaṃ upāsakattaṃ paṭivedesi, ekādasa nahutāni sotāpattiphale paṭiṭṭhahiṃsu saddhiṃ raññā bimbisārena. Ayaṃ upāsako tesāṃ aññataro, tehi saddhiṃ paṭhamadassaneva sotāpattiphale paṭiṭṭhāya, puna ekadivasaṃ dhammaṃ sutvā sakadāgāmiphalaṃ patvā, tato aparabhāgepi ekadivasaṃ dhammaṃ sutvā anāgāmiphale paṭiṭṭhito. So anāgāmī hutvā gehaṃ āgacchanto yathā aññesu divasesu ito cito ca olokento sitaṃ kurumāno āgacchati, evaṃ anāgantvā santindriyo santamānaso hutvā agamāsi.

Dhammadinnā sīhapañjaraṃ ugghāṭetvā vīthiṃ olokayamānā tassa āgamanā-kāraṃ disvā, “kiṃ nu kho etan” ti cintetvā tassa paccuggamaṃ kurumānā sopānasīse ṭhatvā olambanattaṃ hatthaṃ pasāresi. Upāsako attano hatthaṃ samīñjesi. Sā “pātarāsabhojanakāle jānissāmī” ti cintesi. Upāsako pubbe tāya saddhiṃ ekato bhuñjati. Taṃ divasaṃ pana taṃ anapaloketvā yogāvacarabhikkhu viya ekakova bhuñji. Sā, “sāyanhakāle jānissāmī” ti cintesi. Upāsako taṃdivasaṃ siri-gabbhaṃ na pāvīsi, aññaṃ gabbhaṃ paṭijaggāpetvā kappiyamañcakaṃ paññāpāpetvā nipajji. Upāsikā, “kiṃ nu khvassa bahiddhā patthanā atthi, udāhu kenaci-deva paribhedakena bhinno, udāhu mayheva koci doso atthi” ti balavadomanassā (2.0256) hutvā, “ekaṃ dve divase vasitakāle sakkā ñātun” ti tassa upaṭṭhānaṃ gantvā vanditvā aṭṭhāsi.

Upāsako, “kiṃ dhammadinne akāle āgatāsī” ti pucchi. Āma ayyaputta, āgatāmihi, na tvaṃ yathā purāṇo, kiṃ nu te bahiddhā patthanā atthīti? Natthi dhammadinneti. Añño koci paribhedako atthīti? Ayampi natthīti. Evaṃ sante mayheva koci

doso bhavissatīti. Tuyhampi doso natthīti. Atha kasmā mayā saddhiṃ yathā pakatiyā ālāpasallāpamattampi na karothāti? So cintesi- “ayaṃ lokuttaradhammo nāma garu bhāriyo na pakāsetatabbo, sace kho panāhaṃ na kathessāmi, ayaṃ hadayaṃ phāletvā ettheva kālaṃ kareyyā”ti tassānuggahatthāya kathesi- “dhammadinne ahaṃ satthu dhammadesanaṃ sutvā lokuttaradhammaṃ nāma adhigato, taṃ adhigatassa evarūpā lokiyakiriyā na vaṭṭati. Yadi tvaṃ icchasi, tava cattālīsa koṭiyo mama cattālīsa koṭiyoti asītikoṭidhanaṃ atthi, ettha issarā hutvā mama mātiṭṭhāne vā bhaginiṭṭhāne vā ṭhatvā vasa. Tayā dinnena bhattapiṇḍamattakena ahaṃ yāpessāmi. Athevaṃ na karosi, ime bhoge gahetvā kulagehaṃ gaccha, athāpi te bahiddhā patthanā natthi, ahaṃ taṃ bhaginiṭṭhāne vā dhituṭṭhāne vā ṭhapetvā posessāmī”ti.

Sā cintesi- “pakatipuriso evaṃ vattā nāma natthi. Addhā etena lokuttaravara-dhammo paṭividdho. So pana dhammo kiṃ puriseheva paṭibujjhatabbo, udāhu mātugāmopi paṭivijjhitaṃ sakkoti”ti visākhā etadavoca- “kiṃ nu kho eso dhammo puriseheva labhatabbo, mātugāmenapi sakkā laddhun”ti? Kiṃ vadesi dhammadinne, ye paṭipannakā, te etassa dāyādā, yassa yassa upanissayo atthi, so so etaṃ paṭilabhatīti. Evaṃ sante mayhaṃ pabbajjaṃ anujānāthāti. Sādhū bhaddo, ahampi taṃ etasmimyeva magge yojetukāmo, manaṃ pana te ajāna-māno na kathamīti tāvadeva bimbisārassa rañño santikaṃ gantvā vanditvā aṭṭhāsi.

Rājā (2.0257), “kiṃ, gahapati, akāle āgatosī”ti pucchi. Dhammadinnā, “mahārāja, pabbajissāmī”ti vadatīti. Kiṃ panassa laddhuṃ vaṭṭatīti? Aññaṃ kiñci natthi, sovaṇṇasivikaṃ deva, laddhuṃ vaṭṭati nagarañca paṭijaggāpetunti. Rājā sovaṇṇasivikaṃ datvā nagaraṃ paṭijaggāpesi. Visākho dhammadinnaṃ gandhodakena nahāpetvā sabbālaṅkārehi alaṅkārapetvā sovaṇṇasivikāya nisīdāpetvā ñātigaṇena parivārāpetvā gandhapupphādīhi pūjayamāno nagaravāsanaṃ karonto viya bhikkhuni-upassayaṃ gantvā, “dhammadinnaṃ pabbājethāyye”ti āha. Bhikkhuniyo “ekaṃ vā dve vā dose sahituṃ vaṭṭati gahapati”ti āhaṃsu. Natthayye koci doso, saddhāya pabbajatīti. Athekā byattā therī tacapañcakakammaṭṭhānaṃ ācikkhitvā kese ohāretvā pabbājesi. Visākho, “abhiramayye, svākkhāto dhammo”ti vanditvā pakkāmi.

Tassā pabbajitadivasato paṭṭhāya lābhasakkāro uppajji. Teneva palibuddhā samaṇadhammaṃ kātuṃ okāsaṃ na labhati. Athācariya-upajjhāyatheriyo gahetvā janapadaṃ gantvā aṭṭhatimsāya ārammaṇesu cittarucitaṃ kammaṭṭhānaṃ kathāpetvā samaṇadhammaṃ kātuṃ āradadhā, abhinīhārasampannattā pana nāticiraṃ kilamittha.

Ito paṭṭhāya hi satahassakappamatthake padumuttaro nāma satthā loke udapādi. Tadā esā ekasmiṃ kule dāsī hutvā attano kese vikkiṇitvā sujātattherassa nāma aggasāvakassa dānaṃ datvā patthanamakāsi. Sā tāya patthanābhinīhārasampattiyā nāticiraṃ kilamittha, katipāheneva arahattaṃ patvā cintesi- “ahaṃ yenatthena sāsane pabbajitā, so matthakaṃ patto, kiṃ me janapadavāsena, mayhaṃ ñātakāpi puññāni karissanti, bhikkhunisaṅghopi paccayehi na kilami-

ssati, rājagahaṃ gacchāmi”ti bhikkhunisaṅghaṃ gahetvā rājagahameva agamāsi. Visākho, “dhammadinnā kira āgatā”ti sutvā, “pabbajitvā nacirasseva janapadaṃ gatā, gantvāpi nacirasseva paccāgatā, kiṃ nu kho bhavissati, gantvā jānissāmi”ti dutiyagamanena bhikkhuni-upassayaṃ agamāsi. Tena vuttaṃ- “atha kho visākho upāsako yena dhammadinnā bhikkhunī tenupasaṅkamī”ti.

**Etadavocāti** (2.0258) etaṃ sakkāyoti-ādivacanaṃ avoca. Kasmā avocāti? Evaṃ kirassa ahosi- “abhiramasi nābhiramasi, ayye”ti evaṃ pucchanaṃ nāma na paṇḍitakiccaṃ, pañcupādānakkhandhe upanetvā pañhaṃ pucchissāmi, pañhabyākaraṇena tassā abhiratiṃ vā anabhiratiṃ vā jānissāmi, tasmā avoca. Taṃ sutvāva dhammadinnā ahaṃ, āvuso visākha, acirapabbajitā sakāyaṃ vā parakāyaṃ vā kuto jānissāmi vā, aññattheriyo upasaṅkamitvā pucchāti vā avatvā upanikkhittaṃ sampaṭicchamānā viya, ekapāsakagaṇṭhiṃ mocentī viya gahanaṭṭhāne hatthimaggā nīharamānā viya khaggamukhena samuggaṃ vivaramānā viya ca paṭisambhidāvisaye ṭhatvā pañhaṃ vissajjamānā, **pañca kho ime, āvuso visākha, upādānakkhandhāti**-ādimāha. Tattha **pañcā**ti gaṇanaparicchedo. **Upādānakkhandhāti** upādānānaṃ paccayabhūtā khandhāti evamādinā nāyenettha upādānakkhandhakathā vitthāretvā kathetabbā. Sā panesā visuddhimagge vitthāritā evāti tattha vittāritanayeneva veditabbā. **Sakkāyasamudayā**dīsupi yaṃ vattabbaṃ, taṃ heṭṭhā tattha tattha vuttameva.

Idaṃ pana catusaccabyākaraṇaṃ sutvā visākho theriyā abhiratabhāvaṃ aññāsi. Yo hi buddhasāsane ukkaṇṭhito hoti anabhirato, so evaṃ pucchitapucchitapañhaṃ saṇḍāsena ekekaṃ palitaṃ gaṇhanto viya, sinerupādato vālukaṃ uddharanto viya vissajjetuṃ na sakkoti. Yasmā pana imāni cattāri saccāni loke candimasūriyā viya buddhasāsane pākaṭāni, parisamajjhe gato hi bhagavāpi mahātherāpi saccāneva pakāsentī; bhikkhusaṅghopi pabbajitadivasato paṭṭhāya kulaputte cattāri nāma kiṃ, cattāri ariyasaccānīti pañhaṃ uggaṇhāpeti. Ayañca dhammadinnā upāyakosalle ṭhitā paṇḍitā byattā nayaṃ gahetvā sutenapi kathetuṃ samatthā, tasmā “na sakkā etissā ettāvatā saccānaṃ paṭividdhabhāvo ñātum, saccavinibbhogapañhabyākaraṇena sakkā ñātun”ti cintetvā heṭṭhā kathitāni dve saccāni paṭinivattetvā guḷhaṃ katvā gaṇṭhipañhaṃ pucchissāmi pucchanto **taññeva nu kho, ayyeti**-ādimāha.

Tassa vissajjane **na kho, āvuso visākha, taññeva upādānanti** upādānassa saṅkhārakkhandhekadesabhāvato na taṃyeva upādānaṃ te pañcupādānakkhandhā, nāpi aññatra pañcahi upādānakkhandhehi upādānaṃ. Yadi hi taññeva (2.0259) siyā, rūpādisabhāvampi upādānaṃ siyā. Yadi aññatra siyā, parasamaye

cittavippayutto anusayo viya paṇṇatti viya nibbānaṃ viya ca khandhavinimuttaṃ vā siyā, chaṭṭho vā khandho paññāpetabbo bhavēyya, tasmā evaṃ byākāsi. Tassā byākaraṇaṃ sutvā “adhigatapatiṭṭhā ayan”ti visākho niṭṭhamagamāsi. Na hi sakkā akhīṇāsavena asambaddhena avitthāyantena padīpasahassaṃ jālentena viya evarūpo guḷho paṭicchanno tilakkhaṇāhato gambhīro pañho vissajjetuṃ. Niṭṭhaṃ gantvā pana, “ayaṃ dhammadinnā sāsane laddhapatiṭṭhā adhigatapaṭisa-mbhidā vesārajappattā bhavamattake ṭhitā mahākhīṇāsavā, samatthā mayhaṃ pucchitapañhaṃ kathetuṃ, idāni pana naṃ ovattikasāraṃ pañhaṃ pucchissāmi”ti cintetvā taṃ pucchanto, **kathaṃ panāyyeti-ādimāha.**

**461.** Tassa vissajjane **assutavāti-ādi** mūlapariyāye vitthāritameva. **Rūpaṃ attato samanupassatīti**, “idhekacco rūpaṃ attato samanupassati. Yaṃ rūpaṃ so ahaṃ, yo ahaṃ taṃ rūpanti rūpañca attañca advayaṃ samanupassati. Seyyathāpi nāma telappadīpassa jhāyato yā acci so vaṇṇo, yo vaṇṇo sā accīti acciñca vaṇṇañca advayaṃ samanupassati. Evameva idhekacco rūpaṃ attato samanupassati ...pe... advayaṃ samanupassati”ti (paṭi. ma. 1.131) evaṃ rūpaṃ attāti diṭṭhipassa-nāya passati. **Rūpavantaṃ vā attānanti** arūpaṃ attāti gahetvā chāyāvantaṃ rukkaṃ viya taṃ attānaṃ rūpavantaṃ samanupassati. **Attani vā rūpanti** arūpa-meva attāti gahetvā pupphasmiṃ gandhaṃ viya attani rūpaṃ samanupassati. **Rūpasmim vā attānanti** arūpameva attāti gahetvā karaṇḍāya maṇim viya attānaṃ rūpasmim samanupassati. **Vedanaṃ attatoti-ādīsupi** eseva nayo.

Tattha, **rūpaṃ attato samanupassatīti** suddharūpameva attāti kathitaṃ. Rūpa-vantaṃ vā attānaṃ, attani vā rūpaṃ, rūpasmim vā attānaṃ. Vedanaṃ attato... saññaṃ... saṅkhāre... viññāṇaṃ attato samanupassatīti imesu sattasu ṭhānesu (2.0) arūpaṃ attāti kathitaṃ. Vedanāvantaṃ vā attānaṃ, attani vā vedanaṃ, vedanāya vā attānanti evaṃ catūsu khandhesu tiṇṇaṃ tiṇṇaṃ vasena dvādasasu ṭhānesu rūpārūpamissako attā kathito. Tattha rūpaṃ attato samanupassati... vedanaṃ... saññaṃ... saṅkhāre... viññāṇaṃ attato samanupassatīti imesu pañcasu ṭhānesu ucchedadiṭṭhi kathitā, avasesesu sassatadiṭṭhīti. Evamettha pannarasa bhavadi-ṭṭhiyo, pañca vibhavadiṭṭhiyo honti. **Na rūpaṃ attatoti** ettha rūpaṃ attāti na sama-nupassati. Aniccaṃ dukkaṃ anattāti pana samanupassati. **Na rūpavantaṃ attānaṃ ...pe... na viññāṇasmim attānanti** ime pañcakkhandhe kenaci pariyāyena attato na samanupassati, sabbākārena pana aniccā dukkhā anattāti samanupa-ssati.

Ettāvatā theriyā, “evaṃ kho, āvuso visākha, sakkāyadiṭṭhi hotī”ti evaṃ purima-pañhaṃ vissajjentiyā ettakena gamanaṃ hoti, āgamaṃ hoti, gamanāgamaṃ hoti, vaṭṭaṃ vattatīti vaṭṭaṃ matthakaṃ pāpetvā dassitaṃ. **Evaṃ kho, āvuso visākha, sakkāyadiṭṭhi na hotīti** pacchimaṃ pañhaṃ vissajjentiyā ettakena gamanaṃ na hoti, āgamaṃ na hoti, gamanāgamaṃ na hoti, vaṭṭaṃ nāma na vattatīti vivaṭṭaṃ matthakaṃ pāpetvā dassitaṃ.

**462.** **Katamo panāyye, ariyo aṭṭhaṅgiko maggoti** ayaṃ pañho theriyā paṭipu-cchitvā vissajjetabbo bhavēyya- “upāsaka, tayā heṭṭhā maggo pucchito, idha kasmā maggameva pucchasi”ti. Sā pana attano byattatāya paṇḍiccena tassa

adhippāyaṃ sallakkhesi- “iminā upāsakena heṭṭhā paṭipattivasena maggo pucchito bhavissati, idha pana taṃ saṅkhatāsaṅkhatalokiyalokuttarasaṅgahitāsaṅgahitavasena pucchitukāmo bhavissati”ti. Tasmā appaṭipucchitvāva yaṃ yaṃ pucchi, taṃ taṃ vissajjesi. Tattha **saṅkhatoti** cetito kappito pakappito āyūhito kato nibbattito samāpajjantena samāpajjitabbo. **Tīhi ca kho, āvuso visākha, khandhehi ariyo aṭṭhaṅgiko maggo saṅgahitoti** ettha yasmā maggo sappadeso, tayo khandhā nippadesā, tasmā ayaṃ sappadesattā nagaraṃ viya rajjena nippadesehi tīhi khandhehi saṅgahito. Tattha sammāvācādayo tayo silameva, tasmā te sajātito silakkhandhena saṅgahitāti. Kiñcāpi hi pāliyaṃ silakkhandheti bhummēna viya niddeso kato, attho pana karaṇavasena veditabbo. Sammāvāyāmādisu pana (2.026) tīsu samādhī attano dhammatāya ārammaṇe ekaggabhāvena appetuṃ na sakkoti. Vīriye pana paggahakiccaṃ sādheṇṭe satiyā ca apilāpanakiccaṃ sādheṇṭiyā laddhupakāro hutvā sakkoti.

Tatrāyaṃ upamā- yathā hi “nakkhattaṃ kiḷissāmā”ti uyyānaṃ pavīṭṭhesu tīsu saḥāyesu eko supupphitaṃ campakarukkaṃ disvā hatthaṃ ukkhipitvāpi gahetuṃ na sakuṇeyya. Athassa dutiyo onamitvā piṭṭhiṃ dadeyya, so tassa piṭṭhiyaṃ ṭhatvāpi kampamāno gahetuṃ na sakuṇeyya. Athassa itaro aṃsakūṭaṃ upanāmeyya, so ekassa piṭṭhiyaṃ ṭhatvā ekassa aṃsakūṭaṃ olubbha yathāruci pupphāni ocinitvā piḷandhitvā nakkhattaṃ kiḷeyya. Evaṃsampadamidaṃ daṭṭhabbaṃ. Ekato uyyānaṃ pavīṭṭhā tayo saḥāyakā viya hi ekato jātā sammāvāyāmādayo tayo dhammā. Supupphitacampako viya ārammaṇaṃ. Hatthaṃ ukkhipitvāpi gahetuṃ asakkonto viya attano dhammatāya ārammaṇe ekaggabhāvena appetuṃ asakkonto samādhī. Piṭṭhiṃ datvā onatasahāyo viya vāyāmo. Aṃsakūṭaṃ datvā ṭhitasahāyo viya sati. Yathā tesu ekassa piṭṭhiyaṃ ṭhatvā ekassa aṃsakūṭaṃ olubbha itaro yathāruci pupphaṃ gahetuṃ sakkoti, evamevaṃ vīriye paggahakiccaṃ sādheṇṭe, satiyā ca apilāpanakiccaṃ sādheṇṭiyā laddhupakāro samādhī sakkoti ārammaṇe ekaggabhāvena appetuṃ. Tasmā samādhīyevettha sajātito samādhikkhandhena saṅgahito. Vāyāmasatiyo pana kiriyato saṅgahitā honti.

Sammādiṭṭhisammāsaṅkappesupi paññā attano dhammatāya aniccaṃ dukkaṃ anattāti ārammaṇaṃ nicchetuṃ na sakkoti, vitakke pana ākoṭetvā ākoṭetvā dente sakkoti. Kathaṃ? Yathā hi heraññiko kahāpaṇaṃ hatthe ṭhapetvā sabbabhāgesu oloketukāmo samānopi na cakkhudaleneva parivattetuṃ sakkoti, aṅgulipabbehi pana parivattetvā ito cito ca oloketuṃ sakkoti. Evameva na paññā attano dhammatāya aniccādivasena ārammaṇaṃ nicchetuṃ sakkoti, abhiniropanalakkaṇena pana āhananapariyāhananarasena vitakkena ākoṭentena viya parivattentena viya ca ādāyā dinnameva vinicchetuṃ sakkoti. Tasmā (2.0262) idhāpi sammādiṭṭhiyeva sajātito paññākkhandhena saṅgahitā. Sammāsaṅkappo pana kiriyato saṅgahito hoti. Iti imehi tīhi khandhehi maggo saṅgahaṃ gacchati. Tena vuttaṃ- “tīhi ca kho, āvuso visākha, khandhehi ariyo aṭṭhaṅgiko maggo saṅgahito”ti.

Idāni ekacittakkaṇikaṃ maggasaṃmādhīṃ sanimittaṃ sapaṛikkhāraṃ pucchanto, **katamo panāyyeti-ādimāha**. Tassa vissajjane cattāro satipaṭṭhānā

maggakkhaṇe catukiccasādhanavasena uppannā sati, sā samādhissa paccaya-tthena nimittaṃ. Cattāro sammappadhānā catukiccasādhanavaseneva uppannaṃ vīriyaṃ, taṃ parivāraṭṭhena parikkhāro hoti. **Tesaṃyeva dhammānanti** tesam maggasampayuttadhammānaṃ. **Āsevanā**ti-ādīsu ekacittakkhaṇikāyeva āsevanā-dayo vuttāti.

Vitaṇḍavādī pana, “ekacittakkhaṇiko nāma maggo natthi, ‘evaṃ bhāveyya satta vassānī’ti hi vacanato sattapi vassāni maggabhāvanā hoti, kilesā pana lahu chijjantā sattahi ñāṇehi chijjantī”ti vadati. So “suttaṃ āharā”ti vattabbo. Addhā aññaṃ apassanto, “yā tesaṃyeva dhammānaṃ āsevanā bhāvanā bahulīkammaṃ”-ti idameva suttaṃ āharitvā, “aññaena cittaena āsevati, aññaena bhāveti, aññaena bahulīkaroti”ti vakkhati. Tato vattabbo- “kiṃ panidaṃ, suttaṃ neyyatthaṃ nītatthaṃ”ti. Tato vakkhati- “nītatthaṃ yathā suttaṃ tatheva attho”ti. Tassa idaṃ uttaraṃ- evaṃ sante ekaṃ cittaṃ āsevamānaṃ uppannaṃ, aparampi āsevamānaṃ, aparampi āsevamānanti evaṃ divasampi āsevanāva bhavissati, kuto bhāvanā, kuto bahulīkammaṃ? Ekaṃ vā bhāvayamānaṃ uppannaṃ aparampi bhāvayamānaṃ aparampi bhāvayamānanti evaṃ divasampi bhāvanāva bhavissati, kuto āsevanā kuto bahulīkammaṃ? Ekaṃ vā bahulīkarontaṃ uppannaṃ, aparampi bahulīkarontaṃ, aparampi bahulīkarontanti evaṃ divasampi bahulīkammameva bhavissati kuto āsevanā, kuto bhāvanāti.

Atha vā evaṃ vadeyya- “ekena cittaena āsevati, dvīhi bhāveti, tīhi bahulīkaroti. Dvīhi vā āsevati, tīhi bhāveti, ekena bahulīkaroti (2.0263). Tīhi vā āsevati, ekena bhāveti, dvīhi bahulīkaroti”ti. So vattabbo- “mā suttaṃ me laddhanti yaṃ vā taṃ vā avaca. Pañhaṃ vissajjenta nāma ācariyassa santike vasitvā buddhava-canaṃ uggaṇhitvā attharasam viditvā vattabbaṃ hoti. Ekacittakkhaṇikāva ayaṃ āsevanā, ekacittakkhaṇikā bhāvanā, ekacittakkhaṇikaṃ bahulīkammaṃ. Khaya-gāmilokuttaramaggo bahulacittakkhaṇiko nāma natthi, ‘ekacittakkhaṇikoyevā’ti saññāpetabbo. Sace sañjānāti, sañjānātu, no ce sañjānāti, gaccha pātova vihāraṃ pavisitvā yāguṃ pivāhi”ti uyyojetabbo.

**463. Kati panāyye saṅkhārāti** idha kiṃ pucchati? Ye saṅkhāre nirodhetvā nirodhaṃ samāpajjati, te pucchissāmīti pucchati. Tenevassa adhippāyaṃ ñatvā therī, puññābhisaṅkhārādīsu anekesu saṅkhāresu vijjamānesupi, kāyasaṅkhārādayova ācikkhantī, **tayome, āvusoti**-ādimāha. Tattha kāyapaṭibaddhattā kāyena saṅkharīyati karīyati nibbattiyatīti **kāyasaṅkhāro**. Vācaṃ saṅkharoti karoti nibbatte-tīti vacīsaṅkhāro. Cittapaṭibaddhattā cittaena saṅkharīyati karīyati nibbattiyatīti **citta-saṅkhāro**. **Katamo panāyyeti** idha kiṃ pucchati? Ime saṅkhārā aññaamaññaṃmissā āluṭitā avibhūtā duddīpanā. Tathā hi, kāyadvāre ādānagahaṇamuñcanacopanāni pāpetvā uppannā aṭṭha kāmāvacarakusalacetanā dvādasa akusalacetanāti evaṃ kusalākusalā vīsati cetanāpi assāsapassāsāpi kāyasaṅkhārātveva vuccanti. Vacīdvāre hanusaṃcopanaṃ vacībhedam pāpetvā uppannā vuttappakārāva vīsati cetanāpi vitakkavicārāpi vacīsaṅkhārotveva vuccanti. Kāyavacīdvāresu copanaṃ apattā raho nisinnassa cintayato uppannā kusalākusalā ekūnatīṃsa cetanāpi saññā ca vedanā cāti ime dve dhammāpi cittasaṅkhārotveva vuccanti. Evaṃ ime

saṅkhārā aññaṃaññaṃamissā āluḷitā avibhūtā duddīpanā. Te pākaṭe vibhūte katvā kathāpessāmiti pucchati.

**Kasmā panāyyeti** idha kāyasaṅkhārādināmassa padatthaṃ pucchati. Tassa vissajjane **kāyappaṭibaddhāti** kāyanissitā, kāye sati honti, asati (2.0264) na honti. **Cittappaṭibaddhāti** cittanissitā, citte sati honti, asati na honti.

**464.** Idāni kiṃ nu kho esā saññāvedayitanirodhaṃ valañjeti, na valañjeti. Ciṇṇavasī vā tattha no ciṇṇavasīti jānanatthaṃ pucchanto, **kathaṃ panāyye, saññāvedayitanirodhasamāpatti hotīti**-ādimāha. Tassa vissajjane **samāpajjissanti vā samāpajjāmīti vā** padadvayena nevasaññānāsaññāyatanaśamāpattikālo kathito. **Samāpannoti** padena antonirodho. Tathā purimehi dvīhi padehi sacittakakālo kathito, pacchimena acittakakālo. **Pubbeva tathā cittaṃ bhāvitaṃ hotīti** nirodhasamāpattito pubbe addhānaparicchedakāleyeva, ettakaṃ kālaṃ acittako bhavissāmīti addhānaparicchedacittaṃ bhāvitaṃ hoti. **Yaṃ taṃ tathattāya upanetīti** yaṃ evaṃ bhāvitaṃ cittaṃ, taṃ puggalaṃ tathattāya acittakabhāvāya upaneti.

**Paṭhamaṃ nirujjhati vacīsaṅkhāroti** sesasaṅkhārehi paṭhamaṃ dutiyajjhāneyeva nirujjhati. **Tato kāyasaṅkhāroti** tato paraṃ kāyasaṅkhāro catutthajjhāne nirujjhati. **Tato cittasaṅkhāroti** tato paraṃ cittasaṅkhāro antonirodhe nirujjhati. **Vuṭṭhahissanti vā vuṭṭhahāmīti vā** padadvayena antonirodhakālo kathito. **Vuṭṭhitoti** padena phalasaṃpattikālo. Tathā purimehi dvīhi padehi acittakakālo kathito, pacchimena sacittakakālo. **Pubbeva tathā cittaṃ bhāvitaṃ hotīti** nirodhasamāpattito pubbe addhānaparicchedakāleyeva ettakaṃ kālaṃ acittako hutvā tato paraṃ sacittako bhavissāmīti addhānaparicchedacittaṃ bhāvitaṃ hoti. **Yaṃ taṃ tathattāya upanetīti** yaṃ evaṃ bhāvitaṃ cittaṃ, taṃ puggalaṃ tathattāya sacittakabhāvāya upaneti. Iti heṭṭhā nirodhasamāpajjanakālo gahito, idha nirodhato vuṭṭhānakālo.

Idāni nirodhakathaṃ kathetuṃ vāroti nirodhakathā kathetabbā siyā, sā panesā, “dvīhi balehi samannāgatattā tayo ca saṅkhārānaṃ paṭippassaddhiyā soḷasahi ñāṇacariyāhi navahi samādhicariyāhi vasībhāvatāpaññā



nirodhasamāpattiyā ñāṇan”ti mātikaṃ ṭhapetvā sabbākārena visuddhimagge kathitā. Tasmā tattha kathitanayeneva gahetabbā (2.0265). Ko panāyaṃ nirodho nāma? Catunnaṃ khandhānaṃ paṭisaṅkhā appavatti. Atha kimatthametaṃ samāpajjantīti. Saṅkhārānaṃ pavatte ukkaṅṭhitā sattāhaṃ acittakā hutvā sukhaṃ viharissāma, diṭṭhadhammanibbānaṃ nāmetaṃ, yadidaṃ nirodhoti etadatthaṃ samāpajjanti.

**Paṭhamam uppajjati cittasaṅkhāro**ti nirodhā vuṭṭhahantassa hi phalasangamāpatticittam paṭhamam uppajjati. Taṃsampayuttam saññañca vedanañca sandhāya, “paṭhamam uppajjati cittasaṅkhāro”ti āha. **Tato kāyasaṅkhāro**ti tato param bhavaṅgasamaye kāyasaṅkhāro uppajjati. Kiṃ pana phalasangamāpatti assāsapassāse na samuṭṭhāpetīti? Samuṭṭhāpeti. Imassa pana catutthajjhānikā phalasangamāpatti, sā na samuṭṭhāpeti. Kiṃ vā etena phalasangamāpatti paṭhamajjhānikā vā hotu, dutiyatitayacatutthajjhānikā vā, santāya samāpattiyā vuṭṭhitassa bhikkhuno assāsapassāsā abbohārikā hontīti. Tesam abbohārikabhāvo sañjivattheravatthunā veditabbo. Sañjivattherassa hi samāpattito vuṭṭhāya kiṃsukapupphasadise vītaccitaṅgāre maddamānassa gacchato cīvare aṃsumattampi na jhāyi, usumākāramattampi nāhosi, samāpattiphalaṃ nāmetanti vadanti. Evamevaṃ santāya samāpattiyā vuṭṭhitassa bhikkhuno assāsapassāsā abbohārikā hontīti bhavaṅgasamayenevetam kathitanti veditabbaṃ.

**Tato vacīsaṅkhāro**ti tato param kiriyamayapavattavaḷaṅjanakāle vacīsaṅkhāro uppajjati. Kiṃ bhavaṅgam vitakkavicāre na samuṭṭhāpetīti? Samuṭṭhāpeti. Taṃsamuṭṭhānā pana vitakkavicārā vācam abhisaṅkhātuṃ na sakkontīti kiriyamayapavattavaḷaṅjanakālenevataṃ kathitaṃ. **Suññato phassoti**-ādayo saguṇenāpi ārammaṇenāpi kathetabbā. Saguṇena tāva suññatā nāma phalasangamāpatti, tāya sahaḷaṅgam phassaṃ sandhāya suññato phassoti vuttaṃ. **Animittāpaṇihitesupī**eseva nayo. Ārammaṇena pana nibbānaṃ rāgādīhi suññatā suññaṃ nāma, rāganimittādīnaṃ abhāvā animittaṃ, rāgadosamohappaṇidhīnaṃ abhāvā appaṇihitaṃ. Suññataṃ nibbānaṃ ārammaṇaṃ katvā uppannaphalasangamāpattiyam phasso suññato nāma. **Animittāpaṇihitesupī** eseva nayo.

Aparā (2.0266) āgamaniyakathā nāma hoti, suññatā, animittā, appaṇihitāti hi vipassanāpi vuccati. Tattha yo bhikkhu saṅkhāre aniccato pariggahetvā aniccato disvā aniccato vuṭṭhāti, tassa vuṭṭhānagāminivipassanā **animittā** nāma hoti. Yo dukkhato pariggahetvā dukkhato disvā dukkhato vuṭṭhāti, tassa **appaṇihitā** nāma. Yo anattato pariggahetvā anattato disvā anattato vuṭṭhāti, tassa **suññatā** nāma. Tattha animittavipassanāya maggo animitto nāma, animittamaggassa phalaṃ animittaṃ nāma. Animittaphalasangamāpattisahajāte phasse phusante animitto phasso phusatīti vuccati. Appaṇihitasuññatesupī eseva nayo. Āgamaniyena kathite pana suññato vā phasso animitto vā phasso appaṇihito vā phassoti vikappo āpajjeyya, tasmā saguṇena ceva ārammaṇena ca kathetabbaṃ. Evañhi tayo phassā phusanatīti sameti.

**Vivekaninnanti**-ādīsu nibbānaṃ viveko nāma, tasmim viveke ninnaṃ onatanti **vivekaninnaṃ**. Aññato āgantvā yena viveko, tena vaṅkaṃ viya hutvā ṭhitanti **viveka-**

**poṇaṃ.** Yena viveko, tena patamānaṃ viya ṭhitanti **vivekapabbhāraṃ.**

**465.** Idāni yā vedanā nirodhetvā nirodhasamāpattiṃ samāpajjati, tā pucchissā-mīti pucchanto **kati panāyye, vedanāti āha. Kāyikaṃ vāti-**ādīsu pañcadvārikaṃ sukhaṃ kāyikaṃ nāma, manodvārikaṃ cetasikaṃ nāmāti veditabbaṃ. Tattha **sukhanti** sabhāvaniddeso. **Sātanti** tasseva madhurabhāvadīpakaṃ vevacanaṃ. **Vedayitanti** vedayitabhāvadīpakaṃ, sabbavedanānaṃ sādharmaṇavacanaṃ. Sesapadesupi eseva nayo. **Ṭhitisukhā vipariṇāmadukkhāti-**ādīsu sukhāya vedanāya atthibhāvo sukhaṃ, natthibhāvo dukkhaṃ. Dukkāya vedanāya atthibhāvo dukkhaṃ, natthibhāvo sukhaṃ. Adukkhamasukhāya vedanāya jānanabhāvo sukhaṃ, ajānanabhāvo dukkhanti attho.

**Kiṃ anusayo anusetīti** katamo anusayo anuseti. Appahīnaṭṭhena sayito viya hotīti anusayapucchaṃ pucchati. **Na kho, āvuso (2.0267) visākha, sabbāya sukhāya vedanāya rāgānusayo anusetīti** na sabbāya sukhāya vedanāya rāgānusayo anuseti. Na sabbāya sukhāya vedanāya so appahīno, na sabbaṃ sukhaṃ vedanaṃ ārabba uppajjati attho. Esa nayo sabbattha. **Kiṃ pahātabbanti** ayaṃ pahānapucchā nāma.

**Rāgaṃ tena pajahatīti** ettha ekeneva byākaraṇena dve pucchā vissajjesi. Idha bhikkhu rāgānusayaṃ vikkhambhetvā paṭhamajjhānaṃ samāpajjati, jhānavikkhambhitaṃ rāgānusayaṃ tathā vikkhambhitameva katvā vipassanaṃ vaḍḍhetvā anāgāmimaggena samugghātetī. So anāgāmimaggena pahīnopi tathā vikkhambhitattāva paṭhamajjhāne nānuseti nāma. Tenāha- “na tattha rāgānusayo anusetī”ti. **Tadāyatanti** taṃ āyatanaṃ, paramassāsabhāvena patiṭṭhānabhūtaṃ arahattanti attho. **Iti anuttaresūti** evaṃ anuttarā vimokkhāti laddhanāme arahatte. **Pihaṃ upaṭṭhāpayatoti** patthanaṃ paṭṭhapentassa. **Uppajjati pihāpaccayā domanassanti** patthanāya paṭṭhapanamūlakaṃ domanassaṃ uppajjati. Taṃ panetaṃ na patthanāya paṭṭhapanamūlakaṃ uppajjati, patthetvā alabhantassa pana alābhamūlakaṃ uppajjamānaṃ, “uppajjati pihāpaccayā”ti vuttaṃ. Tattha kiñcāpi domanassaṃ nāma ekantena akusalaṃ, idaṃ pana sevitabbaṃ domanassaṃ vaṭṭatīti vadanti. Yogino hi temāsikaṃ chamāsikaṃ vā navamāsikaṃ vā paṭipadaṃ gaṇhanti. Tesu yo taṃ taṃ paṭipadaṃ gahetvā antokālaparicchedeyeva arahattaṃ pāpuṇissāmīti ghaṭento vāyamanto na sakkoti yathāparicchinna-kālena pāpuṇituṃ, tassa balavadomanassaṃ uppajjati, ālindikavāsimahāphussadevattherassa viya assudhārā pavattanti. Thero kira ekūnavīsativassāni gatapaccāgatavattaṃ pūresi. Tassa, “imasmim vāre arahattaṃ gaṇhissāmi, imasmim vāre visuddhipavāraṇaṃ pavāressāmi”ti mānasaṃ bandhitvā samaṇadhammaṃ karontasseva ekūnavīsativassāni atikkantāni. Pavāraṇādivase āgate therassa assupātena muttadivaso nāma nāhosi. Vīsatiṃ pana vasse arahattaṃ pāṇuṇi.

**Paṭighaṃ (2.0268) tena pajahatīti** ettha domanasseneva paṭighaṃ pajahati. Na hi paṭigheneva paṭighappahānaṃ, domanassena vā domanassappahānaṃ nāma atthi. Ayaṃ pana bhikkhu temāsikādīsu aññataraṃ paṭipadaṃ gahetvā iti paṭisañcikkhati- “passa bhikkhu, kiṃ tuyhaṃ sīlena hīnaṭṭhānaṃ atthi, udāhu vīriyena, udāhu paññāya, nanu te sīlaṃ suparisuddhaṃ vīriyaṃ supaggahitaṃ paññā sūrā

huvā vahatī”ti. So evaṃ paṭisañcikkhitvā, “na dāni puna imassa domanassassa uppajjituṃ dassāmī”ti vīriyaṃ daḷhaṃ katvā antotemāse vā antochamāse vā antonavamāse vā anāgāmmaggena taṃ samugghātetī. Iminā pariyāyena paṭigheveva paṭighaṃ, domanasseneva domanassaṃ pajahati nāma.

**Na tattha paṭighānusayo anusetī**ti tattha evarūpe domanasse paṭighānusayo nānuseti. Na taṃ ārabba uppajjati, pahīnova tattha paṭighānusayoti attho. **Avijjaṃ tena pajahatī**ti idha bhikkhu avijjānusayaṃ vikkhambhetvā catutthajjhānaṃ samāpajjati, jhānavikkhambhitaṃ avijjānusayaṃ tathā vikkhambhitameva katvā vipassanaṃ vadḍhetvā arahattamaggena samugghātetī. So arahattamaggena pahīnopi tathā vikkhambhitattāva catutthajjhāne nānuseti nāma. Tenāha- “na tattha avijjānusayo anusetī”ti.

**466.** Idāni paṭibhāgapucchāṃ pucchanto **sukhāya panāyyeti**-ādimāha. Tassa vissajjane yasmā sukhasa dukkhaṃ, dukkhasa ca sukhaṃ paccanīkaṃ, tasmā dvīsu vedanāsu visabhāgapaṭibhāgo kathito. Upekkhā pana andhakārā avibhūtā duddīpanā, avijjāpi tādisāvātī tenettha sabhāgapaṭibhāgo kathito. Yattakesu pana ṭhānesu avijjā tamaṃ karoti, tattakesu vijjā tamaṃ vinodetīti visabhāgapaṭibhāgo kathito. **Avijjāya kho, āvusoti** ettha ubhopete dhammā anāsavā lokuttarāti sabhāgapaṭibhāgova kathito. **Vimuttiyā kho, āvusoti** ettha anāsavaṭṭhena lokuttaraṭṭhena abyākataṭṭhena ca sabhāgapaṭibhāgova kathito. **Accayāsī**ti ettha pañhaṃ atikkamitvā gatosīti attho. **Nāsakkhi pañhānaṃ pariyantaṃ gahetunti** pañhānaṃ paricchedapamāṇaṃ gahetuṃ nāsakkhi, appaṭibhāgadhammassa paṭibhāgaṃ pucchi. Nibbānaṃ nāmetaṃ appaṭibhāgaṃ (2.0269), na sakkā nīlaṃ vā pītaṃ vāti kenaci dhammena saddhiṃ paṭibhāgaṃ katvā dassetuṃ. Tañca tvaṃ iminā adhippāyena pucchasi attho.

Ettāvatā cāyaṃ upāsako yathā nāma sattame ghare salākabhataṃ labhitvā gato bhikkhu satta gharāni atikkamma aṭṭhamassa dvāre ṭhito sabbānīpi satta gehāni viraddhova na aññāsi, evamevaṃ appaṭibhāgadhammassa paṭibhāgaṃ pucchanto sabbāsupi sattasu sappaṭibhāgapucchāsu viraddhova hotīti veditabbo. **Nibbānogadhanti** nibbānabbhantaṃ nibbānaṃ anupaviṭṭhaṃ. **Nibbānaparāyanti** nibbānaṃ paraṃ ayanamassa parā gati, na tato paraṃ gacchatīti attho. Nibbānaṃ pariyosānaṃ avasānaṃ assāti **nibbānapariyosānaṃ**.

**467. Paṇḍitā**ti paṇḍiccena samannāgatā, dhātukusalā āyatanakusalā paṭicca-samuppādakusalā ṭhānāṭṭhānakusalāti attho. **Mahāpaññā**ti mahante atthe mahante dhamme mahantā niruttiyo mahantāni paṭibhānāni pariggaṇhanasamatthāya paññāya samannāgatā. **Yathā taṃ dhammadinnāyā**ti yathā dhammadinnāya bhikkhuniyā byākataṃ, ahampi taṃ evamevaṃ byākareyyanti. Ettāvatā ca pana ayaṃ suttanto jinabhāsito nāma jāto, na sāvakaḥ bhāsito. Yathā hi rājayuttehi likhitaṃ paṇṇaṃ yāva rājamuddikāya na lañchitaṃ hoti, na tāva rājapaṇṇanti saṅkhyāṃ gacchati; lañchitamattaṃ pana rājapaṇṇaṃ nāma hoti, tathā, “ahampi taṃ evameva byākareyyan”ti imāya jinavacanamuddikāya lañchitattā ayaṃ suttanto āhaccavacanena jinabhāsito nāma jāto. Sesāṃ sabbattha uttānatthamevāti.

Papañcasūdanīyā majjhimanikāyaṭṭhakathāya

Cūḷavedallasuttavaṇṇanā niṭṭhitā.

## 5. Cūḷadhammasamādānasuttavaṇṇanā

**468. Evaṃ me sutanti** cūḷadhammasamādānasuttaṃ. Tattha **dhammasamādānā-**nīti dhammoti gahitagahaṇāni. **Paccuppannasukhanti** paccuppanne sukhaṃ, āyūhanakkhaṇe sukhaṃ (2.0270) sukaraṃ sukhena sakkā pūretuṃ. **Āyatim dukkhavi-**pākanti anāgate vipākakāle dukkhavipākaṃ. Iminā upāyena sabbapadesu attho veditabbo.

**469. Natthi kāmesu dosoti** vatthukāmesupi kilesakāmesupi doso natthi. **Pāta-**byataṃ āpajjantīti te vatthukāmesu kilesakāmena pātabyataṃ pivitabbataṃ, yathā-ruci paribhuñjitabbataṃ āpajjantīti attho. **Moḷibaddhāhīti** moḷim katvā baddhake-sāhi. **Paribbājikāhīti** tāpasaparibbājikāhi. **Evamāhamsūti** evaṃ vadanti. **Pariññaṃ** paññapentīti pahānaṃ samatikkamaṃ paññapenti. **Māluvāsipātīkāti** dīghasa-ṇṭhānaṃ māluvāpakkaṃ. **Phaleyyāti** ātapena sussitvā bhijjeyya. **Sālamūleti** sālaru-kkhassa samīpe. **Santāsaṃ āpajjeyyāti** kasmā āpajjati? Bhavanavināsabhayā. Rukkhamūle patitamāluvābījato hi latā uppajjitvā rukkhaṃ abhiruhati. Sā mahā-pattā ceva hoti bahupattā ca, koviḷārapattasādisehi pattehi samannāgatā. Atha taṃ rukkhaṃ mūlato paṭṭhāya vinandhamānā sabbaviṭapāni sañchādetvā mahantaṃ bhāraṃ janetvā tiṭṭhati. Sā vāte vā vāyante deve vā vassante oghanaṃ janetvā tassa rukkhasa sabbasākhāpasākhaṃ bhañjati, bhūmiyaṃ nipātetī. Tato tasmim rukkhe patiṭṭhitavimānaṃ bhijjati nassati. Iti sā bhavanavināsabhayā santāsaṃ āpajjati.

**Ārāmadevatāti** tattha tattha pupphārāmaphalārāmesu adhivatthā devatā. **Vana-**devatāti andhavanasubhagavanādīsu vanesu adhivatthā

devatā. **Rukkhadevatā**ti abhilakkhitesu naḷerupucimandādīsu rukkhesu adhivatthā devatā. **Osadhitiṇavanappatisū**ti haritakī-āmalakī-ādīsu osadhīsu tālanāḷikerādīsu tiṇesu vanajeṭṭhakesu ca vanappatirukkhesu adhivatthā devatā. **Vanakammikā**ti vane kasanalāyanadāru-āharaṇagorakkhādīsu kenacideva kammaena vā vicaraka-manussā. **Uddhareyyunti** khādeyyuṃ. **Vilambinī**ti vātena pahatapahataṭṭhānesu keḷiṃ karontī viya vilambantī. **Sukho imissā**ti evarūpāya māluvālatāya sampha-ssopi sukho, dassanampi sukhaṃ. Ayaṃ me dārakānaṃ āpānamaṇḍalaṃ bhavi-ssati, kiḷābhūmi bhavissati, dutiyaṃ (2.0271) me vimānaṃ paṭiladdhanti latāya dassanepi samphassepī somanassajātā evamāha.

**Viṭabhiṃ kareyyā**ti sākānaṃ upari chattākārena tiṭṭheyya. **Oghanaṃ janeyyā**ti heṭṭhā ghaṇaṃ janeyya. Upari āruyha sakalaṃ rukkhamaṃ paliveṭṭhetvā puna heṭṭhā bhassamānā bhūmiṃ gaṇheyyāti attho. **Padāleyyā**ti evaṃ oghanaṃ katvā puna tato paṭṭhāya yāva mūlā otiṇṇasākāhi abhiruhamānā sabbasākā paliveṭṭhentī matthakaṃ patvā teneva niyāmena puna orohitvā ca abhiruhitvā ca sakala-rukkhamaṃ saṃsibbitvā ajjhottharantī sabbasākā heṭṭhā katvā sayamaṃ upari ṭhatvā vāte vā vāyante deve vā vassante padāleyya. Bhideyyāti attho. Khāṇumatta-meva tiṭṭheyya, tattha yaṃ sākhaṭṭhakavimānaṃ hoti, taṃ sākāsu bhijjamānāsu tattha tattheva bhijjitvā sabbasākāsu bhinnāsu sabbaṃ bhijjati. Rukkhataṭṭhakavi-mānaṃ pana yāva rukkhassa mūlamattampi tiṭṭhati, tāva na nassati. Imaṃ pana vimānaṃ sākhaṭṭhakaṃ, tasmā sabbasākāsu saṃbhijjamānāsu bhijjittha. Devatā puttake gahetvā khāṇuke ṭhitā paridevituṃ āradhā.

**471. Tibbarāgajātiko**ti bahalarāgasabhāvo. **Rāgamaṃ dukkamaṃ domanassaṃ paṭisaṃvedetī**ti tibbarāgajātikattā diṭṭhe diṭṭhe ārammaṇe nimittaṃ gaṇhāti. Athassa ācariyupajjhāyā daṇḍakammaṃ aṇāpentī. So abhikkhaṇaṃ daṇḍa-kammaṃ karonto dukkamaṃ domanassaṃ paṭisaṃvedetī, natveva vītikkamaṃ karoti. **Tibbadosajātiko**ti appamattikeneva kuppati, daharasāmaṇerehi saddhiṃ hatthaparāmāsādīni karontova katheti. Sopi daṇḍakammaṃ paccayā dukkamaṃ domanassaṃ paṭisaṃvedetī. Mohajātiko pana idha kataṃ vā katato akataṃ vā akatato na sallakkhetī, tāni tāni kiccāni virādhetī. Sopi daṇḍakammaṃ paccayā dukkamaṃ domanassaṃ paṭisaṃvedetī.

**472. Na tibbarāgajātiko**-ādīni vuttapaṭipakkhanayena veditabbāni. Kasmā panettha koci tibbarāgādijātiko hoti, koci na tibbarāgādijātiko? Kammaniyāmena. Yassa hi kammāyūhanakkhaṇe lobho balavā hoti, alobho mando, adosā mohā balavanto, dosamohā (2.0272) mandā, tassa mando alobho lobhaṃ pariyādātuṃ na sakkoti, adosā mohā pana balavanto dosamohe pariyādātuṃ sakkonti. Tasmā so tena kammaena dinnapaṭisandhivasena nibbatto luddho hoti, sukhasīlo akko-dhano paññavā vajirūpamaññaṃ.

Yassa pana kammāyūhanakkhaṇe lobhadosā balavanto honti, alobhādosā mandā, amoho balavā, moho mando, so purimanayeneva luddho ceva hoti duṭṭho ca, paññavā pana hoti vajirūpamaññaṃ dattābhayaṭṭhero viya.

Yassa pana kammāyūhanakkhaṇe lobhādosamohā balavanto honti, itare mandā, so purimanayeneva luddho ceva hoti dandho ca, sukhasīlo pana hoti

akkodhano.

Tathā yassa kammāyūhanakkhaṇe tayopi lobhadosamohā balavanto honti, alobhādayo mandā, so purimanayeneva luddho ceva hoti duṭṭho ca mūḷho ca.

Yassa pana kammāyūhanakkhaṇe alobhadosamohā balavanto honti, itare mandā, so purimanayeneva appakilesa hoti, dibbārammaṇampi disvā niccalo, duṭṭho pana hoti dandhapañño ca.

Yassa pana kammāyūhanakkhaṇe alobhādosamohā balavanto honti, itare mandā, so purimanayeneva aluddho ceva hoti sukhasīlako ca, mūḷho pana hoti.

Tathā yassa kammāyūhanakkhaṇe alobhadosā mohā balavanto honti, itare mandā, so purimanayeneva aluddho ceva hoti paññavā ca, duṭṭho pana hoti kodhano.

Yassa (2.0273) pana kammāyūhanakkhaṇe tayopi alobhādayo balavanto honti, lobhādayo mandā, so mahāsaṅgharakkhitatthero viya aluddho aduṭṭho paññavā ca hoti.

Sesaṃ sabbattha uttānatthamevāti.

Papañcasūdaniyā majjhimanikāyaṭṭhakathāya

Cūḷadhammasamādānasuttavaṇṇanā niṭṭhitā.

## 6. Mahādhammasamādānasuttavaṇṇanā

**473. Evaṃ me suttanti** mahādhammasamādānasuttaṃ. Tattha **evaṃkā māti** evaṃ-icchā. **Evaṃchandāti** evaṃ-ajjhāsayā. **Evaṃ-adhippāyāti** evaṃladdhikā. **Tatrāti** tasmim̐ aniṭṭhavaḍḍhane ceva iṭṭhaparihāne ca. **Bhagavaṃmūlakāti** bhagavā mūlaṃ etesanti bhagavaṃmūlakā. Idaṃ vuttaṃ hoti- ime, bhante, amhākaṃ dhammā pubbe kassapasammāsambuddhena uppāditā, tasmim̐ parinibbute ekaṃ buddhantaṃ añño samaṇo vā brāhmaṇo vā ime dhamme uppādetuṃ samattho nāma nāhosi, bhagavatā pana no ime dhammā uppāditā. Bhagavantañhi nissāya mayaṃ ime dhamme ājānāma paṭivijjhāmāti evaṃ bhagavaṃmūlakā no, bhante, dhammāti. **Bhagavaṃnettikāti** bhagavā hi dhammānaṃ netā vinetā anunetāti. Yathāsabhāvato pāṭiyekkaṃ pāṭiyekkaṃ nāmaṃ gaḥetvā dassitā dhammā bhagavaṃnettikā nāma honti. **Bhagavaṃpaṭisaraṇāti** catubhūmakā dhammā sabbaññutaññāṇassa āpāthaṃ āgacchamānā bhagavati paṭisaranti nāmāti bhagavaṃpaṭisaraṇā. Paṭisarantīti osaranti samosaranti. Apica mahābodhimaṇḍe nisinnassa bhagavato paṭivedhavasena phasso āgacchati, ahaṃ bhagavā kinnāmoti? Tvaṃ phusanaṭṭhena phasso nāma. Vedanā, saññā, saṅkhārā, viññāṇaṃ āgacchati. Ahaṃ bhagavā kinnāmanti? Tvaṃ vijānanaṭṭhena viññāṇaṃ nāmāti evaṃ catubhūmakadhammānaṃ yathāsabhāvato pāṭiyekkaṃ pāṭiyekkaṃ nāmaṃ gaṇhanto bhagavā dhamme paṭisaratītipi bhagavaṃpaṭisa-

raṇā. **Bhagavantaññeva paṭibhātū**ti bhagavatoyeva etassa bhāsitassa attho upa-  
tṭhātu, tumheyeva no kathetvā dethāti attho.

**474. Sevitabbeti** (2.0274) nissayitabbe. **Bhajitabbeti** upagantabbe. **Yathā taṃ  
aviddasunoti** yathā aviduno bālassa andhaputhujanassa. **Yathā taṃ viddasunoti**  
yathā viduno medhāvino paṇḍitassa.

**475. Atthi, bhikkhave, dhammasamādānanti** purimasutte uppaṭipāṭi-ākārena  
mātikā ṭhapitā, idha pana yathādhammaraseneva satthā mātikaṃ ṭhapesi. Tattha  
**dhammasamādānanti** pāṇātipātādīnaṃ dhammānaṃ gahaṇaṃ.

**476. Avijjāgato** Ti avijjāya samannāgato.

**477. Vijjāgatoti** vijjāya samannāgato paññavā.

**478. Sahāpi dukkhenā** Ti ettha micchācāro abhijjhā micchādiṭṭhīti ime tāva tayo  
pubbacetanāya ca aparacetanāya cāti dvinnaṃ cetanānaṃ vasena dukkhave-  
danā honti. Sanniṭṭhāpakacetanā pana sukhasampayuttā vā upekkhāsampayuttā  
vā hoti. Sesā pāṇātipātādayo satta tissannampi cetanānaṃ vasena dukkhave-  
danā honti. Idaṃ sandhāya vuttaṃ- “sahāpi dukkhena sahāpi domanassenā” ti.  
Domanassameva cettha dukkhanti veditabbaṃ. Pariyeṭṭhiṃ vā āpajjantassa  
pubbabhāgaparabhāgesu kāyikaṃ dukkhampi vaṭṭatiyeva.

**479. Sahāpi sukhenāti** ettha pāṇātipāto pharusavācā byāpādoti ime tāva tayo  
pubbacetanāya ca aparacetanāya cāti dvinnaṃ cetanānaṃ vasena sukhavedanā  
honti. Sanniṭṭhāpakacetanā pana dukkhasampayuttā vā hoti. Sesā satta tissa-  
nnampi cetanānaṃ vasena sukhavedanā hontiyeva. **Sahāpi somanassenāti** soma-  
nassameva cettha sukhanti veditabbaṃ. Itṭhaphoṭṭhabbasamaṅgino vā pubbabhā-  
gaparabhāgesu kāyikaṃ sukhampi vaṭṭatiyeva.

**480.** Tatiyadhammasamādāne idhekacco macchabandho vā hoti, māgaviko vā,  
pāṇupaghātaṃyeva nissāya jīvikaṃ kappeti. Tassa garuṭṭhāniyo bhikkhu akāma-  
kasseva pāṇātipāte ādīnavaṃ, pāṇātipātaviratiyā ca ānisaṃsaṃ kathetvā sikkhā-  
padaṃ deti. So gaṇhantopi dukkhito domanassitova hutvā gaṇhāti. Aparabhāge  
katipāhaṃ vītināmetvā (2.0275) rakkhituṃ asakkontopi dukkhitova hoti, tassa  
pubbāparacetanā dukkhasahagatā vā honti. Sanniṭṭhāpakacetanā pana sukhasa-  
hagatā vā upekkhāsahagatā vāti evaṃ sabbattha attho veditabbo. Iti pubbabhāga-  
parabhāgacetanāva sandhāya idaṃ vuttaṃ- “sahāpi dukkhena sahāpi domana-  
ssenā” ti. Domanassameva cettha dukkhanti veditabbaṃ.

**481.** Catutthadhammasamādāne dasasupi padesu tissopi pubbabhāgāparabhā-  
gasanniṭṭhāpakacetanā sukhasampayuttā hontiyeva, taṃ sandhāya idaṃ vuttaṃ-  
“sahāpi sukkena sahāpi somanassenā” ti. Somanassameva cettha sukhanti vedi-  
tabbaṃ.

**482. Tittakālābūti** tittakarasa-alābu. **Visena saṃsatṭhoti** halāhalavisena sampa-  
yutto missito luḷito. **Nacchādessatīti** na ruccissati na tuṭṭhiṃ karissati. **Nigacchasīti**  
gamissasi. **Appaṭisaṅkhāya piveyyāti** taṃ appaccavekkhitvā piveyya.

**483. Āpānīyakaṃsoti** āpānīyassa madhurapānakassa bharitakaṃso. **Vaṇṇasa-  
mpannoti** pānakavaṇṇādīhi sampannaṃvaṇṇo, kaṃse pakkhittapānakavasena  
pānakakaṃsopi evaṃ vutto. **Chādessatīti** tañhi halāhalavisamaṃ yattha yattha

pakkhitaṃ hoti, tassa tasseva rasaṃ deti. Tena vuttaṃ “chādessatī” ti.

**484. Pūtimuttanti** muttameva. Yathā hi manussabhāvo suvaṇṇavaṇṇo pūtikāyo-  
tveva, tadahujātāpi galocilatā pūtilatātveva vuccati. Evaṃ taṅkhaṇaṃ gahitaṃ taru-  
ṇampi muttaṃ pūtimuttameva. **Nānābhesajjehīti** haritakāmalakādīhi nānosadhehi.  
**Sukhī assāti** arogo suvaṇṇavaṇṇo sukhī bhaveyya.

**485. Dadhi ca madhu cāti** suparisuddhaṃ dadhi ca sumadhuraṃ madhu ca.  
**Ekajjhaṃ saṃsaṭṭhanti** ekato katvā missitaṃ āluḷitaṃ. **Tassa tanti** tassa taṃ catu-  
madhurabhesajjaṃ pivato rucceyya. Idañca yaṃ bhagandarasaṃsaṭṭhaṃ lohitaṃ  
pakkhandati, na tassa bhesajjaṃ, āhāraṃ thambhetvā maggaṃ avalaṅjaṃ karoti.  
Yaṃ (2.0276) pana pittaṃsaṃsaṭṭhaṃ lohitaṃ, tassettaṃ bhesajjaṃ sītalakiriyāya  
pariyattabhūtaṃ.

**486. Viddheti** ubbiddhe. Meghavigamena dūrībhūteti attho. **Vigatavalāhake** Ti  
apagatameghe, **deveti** ākāse. **Ākāśagataṃ tamagatanti** ākāśagataṃ tamaṃ. **Puthu-**  
**samaṇabrāhmaṇaparappavādeti** puthūnaṃ samaṇabrāhmaṇasaṅkhātānaṃ  
paresaṃ vāde. **Abhivihaccāti** abhiantvā. **Bhāsate ca tapate ca virocate cāti** sara-  
dakāle majjhanhikasamaye ādiccova obhāsaṃ muñcati tapati vijjotatīti.

Idaṃ pana suttaṃ devatānaṃ ativiya piyaṃ manāpaṃ. Tatridaṃ vatthu- dakkhi-  
ṇadisāyaṃ kira hatthibhogajanapade saṅgaravīhāro nāma atthi. Tassa bhojanasā-  
ladvāre saṅgararukkhe adhiatthā devatā rattibhāge ekassa daharassa sarabha-  
ññavasena idaṃ suttaṃ osārentassa sutvā sādhu-kāraṃ adāsi. Daharo kiṃ esoti  
āha. Ahaṃ, bhante, imasmiṃ rukkhe adhiatthā devatāti. Kasmiṃ devate pasa-  
nnāsi, kiṃ sadde, udāhu sutteti? Saddo nāma, bhante, yassa kassaci hotiyeva,  
sutte pasannāmihi. Satthārā jetavane nisīditvā kathitadivase ca ajja ca ekabyañja-  
nepi nānaṃ natthīti. Assosi tvaṃ devate



satthārā kathitadivaseti? Āma, bhante. Kattha ÷hitā assosīti? Jetavanam, bhante, gatāmhi, mahesakkhāsu pana devatāsu āgacchantīsu tattha okāsam alabhitvā idheva ÷hatvā assosinti. Ettha ÷hitāya sakkā sutthu saddo sotunti? Tvaṃ pana, bhante, mayham saddam suṇasīti? Āma devateti. Dakkhiṇakaṇṇapasse nisīditvā kathanakālo viya, bhante, hotīti. Kiṃ pana devate satthu rūpam passasīti? Satthā mameva oloketīti maññamānā saṅghātuṃ na sakkomi, bhanteti. Visesam pana nibbattetuṃ asakkhittha devateti. Devatā tattheva antaradhāyi. Tam divasam kiresa devaputto sotāpattiphale patiṭṭhito. Evamidam suttam devatānam piyam manāpam. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Mahādhammasamādānasuttavaṇṇanā niṭṭhitā.

## 7. Vīmaṃsakasuttavaṇṇanā

**487. Evaṃ** (2.0277) **me sutanti** vīmaṃsakasuttam. Tattha **vīmaṃsakenāti** tayo vīmaṃsakā- atthavīmaṃsako saṅkhāravīmaṃsako satthuvīmaṃsakoti. Tesu, “paṇḍitā hāvuso, manussā vīmaṃsakā”ti (saṃ. ni. 3.2) ettha atthavīmaṃsako āgato. “Yato kho, ānanda, bhikkhu dhātukusalo ca hoti, āyatanakusalo ca hoti, paṭiccasamuppādakusalo ca hoti, ÷hānāṭṭhānakusalo ca hoti, ettāvata kho, ānanda, paṇḍito bhikkhu vīmaṃsakoti alam vacanāyā”ti (ma. ni. 3.124) ettha saṅkhāravīmaṃsako āgato. Imasmiṃ pana sutte satthuvīmaṃsako adhippeto. **Cetopariyā-** **yanti** cittavāram citta-paricchedam. **Samannesanāti** esanā pariyesanā upapari- rikkhā. **Iti viññāyāti** evaṃ vijānanatthāya.

**488. Dvīsu dhammesu tathāgato samannesitabboti** idha kalyāṇamittūpani- ssayam dasseti. Mahā hi esa kalyāṇamittūpanissayo nāma. Tassa mahantabhāvo evaṃ veditabbo- ekasmiṃ hi samaye āyasmā ānando upaḍḍham attano ānubhā- vena hoti, upaḍḍham kalyāṇamittānubhāvenāti cintetvā attano dhammatāya nicchetuṃ asakko bhagavantam upasaṅkamitvā pucchi,- “upaḍḍhamidaṃ, bhante, brahmacariyassa, yadidaṃ kalyāṇamittatā kalyāṇasahāyatā kalyāṇasa- mpavaṅkatā”ti. Bhagavā āha- “mā hevaṃ, ānanda, mā hevaṃ, ānanda, sakalame- vidaṃ, ānanda, brahmacariyam yadidaṃ kalyāṇamittatā kalyāṇasahāyatā, kalyā- ṇasampavaṅkatā. Kalyāṇamittassetam, ānanda, bhikkhuno pāṭikaṅkham kalyāṇa- sahāyassa kalyāṇasampavaṅkassa, ariyam aṭṭhaṅgikam maggam bhāvēssati, ariyam aṭṭhaṅgikam maggam bahulīkarissati. Kathaṅcānanda, bhikkhu kalyāṇa- mitto ...pe... ariyam aṭṭhaṅgikam maggam bhāveti, ariyam aṭṭhaṅgikam maggam bahulīkaroti. Idhānanda, bhikkhu sammādiṭṭhiṃ bhāveti ...pe... sammāsamādhiṃ bhāveti vivekanissitam evaṃ kho, ānanda, bhikkhu kalyāṇamitto ...pe... bahulīka- roti, tadamināpetam, ānanda, pariyāyena veditabbam. Yathā sakalamevidaṃ

brahmacariyaṃ yadidaṃ kalyāṇamittatā kalyāṇasahāyatā kalyāṇasampavaṅkatā. Mamañhi, ānanda, kalyāṇamittaṃ āgamma jātidhammā sattā jātiyā parimuccanti. Jarādhammā ...pe... sokaparidevadukkhadomanassupāyāsadhammā (2.0278) sattā sokaparidevadukkhadomanassupāyāsehi parimuccanti”ti (saṃ. ni. 5.2).

Bhikkhūnaṃ bāhiraṅgasampattiṃ kathentopi āha- “bāhiraṃ, bhikkhave, aṅganti karitvā nāññaṃ ekaṅgampi samanupassāmi, yaṃ evaṃ mahato atthāya saṃvattati, yathayidaṃ, bhikkhave, kalyāṇamittatā. Kalyāṇamittatā, bhikkhave, mahato atthāya saṃvattati”ti (a. ni. 1.113). Mahācundassa kilesasallekhapaṭi-padaṃ kathentopi, “pare pāpamittā bhavissanti, mayamettha kalyāṇamittā bhavi-ssāmāti sallekho karaṇīyo”ti (ma. ni. 1.83) āha. Meghiyattherassa vimuttiparipāca-niyadhamme kathentopi, “aparipakkāya, meghiya, cetovimuttiyā pañca dhammā paripākāya saṃvattanti. Katame pañca? Idha, meghiya, bhikkhu kalyāṇamitto hoti”ti (udā. 31) kalyāṇamittūpanissayameva visesesi. Piyaputtassa rāhulathe-rassa abhiṅhovādaṃ dentopi-

“Mitte bhajassu kalyāṇe, pantañca sayanāsaṇaṃ;

vivittaṃ appanigghosaṃ, mattaññū hohi bhojane.

Cīvare piṇḍapāte ca, paccaye sayanāsane;

etesu taṅhaṃ mākāsi, mā lokaṃ punarāgami”ti. (su. ni. 340, 341)-

Kalyāṇamittūpanissayameva sabbapaṭhamaṃ kathesi. Evaṃ mahā esa kalyāṇa-mittūpanissayo nāma. Idhāpi taṃ dassento bhagavā **dvīsu dhammesu tathāgato samannesitabboti** desanaṃ ārabhi. Paṇḍito bhikkhu dvīsu dhammesu tathāgataṃ esatu gavesatūti attho. Etena bhagavā ayaṃ mahājaccoti vā, lakkhaṇasampa-nnoti vā, abhirūpo dassanīyoti vā, abhiññāto abhilakkhitoti vā, imaṃ nissāyāhaṃ cīvarādayo paccaye labhissāmīti vā, evaṃ cintetvā maṃ nissāya vasanakiccaṃ natthi. Yo pana evaṃ sallakkheti, “pahoti me esa satthā hutvā satthukiccaṃ sādhe-tun”ti, so maṃ bhajatūti sīhanādaṃ nadati. Buddhasīhanādo kira nāmesa sutta-ntoti.

Idāni (2.0279) te dve dhamme dassento **cakkhosotaviññeyyesūti** āha. Tattha satthu kāyiko samācāro vīmaṃsakassa cakkhuvīññeyyo dhammo nāma. Vāca-siko samācāro sotaviññeyyo dhammo nāma. Idāni tesu samannesitabbākāraṃ dassento **ye saṃkiliṭṭhāti**-ādimāha. Tattha **saṃkiliṭṭhāti** kilesasampayuttā. Te ca na cakkhusotaviññeyyā. Yathā pana udaye calante vā puppuḷake vā muñcante anto maccho atthīti viññāyati, evaṃ paṇātipātādīni vā karontassa, musāvādādīni vā bhaṇantassa kāyavacīsamācāre disvā ca sutvā ca taṃsamuttāpapakacittaṃ saṃkiliṭṭhanti viññāyati. Tasmā evamāha. Saṃkiliṭṭhacittassa hi kāyavacīsamācā-rāpi saṃkiliṭṭhāyeva nāma. **Na te tathāgatassa saṃvijjantī** Ti na te tathāgatassa atthi. Na upalabbhantīti evaṃ jānātīti attho. Natthitāyeva hi te na upalabbhanti na paṭicchannatāya. Tathā hi bhagavā ekadivasaṃ imesu dhammesu bhikkhu-saṅghaṃ pavārento āha- “handā dāni, bhikkhave, pavāremi vo, na ca me kiñci garahatha kāyikaṃ vā vācasikaṃ vā”ti. Evaṃ vutte āyasmā sārīputto utthāyāsanā ekaṃsaṃ uttarāsaṅgaṃ karitvā yena bhagavā tenañjalim paṇāmetvā bhaga-vantaṃ etadavoca- “na kho mayaṃ, bhante, bhagavato kiñci garahāma kāyikaṃ

vā vācasikaṃ vā. Bhagavā hi, bhante, anuppannassa maggassa uppādetā, asa-  
ñjātassa maggassa sañjānetā, anakkhātassa maggassa akkhātā, maggaññū  
maggavidū maggakovidō. Maggānugā ca, bhante, etarahi sāvakā viharanti  
pacchāsamannāgatā”ti (saṃ. ni. 1.215). Evaṃ parisuddhā tathāgatassa kāyavacī-  
samācārā. Uttaropi sudaṃ māṇavo tathāgatassa kāyavacīdvāre anārādhanīyaṃ  
kiñci passissāmīti satta māse anubandhitvā likkhāmatampi na addasa. Manussa-  
bhūto vā esa buddhabhūtaṃ kāyavacīdvāre kiṃ anārādhanīyaṃ passissati?  
Māropi devaputto bodhisattassa sato mahābhinnikkhamanato paṭṭhāya chabba-  
ssāni gavesamāno kiñci anārādhanīyaṃ nāddasa, antamaso cetoparivitakkama-  
ttampi. Māro kira cintesi- “sacassa vitakkitamattampi akusalaṃ passissāmi,  
tattheva naṃ muddhani paharivā pakkamissāmī”ti. So chabbassāni adisvā  
buddhabhūtampi ekaṃ vassaṃ anubandhitvā kiñci vajjaṃ apassanto gamanasa-  
maye vanditvā-

“Mahāvīra (2.0280) mahāpuññaṃ, iddhiyā yasasā jalaṃ;

sabbaverabhayātitaṃ, pāde vandāmi gotaman”ti. (saṃ. ni. 1.159)-

Gāthaṃ vatvā gato.

**Vītimissāti** kāle kaṇhā, kāle sukkāti evaṃ vomissakā. **Vodātāti** parisuddhā nikki-  
lesā. **Samvijantīti** vodātā dhammā atthi upalabbhanti. Tathāgatassa hi parisuddhā  
kāyasamācārādayo. Tenāha- “cattārimāni, bhikkhave, tathāgatassa arakkhe-  
yyāni. Katamāni cattāri? Parisuddhakāyasamācāro, bhikkhave, tathāgato, natthi  
tathāgatassa kāyaduccaritaṃ, yaṃ tathāgato rakkheyya, mā me idaṃ paro aññā-  
sī”ti. Parisuddhavacīsamācāro... parisuddhamanosamācāro... parisuddhājīvo,  
bhikkhave, tathāgato, natthi tathāgatassa micchājīvo, yaṃ tathāgato rakkheyya,  
mā me idaṃ paro aññāsī”ti (a. ni. 7.58).

**Imaṃ kusalaṃ dhammanti** imaṃ anavajjaṃ ājivaṭṭhamakasīlaṃ. “Ayaṃ āyasmā  
satthā kiṃ nu kho dīgharattaṃ samāpanno aticirakālato paṭṭhāya iminā samannā-  
gato, udāhu ittarasamāpanno hiyyo vā pare vā parasuve vā divase samāpanno”ti  
evaṃ gavesatūti attho. Ekaccena hi ekasmiṃ ṭhāne vasantena bahu micchājīva-  
kammaṃ kataṃ, taṃ tattha kālātikkame paññāyati, pākaṭaṃ hoti. So aññataraṃ  
paccantagāmaṃ vā samuddatīraṃ vā gantvā paṇṇasālaṃ kāretvā āraññako viya  
hutvā viharati. Manussā sambhāvanaṃ uppādetvā tassa paṇite paccaye denti.  
Janapadavāsino bhikkhū tassa parihāraṃ disvā, “atidappito vatāyaṃ āyasmā, ko  
nu kho eso”ti pariggaṇhantā, “asukatṭhāne asukaṃ nāma micchājīvaṃ katvā  
pakkantabhikkhū”ti ñatvā na sakkā iminā saddhiṃ uposatho vā pavāraṇā vā  
kāntunti sannipatitvā dhammena samena ukkhepanīyādīsu aññataraṃ kammaṃ  
karonti. Evarūpāya paṭicchannapaṭipattiyā atthibhāvaṃ vā natthibhāvaṃ vā vīmaṃ-  
sāpetuṃ evamāha.

**Evaṃ jānāti** Ti dīgharattaṃ samāpanno, na ittarasamāpannoti jānāti. Anaccha-  
riyaṃ cetāṃ. Yaṃ tathāgatassa etarahi sabbaññutaṃ pattassa dīgharattaṃ ājiva-  
ṭṭhamakasīlaṃ (2.0281) parisuddhaṃ bhavēyya. Yassa bodhisattakālepi evaṃ  
ahosi.

Atīte kira gandhārarājā ca vedeharājā ca dvepi sahāyakā hutvā kāmesu ādī-

navam disvā rajjāni puttānaṃ niyyātetvā isipabbajjaṃ pabbajitvā ekasmiṃ arañña-gāmake piṇḍāya caranti. Paccanto nāma dullabhaloṇo hoti. Tato aloṇaṃ yāguṃ labhitvā ekissāya sālāya nisīditvā pivanti. Antarantare manussā loṇacuṇṇaṃ āharitvā denti. Ekadivasam eko vedehisissa paṇṇe pakkhipitvā loṇacuṇṇaṃ adāsi. Vedehisi gahetvā upaḍḍhaṃ gandhārisissa-santike ṭhapetvā upaḍḍhaṃ attano santike ṭhapesi. Tato thokaṃ paribhuttāvasesaṃ disvā, “mā idaṃ nassī”ti paṇṇena veṭhetvā tiṇagahane ṭhapesi. Puna ekasmiṃ divase yāgupānakāle satiṃ katvā olokeno taṃ disvā gandhārisiṃ upasaṅkamtivā, “ito thokaṃ gaṇhatha ācariyā”ti āha. Kuto te laddhaṃ vedehisīti? Tasmīṃ divase paribhuttāvasesaṃ “mā nassī”ti mayā ṭhapitanti. Gandhārisi gahetuṃ na icchati, aloṇakaṃyeva yāguṃ pivitvā vedehaṃ isiṃ avoca-

“Hitvā gāmasahassāni, paripuṇṇāni soḷasa;

koṭṭhāgārāni phītāni, sannidhiṃ dāni kubbasī”ti. (jā. 1.7.76);

Vedehisi avoca- “tumhe rajjaṃ pahāya pabbajitā, idāni kasmā loṇacuṇṇamatta-sannidhikāraṇā pabbajjāya anucchavikaṃ na karoṭhā”ti? Kiṃ mayā kataṃ vedehisīti? Atha naṃ āha-

“Hitvā gandhāravisaṃyaṃ, pahūtadhanadhāriyaṃ;

pasāsanato nikkhanto, idha dāni pasāsasi”ti. (jā. 1.7.77);

Gandhāro āha-

“Dhammaṃ bhaṇāmi vedeha, adhammo me na rucati;

dhammaṃ me bhaṇamānassa, na pāpamupalimpatī”ti. (jā. 1.7.78);

Vedeho (2.0282) āha-

“Yena kenaci vaṇṇena, paro labhati ruppanaṃ;

mahatthiyampi ce vācaṃ, na taṃ bhāseyya paṇḍito” ti. (jā. 1.7.79);  
Gandhāro āha-

“Kāmaṃ ruppātu vā mā vā, bhusaṃva vikiriyatu;  
dhammaṃ me bhaṇamānassa, na pāpamupalimpatī” ti. (jā. 1.7.80);

Tato vedehisi yassa sakāpi buddhi natthi, ācariyasantike vinayaṃ na sikkhati,  
so andhamahiṃso viya vane caratīti cintetvā āha-

“No ce assa sakā buddhi, vinayo vā susikkhito;  
vane andhamahiṃsova, careyya bahuko jano.  
Yasmā ca panidhekacce, āceramhi susikkhitā;  
tasmā vinītavinayā, caranti susamāhitā” ti. (jā. 1.7.81-82);

Evañca pana vatvā vedehisi ajānitvā mayā katanti gandhārisiṃ khamāpesi. Te  
ubhopi tapaṃ caritvā brahmalokaṃ agamaṃsu. Evaṃ tathāgatassa bodhisattakā-  
lepi dīgharattaṃ ājivaṭṭhamakasiṃ parisuddhaṃ ahosi.

**Uttajjhāpanno ayamāyasmā bhikkhu yasapattoti** ayamāyasmā amhākaṃ satthā  
bhikkhu ñattaṃ paññātabhāvaṃ pākaṭabhāvaṃ ajjhāpanno nu kho, sayañca pari-  
vārasampattiṃ patto nu kho noti. Tena cassa paññātajjhāpannabhāvena yasasa-  
nissitabhāvena ca kiṃ ekacce ādīnavā sandissanti udāhu noti evaṃ samannesa-  
ntūti dasseti. **Na tāva, bhikkhaveli**, bhikkhave, yāva bhikkhu na rājarājamahāmattā-  
dīsu abhiññātabhāvaṃ vā parivārasampattiṃ vā āpanno hoti, tāva ekacce mānāti-  
mānādayo ādīnavā na saṃvijjanti upasantūpasanto viya sotāpanno viya sakadā-  
gāmī viya ca viharati. Ariyo nu kho puthujjano nu khotipi ñātuṃ na sakkā hoti.

**Yato** (2.0283) **ca kho, bhikkhaveli** yadā pana idhekacco bhikkhu ñāto hoti pari-  
vārasampanno vā, tadā tiṅhena siṅgena gogaṇaṃ vijjhanto duṭṭhagoṇo viya, miga-  
saṅghaṃ abhimaddamāno dīpi viya ca aññe bhikkhū tattha tattha vijjhanto agā-  
ravo asabhāgavutti aggapādena bhūmiṃ phusanto viya carati. Ekacco pana kula-  
putto yathā yathā ñāto hoti yasassī, tathā tathā phalabhārabharito viya sāli suṭṭhu-  
taraṃ onamati, rājarājamahāmattādīsu upasaṅkamantesu akiñcanabhāvaṃ  
paccavekkhitvā samaṇasaññaṃ upaṭṭhapetvā chinnavisāṇa-usabho viya, caṇḍāla-  
dārako viya ca sorato nivāto nīcacitto hutvā bhikkhusaṅghassa ceva sadevakassa  
ca lokassa, hitāya sukhāya paṭipajjati. Evarūpaṃ paṭipattiṃ sandhāya “nāssa idhe-  
kacce ādīnavā” ti āha.

Tathāgato pana aṭṭhasu lokadhammesu tādī, so hi lābhēpi tādī, alābhēpi tādī,  
yasepi tādī, ayasepi tādī, pasaṃsāyapi tādī, nindāyapi tādī, sukhepi tādī, dukkhepi  
tādī, tasmā sabbākārena nāssa idhekacce ādīnavā saṃvijjanti. **Abhayūparatoti**  
abhayo hutvā uparato, accantūparato satatūparatoti attho. Na vā bhayena uparato-  
tipi abhayūparato. Cattāri hi bhayāni kilesabhayaṃ vaṭṭabhayaṃ duggatibhayaṃ  
upavādabhayanti. Puthujjano catūhipi bhayehi bhāyati. Sekkhā tīhi, tesañhi dugga-  
tibhayaṃ pahīnaṃ, iti satta sekkhā bhayūparatā, khīṇāsavo abhayūparato nāma,  
tassa hi ekampi bhayaṃ natthi. Kiṃ paravādabhayaṃ natthīti? Natthi. Parānu-  
ddayaṃ pana paṭicca, “mādisaṃ khīṇāsavaṃ paṭicca sattā mā nassantū” ti upa-  
vādaṃ rakkhati. Mūluppalavāpivihāravāsī yasatthero viya.

Thero kira mūluppalavāpigāmaṃ piṇḍāya pāvīsi. Athassa upaṭṭhākakuladvāraṃ

pattassa pattam gahetvā thaṇḍilapīṭhakaṃ nissāya āsanaṃ paññapesuṃ. Amaccadhīṭāpi taṃyeva pīṭhakaṃ nissāya paratobhāge nicataraṃ āsanaṃ paññāpetvā nisīdi. Eko nevāsiko bhikkhu pacchā piṇḍāya pavīṭṭho dvāre ṭhatvāva olokeno therō amaccadhīṭarā saddhiṃ ekamañce nisinnoti sallakkhetvā, “ayaṃ paṃsukūliko vihāreva upasantūpasanto (2.0284) viya viharati, antogāme pana upaṭṭhāyikāhi saddhiṃ ekamañce nisīdati”ti cintetvā, “kiṃ nu kho mayā duddiṭṭhan”ti punappunaṃ oloketvā tathāsaññīva hutvā pakkāmi. Theropi bhattakiccaṃ katvā vihāraṃ gantvā vasanaṭṭhānaṃ pavisitvā dvāraṃ pidhāya nisīdi. Nevāsikopi katabhattakicco vihāraṃ gantvā, “taṃ paṃsukūlikaṃ niggaṇhitvā vihārā nikkadḍhissāmi”ti asaññatanīhārena therassa vasanaṭṭhānaṃ gantvā paribhogaghaṭato uluṅkena udakaṃ gahetvā mahāsaddaṃ karonto pāde dhovi. Therō, “ko nu kho ayaṃ asaññatacāriko”ti āvajjanto sabbaṃ ñatvā, “ayaṃ mayi manaṃ padosetvā apāyūpago mā ahoṣī”ti vehāsaṃ abbhuggantvā kaṇṇikāmaṇḍalasaṃpe pallaṅkena nisīdi. Nevāsiko duṭṭhākārena ghaṭikaṃ ukkhipitvā dvāraṃ vivaritvā anto pavīṭṭho therāṃ apassanto, “heṭṭhāmañcaṃ pavīṭṭho bhavissati”ti oloketvā tatthāpi apassanto nikkhamituṃ ārabhi. Therō ukkāsi. Itaro uddhaṃ olokeno disvā adhivāsetuṃ asakkonto evamaṃha- “patirūpaṃ te, āvuso, paṃsukūlika evaṃ ānubhāvasaṃpannaṃ upaṭṭhāyikāya saddhiṃ ekamañce nisīdituṃ”ti. Pabbajitā nāma, bhante, mātuḡāmena saddhiṃ na ekamañce nisīdanti, tumhehi pana duddiṭṭhameṭanti. Evaṃ khīṇāsavā parānuddayaṃ upavādaṃ rakkhanti.

**Khayā rāgassāti** rāgassa khayeneva. Vītarāgattā kāme na paṭisevati, na paṭisaṅkhāya vāretvāti. **Tañceti** evaṃ tathāgatassa kilesappahānaṃ ñatvā tattha tattha ṭhitanisinnakālādīsipi catuparisamajjhe alaṅkatadhammāsane nisīditvāpi itipi sathā vītarāgo vītadoso vītamoho vantakilesa pahīnamalo abbhā muttapuṇṇacando viya suparisuddhoti evaṃ tathāgatassa kilesappahāne vaṇṇaṃ kathayaṃ mānaṃ taṃ vīmaṃsakaṃ bhikkhuṃ pare evaṃ puccheyyuṃ ceti attho.

**Ākārāti** kāraṇāni. **Anvayāti** anubuddhiyo. **Saṅghe vā viharantoti** appekadā aparicchinnagaṇanaṃ bhikkhusaṅghassa majjhe viharanto. **Eko vā viharantoti** icchāmaṃ, bhikkhave, aḍḍhamāsaṃ paṭisallīyitunti, temāsaṃ paṭisallīyitunti evaṃ paṭisallāne ceva pālīyeyyakavanasaṅḡe ca ekako viharanto. **Sugatāti** suṭṭhugatā suppaṭipannā kārakā yuttapayuttā. Evarūpāpi hi ekacce bhikkhū atthi. **Duggatāti** (2.0) duṭṭhugatā duppaṭipannā kāyadaḡhibahulā viṣaṭṭhakammaṭṭhānā. Evarūpāpi ekacce atthi. **Gaṇamanusāsantīti** gaṇabandhanena baddhā gaṇārāmā gaṇabahulikā hutvā gaṇaṃ pariharanti. Evarūpāpi ekacce atthi. Tesāṃ paṭipakkhabhūtā gaṇato nissaṭā viṣaṃsaṭṭhā vippamuttavīhārinopi atthi.

**Āmisesu sandissantīti** āmisagiddhā āmisacakkhukā catupaccaya-āmisatthameva āhiṇḍamānā āmisesu sandissamānakabhikkhūpi atthi. Āmisena anupalittā catūhi paccayehi vinivattamānasā abbhā muttacandasadisā hutvā viharamānāpi atthi. **Nāyamāyasmā taṃ tena avajānātīti** ayaṃ āyasmā sathā tāya tāya paṭipattiyā taṃ taṃ puggalaṃ nāvajānāti, ayaṃ paṭipanno kārako, ayaṃ gaṇato nissaṭo viṣaṃsaṭṭho. Ayaṃ āmisena anupalitto paccayehi vinivattamānasā abbhā mutto candimā viyāti evamassa gehasitavasena ussādanāpi natthi. Ayaṃ duppaṭipanno

akārako kāyadaḥhibahulo vissatṭhakammaṭṭhāno, ayam gaṇabandhanabaddho, ayam āmisagiddho lolo āmisacakkhukoti evamassa gehasitavasena apasādanāpi natthīti attho. Iminā kiṃ kathitaṃ hoti? Tathāgatassa sattesu tāḍibhāvo kathito hoti. Ayañhi-

“Vadhakassa devadattassa, corassaṅgulimālino;

dhanapāle rāhule ca, sabbesaṃ samako muni”ti. (mi. pa. 6.6.5);

**489. Tatra, bhikkhave** Ti tesu dvīsu vīmaṃsakesu. Yo, “ke paṇāyasmato ākāra”-ti pucchāyaṃ āgato gaṇṭhivīmaṃsako ca, yo “abhayūparato ayamāyasmā”ti āgato mūlavīmaṃsako ca. Tesu mūlavīmaṃsakena tathāgatova uttari paṭipucchitabbo. So hi pubbe parasseva kathāya niṭṭhaṅgato. Paro ca nāma jānitvāpi katheyya ajānitvāpi. Evamassa kathā bhūtāpi hoti abhūtāpi, tasmā parasseva kathāya niṭṭhaṃ agantvā tato uttari tathāgatova paṭipucchitabboti attho.

**Byākaramānoti** ettha yasmā tathāgatassa micchābyākaraṇaṃ nāma natthi, tasmā sammā micchāti avatvā byākaramānotveva vuttaṃ. **Etam pathohamasmi** (2.0) **etam gocaroti** esa mayhaṃ patho esa gocaroti attho. “Etāpātho”tipi pāṭho, tassattho mayhaṃ ājivaṭṭhamakasīlaṃ parisuddhaṃ, svāhaṃ tassa parisuddhabhāvena vīmaṃsakassa bhikkhuno ñāṇamukhe etāpātho, evaṃ āpāthaṃ gacchāmīti vuttaṃ hoti. **No ca tena tammayoti** tenapi cāhaṃ parisuddhena sīlena na tammayo, na sataṇho, parisuddhasīlattāva nittaṇhohamasmiṭi dīpeti.

**Uttaruttariṃ paṇītapāṇītanti** uttaruttariṃ ceva paṇītatarañca katvā deseti. **Kaṇhasukkasappaṭibhāganti** kaṇhaṃ ceva sukkañca, tañca kho sappaṭibhāgaṃ savi-pakkhaṃ katvā, kaṇhaṃ paṭibāhitvā sukkanti sukkaṃ paṭibāhitvā kaṇhanti evaṃ sappaṭibhāgaṃ katvā kaṇhasukkaṃ deseti. Kaṇhaṃ desentopi sa-ussāhaṃ savi-pākaṃ deseti, sukkaṃ desentopi sa-ussāhaṃ savipākaṃ deseti. **Abhiññāya idhekaccaṃ dhammaṃ dhammesu niṭṭhaṃ gacchatīti** tasmīṃ desite dhamme ekaccaṃ paṭivedhadhammaṃ abhiññāya tena paṭivedhadhammena desanādhamme niṭṭhaṃ gacchati. **Satthari pasīdatīti** evaṃ dhamme niṭṭhaṃ gantvā bhīyosoma-ttāya sammāsambuddho so bhagavatī satthari pasīdati. Tena pana bhagavatā yo dhammo akkhāto, sopi svākkhāto bhagavatā dhammo niyyānikattā. Yvāssa taṃ dhammaṃ paṭipanno saṅgho, sopi suppaṭipanno vaṅkādidosarahitaṃ paṭipadaṃ paṭipannattāti evaṃ dhamme saṅghepi pasīdati. **Tañceti** taṃ evaṃ pasannaṃ tattha tattha tiṇṇaṃ ratanānaṃ vaṇṇaṃ kathentaṃ bhikkhuṃ.

**490. Imehi ākārehīti** imehi satthuvīmaṃsanakāraṇehi. **Imehi padehīti** imehi akkharasampiṇḍanapadehi. **Imehi byañjanehīti** imehi idha vuttehi akkharehi. **Saddhā nivīṭṭhāti** okappanā patiṭṭhitā. **Mūlajātāti** sotāpattimaggavasena sañjāta-mūlā. Sotāpattimaggo hi saddhāya mūlaṃ nāma. **Ākāravatīti** kāraṇaṃ pariyesitvā gahitattā sakāraṇā. **Dassanamūlikāti** sotāpattimaggamūlikā. So hi dassananti vuccati. **Daḥhāti** thirā. **Asaṃhāriyāti** harituṃ na sakkā. **Samaṇena vāti** samitapāpasamaṇena vā. **Brāhmaṇena vāti** bāhitapāpabrāhmaṇena vā. **Devena vāti** upapattidevena vā. **Mārena vāti** vasavattimārena (2.0287) vā, sotāpannassa hi vasavattimārenāpi saddhā asaṃhāriyā hoti sūrambaṭṭhassa viya.

So kira satthu dhammadesanaṃ sutvā sotāpanno hutvā gehaṃ āgato. Atha

māro dvattiṃsavavaralakkhaṇappaṭimaṇḍitaṃ buddharūpaṃ māpetvā tassa ghara-  
dvāre ṭhatvā- “satthā āgato”ti sāsanaṃ paṇi. Sūro cintesi, “ahaṃ idāneva satthu  
santikā dhammaṃ sutvā āgato, kiṃ nu kho bhavissati”ti upasaṅkamtivā satthusa-  
ññāya vanditvā aṭṭhāsi. Māro āha- “yaṃ te mayā, sūrambatṭha, rūpaṃ aniccaṃ  
...pe... viññāṇaṃ aniccanti kathitaṃ, taṃ anupadhāretvāva sahasā mayā evaṃ  
vuttaṃ. Tasmā tvaṃ rūpaṃ niccaṃ ...pe... viññāṇaṃ niccanti gaṇhāhi”ti. Sūro  
cintesi- “aṭṭhānametaṃ, yaṃ buddhā anupadhāretvā apaccakkaṃ katvā kiñci  
katheyyuṃ, addhā ayaṃ mayhaṃ vibādhanatthaṃ māro āgato”ti. Tato naṃ tvaṃ  
māroti āha. So musāvādaṃ kātuṃ nāsakkhi, āma mārosmīti paṭijāni. Kasmā āga-  
tosīti vutte tava saddhācālanatthanti āha. Kaṇha pāpima, tvaṃ tāva ekako tiṭṭha,  
tādisānaṃ mārānaṃ satampi sahasampi mama saddhaṃ cāletuṃ asamatthaṃ,  
maggena āgatā saddhā nāma silāpathaviyaṃ paṭiṭṭhitasineru viya acalā hoti, kiṃ  
tvaṃ etthāti accharaṃ pahari.



So ðhātum asakkonto tatthevantaradhāyi. **Brahmunā vāti** brahmakāyikādīsu añña-tarabrahmunā vā. **Kenaci vā lokasminti** ete samañādayo ðhapetvā aññenapi kenaci vā lokasmiṃ haritum na sakkā. **Dhammasamannesanāti** sabhāvasamannesanā. **Dhammatāsusamanniṭṭhoti** dhammatāya susamanniṭṭho, sabhāveneva suṭṭhu samannesito hotīti attho. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Vīmaṃsakasuttavaṇṇanā niṭṭhitā.

## 8. Kosambiyasuttavaṇṇanā

**491. Evaṃ me sutanti** kosambiyasuttam. Tattha **kosambiyanti** evaṃnāmake nagare. Tassa kira nagarassa ārāmapokkharāṇī-ādīsu tesu tesu ðhānesu kosambarukkhāva ussannā ahesum, tasmā kosambīti saṅkham agamāsi. Kusambassa nāma isino assamato avidūre māpitattātipi (2.0288) eke. **Ghositārāmeti** ghositaseṭṭhinā kārite ārāme.

Pubbe kira addilaraṭṭham nāma ahosi. Tato kotūhalako nāma daliddo chātaka-bhayena saputtadāro kedāraparicchinnam subhikkham raṭṭham gacchanto puttam vahitum asakkonto chaḍḍetvā agamāsi. Mātā nivattivā tam gahetvā gatā. Te ekaṃ gopālakagāmakam pavisiṃsu, gopālakānañca tadā pahatapāyaso paṭiyatto hoti, tato pāyasam labhitvā bhuñjiṃsu. Atha so puriso pahūtapāyasam bhuñjitvā jirāpetum asakkonto rattibhāge kālam katvā tattheva sunakhiyā kucchimhi paṭisandhiṃ gahetvā kukkuro jāto. So gopālakassa piyo ahosi manāpo, gopālako ca paccekabuddham upaṭṭhāsi. Paccekabuddhopi bhattakiccāvasāne kukkurassa ekaṃ piṇḍam deti. So paccekabuddhe sineham uppādetvā gopālakena saddhiṃ paṇṇasālampi gacchati.

So gopālake asannihite bhattavelāya sayameva gantvā kālārocanattham paṇṇasāladvāre bhussati, antarāmaggepi caṇḍamige disvā bhussitvā palāpeti. So paccekabuddhe mudukena cittena kālam katvā devaloke nibbatti. Tatrassa ghosakadevavuttotveva nāmam ahosi. So devalokato cavitvā kosambiyam ekasmiṃ kulaghare nibbatti. Tam aputtako seṭṭhi tassa mātāpitūnam dhanam datvā puttam katvā aggahesi. Atha so attano putte jāte sattakkhattum mārāpetum upakkami. So puññavantatāya sattasupi ðhānesu maraṇam appatvā avasāne ekāya seṭṭhidhītāya veyyattiyena laddhajiviko aparabhāge pitu-accayena seṭṭhiṭṭhānam patvā **ghositaseṭṭhi** nāma jāto. Aññepi kosambiyam kukkuṭaseṭṭhi pāvārikaseṭṭhīti dve seṭṭhino santi. Imehi saddhiṃ tayo ahesum.

Tena ca samayena tesam sahāyakānam seṭṭhīnam kulūpakā pañcasatā isayo pabbatapāde vasiṃsu. Te kālena kālam loṇambilasevanatthāya manussapatham āgacchanti. Athekasmiṃ vāre gimhasamaye manussapatham (2.0289) āga-

cchantā nirudakamahākantāraṃ atikkamitvā kantārapariyosāne mahantaṃ nigrodharukkhaṃ disvā cintesuṃ- “yādiso ayaṃ rukkho, addhā ettha mahesakkhāya devatāya bhavitabbaṃ, sādhu vatassa, sace no pāṇiyaṃ vā bhojanīyaṃ vā dadeyyā”ti. Devatā isīnaṃ ajjhāsayaṃ veditvā imesaṃ saṅghaṃ karissāmīti attano ānubhāvena viṭapantarato naṅgalasīsamattaṃ udakadhāraṃ pavattesi. Isigaṇo rajatakkhandhasadisāṃ udakavaṭṭiṃ disvā attano bhājanehi udakaṃ gahetvā paribhogaṃ katvā cintesi- “devatāya amhākaṃ paribhoga-udakaṃ dinnaṃ, idaṃ pana agāmakāṃ mahā-araññaṃ, sādhu vatassa, sace no āhārampi dadeyyā”ti. Devatā isīnaṃ upasaṃkappanavasena dibbāni yāgukhajjakādīni datvā santappaesi. Isayo cintayīmsu- “devatāya amhākaṃ paribhoga-udakampi bhojanampi sabbaṃ dinnaṃ, sādhu vatassa, sace no attānaṃ dasseyyā”ti.

Devatā tesāṃ ajjhāsayaṃ veditvā upaḍḍhakāyaṃ dassesi. Te āhaṃsu- “devate, mahatī te sampatti, kiṃ kammaṃ katvā imaṃ sampattiṃ adhigatāsī”ti? Bhante, nātimahantaṃ parittakaṃ kammaṃ katvāti. Upaḍḍha-uposathakammaṃ nissāya hi devatāya sā sampatti laddhā.

Anāthapiṇḍikassa kira gehe ayaṃ devaputto kammakāro ahosi. Setṭhissa hi gehe uposathadivasesu antamaso dāsakammakāre upādāya sabbo jano uposathiko hoti. Ekadivasaṃ ayaṃ kammakāro ekakova pāto uṭṭhāya kammantaṃ gato. Mahāsetṭhi nivāpaṃ labhanamanusse sallakkhento etassevekassa araññaṃ gatabhāvaṃ ñatvā assa sāyamāsathāya nivāpaṃ adāsi. Bhattakārikā dāsī ekasseva bhattaṃ pacitvā araññaṃ āgatassa bhattaṃ vaḍḍhetvā adāsi, kammakāro āha- “aññesu divasesu imasmiṃ kāle gehaṃ ekasaddaṃ ahosi, ajja ativiya sannisīnaṃ, kiṃ nu kho etan”ti? Tassa sā ācikkhi- “ajja imasmiṃ gehe sabbe manussā uposathikā, mahāsetṭhi tuyhevekassa nivāpaṃ adāsi”ti. Evaṃ ammāti? Āma sāmīti. Imasmiṃ kāle uposathaṃ samādinnassa uposathakammaṃ hoti na hotīti mahāsetṭhiṃ puccha ammāti? Tāya gantvā pucchito mahāsetṭhi āha- “sakala-uposathakammaṃ na hoti, upaḍḍhakammaṃ pana hoti, uposathiko hotū”ti (2.029) Kammakāro bhattaṃ abhuñjitvā mukhaṃ vikkhāletvā uposathiko hutvā vasanaṭṭhānaṃ gantvā nipajji. Tassa āhāraparikkhīṇakāyassa rattiṃ vāto kuppi. So paccūsasamaye kālaṃ katvā upaḍḍha-uposathakammanissandena mahāvaṭṭani-aṭaviyaṃ nigrodharukkhe devaputto hutvā nibbatti. So taṃ pavattiṃ isīnaṃ ārocesi.

Isayo tumhehi mayaṃ buddho, dhammo, saṅghoti asutapubbaṃ sāvītā, uppanno nu kho loke buddhoti? Āma, bhante, uppannoti. Idāni kuhiṃ vasatīti? Sāvattiṃ nissāya jetavane, bhanteti. Isayo tiṭṭhatha tāva tumhe mayaṃ satthāraṃ passissāmāti haṭṭhatuṭṭhā nikkhamitvā anupubbena kosambinagaraṃ sampāpuṇīmsu. Mahāsetṭhino, “isayo āgatā”ti paccuggamaṃ katvā, “sve amhākaṃ bhikkhaṃ gaṇhatha, bhante”ti nimantetvā punadivase isigaṇassa mahādānaṃ adaṃsu. Isayo bhuñjitvāva gacchāmāti āpucchiṃsu. Tumhe, bhante, aññasmiṃ kāle ekampi māsaṃ dvepi tayopi cattāropi māse vasitvā gacchatha. Imasmiṃ pana vāre hiyyo āgantvā ajjeva gacchāmāti vadatha, kimidanti? Āma gahapatayo buddho loke uppanno, na kho pana sakkā jīvantarāyo vedituṃ, tena mayaṃ turitā

gacchāmāti. Tena hi, bhante, mayampi gacchāma, amhehi saddhimyeva gacchathāti. Tumhe agāriyā nāma mahājaṭā, tiṭṭhatha tumhe, mayaṃ puretaraṃ gamissāmāti nikkhamitvā ekasmiṃ ṭhāne dvepi divasāni avasitvā turitagamaneneva sāvattiṃ patvā jetavanavihāre satthu santikameva agamaṃsu. Satthu madhura-dhammakathaṃ sutvā sabbeva pabbajitvā arahattaṃ pāpuṃsu.

Tepi tayo seṭṭhino pañcahi pañcahi sakaṭasatehi sappimadhuphāṇitādīni ceva paṭṭunnadukūlādīni ca ādāya kosambito nikkhamitvā anupubbena sāvattiṃ patvā jetavanasāmante khandhāvāraṃ bandhitvā satthu santikaṃ gantvā vanditvā paṭi-santhāraṃ katvā ekamantaṃ nisīdiṃsu. Satthā tiṇṇampi sahāyakānaṃ madhura-dhammakathaṃ kathesi. Te balavasomanassajātā satthāraṃ nimantetvā punadivase mahādānaṃ adaṃsu. Puna nimantetvā punadivaseti evaṃ aḍḍhamāsaṃ dānaṃ datvā, “amhākaṃ janapadaṃ āgamanāya paṭiññaṃ dethā”ti pādamūle nipajjiṃsu. Bhagavā, “suññāgāre kho gahapatayo tathāgatā abhiraṃti”ti āha. Ettāvataṃ paṭiññā dinnā nāma hotīti gahapatayo (2.0291) sallakkhetvā dinnā no bhagavatā paṭiññāti dasabalaṃ vanditvā nikkhamitvā antarāmagge yojane yojane ṭhāne vihāraṃ kāretvā anupubbena kosambiṃ patvā, “loke buddho uppanno”ti kathayiṃsu. Tayopi janā attano attano ārāme mahantaṃ dhanapariccāgaṃ katvā bhagavato vasanattāya vihāre kārāpayiṃsu. Tattha kukkuṭasetṭhinā kārīto **kukkuṭārāmo** nāma ahosi. Pāvārikasetṭhinā ambavane kārīto **pāvārikambavano** nāma ahosi. Ghositena kārīto **ghositārāmo** nāma ahosi. Taṃ sandhāya vuttaṃ- “ghosita-seṭṭhinā kārīte ārāme”ti.

**Bhaṇḍanajātā**ti-ādīsu kalahassa pubbhāgo bhaṇḍanaṃ nāma, taṃ jātaṃ ete-santi **bhaṇḍanajātā**. Hatthaparāmāsādivasena matthakaṃ patto kalaho jāto ete-santi **kalahajātā**. Viruddhabhūtaṃ vādanti vivādaṃ, taṃ āpannāti **vivādāpannā**. **Mukhasattihīti** vācāsattihī. **Vitudantā**ti vijjhantā. **Te na ceva aññamaññaṃ saññā-penti na ca saññattiṃ upentī**ti te atthañca kāraṇaṃca dassetvā neva aññamaññaṃ jānāpentī. Sacepi saññāpetuṃ ārabhanti, tathāpi saññattiṃ na upenti, jānituṃ na icchantīti attho. Nijjhattiyāpi eseva nayo. Ettha ca **nijjhattī**ti saññattivevacaname-vetaṃ. Kasmā panete bhaṇḍanajātā ahesunti? Appamattakena kāraṇena.

Dve kira bhikkhū ekasmiṃ āvāse vasanti vinayadharo ca suttantiko ca. Tesu suttantiko bhikkhu ekadivasaṃ vaccakuṭiṃ pavitṭho ācamana-udakāvasesaṃ bhājane ṭhapetvāva nikkhami. Vinayadharo pacchā pavitṭho taṃ udakaṃ disvā nikkhamitvā taṃ bhikkhuṃ pucchi, āvuso, tayā idaṃ udakaṃ ṭhapitanti? Āma, āvusoti. Tvamettha āpattibhāvaṃ na jānāsīti? Āma na jānāmīti. Hoti, āvuso, ettha āpattīti. Sace hoti desessāmīti. Sace pana te, āvuso, asañcicca asatiyā kataṃ, natthi te āpattīti. So tassā āpattiyā anāpattidiṭṭhi ahosi.

Vinayadharo attano nissitakānaṃ, “ayaṃ suttantiko āpattiṃ āpajjamānopi na jānāti”ti ārocesi. Te tassa nissitake disvā- “tumhākaṃ upajjhāyo āpattiṃ āpajjītvāpi āpattibhāvaṃ na jānāti”ti āhaṃsu. Te gantvā attano upajjhāyassa ārocesuṃ. So (2.0292) evamāha- “ayaṃ vinayadharo pubbe ‘anāpattī’ti vatvā idāni ‘āpattī’ti vadati, musāvādī eso”ti. Te gantvā, “tumhākaṃ upajjhāyo musāvādī”ti evaṃ aññamaññaṃ kalahaṃ vaḍḍhayiṃsu, taṃ sandhāyetaṃ vuttaṃ.

**Bhagavantam etadavocāti** etaṃ, “idha, bhante, kosambiyam bhikkhū bhaṇḍana-jātā”ti-ādivacanaṃ avoca. Tañca kho neva piyakamyatāya na bhedādhippāyena, atha kho atthakāmatāya hitakāmatāya. Sāmaggikārako kiresa bhikkhu, tasmāssa etadahosi- “yathā ime bhikkhū vivādam āradhā, na sakkā mayā, nāpi aññena bhikkhunā samaggā kātuṃ, appeva nāma sadevake loke appaṭipuggalo bhagavā sayam vā gantvā, attano vā santikaṃ pakkosāpetvā etesaṃ bhikkhūnaṃ khanti-mettāpaṭisaṃyuttaṃ sāraṇiyadhammadesanaṃ kathetvā sāmaggiṃ kareyyā”ti atthakāmatāya hitakāmatāya gantvā avoca.

**492. Chayime, bhikkhave, dhammā sāraṇiyāti** heṭṭhā kalahabhaṇḍanavasena desanā āradhā. Imasmiṃ ṭhāne cha sāraṇiyā dhammā āgatāti evamidaṃ kosa-mbiyasuttaṃ yathānusandhināva gataṃ hoti. Tattha **sāraṇiyāti** saritabbayuttā addhāne atikkantepi na pamussitabbā. Yo te dhamme pūreti, taṃ sabrahmacā-rīnaṃ piyaṃ karontīti **piyakaraṇā**. Garuṃ karontīti **garukaraṇā**. **Saṅgahāyāti** saṅgahaṇatthāya. **Avivādāyāti** avivādanatthāya. **Sāmaggiyāti** samaggabhāvatthāya. **Ekībhāvāyāti** ekībhāvatthāya ninnānākaraṇāya. **Samvattantīti** bhavanti. **Mettaṃ kāyakammanti** mettacittena kattabbaṃ kāyakammaṃ. **Vacīkammamanokammesupi** eseva nayo. Imāni bhikkhūnaṃ vasena āgatāni, gihīsupi labbhantiyeva. Bhikkhūnañhi mettacittena ābhisamācārikadhammapūraṇaṃ mettaṃ kāyakammaṃ nāma. Gihīnaṃ cetiyavandanatthāya bodhivandanatthāya saṅghanimantanatthāya gamanaṃ gāmaṃ piṇḍāya pavitṭhe bhikkhū disvā paccuggamaṃ pattapaṭigga-haṇaṃ āsanapaññāpanaṃ anugamananti evamādikaṃ mettaṃ kāyakammaṃ nāma.

Bhikkhūnaṃ mettacittena ācārapaññattisikkhāpadaṃ, kammaṭṭhānakathanaṃ dhammadesanā tepiṭakampi buddhavacanaṃ **mettaṃ vacīkammaṃ** nāma. Gihīnañca, “cetiavandanatthāya gacchāma, bodhivandanatthāya gacchāma, dhammassavanaṃ karissāma, paḍipamālāpupphapūjaṃ karissāma, tīṇi sucari-tāni samādāya vattissāma, salākabhattādīni dassāma, vassāvāsikaṃ dassāma, ajja saṅghassa (2.0293) cattāro paccaye dassāma, saṅghaṃ nimantetvā khādanī-yādīni saṃvidahatha, āsanāni paññāpetha, pānīyaṃ upaṭṭhapetha, saṅghaṃ paccuggantvā ānetha, paññattāsane nisīdāpetvā chandajātā ussāhajātā veyyāvaccam karoṭhā”ti-ādīkathanakāle mettaṃ vacīkammaṃ nāma.

Bhikkhūnaṃ pātova uṭṭhāya sarīrapaṭijagganaṃ cetiyaṅgaṇavattādīni ca katvā vivittāsane nisīditvā, “imasmiṃ vihāre bhikkhū sukhī hontu, averā abyāpajjhā”ti cintanaṃ **mettaṃ manokammaṃ** Nāma.

Gihīnaṃ “ayyā sukhī hontu, averā abyāpajjhā”ti cintanaṃ mettaṃ manokammaṃ nāma.

**Āvi ceva raho cāti** sammukhā ca parammukhā ca. Tattha navakānaṃ cīvarakammādīsu sahāyabhāvūpagamaṃ sammukhā mettaṃ kāyakammaṃ nāma. Therānaṃ pana pādadhovanavandanabījanadānādibhedampi sabbaṃ sāmīcīkammaṃ sammukhā mettaṃ kāyakammaṃ nāma. Ubhayehipi dunnikkhittānaṃ dārubhaṇḍādīnaṃ tesu avamaññaṃ akatvā attanā dunnikkhittānaṃ viya paṭisāmanaṃ parammukhā mettaṃ kāyakammaṃ nāma. Devatthero tissantheroti evaṃ paggayha vacanaṃ sammukhā mettaṃ vacīkammaṃ nāma. Vihāre asantaṃ pana paripucchantassa, kuhiṃ amhākaṃ devatthero, amhākaṃ tissanthero kadā nu kho āgamissatīti evaṃ mamāyanavacanaṃ parammukhā mettaṃ vacīkammaṃ nāma. Mettāsinehasiniddhāni pana nayanāni ummīletvā suppasannena mukhena olokanaṃ sammukhā mettaṃ manokammaṃ nāma. Devatthero, tissanthero arogo hotu appābādhoti samannāharaṇaṃ parammukhā mettaṃ manokammaṃ nāma.

**Lābhāti** cīvarādayo laddhapaccayā. **Dhammikāti** kuhanādibhedaṃ micchājīvaṃ vajjetvā dhammena samena bhikkhācariyavattena uppannā. **Antamaso pattapariyāpannamattampīti** pacchimakoṭiyā patte pariyāpannaṃ pattassa antogataṃ dvattikaṭacchubhikkhāmattampi. **Appaṭivibhattabhogīti** ettha dve paṭivibhattāni nāma āmisapaṭivibhattaṃ puggalapaṭivibhattaṃ. Tattha, “ettakaṃ dassāmi, ettakaṃ na dassāmi”ti evaṃ cittaṃ vibhajānaṃ āmisapaṭivibhattaṃ nāma. “Asukassa dassāmi, asukassa na dassāmi”ti evaṃ cittaṃ vibhajānaṃ pana puggalapaṭivibhattaṃ nāma. Tadubhayampi akatvā yo appaṭivibhattaṃ bhujjati, ayaṃ **appaṭivibhattabhogī** nāma.

**Sīlavantehi** (2.0294) **sabrahmacārihi sādharmaṇabhogīti** ettha sādharmaṇabhogino idaṃ lakkhaṇaṃ, yaṃ yaṃ paṇītaṃ labbhati, taṃ taṃ neva lābhena lābhaṃ jigīsānāmukhena gihīnaṃ deti, na attanā paribhuñjati; paṭiggaṇhantova saṅghena sādharmaṇaṃ hotūti gahetvā gaṇḍiṃ paharivā paribhuñjitabbaṃ saṅghasantakaṃ viya passatī. Idaṃ pana sāraṇīyadhammaṃ ko pūreti, ko na pūretīti? Dussīlo tāva na pūreti. Na hi tassa santakaṃ sīlavantā gaṇhanti. Parisuddhasīlo pana vattaṃ akhaṇḍento pūreti.

Tatridaṃ vattaṃ- yo hi odissakaṃ katvā mātu vā pitu vā ācariyupajjhāyādīnaṃ vā deti, so dātabbaṃ deti, sāraṇīyadhammo panassa na hoti, palibodhajagganaṃ nāma hoti. Sāraṇīyadhammo hi muttapalibodhasseva vaṭṭati, tena pana odissakaṃ dentena gilānagilānupaṭṭhāka-āgantukagamikānañceva navapabbajitassa ca saṅghāṭipattaggahaṇaṃ ajānantassa dātabbaṃ. Etesaṃ datvā avasesaṃ therāsānato paṭṭhāya thokaṃ thokaṃ adatvā yo yattakaṃ gaṇhāti, tassa tattakaṃ dātabbaṃ. Avasiṭṭhe asati puna piṇḍāya caritvā therāsānato paṭṭhāya yaṃ yaṃ paṇītaṃ, taṃ taṃ datvā sesaṃ paribhuñjitabbaṃ, “sīlavantehi”ti vacanato dussīlassa adātumpi vaṭṭati.

Ayaṃ pana sāraṇīyadhammo susikkhitāya parisāya supūro hoti, no asikkhitāya parisāya. Susikkhitāya hi parisāya yo aññato labhati, so na gaṇhāti, aññato alabhantopi pamāṇayuttameva gaṇhāti, na atirekaṃ. Ayañca pana sāraṇīyadhammo

evam punappunam piṇḍāya caritvā laddham laddham dentassāpi dvādasahi vassehi pūراتي, na tato oram. Sace hi dvādasamepi vasse sāraṇiyadhammapūrako piṇḍapātapūram pattam āsanasālāyam ṭhapetvā nahāyitum gacchati, saṅghatthero ca kasseso pattoti? Sāraṇiyadhammapūrakassāti vutte- “āharatha nan”ti sabbam piṇḍapātam vicāretvā bhuñjitvā ca rittapattam ṭhabeti. Atha so bhikkhu rittapattam disvā, “mayham asesetvāva paribhuñjimsū”ti domanassam uppādeti, sāraṇiyadhammo bhijjati, puna dvādasā vassāni pūretabbo (2.0295) hoti, titthiyaparivāsasadisō hesa. Sakim khaṇḍe jāte puna pūretabbova. Yo pana, “lābhā vata me, suladdham vata me, yassa me pattagatam anāpucchāva sabrahmacārī paribhuñjanti”ti somanassam janeti, tassa puṇṇo nāma hoti.

Evam pūritasāraṇiyadhammassa pana neva issā, na macchariyam hoti, so manussānam piyo hoti, sulabhapaccayo; pattagatamassa diyamānampi na khīyati, bhājanīyabhaṇḍaṭṭhāne aggabhaṇḍam labhati, bhaye vā chātake vā sampatte devatā ussukkam āpajjanti.

Tatrimāni vatthūni- leṇagirivāsī tissatthero kira mahāgirimānam upanissāya vasati. Paññāsa mahātherā nāgadīpam cetiyavandanatthāya gacchantā girigāme piṇḍāya caritvā kiñci aladdhā nikkhamimsu. Thero pavisanto te disvā pucchi- “laddham, bhante”ti? Vicarimhā, āvusoti. So aladdhabhāvam ṇatvā āha- “yāvāham, bhante, āgacchāmi, tāva idheva hothā”ti. Mayaṃ, āvuso, paññāsa janā pattatema- namattampi na labhimhāti. Nevāsikā nāma, bhante, paṭibalā honti, alabhantāpi bhikkhācāramaggasabhāvam jānantīti. Therā āgamiṃsu. Thero gāmaṃ pāvisi. Dhurageheyeva mahā-upāsikā khīrabhattam sajjetvā theram olokayamānā ṭhitā therassa dvāram sampattasseva pattam pūretvā adāsi. So tam ādāya therānam santikam gantvā, “gaṇhatha, bhante”ti saṅghattheramāha. Thero, “amhehi etta- kehi kiñci na laddham, ayam sīghameva gahetvā āgato, kim nu kho”ti sesānam mukham olokesi. Thero olokanākāreneva ṇatvā- “dhammena samena laddhapi- ṇḍapāto, nikkukkuccā gaṇhatha bhante”ti-ādito paṭṭhāya sabbesam yāvadattham datvā attanāpi yāvadattham bhuñji.

Atha nam bhattakiccāvasāne therā pucchiṃsu- “kadā, āvuso, lokuttara- dhammam paṭivijjhī”ti? Natthi me, bhante, lokuttaradhammoti. Jhānalābhīsi, āvu- soti? Etampi me, bhante, natthīti. Nanu, āvuso, pāṭihāriyanti? Sāraṇiyadhammo me, bhante, pūrito, tassa me dhammassa pūritakālato (2.0296) paṭṭhāya sacepi bhikkhusatasahassam hoti, pattagatam na khīyatīti. Sādhu sādhu, sappurisa, anu- cchavikamidam tuyhanti. Idam tāva **pattagatam na khīyatīti** ettha vatthu.

Ayameva pana thero cetiyapabbate giribhaṇḍamahāpūjāya dānaṭṭhānam gantvā, “imasmim ṭhāne kim varabhaṇḍan”ti pucchati. Dve sātākā, bhanteti. Ete mayham pāpuṇissantīti. Tam sutvā amacco rañño ārocesi- “eko daharo evam vadati”ti. “Daharassevam cittam, mahātherānam pana sukhumasātākā vaṭṭanti”ti vatvā, “mahātherānam dassāmi”ti ṭhapesi. Tassa bhikkhusaṅghe paṭipāṭiyā ṭhite dentassa matthake ṭhapitāpi te sātākā hattham nārohanti, aññeva ārohanti. Dha- rassa dānakāle pana hattham āruḥhā. So tassa hatthe ṭhapetvā amaccassa mukham oloketvā daharam nisīdāpetvā dānam datvā saṅgham vissajjetvā dha-

rassa santike nisīditvā, “kadā, bhante, imaṃ dhammaṃ paṭivijjhitthā”ti āha. So pariyāyenapi asantaṃ avadanto, “natthi mayhaṃ, mahārāja, lokuttaradhammo”ti āha. Nanu, bhante, pubbeva avacutthāti? Āma, mahārāja, sāraṇiyadhammapū-rako ahaṃ, tassa me dhammassa pūritakālato paṭṭhāya bhājanīyabhaṇḍaṭṭhāne aggabhaṇḍaṃ pāpuṇātīti. Sādhu sādhu, bhante, anucchavikamidaṃ tumhākanti vanditvā pakkāmi. Idaṃ **bhājanīyabhaṇḍaṭṭhāne aggabhaṇḍaṃ pāpuṇātīti** ettha vatthu.

Brāhmaṇatissabhaye pana bhātaragāmaṃvāsino nāgattheriyā anārocetvāva palā-yiṃsu. Therī paccūsakāle, “ativiya appanigghoso gāmo, upadhāretha tāvā”ti daha-rabhikkhuniyo āha. Tā gantvā sabbesaṃ gatabhāvaṃ ṇatvā āgamma theriyā āro-cesuṃ. Sā sutvā, “mā tumhe tesāṃ gatabhāvaṃ cintayittha, attano uddesaparipu-cchāyonisomanasikāresuyeva yogaṃ karoṭhā”ti vatvā bhikkhācāraṇelāya pāru-pitvā attadvādasamā gāmadvāre nigrodharukkhamūle aṭṭhāsi. Rukkhe adhivatthā devatā dvādasannampī bhikkhunīnaṃ piṇḍapātaṃ datvā, “ayye, aññattha mā gacchatha, niccaṃ idheva ethā”ti āha. Theriyā pana kaniṭṭhabhātā (2.0297) nāga-tthero nāma atthi. So, “mahantaṃ bhayaṃ, na sakkā idha yāpetuṃ, paratīraṃ gamissāmāti attadvādasamova attano vasanaṭṭhānā nikkhanto theriṃ disvā gami-ssāmī”ti bhātaragāmaṃ āgato. Therī, “therā āgatā”ti sutvā tesāṃ santikaṃ gantvā, kiṃ ayyāti pucchi. So taṃ pavattiṃ ācikkhi. Sā, “ajja ekadivasāṃ vihāreyeva vasitvā sveva gamissathā”ti āha. Therā vihāraṃ agamaṃsu.

Therī punadivase rukkhamūle piṇḍāya caritvā therāṃ upasaṅkamtivā, “imaṃ piṇḍapātaṃ paribhuñjathā”ti āha. Thero, “vaṭṭissati therī”ti vatvā tuṅhī aṭṭhāsi. Dhammiko tātā piṇḍapāto kukkucchaṃ akatvā paribhuñjathāti. Vaṭṭissati therīti. Sā pattaṃ gahetvā ākāse khiṇi, patto ākāse aṭṭhāsi. Thero, “sattatālamatte ṭhitampi bhikkhunībhattameva, therīti vatvā bhayaṃ nāma sabbakālaṃ na hoti, bhaye vūpa-sante ariyavaṃsaṃ kathayamāno, ‘bho piṇḍapātika bhikkhunībhattaṃ bhuñjitvā vītināmayitthā’ti cittaṃ anuvadiyamāno santhambhetuṃ na sakkhissāmi, appa-mattā hotha therīyo”ti maggaṃ āruhi.

Rukkhadevatāpi, “sace thero theriyā hatthato piṇḍapātaṃ paribhuñjissati, na naṃ nivattessāmi, sace pana na paribhuñjissati, nivattessāmi”ti cintayamānā ṭhatvā therassa gamanaṃ disvā rukkhā oruyha pattaṃ, bhante, dethāti pattaṃ gahetvā therāṃ rukkhamūlaṃyeva ānetvā āsanaṃ paññāpetvā piṇḍapātaṃ datvā katabhattakiccaṃ paṭiññaṃ kāretvā dvādasā bhikkhuniyo, dvādasā ca bhikkhū satta vassāni upaṭṭhahi. Idaṃ **devatā ussukkaṃ āpajjantīti** ettha vatthu, tatra hi therī sāraṇiyadhammapūrikā ahosi.

**Akhaṇḍānīti**-ādīsu yassa sattasu āpattikkhandhesu ādimhi vā ante vā sikkhā-padaṃ bhinnaṃ hoti, tassa sīlaṃ pariyante chinnaṃsāṭako viya **khaṇḍaṃ** Nāma. Yassa pana vemajjhe bhinnaṃ, tassa majjhe chiddasāṭako viya **chiddaṃ** nāma hoti. Yassa pana paṭipāṭiyā dve tīṇi bhinnāni, tassa piṭṭhiyaṃ vā kucchiyaṃ vā uṭṭhitena visabhāgavaṇṇena kāḷarattādīnaṃ aññataravaṇṇā gāvī viya **sabalaṃ** nāma hoti. Yassa pana antarantarā bhinnāni, tassa (2.0298) antarantarā visabhā-gabinducitrā gāvī viya **kammāsaṃ** nāma hoti. Yassa pana sabbena sabbaṃ abhi-

nnāni, tassa tāni sīlāni **akhaṇḍāni acchiddāni asabalāni akammāsāni** nāma honti. Tāni panetāni taṇhādāsabyato mocetvā bhujissabhāvakaraṇato **bhujissāni**. Buddhādīhi viññūhi pasatthattā **viññuppasatthāni**. Taṇhādiṭṭhīhi aparāmaṭṭhattā, “idaṃ nāma tvaṃ āpannapubbo”ti kenaci parāmaṭṭhuṃ asakkuṇeyyattā ca **aparāmaṭṭhāni**. Upacārasamādhiṃ vā appanāsamādhiṃ vā saṃvattayantīti **samādhisaṃvattanikānīti** vuccanti. **Sīlasāmaññagato Viharatīti** tesu tesu disābhāgesu viharantehi bhikkhūhi saddhiṃ samānabhāvūpagatasīlo viharati. Sotāpannādīnañhi sīlaṃ samuddantarepi devalokepi vasantānaṃ aññesaṃ sotāpannādīnaṃ sīlena samānameva hoti, natthi maggasīle nānattaṃ, taṃ sandhāyetaṃ vuttaṃ.

**Yāyaṃ diṭṭhīti** maggasampayuttā sammādiṭṭhi. **Ariyā**Ti niddosā. **Niyyātīti niyyānikā**. **Takkarassāti** yo tathākārī hoti. **Dukkhakkhayāyāti** sabbadukkhakkhayatthaṃ. **Diṭṭhisāmaññagatoti** samānadiṭṭhibhāvaṃ upagato hutvā viharati. **Agganti** jeṭṭhakaṃ. Sabbagopānasiyo saṅgaṇhātīti **saṅgāhikaṃ**. Sabbagopānasīnaṃ saṅghātaṃ karotīti **saṅghātanikaṃ**. Saṅghāṭaniyanti attho. **Yadidaṃ kūṭanti** yametaṃ kūṭāgārakaṇṇikāsaṅkhātaṃ kūṭaṃ nāma. Pañcabhūmikādīpāsādā hi kūṭabaddhāva tiṭṭhanti. Yasmiṃ patite mattikaṃ ādiṃ katvā sabbe patanti. Tasmā evamāha. **Evameva khoti** yathā kūṭaṃ kūṭāgārassa, evaṃ imesampi sāraṇiyadhammānaṃ yā ayaṃ ariyā diṭṭhi, sā aggā ca saṅgāhikā ca saṅghāṭaniyā cāti daṭṭhabbā.

**493. Kathaṅca, bhikkhave, yāyaṃ diṭṭhīti** ettha, bhikkhave, yāyaṃ sotāpattimaggaḍḍhi ariyā niyyānikā niyyāti takkarassa sammā dukkhakkhayāyāti vuttā, sā kathaṃ kena kāraṇena niyyātīti attho. **Pariyuṭṭhitacittova hotīti** ettāvatāpi pariyuṭṭhitacittoyeva nāma hotīti attho. Esa nayo sabbattha. **Suppaṇihitaṃ me mānasanti** mayhaṃ cittaṃ suṭṭhu ṭhapitaṃ. **Saccānaṃ bodhāyāti** catunnaṃ saccānaṃ bodhatthāya. **Ariyanti-ādīsu** taṃ ñāṇaṃ yasmā ariyānaṃ hoti, na puthujjanānaṃ, tasmā **ariyanti** vuttaṃ. Yesaṃ pana lokuttaradhammopi atthi, tesameva hoti, na (2.0 aññesaṃ, tasmā **lokuttaranti** vuttaṃ. Puthujjanānaṃ pana abhāvato **asādhāraṇaṃ puthujjanehī**Ti vuttaṃ. Esa nayo sabbavāresu.



494. **Labhāmi paccattaṃ samathanti** attano citte samathaṃ labhāmīti attho. **Nibbutiyampi** eseva nayo. Ettha ca **samathoti** ekaggatā. **Nibbutīti** kilesavūpasamo.

495. **Tathārūpāya diṭṭhiyāti** evarūpāya sotāpattimaggadiṭṭhiyā.

496. **Dhammatāyāti** sabhāvena. **Dhammatā esāti** sabhāvo esa. **Vuṭṭhānaṃ paññāyatīti** saṅghakammavasena vā desanāya vā vuṭṭhānaṃ dissati. Ariyasāvako hi āpattiṃ āpajjanto garukāpattīsu kuṭikārasadisamaṃ, lahukāpattīsu sahaseyyādīsadisamaṃ acittakāpattiṃyeva āpajjati, tampi asañcicca, no sañcicca, āpannaṃ na paṭicchādeti. Tasmā **atha kho naṃ khippamevāti**-ādimāha. **Daharoti** taruṇo. **Kumāroti** na mahallako. **Mandoti** cakkhusotādīnaṃ mandatāya mando. **Uttānaseyya-koti** atidaharatāya uttānaseyyako, dakkhiṇena vā vāmena vā passena sayituṃ na sakkotīti attho. **Aṅgāraṃ akkamitvāti** ito cito ca pasāritena hatthena vā pādena vā phusitvā. Evaṃ phusantānaṃ pana manussānaṃ na sīghaṃ hattho jhāyati, tathā hi ekacce hatthena aṅgāraṃ gahetvā parivattamānā dūrampi gacchanti. Daharassa pana hatthapādā sukhumālā honti, so phuṭṭhamatteneva dayhamāno cirīti saddaṃ karonto khippaṃ paṭisaṃharati, tasmā idha daharova dassito. Mahallako ca dayhantopi adhvāseti, ayaṃ pana adhvāsetuṃ na sakkoti. Tasmāpi daharova dassito. **Desetīti** āpattiapaṭiggāhake sabhāgapuggale sati ekaṃ divasaṃ vā rattīṃ vā anadhivāsetvā rattīṃ caturaṅgepi tame sabhāgabhikkhuno vasanaṭṭhānaṃ gantvā desetiyeva.

497. **Uccāvacānīti** uccanīcāni. **Kiṃ karaṇiyānīti** kiṃ karomīti evaṃ vatvā katta-bbakammāni. Tattha uccakammaṃ nāma cīvarassa karaṇaṃ rajanaṃ cetiye sudhākammaṃ uposathāgāracetiyagharabodhigharesu kattabbakammanti evamādi. Avacakammaṃ nāma pādadhovanamakhanādikhuddakammaṃ, atha vā cetiye (2.0300) sudhākammādi uccakammaṃ nāma. Tattheva kasāvapacana-udakānayanakucchakaraṇa niyyāsabandhanādi avacakammaṃ nāma. **Ussukkaṃ āpanno hotīti** ussukkabhāvaṃ kattabbataṃ paṭipanno hoti. **Tibbāpekkho hotīti** bahalapatthano hoti. **Thambañca ālumpatīti** tiṇaṅca ālumpamānā khādāti. **Vacchakañca apacinātīti** vacchakañca apaloketi. Taruṇavacchā hi gāvī araṅṅe ekato āgataṃ vacchakaṃ ekasmiṃ ṭhāne nipannaṃ pahāya dūraṃ na gacchati, vacchakassa āsannaṭṭhāne caramānā tiṇaṃ ālumpitvā gīvaṃ ukkhipitvā ekantaṃ vacchakameva ca viloketi, evameva sotāpanno uccāvacāni kiṃ karaṇiyāni karonto tanninno hoti, asithilapūrako tibbacchando bahalapatthano hutvāva karoti.

Tatridaṃ vatthu- mahācetiye kira sudhākamme kariyamāne eko ariyasāvako ekena hatthena sudhābhājanaṃ, ekena kucchaṃ gahetvā sudhākammaṃ karissāmīti cetiyaṅgaṇaṃ āruḷho. Eko kāyadaḷhibahulo bhikkhu gantvā therassa santike aṭṭhāsi. Thero aññasmiṃ sati papañco hoti tasmā ṭhānā aññaṃ ṭhānaṃ gato. Sopi bhikkhu tattheva agamāsi. Thero puna aññaṃ ṭhānanti evaṃ katipayaṭṭhāne āgataṃ,- “sappurisa mahantaṃ cetiyaṅgaṇaṃ kiṃ aññasmiṃ ṭhāne okāsaṃ na labhathā”ti āha. Na itaro pakkāmīti.

498. **Balatāya samannāgatoti** balena samannāgato. **Aṭṭhiṃ katvāti** atthika-bhāvaṃ katvā, atthiko hutvāti attho. **Manasikatvāti** manasmiṃ karitvā. **Sabbace-**

**tasā samannāharitvā**ti appamattakampi vikkhepaṃ akaronto sakalacittena samannāharitvā. **Ohitasototi** ṭhapitasoto. Ariyasāvaka hi piyadhammassavanā honti, dhammassavanaggaṃ gantvā niddāyamānā vā yena kenaci saddhiṃ sallapamānā vā vikkhittacittā vā na nisīdanti, atha kho amataṃ paribhuñjantā viya atittāva honti dhammassavane, atha aruṇaṃ uggacchati. Tasmā evamāha.

**500. Dhammatā** (2.0301) **susamanniṭṭhā hotī**ti sabhāvo suṭṭhu samannesito hoti. **Sotāpattiphalasacchikiriyāyā**ti karaṇavacanaṃ, sotāpattiphalasacchikatañāṇenāti attho. **Evaṃ sattaṅgasamannāgatoti** evaṃ imehi sattaḥ mahāpaccavekkhaṇāñāṇehi samannāgato. Ayaṃ tāva ācariyānaṃ samānakathā. Lokuttaramaggo hi bahucittakkhaṇiko nāma natthi.

Vitaṇḍavādī pana ekacittakkhaṇiko nāma maggo natthi, “evaṃ bhāveyya satta vassānī”ti hi vacanato sattapi vassāni maggabhāvanā honti. Kilesā pana lahu chijjantā sattaḥ ñāṇehi chijjantīti vadati. So suttaṃ āharāti vattabbo, addhā aññaṃ suttaṃ apassanto, “idamassa paṭhamaṃ ñāṇaṃ adhigataṃ hoti, idamassa dutiyaṃ ñāṇaṃ ...pe... idamassa sattamaṃ ñāṇaṃ adhigataṃ hoti”ti imameva āharitvā dassessati. Tato vattabbo kiṃ panidaṃ suttaṃ neyyatthaṃ nītatthanti. Tato vakkhati- “nītatthattaṃ, yathāsuttaṃ tatheva attho”ti. So vattabbo- “dhammatā susamanniṭṭhā hoti sotāpattiphalasacchikiriyāyāti ettha ko attho”ti? Addhā sotāpattiphalasacchikiriyāyatthoti vakkhati. Tato pucchitabbo, “maggasamaṅgī phalaṃ sacchikaroti, phalasmaṅgī”ti. Jānanto, “phalasmaṅgī sacchikaroti”ti vakkhati. Tato vattabbo,- “evaṃ sattaṅgasamannāgato kho, bhikkhave, ariyasāvako sotāpattiphalasamannāgato hoti idha maggaṃ abhāvetvā maṇḍūko viya uppatitvā ariyasāvako phalameva gaṇhissati. Mā suttaṃ me laddhanti yaṃ vā taṃ vā avaca. Pañhaṃ vissajjenta nāma ācariyasantike vasitvā buddhavacanaṃ uggaṇhitvā attharasam veditvā vattabbaṃ hoti”ti. “Imāni satta ñāṇāni ariyasāvaka paccavekkhaṇāñāṇāneva, lokuttaramaggo bahucittakkhaṇiko nāma natthi, ekacittakkhaṇikoyevā”ti saññāpetabbo. Sace sañjānāti sañjānātu. No ce sañjānāti, “gaccha pātova vihāraṃ pavisitvā yāguṃ pivāhi”ti uyyojetabbo. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Kosambiyasuttavaṇṇanā niṭṭhitā.

## 9. Brahmanimantanikasuttavaṇṇanā

**501. Evaṃ** (2.0302) **me sutanti** brahmanimantanikasuttaṃ. Tattha **pāpakaṃ diṭṭhigatanti** lāmakā sassatadiṭṭhi. **Idaṃ niccanti** idaṃ saha kāyena brahmaṭṭhānaṃ aniccaṃ “niccan”ti vadati. **Dhuvādīni** tasseva vevacanāni. Tattha **dhuvanti** thiraṃ. **Sassatanti** sadā vijjamānaṃ. **Kevalanti** akhaṇḍaṃ sakalaṃ. **Acava-**

**nadhammanti** acavanasabhāvaṃ. **Idaṅhi na jāyatīti**-ādīsu imasmim̃ ṭhāne koci jāyanako vā jīyanako vā mīyanako vā cavanako vā upapajjanako vā natthīti sandhāya vadati. **Ito ca panaññanti** ito saha kāyakā brahmaṭṭhānā uttari aññaṃ nissaraṇaṃ nāma natthīti evamassa thāmagatā sassatadiṭṭhi uppannā hoti. Evaṃvādī pana so upari tisso jhānabhūmiyo cattāro maggā cattāri phalāni nibbānanti sabbam̃ paṭibāhati. **Avijjāgatoti** avijjāya gato samannāgato aññāṇi andhībhūto. **Yatra hi nāmāti** yo nāma.

**502. Atha kho, bhikkhave, māro pāpimāti** māro kathaṃ bhagavantaṃ addasa? So kira attano bhavane nisīditvā kālena kālaṃ sathhāraṃ āvajjeti- “ajja samaṇo gotamo katarasmim̃ gāme vā nigame vā vasatī”ti. Imasmim̃ pana kāle āvajjanto, “ukkaṭṭhaṃ nissāya subhagavane viharatī”ti ñatvā, “kattha nu kho gato”ti olokento brahmalokaṃ gacchantaṃ disvā, “samaṇo gotamo brahmalokaṃ gacchati, yāva tattha dhammakathaṃ kathetvā brahmagaṇaṃ mama visayā nātikkameti, tāva gantvā dhammadesanāyaṃ vichandaṃ karissāmi”ti satthu padānupadiko gantvā brahmagaṇassa antare adissamānena kāyena aṭṭhāsi. So, “sathhārā bakabrahmā apasādito”ti ñatvā brahmuno upatthambho hutvā aṭṭhāsi. Tena vuttaṃ- “atha kho, bhikkhave, māro pāpimā”ti.

**Brahmapārisajjam̃ anvāvisitvāti** ekassa brahmapārisajjassa sarīraṃ pavisitvā. Mahābrahmānaṃ pana brahmapurohitānaṃ vā anvāvisituṃ na sakkoti. **Metamāsa-doti** mā etaṃ apasādayittha. **Abhibhūti** abhibhavitvā ṭhito jeṭṭhako. **Anabhibhūtoti** aññehi anabhibhūto. **Aññadatthūti** ekaṃsavacane (2.0303) nipāto. Dassanava-sena **daso**, sabbam̃ passatīti dīpeti. **Vasavattīti** sabbajanaṃ vase vatteti. **Issaroti** loke issaro. **Kattā nimmātāti** lokassa kattā ca nimmātā ca, pathavihimavantasineru-cakkavāḷamahāsamuddacandimasūriyā ca iminā nimmitāti dīpeti.

**Setṭho sajītāti** ayaṃ lokassa uttamo ca sajītā ca. “Tvam̃ khattiyo nāma hohi, tvam̃ brāhmaṇo nāma, vesso nāma, suddo nāma, gahaṭṭho nāma, pabbajito nāma, antamaso oṭṭho hohi, goṇo hohi”ti evaṃ sattānaṃ visajjetā ayanti dasseti. **Vasī pitā bhūtabhabyānanti** ayaṃ ciṇṇavasitāya vasī, ayaṃ pitā bhūtānañca bhabyānañcāti vadati. Tattha aṇḍajalābujā sattā anto-aṇḍakose ceva antovatthimhi ca **bhabyā** nāma, bahi nikkhantakālato paṭṭhāya **bhūtā**. Saṃsedajā paṭhamacittakkhaṇe bhabyā, dutiyato paṭṭhāya bhūtā. Opapātikā paṭhama-iriyāpathe bhabyā, dutiyato paṭṭhāya bhūtāti veditabbā. Te sabbepi etassa puttāti saññāya, “pitā bhūtabhabyānan”ti āha.

**Pathavīgarahakāti** yathā tvam̃ etarahi, “aniccā dukkhā anattā”ti pathaviṃ gara-hasi jigucchasi, evaṃ tepi pathavīgarahakā ahesuṃ, na kevalaṃ tvam̃yevāti dīpeti. **Āpagarahakā**Ti-ādīsipi eseva nayo. **Hīne kāye patīṭṭhitāti** catūsu apāyesu nibbattā. **Pathavīpasamsakāti** yathā tvam̃ gara-hasi, evaṃ agarahitvā, “niccā dhuvā sassatā acchejjā abhejjā akkhayā”ti evaṃ pathavīpasamsakā pathaviyā vaṇṇavādino ahesunti vadati. **Pathavābhinandinoti** taṇhādiṭṭhivasena pathaviyā abhinandino. Sesesupi eseva nayo. **Paṇīte kāye patīṭṭhitāti** brahmaloke nibbattā. **Taṃ tāhanti** tena kāraṇena taṃ ahaṃ. **Inghāti** codanatthe nipāto. **Upātivattitthoti** atikkamittha. “Upātivattito”tipi pāṭho, ayamevattho. **Daḍḍena paṭippanāmeyyāti**

catuhatthena muggaradaṇḍena pothetvā palāpeyya. **Narakapapā**ṭeti sataporise mahāsobbhe. **Virādhey**yāti hatthena gahaṇayutte vā pādena paṭiṭṭhānayutte vā ṭhāne gahaṇapatiṭṭhānāni kātuṃ na sakkuṇeyya. **Nanu tvam bhikkhu passasī**ti bhikkhu nanu tvam imaṃ brahmapariṣaṃ sannipatitaṃ obhāsamānaṃ virocamaṇaṃ jotayamaṇaṃ passasīti brahmuno ovāde ṭhitānaṃ (2.0304) iddhānu-bhāvaṃ dasseti. **Iti kho maṃ, bhikkhave, māro pāpimā brahmapariṣaṃ upanesī**ti, bhikkhave, māro pāpimā nanu tvam bhikkhu passasi brahmapariṣaṃ yasena ca siriyā ca obhāsamānaṃ virocamaṇaṃ jotayamaṇaṃ, yadi tvampi mahābrahmuno vacanaṃ anatikkamitvā yadeva te brahmā vadati, taṃ kareyyāsi, tvampi evamevaṃ yasena ca siriyā ca viroceyyāsīti evaṃ vadanto maṃ brahmapariṣaṃ upanesi upasaṃhari. **Mā tvam maññitthoti mā tvam maññi. Māro tvamasi pāpimā**ti pāpima tvam mahājanassa māraṇato **māro** nāma, pāpakaṃ lāmakam mahājanassa ayasaṃ karaṇato **pāpimā** nāmāti jānāmi.

**503. Kasiṇaṃ āyunti sakalaṃ āyuraṃ. Te kho evaṃ jāneyyunti** te evaṃ mahāntena tapokammaena samannāgatā, tvam pana purimadivase jāto, kiṃ jānissasi, yassa te ajjāpi mukhe khīragandho vāyatīti ghaṭṭento vadati. **Pathaviṃ ajjhossasī**ti pathaviṃ ajjhosāya gilitvā pariniṭṭhapetvā taṇhāmānadiṭṭhīhi gaṇhissasi. **Opasāyiko me bhavissasī**ti mayhaṃ samīpasayo bhavissasi, maṃ gacchantaṃ anugacchissasi, ṭhitaṃ upatiṭṭhissasi, nisinnaṃ upanisīdissasi, nipannaṃ upanipajjissasīti attho. **Vatthusāyikoti** mama vatthusmiṃ sayanako. **Yathākāmakaraṇiyo bāhiteyyo**ti mayā attano ruciyā yaṃ icchāmi, taṃ katabbo, bāhitvā ca pana jajjharikāgumbatopi nīcataro lakuṇḍaṭakataro katabbo bhavissasīti attho.

Iminā esa bhagavantaṃ upalāpeti vā apasādeti vā. **Upalāpeti** nāma sace kho tvam, bhikkhu, taṇhādīhi pathaviṃ ajjhossissasi, opasāyiko me bhavissasi, mayi gacchante gamissasi, tiṭṭhante ṭhassasi, nisinne nisīdissasi, nipanne nipajjissasi, ahaṃ taṃ sesajanaṃ paṭibāhitvā vissāsikaṃ abbhantarikaṃ karissāmīti evaṃ tāva **upalāpeti** nāma.

Sesapadehi pana **apasādeti** nāma. Ayañhettha adhippāyo- sace tvam pathaviṃ ajjhossasi, vatthusāyiko me bhavissasi, mama gamanādini āgametvā gamissasi vā ṭhassasi vā nisīdissasi vā nipajjissasi vā, mama vatthusmiṃ mayhaṃ ārakkaṃ gaṇhissasi, ahaṃ pana taṃ yathākāmaṃ karissāmi bāhitvā (2.0305) ca jajjharikā-gumbatopi lakuṇḍakataranti evaṃ apasādeti nāma. Ayaṃ pana brahmā mānani-ssito, tasmā idha apasādanāva adhippetā. **Āpādīsupi** eseva nayo.

**Apica te ahaṃ brahmeti** idāni bhagavā, “ayaṃ brahmā mānanissito ‘ahaṃ jānāmi’ti maññati, attano yasena sammatto sarīraṃ phusitumpi samatthaṃ kiñci na passati, thokaṃ niggahetuṃ vaṭṭati”ti cintetvā imaṃ desanaṃ ārabhi. Tattha **gatiñca pajānāmi**ti nipphattiñca pajānāmi. **Jutiñcāti** ānubhāvañca pajānāmi. **Evaṃ mahesakkhoti** evaṃ mahāyaso mahāparivāro.

**Yāvatā candimasūriyā pariharanti**ti yattake ṭhāne candimasūriyā vicaranti. **Disā bhanti virocanti**ti disāsu virocāmānā obhāsanti, disā vā tehi virocāmānā obhāsanti. **Tāva sahasadhā lokoti** tattakena pamāṇena sahasadhā loko, iminā cakkavāḷena saddhiṃ cakkavāḷasahasanti attho. **Ettha te vattate vasoti** ettha cakkavāḷasahasante tuyhaṃ vaso vattati. **Paroparañca jānāsīti** ettha cakkavāḷasahasante paropare uccanīce hīnappaṇīte satte jānāsīti. **Atho rāgavirāginanti** na kevalaṃ, “ayaṃ iddho ayaṃ pakatimanusso”ti paroparaṃ, “ayaṃ pana sarāgo ayaṃ vitarāgo”ti evaṃ rāgavirāginampi janaṃ jānāsīti. **Itthaṃbhāvaññathābhāvanti itthaṃbhāvoti** idaṃ cakkavāḷaṃ. **Aññathābhāvoti** ito sesaṃ ekūnasahasantaṃ. **Sattānaṃ āgatiṃ gatinti** ettha cakkavāḷasahasante paṭisandhivasena sattānaṃ āgatiṃ, cutivasena gatiṃ ca jānāsīti. Tuyhaṃ pana atimahantohamasmiti saññā hoti, sahasibrahmā nāma tvam, aññesaṃ pana tayā uttari dvisahasānaṃ tisahasānaṃ catusahasānaṃ pañcasahasānaṃ dasahasānaṃ satasahasānañca brahmānaṃ pamāṇaṃ natthi, catuhatthāya pilotikāya paṭappamāṇaṃ kātuṃ vāyamanto viya mahantosmiti saññaṃ karosīti niggaṇhāti.

**504. Idhūpapanno** Ti idha paṭhamajjhānabhūmiyaṃ upapanno. **Tena taṃ tvam na jānāsīti** tena kāraṇena taṃ kāyaṃ tvam na jānāsīti. **Neva te samasamoti** (2.0306) jānitabbaṭṭhānaṃ patvāpi tayā samasamo na homi. **Abhiññāyāti** aññāya. **Kuto nīceyyanti** tayā nīcatarabhāvo pana mayhaṃ kuto.

Heṭṭhūpapattiko kiresa brahmā anuppanne buddhuppāde isipabbajjaṃ pabbajitvā kasiṇaparikkamaṃ katvā samāpattiyo nibbattetvā aparihīnājjhāno kālaṃ katvā catutthajjhānabhūmiyaṃ vehapphalabrahmaloke pañcakappasatikaṃ āyugaṃ gahetvā nibbatti. Tattha yāvatāyukaṃ ṭhatvā heṭṭhūpapattikaṃ katvā tatiyajjhānaṃ paṇītaṃ bhāvetvā subhakiṇhabrahmaloke catusaṭṭhikappaṃ āyugaṃ gahetvā nibbatti. Tattha dutiyajjhānaṃ bhāvetvā ābhassaresu aṭṭhakappaṃ āyugaṃ gahetvā nibbatti. Tattha paṭhamajjhānaṃ bhāvetvā paṭhamajjhānabhūmiyaṃ kappāyuko hutvā nibbatti, so paṭhamakāle attanā katakammañca nibbattaṭṭhānañca aññāsīti, kāle pana gacchante ubhayaṃ pamussitvā sassataditṭhiṃ uppādesi. Tena naṃ bhagavā, “tena taṃ tvam na jānāsīti ...pe... kuto nīceyyanti”ti āha.

Atha brahmā cintesi- “samaṇo gotamo mayhaṃ āyuñca nibbattaṭṭhānañca pubbekatakammañca jānāti, handa naṃ pubbe katakammaṃ pucchāmi”ti

satthāraṃ attano pubbekatakammaṃ pucchi. Satthā kathesi.

Pubbe kiresa kulaghare nibbattivā kāmesu ādīnavaṃ disvā, “jātijarābyādhimaraṇassa antaṃ karissāmi”ti nikkhamma isipabbajjaṃ pabbajitvā samāpattiyo nibbattetvā abhiññāpādakajjhānalābhī hutvā gaṅgātīre paṇṇasālaṃ kāretvā jhānaratiyā vītināmeti. Tadā ca kālena kālaṃ satthavāhā pañcahi sakaṭasatehi marukantāraṃ paṭipajjanti. Marukantāre pana divā na sakkā gantuṃ, rattiṃ gamanaṃ hoti. Atha purimasakaṭassa aggayuge yuttabalibaddā gacchantā nivattitvā āgata-maggābhimukhāva ahesuṃ. Itarasakaṭāni tatheva nivattitvā aruṇe uggate nivattitabhāvaṃ jāniṃsu. Tesañca tadā kantāraṃ atikkamanadivaso ahosi. Sabbaṃ dārudakaṃ parikkhiṇaṃ, tasmā, “natthi dāni amhākaṃ jīvitan”ti cintetvā goṇe cakkesu bandhitvā manussā sakaṭapacchāyāyaṃ pavisitvā nipajjiṃsu (2.0307). Tāpasopi kālasseva paṇṇasālato nikkhamitvā paṇṇasāladvāre nisinno gaṅgaṃ olokayamāno addasa gaṅgaṃ mahatā udakoghena vuyhamānaṃ pavattitamaṇikkhandhaṃ viya āgacchantiṃ. Disvā cintesi- “atthi nu kho imasmiṃ loke evarūpassa madhurodakassa alābhena kilissamānā sattā”ti. So evaṃ āvajjanto marukantāre taṃ satthaṃ disvā, “ime sattā mā nassantū”ti, “ito mahā udakakkhandho chijjitvā marukantāre satthābhimukho gacchatū”ti abhiññācittena adhiṭṭhāsi. Saha-cittuppādena mātikāruḷhaṃ viya udakaṃ tattha agamāsi. Manussā udakasaddena vuṭṭhāya udakaṃ disvā hatthatuṭṭhā nhāyitvā pivitvā goṇepi pāyetvā sotthinā icchitaṭṭhānaṃ agamaṃsu. Satthā taṃ brahmuno pubbakammaṃ dassento-

“Yaṃ tvaṃ apāyesi bahū manusse,  
pipāsīte ghammani samparete;  
taṃ te purāṇaṃ vatasīlavattaṃ,  
suttappabuddhova anussarāmi”ti. (jā. 1.7.71)-

Imaṃ gāthamāha.

Aparasmīṃ samaye tāpaso gaṅgātīre paṇṇasālaṃ māpetvā āraññaṃ gāmaṃ nissāya vasati. Tena ca samayena corā taṃ gāmaṃ paharitvā hatthasāraṃ gahetvā gāviyo ca karamare ca gahetvā gacchanti. Gāvopi sunakhāpi manussāpi mahāviraṃ viravanti. Tāpaso taṃ saddaṃ sutvā “kiṃ nu kho etan”ti āvajjanto, “manussānaṃ bhayaṃ uppannan”ti ñatvā, “mayi passante ime sattā mā nassantū”ti abhiññāpādakajjhānaṃ samāpajjitvā vuṭṭhāya abhiññācittena corānaṃ paṭipathe caturaṅginisenaṃ māpesi kammasajjaṃ āgacchantiṃ. Corā disvā, “rājā”ti te maññaṃ vilopaṃ chaḍḍetvā pakkamiṃsu. Tāpaso “yaṃ yassa santakaṃ, taṃ tasseva hotū”ti adhiṭṭhāsi, taṃ tatheva ahosi. Mahājano sotthibhāvaṃ pāpuṇi. Satthā idampi tassa pubbakammaṃ dassento-

“Yaṃ (2.0308) eṇikūlasmiṃ janaṃ gahītaṃ,  
amocayī gayhaka nīyamānaṃ;  
taṃ te purāṇaṃ vatasīlavattaṃ,  
suttappabuddhova anussarāmi”ti. (jā. 1.7.72)-

Imaṃ gāthamāha. Ettha **eṇikūlasmi**ti gaṅgātīre.

Puna ekasmiṃ samaye uparigaṅgāvāsikaṃ kulaṃ heṭṭhāgaṅgāvāsikena kulena saddhiṃ mittasanthavaṃ katvā nāvāsaṅghātaṃ bandhitvā bahuṃ khāda-

nīyabhojaniyañceva gandhamālādīni ca āropetvā gaṅgāsotena āgacchati. Manussā khādamānā bhuñjamānā naccantā gāyantā devavimānena gacchantā viya balavasomanassā ahesuṃ. Gaṅgeyyako nāgo disvā kupito, “ime mayi saññampi na karonti, idāni ne samuddameva pāpessāmī”ti mahantaṃ attabhāvaṃ māpetvā udakaṃ dvidhā bhinditvā uṭṭhāya phaṇaṃ katvā sussūkāraṃ karonto aṭṭhāsi. Mahājano disvā bhīto vissaramakāsi. Tāpaso paṇṇasālāya nisinno sutvā, “ime gāyantā naccantā somanassajātā āgacchanti, idāni pana bhayaravaṃ ravimsu, kiṃ nu kho”ti āvajjanto nāgarājaṃ disvā, “mayi passante ime sattā mā nassantū”ti abhiññāpādakajjhānaṃ samāpajjitvā attabhāvaṃ vijahitvā supaṇṇavaṇṇaṃ māpetvā nāgarājassa dassesi. Nāgarājā bhīto phaṇaṃ saṃharitvā udakaṃ pavitṭho. Mahājano sotthibhāvaṃ pāpuṇi. Satthā idampi tassa pubba-kammaṃ dassento-

“Gaṅgāya sotasmim gahītanāvaṃ,  
luddena nāgena manussakappā;  
amocayittha balasā pasayha,  
taṃ te purāṇaṃ vatasīlavattaṃ;  
suttappabuddhova anussarāmī”ti. (jā. 1.7.73)-

Imaṃ gāthamāha.

Aparasmim samaye esa isipabbajjaṃ pabbajitvā **kesavo** nāma tāpaso ahosi. Tena samayena amhākaṃ bodhisatto **kappo** Nāma māṇavo (2.0309) kesavassa baddhacaro antevāsiko hutvā ācariyassa kiṃkārapaṭṭissāvī manāpacārī buddhisampanno atthacaro ahosi. Kesavo taṃ vinā vattituṃ nāsakkhi, taṃ nissāyeva jīvikaṃ kappesi. Satthā idampi tassa pubbakammaṃ dassento-

“Kappo ca te baddhacaro ahosi,  
sambuddhimantaṃ vatinaṃ amaññi;  
taṃ te purāṇaṃ vatasīlavattaṃ,  
suttappabuddhova anussarāmī”ti. (jā. 1.7.74)-

Imaṃ gāthamāha.

Evaṃ brahmuno nānattabhāvesu katakammaṃ satthā pakāsesi. Satthari kathe-nteyeva brahmā sallakkhesi, dīpasahasse ujjalite rūpāni viya sabbakammānissa pākaṭāni ahesuṃ. So pasannacitto imaṃ gāthamāha-

“Addhā pajānāsi mametamāyumuṃ,  
aññampi jānāsi tathā hi buddho;  
tathā hi tāyaṃ jalitānubhāvo,  
obhāsayaṃ tiṭṭhati brahmalokan”ti. (jā. 1.7.75);

Athassa bhagavā uttari asamasamataṃ pakāseso **pathaviṃ kho ahaṃ brahmeti-ādimāha**. Tattha **pathaviyā pathavattena ananubhūtanti** pathaviyā pathavisabhāvena ananubhūtaṃ appattaṃ. Kiṃ pana tanti? Nibbānaṃ. Tañhi sabbasmā saṅkhatā nissaṭṭatā pathavisabhāvena appattaṃ nāma. **Tadabhiññāyāti** taṃ nibbānaṃ jānitvā sacchikatvā. **Pathaviṃ nāpahosinti** pathaviṃ taṇhādiṭṭhimānagā-hehi na gaṇhiṃ. **Āpādīsupi** eseva nayo. Vitthāro pana mūlapariyāye vuttanaye-veva veditabbo.

**Sace kho te, mārīsa, sabbassa sabbattenā**ti idameva brahmā attano vāditāya sabbanti akkharam niddisitivā akkhare dosam gaṇhanto āha. Satthā pana sakkāyam sandhāya “sabban”ti vadati, brahmā sabbasabbaṃ sandhāya. Tvaṃ “sabban”ti vadasi, “sabbassa sabbattena ananubhūtan”ti vadasi, yadi sabbaṃ ananubhūtaṃ natthi, athassa ananubhūtaṃ atthi. **Mā heva te rittakameva ahosi** (2.03) **tucchakameva ahosī**ti tuyhaṃ vacanaṃ rittakaṃ mā hotu, tucchakaṃ mā hotūti satthāraṃ musāvādena niggaṇhāti.

Satthā pana etasmā brahmunā sataguṇena sahasaguṇena



satasahassaguṇena vāditaro, tasmā ahaṃ sabbañca vakkhāmi, ananubhūtañca vakkhāmi, suṇāhi meti tassa vādamaddanattaṃ kāraṇaṃ āharanto **viññāṇanti-ādimāha**. Tattha **viññāṇanti** vijānitabbaṃ. **Anidassananti** cakkhuviññāṇassa āpāthaṃ anupagamanato anidassanaṃ nāma, padadvayenapi nibbānameva vuttaṃ. **Anantanti** tayidaṃ uppādavaya-antarāhitattā anantaṃ nāma. Vuttampi hettaṃ-

“Antavantāni bhūtāni, asambhūtaṃ anantakaṃ;  
bhūte antāni dissanti, bhūte antā pakāsītā”ti.

**Sabbatopabhanti** sabbaso pabhāsampannaṃ. Nibbānato hi añño dhammo sapabhataro vā jotivantataro vā parisuddhataro vā paṇḍarataro vā natthi. Sabbato vā tathā pabhūtameva, na katthaci natthīti sabbatopabhaṃ. Puratthimadisādīsu hi asukadisāya nāma nibbānaṃ natthīti na vattabbaṃ. Atha vā **pabhanti** titthassa nāmaṃ, sabbato pabhamassāti **sabbatopabhaṃ**. Nibbānassa kira yathā mahāsamuddassa yato yato otaritukāmā honti, taṃ tadeva titthaṃ, atitthaṃ nāma natthi. Evamevaṃ aṭṭhatimsāya kammaṭṭhānesu yena yena mukhena nibbānaṃ otaritukāmā honti, taṃ tadeva titthaṃ. Nibbānassa atitthaṃ nāma kammaṭṭhānaṃ natthi. Tena vuttaṃ **sabbatopabhanti**. Taṃ pathaviyā pathavattenāti taṃ nibbānaṃ pathaviyā pathavīsabhāvena tato paresaṃ āpādināṃ āpādisabhāvena ca ananubhūtaṃ. Iti yaṃ tumhādisānaṃ visayabhūtaṃ sabbatebhūmakadhammajātaṃ tassa sabbatena taṃ viññāṇaṃ anidassanaṃ anantaṃ sabbatopataṃ ananubhūtanti vādaṃ patiṭṭhapesi.

Tato brahmā gahitagahitaṃ satthārā vissajjāpito kiñci gahetabbaṃ adisvā laḍḍitakaṃ kātukāmo **handā carahi te, mārīsa, antaradhāyāmīti** āha. Tattha **antaradhāyāmīti** adissamānakapāṭihāriyaṃ karomīti āha. **Sace visahasīti** yadi sakkosi mayhaṃ antaradhāyituṃ, antaradhāyasi (2.0311), pāṭihāriyaṃ karohīti. **Nevassu me sakkoti antaradhāyituntī** mayhaṃ antaradhāyituṃ neva sakkoti. Kiṃ panesa kātukāmo ahoṣīti? Mūlapaṭṭisandhiṃ gantukāmo ahoṣi. Brahmānañhi mūlapaṭṭisandhika-attabhāvo sukhumo, aññesaṃ anāpātho, abhisankhatakāyeneva tiṭṭhanti. Satthā tassa mūlapaṭṭisandhiṃ gantuṃ na adāsi. Mūlapaṭṭisandhiṃ vā agantvāpi yena tamena attānaṃ antaradhāpetvā adissamānako bhavēyya, satthā taṃ tamaṃ vinodesi, tasmā antaradhāyituṃ nāsakkhi. So asakkonto vimāne niliyati, kapparukkhe niliyati, ukkuṭiko nisīdati. Brahmagaṇo keḷimakāsi- “esa kho bako brahmā vimāne niliyati, kapparukkhe niliyati, ukkuṭiko nisīdati, brahme tvaṃ antarahitomhī”ti saññaṃ uppādesi nāmāti. So brahmagaṇena uppaṇḍito mañku ahoṣi.

**Evaṃ vutte ahaṃ, bhikkhveti**, bhikkhave, etena brahmunā, “handā carahi te, mārīsa, antaradhāyāmī”ti evaṃ vutte taṃ antaradhāyituṃ asakkontaṃ disvā ahaṃ etadavocaṃ. **Imaṃ gāthamabhāsinti** kasmā bhagavā gāthamabhāsīti? Samaṇassa gotamassa imasmiṃ ṭhāne atthibhāvo vā natthibhāvo vā kathaṃ sakkā jānituntī evaṃ brahmagaṇassa vacanokāso mā hotūti antarahitova gāthamabhāsi.

Tattha **bhavevāhaṃ bhayaṃ disvāti** ahaṃ bhavē bhayaṃ disvāyeva. **Bhavañca vibhavesinanti** imañca kāmabhavāditividhampi sattabhavaṃ vibhavesinaṃ vibhavaṃ gavesamānaṃ pariyesamānampi punappunaṃ bhavēyeva disvā.

**Bhavaṃ nābhivadinti** taṅhādiṭṭhivasena kiñci bhavaṃ na abhivadim, na gavesinti attho. **Nandiñca na upādiyinti** bhavataṅhaṃ na upagañchim, na aggahesinti attho. Iti cattāri saccāni pakāsento satthā dhammaṃ desesi. Desanāpariyosāne desanā-nusārena vipassanāgabbhaṃ gāhāpetvā dasamattāni brahmasahassāni magga-phalāmatapānaṃ pivimsu.

**Acchariyabbhutacittajātā** Ti acchariyajātā abbhutajātā tuṭṭhijātā ca ahesuṃ. **Samūlaṃ bhavaṃ udabbahīti** bodhimaṇḍe attano tāya tāya desanāya aññesampi bahūnaṃ devamanussānaṃ samūlakaṃ bhavaṃ udabbahi, uddhari uppāṭesīti attho.

**505.** Tasmim (2.0312) pana samaye māro pāpimā kodhābhibhūto hutvā, “mayi vicaranteyeva samaṇena gotamena dhammakathaṃ kathetvā dasamattāni brahmasahassāni mama vasaṃ ativattitāni”ti kodhābhibhūtātāya aññatarassa brahmapārisajjassa sarīre adhimucci, taṃ dassetuṃ **atha kho, bhikkhavi**ti-ādi-māha. Tattha **sace tvaṃ evaṃ anubuddhoti** sace tvaṃ evaṃ attanāva cattāri saccāni anubuddho. **Mā sāvake upanesīti** gihisāvake vā pabbajitasāvake vā taṃ dhammaṃ mā upanayasi. **Hīne kāye patiṭṭhitā**ti catūsu apāyesu patiṭṭhitā. **Paṇīte kāye patiṭṭhitā**ti brahmaloke patiṭṭhitā. Idaṃ ke sandhāya vadati? Bāhirapabbajjaṃ pabbajite tāpasaparibbājake. Anuppanne hi buddhuppāde kulaputtā tāpasapabbajjaṃ pabbajitvā kassaci kiñci avicāretvā ekacarā hutvā samāpattiyo nibbattevā brahmaloke uppajjimsu, te sandhāya evamāha. **Anakkhātaṃ kusalañhi mārisāti** paresaṃ anakkhātaṃ anovadanaṃ dhammakathāya akathanaṃ kusalaṃ etaṃ seyyo. **Mā paraṃ ovaḍāhīti** kālena manussalokaṃ, kālena devalokaṃ, kālena brahmalokaṃ, kālena nāgalokaṃ āhiṇḍanto mā vicari, ekasmim ṭhāne nisinno jhānamaggaphalasukhena vītināmeḥīti. **Anālapanatāyāti** anullapanatāya. **Brahmuno ca abhinimantanatāyāti** bakabrahmuno ca idañhi, mārisa, niccanti-ādinā nayena saha kāyakena brahmaṭṭhānena nimantanavacanena. **Tasmāti** tena kāraṇena. **Imassa veyyākaraṇassa brahmanimantanikaṃ** tveva adhivacanaṃ saṅkhā samaññā paññatti jātā. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Brahmanimantanikasuttavaṇṇanā niṭṭhitā.

## 10. Māratajjanīyasuttavaṇṇanā

**506.** **Evaṃ me sutanti** māratajjanīyasuttaṃ. Tattha **koṭṭhamanupaviṭṭhoti** kucchim pavisitvā antānaṃ anto anupaviṭṭho, pakkāsayaṭṭhāne nisinno. **Garugaro viyāti** garukagaruko viya thaddho pāsāṇapuñjasadiso. **Māsācitaṃ** (2.0313) **maññe** Ti māsabhataṃ bhuttassa kucchi viya māsapūritapasibbako viya tinta-māso viya cāti attho. **Vihāraṃ pavisitvāti** sace āhāradosena esa garubhāvo,

abbhokāse caṅkamituṃ na sappāyanti caṅkamā orohitvā paṇṇasālaṃ pavisitvā pakatipaññatte āsane nisīdi. **Paccattaṃ yoniso manasākāsīti**, “kiṃ nu kho etaṃ”ti āvajjamaṇo attanoyeva upāyena manasi akāsī. Sace pana therō attano sīlaṃ āvajjetvā, “yaṃ hiyyo vā pare vā parasuve vā paribhuttaṃ avipakkamatthi, añño vā koci visabhāgado, sabbaṃ jīratu phāsukaṃ hotū”ti hatthena kucchiṃ parāma-sissa, māro pāpimā vilīyitvā agamissa. Therō pana tathā akatvā yoniso manasi akāsī. **Mā tathāgataṃ vihesesīti** yathā hi puttesu vihesitesu mātāpitaro vihesitāva honti, saddhivihārika-antevāsikesu vihesitesu ācariyupajjhāyā vihesitāva, janapade vihesite rājā vihesitova hoti, evaṃ tathāgatasāvake vihesite tathāgato vihesitova hoti. Tenāha- “mā tathāgataṃ vihesesī”ti.

**Paccaggale aṭṭhāsīti** pati-aggaleva aṭṭhāsī. **Aggaḷaṃ** Vuccati kavāṭaṃ, mukhena uggantvā paṇṇasālato nikkhamitvā bahipaṇṇasālāya kavāṭaṃ nissāya aṭṭhāsīti attho.

**507. Bhūtapubbāhaṃ pāpimāti** kasmā idaṃ desanaṃ ārabhi? Therō kira cintesi- “ākāsaṭṭhakadevatānaṃ tāva manussagandho yojanasate ṭhitānaṃ ābādhaṃ karoti. Vuttañhettaṃ- ‘yojanasataṃ kho rājañña manussagandho deve ubbādhatī’ti (dī. ni. 2.415). Ayaṃ pana māro nāgariko paricokkho mahesakkho ānubhāvasampanno devarājā samāno mama kucchiyaṃ pavisitvā antānaṃ anto pakkāsayokāse nisinno ativiya paduṭṭho bhavissati. Evarūpaṃ nāma jegucchaṃ paṭikūlaṃ okāsaṃ pavisitvā nisīdituṃ sakkontassa kimaññaṃ akaraṇiyaṃ bhavissati, kiṃ aññaṃ lajjissati, tvaṃ mama ñātikoti pana vutte mudubhāvaṃ anāpajjamaṇo nāma natthi, handassa (2.0314) ñātikotiṃ paṭivijjhivā mudukeneva naṃ upāyena vissajjessāmi”ti cintetvā imaṃ desanamārabhi.

**So me tvaṃ bhāgineyyo hosīti** so tvaṃ tasmim kāle mayhaṃ bhāgineyyo hosi. Idaṃ paveṇivasena vuttaṃ. Devalokasmiṃ pana mārassa pitu vaṃso pitāma-hassa vaṃso rajjaṃ karonto nāma natthi, puññavasena devaloke devarājā hutvā nibbatto, yāvatāyukaṃ ṭhatvā cavati. Añño eko attanā katena kammena tasmim ṭhāne adhipati hutvā nibbattati. Iti ayaṃ māropi tadā tato cavitvā puna kusalaṃ katvā imasmim kāle tasmim adhipatiṭṭhāne nibbattoti veditabbo.

**Vidhuroti** vigatadhuro, aññehi saddhiṃ asadisoti attho. **Appakasirenāti** appadukkheṇa. **Pasupālakāti** ajeḷakapālakā. **Pathāvinoti** maggapaṭipannā. **Kāye upacinitvāti** samantato citakaṃ bandhitvā. **Aggiṃ datvā pakkamimsūti** ettakena sarīraṃ pariyādānaṃ gamissatīti citakassa pamāṇaṃ sallakkhetvā catūsu disāsu aggiṃ datvā pakkamimsu. Citako padīpasikhā viya pajjali, therassa udakaleṇaṃ pavisitvā nisinnakālo viya ahosi. **Cīvarāni papphoṭetvāti** samāpattito vuṭṭhāya vigatadhūme kiṃsukavaṇṇe aṅgāre maddamaṇo cīvarāni vidhunitvā. Sarīre panassa usumamattampi nāhosi, cīvaresu aṃsumattampi najjhāyi, samāpattiphalaṃ nāmetaṃ.

**508. Akkosathāti** dasahi akkosavattūhi akkosatha. **Paribhāsathā** Ti vācāya paribhāsatha. **Rosethāti** ghaṭṭetha. **Vihesethāti** dukkhāpetha. Sabbametaṃ vācāya ghaṭṭanasseva adhivacanaṃ. **Yathā taṃ dūsī māro** Ti yathā etesaṃ dūsī māro. **Labhetha otāranti** labhetha chiddaṃ, kilesuppattiyā ārammaṇaṃ paccayaṃ

labheyyāti attho. **Muṇḍakā**ti-ādīsu muṇḍe muṇḍāti samaṇe ca samaṇāti vattuṃ vaṭṭeyya, ime pana hīlentā muṇḍakā samaṇakāti āhaṃsu. **Ibbhā**ti gahapatikā. **Kiṇhā**ti kaṇhā, kālakāti attho. **Bandhupādāpaccā**ti ettha **bandhū**ti brahmā adhippeto. Tañhi brāhmaṇā pitāmahoti voharanti. Pādānaṃ (2.0315) apaccā **pādāpaccā**, brahmuno piṭṭhipādato jātāti adhippāyo. Tesam kira ayaṃ laddhi-“brāhmaṇā brahmuno mukhato nikkhantā, khattiyā urato, vessā nābhito, suddā jāṇuto, samaṇā piṭṭhipādato”ti.

**Jhāyinosmā jhāyinosmāti** jhāyino mayaṃ jhāyino mayanti. **Madhurakajātāti** āla-siyajātā. **Jhāyantīti** cintayanti. **Pajjhāyantīti**-ādīni upasaggavasena vaḍḍhitāni. **Mūsikaṃ maggayamānoti** sāyaṃ gocarathāya susirarukkhatto nikkhantaṃ rukkhāsākhāya mūsikaṃ pariyesanto. So kira upasantūpasanto viya niccalova tiṭṭhati, sampattakāle mūsikaṃ sahasā gaṇhāti. **Kotthū**ti siṅgālo, soṇotipi vadanti. **Sandhisamalasaṅkaṭireti** sandhimhi ca samale ca saṅkaṭire ca. Tattha **sandhi** nāma gharasandhi. **Samalo** nāma gūthaniddhamanapanāḷi. **Saṅkaṭiram** nāma saṅkāraṭṭhānaṃ. **Vahacchinnoti** kantārato nikkhanto chinnavaho. **Sandhisamalasaṅkaṭireti** sandhimhi vā samale vā saṅkaṭire vā. Sopi hi baddhagatto viya niccalo jhāyati.

**Nirayaṃ upapajjantīti** sace māro manussānaṃ sarīre adhimuccitvā evaṃ kareyya, manussānaṃ akusalaṃ na bhaveyya, mārasseva bhaveyya. Sarīre pana anadhimuccitvā visabhāgavatthum vippaṭisārārammaṇaṃ dasseti, tadā kira so bhikkhū khippaṃ gahetvā macche ajjhottharante viya, jālaṃ gahetvā macche gaṇhante viya, lepayatṭhiṃ oḍḍetvā sakuṇe bandhante viya, sunakhehi saddhiṃ araṅṅe migavaṃ carante viya, mātugāme gahetvā āpānabhūmiyaṃ nisinne viya, naccante viya, gāyante viya, bhikkhunīnaṃ rattitṭhānadivātṭhānesu visabhāgamānusse nisinne viya, ṭhite viya ca katvā dassesi. Manussā araṅṅagatāpi vanagatāpi vihāragatāpi vippaṭisārārammaṇaṃ passitvā āgantvā aṅṅesaṃ kathenti-“samaṇā evarūpaṃ assamaṇakaṃ ananucchavikaṃ karonti, etesaṃ dinne kuto kusalaṃ, mā etesaṃ kiṅci adatthā”ti. Evaṃ te manussā diṭṭhaditṭhatṭhāne silāvante akkosantā apuṅṅaṃ pasavitvā apāyapūrakā ahesuṃ. Tena vuttaṃ “nirayaṃ upapajjanti”ti.

**509. Anvāviṭṭhāti** (2.0316) āvaṭṭitā. **Pharivā vihariṃsūti** na kevalaṃ pharivā vihariṃsu. Kakusandhassa pana bhagavato ovāde ṭhatvā ime cattāro brahmavihāre nibbattetvā jhānapadaṭṭhānaṃ vipassanaṃ vaḍḍhetvā arahatte patiṭṭha-hiṃsu.

**510. Āgatiṃ vā gatiṃ vāti** paṭisandhivasena āgamaṇaṭṭhānaṃ vā, cutivasena gamaṇaṭṭhānaṃ vā na jānāmi. **Siyā cittassa aññathattanti** somanassavasena aññathattaṃ bhavēyya. **Saggaṃ lokaṃ upapajjantīti** idhāpi purimanayeneva attho veditabbo. Yathā hi pubbe vippaṭṭisāraṃ ārammaṇaṃ dasseti, evamidhāpi pasādakaraṃ. So kira tadā manussaṇaṃ dassanaṭṭhāne bhikkhū ākāse gacchante viya, ṭhite viya pallaṅkena nisinne viya, ākāse sūcikaṃmaṃ karonte viya, potthakaṃ vācente viya, ākāse cīvaraṃ pasāretvā kāyaṃ utuṃ gaṇhāpente viya, navapabbajite ākāseṇa carante viya, taruṇasāmaṇere ākāse ṭhatvā pupphāni ocinante viya katvā dassesi. Manussā araṇṇagatāpi vanagatāpi vihāragatāpi pabbajitānaṃ taṃ paṭipattiṃ disvā āgantvā aññesaṃ kathenti- “bhikkhūsu antamaso sāmaṇerāpi evaṃmahiddhiko mahānubhāvā, etesaṃ dinnāṃ mahapphalaṃ nāma hoti, etesaṃ detha sakkarothā”ti. Tato manussā bhikkhusaṅghaṃ catūhi paccayehi sakkarontā bahū puññaṃ katvā saggapathapūrakā ahesuṃ. Tena vuttaṃ “saggaṃ lokaṃ upapajjanti”ti.

**511. Etha tumhe, bhikkhave, asubhānupassino kāye viharathāti** bhagavā sakalajambudīpaṃ āhiṇḍanto antamaso dvinnampi tiṇṇampi bhikkhūnaṃ vasanaṭṭhānaṃ gantvā-

“Asubhasaññāpariciteṇa, bhikkhave, bhikkhuno cetasā bahulaṃ viharato methunadhammasamāpattiyā cittaṃ patilīyati patikuṭati pativattati na sampasāriyati, upekkhā vā pāṭikulyatā vā saṅghāti.

Āhāre paṭikūlasaññāpariciteṇa, bhikkhave, bhikkhuno cetasā bahulaṃ viharato rasataṇhāya cittaṃ patilīyati patikuṭati (2.0317) pativattati na sampasāriyati, upekkhā vā pāṭikulyatā vā saṅghāti.

Sabbaloke anabhiratisaññāpariciteṇa, bhikkhave, bhikkhuno cetasā bahulaṃ viharato lokacitresu cittaṃ patilīyati patikuṭati pativattati na sampasāriyati, upekkhā vā pāṭikulyatā vā saṅghāti.

Aniccasaññāpariciteṇa, bhikkhave, bhikkhuno cetasā bahulaṃ viharato lābhasakkārasiloke cittaṃ patilīyati patikuṭati pativattati na sampasāriyati, upekkhā vā pāṭikulyatā vā saṅghāti”ti (a. ni. 7.49) evaṃ ānisaṃsaṃ dassetvā-

Etha tumhe, bhikkhave, asubhānupassī kāye viharatha, āhāre paṭikūlasaññino sabbaloke anabhiratisaññino sabbasaṅkhāresu aniccānupassinoti. Imāni cattāri kammaṭṭhānāni kathesi. Tepi bhikkhū imesu catūsu kammaṭṭhānesu kammaṃ karontā vipassanaṃ vaḍḍhetvā sabbāsava khepetvā arahatte patiṭṭhahiṃsu, imānīpi cattāri kammaṭṭhānāni rāgasantāni dosamohasantāni rāgapatiṭṭhātāni dosamohapatiṭṭhātāni cāti.

**512. Sakkharaṃ gahetvāti** antomuṭṭhiyaṃ tiṭṭhanapamaṇaṃ pāsāṇaṃ gahetvā. Ayañhi brāhmaṇagahapatikehi bhikkhū akkosāpetvāpi, brāhmaṇagahapatikānaṃ vasena bhikkhusaṅghassa lābhasakkāraṃ uppādāpetvāpi, otāraṃ alabhanto

idāni sahatthā upakkamitukāmo aññatarassa kumārassa sarīre adhimuccitvā eva-  
rūpaṃ pāsāṇaṃ aggahesi. Taṃ sandhāya vuttaṃ “sakkharaṃ gahetvā” ti.

**Sīsaṃ vo bhindīti** sīsaṃ bhindi, mahācammaṃ chijjitvā maṃsaṃ dvedhā ahosi. Sakkharā panassa sīsakaṭāhaṃ abhinditvā aṭṭhiṃ āhacceva nivattā. **Nāgāpalokitaṃ apalokesīti** pahārasaddaṃ sutvā yathā nāma hatthināgo (2.0318) ito vā etto vā apaloketukāmo gīvaṃ aparivattetvā sakalasarīreneva nivattitvā apaloketi. Evaṃ sakalasarīreneva nivattitvā apalokesi. Yathā hi mahājanassa aṭṭhīni koṭiyā koṭiṃ āhacca ṭhitāni, paccekabuddhānaṃ aṅkusalaggāni, na evaṃ buddhānaṃ. Buddhānaṃ pana saṅkhalikāni viya ekābaddhāni hutvā ṭhitāni, tasmā pacchato apalokanakāle na sakkā hoti gīvaṃ parivattetuṃ. Yathā pana hatthināgo pacchābhāgaṃ apaloketukāmo sakalasarīreneva parivattati, evaṃ parivattitabbaṃ hoti. Tasmā bhagavā yantena parivattitā suvaṇṇapaṭimā viya sakalasarīreneva niva-  
ttitvā apalokesi, apaloketvā ṭhito pana, “na vāyaṃ dūsī māro mattamaññāsī” ti āha. Tassattho, ayaṃ dūsī māro pāpaṃ karonto neva pamāṇaṃ aññāsī, pamāṇātikka-  
ntamakāsīti.

**Sahāpalokanāyāti** kakusandhassa bhagavato apalokaneneva saha taṅkhaṇa-  
ññeva. **Tamhā ca ṭhānā cavīti** tamhā ca devaṭṭhānā cuto, mahānirayaṃ upapa-  
nnoti attho. Cavamāno hi na yattha katthaci ṭhito cavati, tasmā vasavattidevalokaṃ  
āgantvā cuto, “sahāpalokanāyā” ti ca vacanato na bhagavato apalokitattā cutoti  
veditabbo, cutikāladassanamattameva hetuṃ. Uḷāre pana mahāsāvake vira-  
ddhattā kudāriyā pahaṭaṃ viyassa āyu tattheva chijjitvā gatanti veditabbaṃ. **Tayo  
nāmadheyā hontīti** tīṇi nāmāni honti. **Chaphassāyatanikoti** chasu phassāyata-  
nesu pāṭiyekkāya vedanāya paccayo.

**Saṅkusamāhatoti** ayasūlehi samāhato. **Paccattavedaniyoti** sayameva vedanāja-  
nako. **Saṅkunā saṅku hadaye samāgaccheyyāti** ayasūlena saddhiṃ ayasūlaṃ  
hadayamajjhe samāgaccheyya. Tasmīṃ kira niraye upapannānaṃ tigāvuto atta-  
bhāvo hoti, therassāpi tādiso ahosi. Athassa hi nirayapālā tālakkhandhapamā-  
ṇāni ayasūlāni ādittāni sampajjalitāni sajotibhūtāni sayameva gahetvā puna-  
ppunaṃ nivattamānā,- “iminā te ṭhānena cintetvā pāpaṃ katan” ti pūvadoṇiyaṃ (2.03  
pūvaṃ koṭṭento viya hadayamajjhaṃ koṭṭetvā, paṇṇāsa janā pādābhimukhā  
paṇṇāsa janā sīsābhimukhā koṭṭetvā gacchanti, evaṃ gacchantā pañcahi vassasa-  
tehi ubho ante patvā puna nivattamānā pañcahi vassasatehi hadayamajjhaṃ āga-  
cchanti. Taṃ sandhāya evaṃ vuttaṃ.

**Vuṭṭhānimanti** vipākavuṭṭhānavedanaṃ. Sā kira mahāniraye vedanāto dukkha-  
tarā hoti, yathā hi sinehapānasattāhato parihārasattāhaṃ dukkhataraṃ, evaṃ  
mahānirayadukkhatato ussade vipākavuṭṭhānavedanā dukkhatarāti vadanti. **Seyya-  
thāpi macchassāti** purisasīsāñhi vaṭṭaṃ hoti, sūlena paharantassa pahāro ṭhānaṃ  
na labhati parigalati, macchāsīsaṃ āyataṃ puthulaṃ, pahāro ṭhānaṃ labhati, avi-  
rajjitvā kammakāraṇā sukarā hoti, tasmā evarūpaṃ sīsaṃ hoti.

**513. Vidhuraṃ sāvakaṃ sājāti** vidhuraṃ sāvakaṃ ghaṭṭayitvā. **Paccattaveda-  
nāti** sayameva pāṭiyekkavedanājanakā. **Īdiso nirayo āsīti** imasmīṃ ṭhāne nirayo  
devadūtasuttena dīpetabbo. **Kaṇha-dukkhaṃ nigacchasi** Ti kālaka-māra, dukkhaṃ

vindissasi. **Majjhe sarassāti** mahāsamuddassa majjhe udakaṃ vatthuṃ katvā nibbattavimānāni kappatṭhitikāni honti, tesam veḷuriyassa viya vaṇṇo hoti, pabbatamatthake jalitanaḷaggikkhandho viya ca nesam acciyo jotanti, pabhassarā pabhāsampannā honti, tesu vimānesu nilabhedādivasena nānattavaṇṇā accharā naccanti. **Yo etamabhijānātīti** yo etaṃ vimānavatthuṃ jānātīti attho. Evamettha vimānapetavatthukeneva attho veditabbo. **Pādaṅguṭṭhena kampayīti** idaṃ pāsādakampanasuttena dīpetabbaṃ. **Yo vejayantaṃ pāsādanti** idaṃ cūḷataṇhāsaṅkhaya-vimuttisuttena dīpetabbaṃ. **Sakkaṃ so paripucchatīti** idampi teneva dīpetabbaṃ. **Sudhammāyābhito sabhanti** sudhammasabhāya samīpe, ayaṃ pana brahmaloke sudhammasabhāva, na tāvatīṃsabhavane. Sudhammasabhāvīrahito hi devaloko nāma natthi.

**Brahmaloke pabhassaranti** brahmaloke mahāmoggallānamahākassapādīhi sāvakehi saddhiṃ tassa tejodhātuṃ samāpajjitvā nisinnassa (2.0320) bhagavato obhāsaṃ. Ekasmiñhi samaye bhagavā brahmaloke sudhammāya devasabhāya sannipatitvā,- “atthi nu kho koci samaṇo vā brāhmaṇo vā evaṃmahiddhiko. Yo idha āgantuṃ sakkuṇeyyā”ti cintentasseva brahmagaṇassa cittamaññāya tattha gantvā brahmagaṇassa matthake nisinno tejodhātuṃ samāpajjitvā mahāmoggallānādīnaṃ āgamaṃ cintesi. Tepi gantvā satthāraṃ vanditvā tejodhātuṃ samāpajjitvā paccekaṃ disāsu nisīdiṃsu, sakalabrahmaloko ekobhāso ahosi. Satthā catu-saccappakāsaṃ dhammaṃ desesi, desanāpariyosāne anekāni brahmasahassāni maggaphalesu patitṭhahiṃsu. Taṃ sandhāyimā gāthā vuttā, so panāyamattho aññatarabrahmasuttena dīpetabbo.

**Vimokkhena aphasayīti** jhānavimokkhena phusi. **Vananti** jambudīpaṃ. **Pubbavidehānanti** pubbavidehānañca dīpaṃ. **Ye ca bhūmisayā narāti bhūmisayā narā** nāma aparagoyānakā ca uttarakurukā ca. Tepi sabbe phusīti vuttaṃ hoti. Ayaṃ pana attho nandopanandadamanena dīpetabbo. Vatthu visuddhimagge iddhikathāya vitthāritaṃ. **Apuññaṃ pasavīti** apuññaṃ paṭilabhi. **Āsaṃ mā akāsi bhikkhūsūti** bhikkhū vihesemīti etaṃ āsaṃ mā akāsi. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Māratajjanīyasuttavaṇṇanā niṭṭhitā.

Pañcamavaggavaṇṇanā niṭṭhitā.

Mūlapaṇṇāsaṭṭhakathā niṭṭhitā.